

A painting of two hands, one holding a cigar, against a starry background. The hands are rendered in a realistic style with warm tones. The background is a deep purple and blue with numerous small, bright stars and nebulae. The text is overlaid on the image.

Le Finauga Tele

Ta'iala o le
Su'esu'ega

Ta'iala o le Su'esu'ega Fa'ale-Tusi Pa'ia mai

Le Finauga Tele

Copyright (C) 2003 by
Merlin Beerman ma Revelation Publicatios.
All rights reserved world-wide.
PublisherforGod@gmail.com

Tulaga e Fa'ataga ai Ona Fa'asalalauina

Matou te fa'alototele iā te 'oe ina ia e fa'asoa atu lenei a'oa'oga ma ia fa'apea ona fa'aaogā i se tulaga e 'ave fua, lē fa'atauina i se tupe. E tatau ona tu'ufa'atasi i se fafauga fa'aōnapōnei e ta'ua o le PDF pe lolomi le ata o le tusiga e fa'asoa atu. E lē mafai ona fa'atau atu pe suia se mea o lenei galuega ma e tatau ona i ai pea lenei fa'aaliga a lē aiā i lomiga ta'itasi uma, ma ia muamua maua se 'upu fa'ataga a e le'i fa'aliliuina i se isi lava gagana.

www.RevelationPublications.com
PublisherForGod@gmail.com

Upusi'i mai *Le Finauga Tele* a Elena G. Uaita.
Fa'amaopoopoina e Merlin Beerman
Fa'aSamoaina e Abbie Lam Yuen Watt
Tusi Ata - Copyright (C) Justinen Creative
Group Nampa ID www.goodsalt.com

O manatu fa'aopoopo o lo'o mulimuli mai i fesili i lenei ta'iala e mai toe matā'upu e 13 o le ulua'i tusiga o *Le Finauga Tele* a Elena Uaita. Ina ia lē umi tele lenei ta'iala, o lea ua fa'apu'upu'uina ai su'esu'ega mai isi matā'upu. O se galuega faigatā le filifilia o matā'upu e tautua'apupu'u ona o lenei galuega i lona atoa e matuā tāua ma fa'atumuina i le tele o fa'amanuiāga ma oloa o lo'o tu'u mai ai. O le mea lea e fautua atu ai ma le fa'aaloalo i tagata uma o lo'o fia maua ma su'esu'e i nei tusi ofoofogia, ia taumafai e faitau ia tusi, e maua i le tuātusi: <https://egwwritings.org/>

Fa'asino Matā'upu

Lesona

1. O le Amataga o le Agasala
2. Feitaga'i i le Vā o le Tagata ma Satani
3. Matāgaluega a Agaga Leaga
4. Mailei a Satani
5. O le Ulua'i Pepelo
6. E Mafai e Tagata Oti Ona Tautala mai iā i Tatou?
7. O le Taua ua Fa'amālumālu mai
8. O le Afioga a le Atua e Malu ai
9. O le Lapata'iga Mulimuli
10. O le Taimi o Puapuagā
11. Ua lavea'iina Tagata o le Atua
12. O le Fa'atafunaga o le Lalolagi
13. Ua Fa'ai'uina le Finauga

Manatu Fa'aopoopo

- A. O le Usiusita'i - Tofotofoga Moni o le Uiga Fa'amaoni
- B. O le Tala'aga o le Sapati
- C. O le Talafa'asolopito o le Tausiga o le Aso o le Lā (Ulua'i Aso)
- D. O se Mea Tāua le Aso Tatou te Tausia?
- E. O le Manu Fe'ai o le Fa'aaliga
- F. O le Fa'atusa o le Manu Fe'ai
- G. O le "Fa'amaufa'ailoga" a le Atua ma le "Fa'ailoga" o le Manu Fe'ai

O le Amataga o le Leaga - 1

(1) AISEĀ E LĒ TU'UA'IA AI LE POGAI O LE AGASALA I LE ATUA?

A fa'aosoosoina se tasi, 'aia le fa'apea, "Ua fa'aosoosoina a'u mai le Atua;" auā e lē mafai ona fa'aosoosoina o le Atua i mea leaga, e lē fa'aosooso atu fo'i o Ia i se tasi.

Iakopo 1:13

E lē mafai ona fa'amalamalamaina le amataga o le agasala ina ia iloa ai lona mafua'aga. Peita'i e lava mea e mafai ona tatou malamalama i ai e fa'atatau i le amataga o le agasala atoa ma lona fa'aumatiāga e fa'avavau, ina ia tatou iloa lelei ai le amiotonu ma le alofa o le Atua, i Lona vā feagai ai ma le agasala ma tagata amioleaga. O se tasi lenei o matā'upu ua sili ona manino i totonu o le Tusi Pa'ia. Ua fa'ailoa mai i le afioga a le Atua e lē o se mea na faia e le Atua na tupu mai ai le agasala, e lē o se pona fo'i o le faigāmalō a le lagi na tupu mai ai le agasala pe na mafua ai le fouvalega.

(2) E FA'AFEFEA ONA FA'AMATALAINA E LE TUSI PA'IA LE AGASALA?

O i latou uma lava o ē fai le agasala, ua latou soli fo'i i tulafono; o le agasala o le solitūlafono lava lea.

I Ioane 3:4

E leai se mafua'aga lelei mo le i ai o le agasala i le lalolagi; o le agasala o se mea na osofa'alava mai. O le agasala o se mealilo; a tatou taumafai e sa'ili sona 'alofaga, o lo tatou taupui'ui lava lea i ai. Ana mafai ona maua sona mafua'aga lelei po o sona 'alofaga, semanū e le toe ta'ua o se agasala. Fai mai le tala manino e tasi a le Tusi Pa'ia, o le agasala o le solia lea o le tulafono; o le agasala o se atali'i o le agaga leaga lea ua fa'asagatau i le tulafono o le alofa, le alofa lea ua fai ma fa'avae o le faigāmalō fa'alelagi.

(3) O Ā TA'IALA FA'AVAE E FĀ O LO'O FA'ASINO I AI LE FAIGĀ MALŌ A LE ATUA?

O le amiotonu ma le fa'amasinoga o lo'o tumau ai Lou nofoāli'i; o le alofa ma le fa'amaoni la te muamua atu i Ōu luma.

Salamo 89:14

Ua fa'avaeina le malō o le Atua i luga o le alofa, ma ua fa'alagolago lē fiafia o i latou uma na faia e le Atua, i lo latou usiusita'i ato'atoa i tulafono amiotonu ua fa'avaeina ai lenei alofa. Ua fa'anaunau le Atua ina ia 'au'auna atu iā te Ia i latou uma na Ia faia, e ala i lo latou alofa - le alofa e fa'avaeina i luga o lo latou iloa lelei o Lana amiotonu, atoa ma lo latou agaga fa'afetai ona o lea amiotonu. E leai Sona fiafia e maua i se fa'amaoni e fai fa'amalosi. Ua Ia foa'iina mai le sa'olotoga ma le faitalia iā i latou na Ia foafoaina, ina ia latou 'au'auna atu ai iā te Ia ona o lo latou loto fua'itiaifo. Peita'i, e i ai se tasi na ia fa'aaogāsesēina lea sa'olotoga.

(4) O AI NA LEPETIA LE TULAFONO A LE ATUA MA 'AVEA O LE TA'TTA'I O LE AGASALA?

Ua fa'apea ona pa'ū mai le lagi o 'oe lē ua pupula, le atali'i o le taeao; ua taia 'oe i lalo i le 'ele'ele, o 'oe sa fa'ato'ilaloina nu'u 'ese.

Isaia 14:12

Na fanau mai le agasala iā Lusifelo, o lē na pito atu iā Keriso i lona tulaga mamalu ma le fa'aeaina, fa'apea ma lona malosi e sili atu i agelu uma a le lagi.

(5) O LE Ā LE TULAGA NA FAIA AI E LE ATUA LUSIFELO?

Na ato'atoa ona lelei o āu sauniga talu le aso na faia ai 'oe, ua o'o i le aso na iloa ai lau amio leaga.

Esekielu 28:15

A o le'i faia le agasala e Lusifelo, na sili o ia i kerupi pa'ia ma le mamā, o ē na fa'amālumālu i luga a'e o le nofoāli'i o le Atua.

(6) O LE Ā LE UIGA FA'ALETINO SA FILIFILI LUSIFELO E TU'ULOTO, MULIMULI ANE UA AUMAI AI IĀ TE IA LE FA'ANAUNAUGA AGASALA O LE LOTO UA FIAFIA LAVA IA IĀ TE IA?

Na fa'amaualugaina lou loto i lou matagofie; ua e fa'amaumau lou poto ma lou matagofie; 'Ou te lafoina 'oe i lalo i le 'ele'ele; 'Ou te tu'uina atu 'oe i luma o tupu ina ia latou va'ava'ai iā te 'oe.

Ezekielu 28:17

Ana fa'aaogā sa'o le sa'olotoga o Lusifelo, semanū o i ai pea lava o ia i lona tulaga fa'aeaina i luma o le Atua, semanū o alofagia pea lava o ia ma avatu iā te ia le mamalu e 'au agelu uma, semanū o fa'aaogāina pea lava ana taleni ma lona malosi mo le fa'amanuiāga o isi, ma le vi'iga o Lē na faia o ia. Na faifaimalie e Lusifelo lona fa'amalieina o lona mana'o mo le si'itia a'e o ia e ia lava. Ua lē galue Lusifelo ina ia fa'asilisilia le Atua i loto ma mafaufau o le 'au agelu, a ua sa'ilili'i o ia ina ia fa'aliliu atu iā te ia lo latou alofa ma lo latou fa'amaoni. Ua ia mana'o fua i le mamalu na fa'ae'eina e le Silisili 'Ese i Lona Ālo, fa'aapea ma le malosi ma le mana o Keriso.

(7) O LE Ā LE I'UGA O LE AGASALA - FOUVALEGA E TETE'E I LE TULAFONO A LE ATUA?

Auā o le oti o le totogi lea o le agasala; a o le ola e fa'avavau, o le mea foā'ifuaina mai lea e le Atua, i lo tatou Ali'i o Keriso Iesu.

Roma 6:23

Na fiasia le lagi atoa latou te fa'aילוa atu le alofa ma le vi'iga o Lē na faia mea uma. A o avatua fa'apenā le mamalu ma le vi'iga i le Atua, sa i ai le filemū ma le fiasia i mea uma. Peita'i ua i ai nei se leo pa'ūlua ua fa'aleagaina ai vi'iga matagofie fa'alelagi. O le 'au'auna o le tagata iā te ia lava, ma lona fa'aeaina o ia lava, o se mea lea e lē fetau'i ma le fuafuāga a Lē na faia mea uma. Peita'i, o manatu fa'aapea iā Lusifelo ua fagua a'e ai ni masalosologa leaga i mafaufau o agelu o ē na fa'asilisilia iā i latou le vi'iga o le Atua. Na ōle ma fautua atu le Aiga Atua iā Lusifelo. Na fa'aילוa atu iā te ia e Keriso le silisili 'ese, ma le lelei, ma le amiotonu o le Atua le Tamā, atoa ma le natura pa'ia ma le lē suia o Lana tulafono. O le Atua lava na Ia fuafuaina ma fa'atūina le faigāmalō a le lagi; ma o le lē usita'i i ai o Lusifelo o le a na ta'uva'eaina ai Lē na foafoaina mea uma, ma i'u atu ai i lona lava matagā ma lona fa'aumatiāga. Peita'i, ua na o le agaga o le tete'e na tali mai ai Lusifelo i lapata'iga na tu'uina atu iā te ia i le alofa mutimutivale o le Silisili 'Ese. Ua fa'atagaina e Lusifelo lona loto leaga iā Keriso e puleaina o ia, ma ua atili ai nei lona fa'ama'a'a.

(8) O LE Ā LE TULAGA NA TA'ITA'IA LUSIFELO INA IA FA'ANAUNAU I AI ONA O LE MITAVALE IĀ TE IA LAVA?

O 'oe fo'i sa e fa'aapea ifo i lou loto, 'ou te alu a'e i le lagi, 'ou te si'itia i luga lo'u nofoāli'i ia sili i fetū a le Atua, 'ou te nofo fo'i i le mauga o le fa'apotopotoga i le itū i matū; 'ou te alu a'e i luga o mea maualuluga i luga a'e o āo; ma te tutusa ma le Silisili 'Ese.

Isaia 14:13, 14

O lona fa'amaualuga i lona mamalu ma lona lālelei ua atili ai lona mana'o mo le pule. E le'i i ai se agaga fa'afetai o Lusifelo i le Atua mo le meaalofa o le mamalu ma le tulaga fa'aeaina na fa'ae'eina e le Atua iā te ia. Na ia fa'amaualuga i lona matagofie ma lona tulaga fa'aeaina, ma ua mana'o la te tutusa ma le Atua. Na alofagia ma fa'aaloalogia o ia e 'au agelu a le lagi. Na fiasia le 'au agelu latou te faia āna poloā'iga, ma sa fa'a ofuina o ia i le poto ma le mamalu e sili i lo agelu uma. Peita'i na iloa lelei e agelu ua na o Keriso le tupu Aoao i le lagi, o Lē ua tasi lo la malosi ma lo la pule fa'atasi ma le Tamā. Na i ai Keriso i le faiga o fuafuāga a le Aiga Atua i le lagi; peita'i e le'i fa'atagaina Lusifelo i totonu o le li'o o le finagalo o le Atua. Ua fesili nei Lusifelo pe aiseā ua 'avea ai Keriso o le pule aoao i le lagi. Ua ia fesili fo'i pe aiseā ua maualuga a'e ai le tulaga o Keriso i lo ia.

(9) O LE Ā LE UIGA TA'UTA'UA NA MAUA E LUSIFELO ONA O LANA TAUPULEGA E TAUF'AASESĒ?

O outou nai lo outou tamā le tiāp'olo, tou te fia faia fo'i mea e tu'inaanau i ai lo outou tamā. O le fasioti tagata ia talu le amataga, e le'i tumau lava ia i le 'upu moni, auā e lē o i totonu lava iā te ia le 'upu moni; a tautala ia e tala pepelo, o lana lava lea e tautala a'i, auā o le pepelo ia, ma le tamā o le pepelo.

Ioane 8:44

Ua ia tu'ua nei lona tulaga fa'aeaina i luma o le Atua, a ua alu atu Lusifelo na te fa'asalalauina i agelu le agaga faitio ma le fa'ameo. Na ia galue fa'alilolilo, ma sa ia fa'auifi mo se vaitaimi lona loto leaga i lalo ifo o se mea na foliga mai o se fa'aaloaloga i le Atua. Na ia taumafai ina ia fa'atupu le agaga faitio ma le fa'aseā i agelu e fa'atatau i tulafono ua pulea ai i latou. O ana fa'amatalaga ua foliga mai ai e lē mana'omia e agelu ni tulafono e saisaitia ai lo latou sa'olotoga. Afai e pa'ia le natura o agelu, o lona uiga e tatau ona tu'u agelu e fai la latou faitalia ma usita'i i lo latou lava iloa. Na foliga mai i ana fa'amatalaga ua lē sa'o le faiga o ia e le Atua ona ua tu'uina e le Tamā le pule aoao iā Keriso. Fai mai lana tala e lē o sona naunau ina ia fa'aeaina atili e ia lona lava tulaga ua ia sa'ilia ai nei se malosi ma se mamalu maua. Fai mai o ia ua ia faia lenei mea ina ia maua ai le sa'olotoga mo le 'au agelu uma a le lagi, ina ia 'avea lea ma ala latou te o'o atu ai i se tulaga e sili a'e ona maua mo i latou uma.

(10) O LE Ā LE UIGA O LE ATUA NA FA'AALIA INA UA FA'AFEAGAI MA LUSIFELO MA E FA'APEI ONA IA FAIA FO'I MO I TATOU?

Pe ua fa'atauva'a ea iā te 'oe le faula'i o Lona agamalū, ma Lona fa'apalepale, ma Lona onosa'i, o lo'o e lē iloa e ta'ita'iina 'oe e le agamalū o le Atua i le salāmō?

Roma 2:4

O le alofa mutimutivale o le Atua na la onosa'i ai iā Lusifelo. E le'i 'ave'esea o ia mai lona tulaga fa'aeaina ina ua fa'ato'ā amata lona uiga lē fiafia ma le fa'ameo. E le'i fa'ate'aina fo'i o ia ma lona tulaga ina ua amata ona alu ma fa'asalalau i agelu fa'amaoni ana fa'amatalaga sesē ma 'upu taufa'aleaga. Na umi lava se vaitaimi o onosa'i pea le Atua ma avatua i ai le avanoa e tū ai pea o ia i lona tulaga i le lagi. Na tu'uina atu pea iā te ia e le Atua le avanoa e maua ai e ia le fa'amagaloga pe afai e gaua'i ma salāmō. E leai se mea na taofia e le alofa ma le poto fa'alelagi ina ia mafai ai ona liliu 'ese o ia mai lona 'auala sesē. Na o le alofa lava o le Atua ma Lōna pōto e mafai ai ona lava le onosa'i e tu'uina atu ai ia avanoa iā Lusifelo. Fa'ato'ā va'aia lea o le agaga lē fiafia ma le faitio i le lagi. E le'i iloa e Lusifelo i le amataga le mea o le a o'o i ai lana galuega leaga ua faia nei. E le'i malamalama fo'i o ia i le uiga moni o ōna lagona. Peita'i na fa'a'ailoa manino atu iā Lusifelo e leai ma se mafua'aga lelei o lona lē fiafia; na ia lagona fo'i o ia ua sesē; ma e amiotonu le Atua i Ōna ala uma. Na ia lagona fo'i e ao ona fa'a'ailoa atu lona sesē i luma o le lagi uma. Ana usita'i Lusifelo i lenei lagona lelei, semanū e fa'asaoina o ia fa'atasi ma le tele o le 'au agelu. E le'i ato'atoa le liliu 'ese o Lusifelo i lea taimi, mai lona fa'amaoni i le Atua. E o'o atu i lea taimi ua lafoa'i e Lusifelo lona tulaga fa'akerupi na te fa'amālumālu ai i le nofoāli'i o le Atua. Peita'i, ana loto malie o ia e toe liliu i le Atua ma ioe i le poto ma le fa'autauta o le Atua Foafoa, ana loto malie o ia na te talia se tulaga o le a tofia i ai o ia e le Atua i Lana fuafuāga lautele, semanū e toe fa'afo'i o ia i lona tulaga.muamua. Peita'i, na lē fia gaua'i Lusifelo ona o lona fa'amaua. Na tumau pea o ia i le fa'asesēina o lana mea ua fai, ma ua fai mai o ia e leai se mea o le a mana'omia ai fua sona salāmō. Ua fuli ato'atoa atu nei Lusifelo i le faia o le fouvalega tele e tete'e atu ai i Lē na faia o ia.

(11) I LANA FOUVALEGA, E TO'AFIA AGELU NA MAFAI ONA FA'ASESĒ E SATANI?

Ua toso e lona i'u i lona tolu o vaega o fetū i le lagi, ma lafo ifo iā i latou i le lalolagi. Ua tū fo'i le tarako i luma o le fafine o le a fanau, ina ia 'ai e ia o lana tama pe a fanau.

Fa'aaliga 12:4

Ua fa'asaga atu nei o ia na te fa'aaogāina le malosi ma le maoa'e o lona mafaufau e fai ai le galuega o le taufa'asesē, ina ia maua mai ai agelu na i lalo ifo o lana pule e lagolagoina lana matā'upu. E o'o lava i apoapo'iga ma ōlega ma fautuāga a Keriso iā te ia, ua fa'asaga nei Lusifelo e fa'aleagaina ma mimilo ina ia lagolagoina ai ana pepelo. O ē na pipi'i iā te ia i lo latou alofa fa'amaoni, ua ia fai i ai ua lē sa'o le manatu o le Atua iā te ia, ma ua lē fia fa'afofoga mai le Atua iā te ia. E lē gata i lea o le a fa'aititia fo'i lona sa'olotoga. Ua uma ona mimilo fetalaiga a Keriso ina ia lagolagoina ai lana matā'upu, ona fa'asolo atu lea o Lusifelo i lona lē ta'ua o le 'upu moni atoa a e tau o mea e lagolagoina ai lana itū. E lē gata i lea ua ia molia pepelo le Ālo o le Atua ona ua ia fai mai ua fai se fuafuāga a Keriso e fa'amātagāina o ia i luma o le lagi atoa. Na ia taumafai fo'i e fa'atelē le vā o ia ma agelu o lo o fa'amaoni pea i le Atua. O i latou uma ua na lē mafai ona fa'asesēina ina ia latou lagolagoina ato'atoa o ia, ua ia molia sesē i latou ma fai mai o agelu ia e leai so latou manatu mamafa i mea e tāua i 'au a le lagi. O le galuega leaga ua ia faia nei, ua ia tu'ua'ia lea mea i luga o agelu o lo o fa'amaoni pea i le Atua. Ua ia mimilo 'upu ma fa'agaioiga a le Atua ina ia lagolagoina ai lana moliga e fa'atatau i le lē faia e le Atua o le amiotonu iā te ia. Ua ia fa'atupu le vevesi ma le fenunia'i i mafaufau o le 'au agelu e ala i ana fa'amatalaga e uiga i fuafuāga a le Atua. O mea faigofie uma, ua ia taumafai e ufiufi i se ao ina ia foliga mai ai o se mealilo e faigatā ona malamalama i ai. Ua fa'apenā ona faia togafiti poto a Lusifelo ina ia masalosalo ai agelu i fetalaiga manino ma le faigofie a Ieova. O lona tulaga maua i luma o le Atua ua faigofie ai ona talitonu agelu i ana

fa'amatalaga, ma ua fa'apenā ona fa'aliliuina e Lusifelo agelu e to'atele ina ia latou tutū fa'atasi i le faiga o le fouvalega i le pule a le Atua.

(12) AISEĀ NA FA'ATAGAINA AI SATANI E LE ATUA, I LONA POTO SILISILI 'ESE, E FA'AALI ATO'ATO A LONA UIGA MONI?

O lē savali i le amiotonu, ua savali ma le saogalemū o ia; a o lē fa'api'opi'o ōna ala, e fa'aalia o ia.

Fa'ata'oto 10:9

O le finagalo amiotonu o le Atua na Ia fa'atagaina ai Satani na te tau'aveina pea lana galuega se'ia o'o ina matua le agaga faitio ma le fa'ameo ma ua fa'atino mai ai le fouvalega. Na finagalo le Atua ina ia tupu ma ia ato'atoa ona tino mai fuafuāga a Satani, ina ia malamalama i latou uma na faia e le Atua i le uiga moni ma le natura o fuafuāga a Satani. Na maua luga le fa'aeaina o Lusifelo, le kerupi na fa'au'uina; na alofagia o ia e 'au agelu a le lagi, ma sa faigofie ona latou faia o so'o se mea na ia poloa'iina. O le malō o le Atua e aofia ai 'au agelu a le lagi, fa'apea ma i latou uma ua latou 'ainā isi lalolagi uma na Ia faia. Na manatu Satani a mafai ona liliu atu agelu i lana itū i le faiga o le fouvalega, o le a faigofie fo'i ona liliu atu i latou ua 'ainā ai isi lalolagi. E mata'utia le poto na fa'aaogāina e Satani e fai ai ana fa'amatalaga ina ia foliga mai ai e amiotonu ana mea taufa'asesē. E maoa'e lona malosi ma lona poto i mea taufa'asesē, ma sa iloa e Satani o le a manuia lana galuega pe a ufiufi lelei lona uiga moni. E o'o lava i agelu na fa'amaoni pea i le Atua, latou te le'i malamalama ato'atoa i le amio a Satani po o le ā tonu le mea ua aga'i atu i ai lana galuega.

(13) AISEĀ NA LĒ FA'A'UMATIA AI E LE ATUA SATANI I LE AMATAGA O LANA FOUVALEGA?

A o Lē e ōna le malosi uma lava, tatou te lē mafai ona iloa o Ia; e silisili 'ese Lona malosi ma Lana fa'amasinoga, e sili fo'i Lana amiotonu, Na te lē agaleaga.

Iopu 37:23

Ua maua le i'uga ua tataua ona tuli'esea Satani mai le lagi. Peita'i o le poto o le Silisili 'Ese na Ia lē fa'a'umatiaina ai le ti'āpolo i lea taimi. O le galuega e fa'avae i luga o le alofa, ua na o le pau lea o le itū'aiga galuega e talia e le Atua. O le mea lea e ao ai ona va'ava'ai agelu fa'apea ma tagata i fua o galuega a Satani, ina ia faia ai la latou galuega mo Ia ona ua latou lagona le amiotonu ma le alofa o le Atua. Ana fa'a'umatia e le Atua Satani i lenā taimi, semanū o le a lē malamalama agelu i le lagi atoa ma tagata i lalolagi uma na faia e le Atua, i le amiotonu ma le alofa o le Atua, ona latou te le'i va'ai i fua o galuega a Satani. Ana fa'a'umatia e le Atua Satani i lenā taimi, semanū o le a latou 'au'auna i le Atua i lo latou fefefe a e lē o so latou alofa iā te Ia. Semanū e fa'a'umatia atu Satani a e toe tupu mai fo'i se isi na te fa'aauuina le agaga o le fouvalega. E ao ona tu'u le agasala se'i fua ma matua se'i va'ai i ai agelu ma tagata i lona uiga moni. E ao ona tu'u Satani se'i atina'e ma fa'a'ato'atoa mea uma na ia mana'o i ai, ina ia va'ai uma i ai i latou na faia e le Atua i le natura ma uiga moni o ana moliga na faia e fa'atatau i le malō o le Atua, ina ia lē toe masalosalo e fa'avavau se tasi o i latou i le amiotonu ma le alofa tunoa o le Atua, atoa ma le lēmasuia o Lana tulafono. O le mea lea e ao ona faia mo le lelei o le lagi ma le atulaulau uma i augātupulaga uma o le ola e fa'avavau.

Na finagalo le Atua ina ia 'avea le fouvalega a Satani o se lesonea i le atulaulau uma i augātupulaga uma o le lumana'i, ina ia 'avea o se molimau e fa'avavau o le natura moni o le agasala, atoa ma i'uga mata'utia e maua mai ai. O le tu'uina o Satani e fa'a'ato'atoa lana pule, fa'atasi ai ma i'uga leaga o lea pule i olaga o tagata fa'apea ma agelu, o mea ia o le a fa'a'ailoa mai ai fua mata'utia o taumafaiga ina ia 'ave'esea le pule a le Atua. O le a fai fo'i lea ma molimau e fa'a'ailoa mai ai ua milo fa'atasi i le faigāmalō a le Atua Lana tulafono ma le manuia silisili o i latou uma na Ia foafoaina. Ua fa'apenā ona 'avea le tala tusia o lenei fouvalega mata'utia, le fouvalega na fa'atagaina e le Atua ina ia fa'aauuina, ua 'avea lea tala tusia ma pā puipui e fa'avavau, e taofia mai ai tagata atoa ma agelu, mai le fa'asesēina o i latou e fa'atatau i le uiga moni o le solitūlafono, ma fa'asaina ai fo'i i latou mai le faia o le agasala, atoa ma le puapugātia talu ai le fa'asalaga o le agasala.

(14) O LE Ā LE FA'AI'UGA MATA'UTIA NA O'O I AI LE FOUVALEGA A SATANI?

Ua tau fo'i le taua i le lagi; o Mikaeli ma āna agelu ua latou tau ma le tarako, ua 'au fo'i le tarako ma āna agelu e tau ai le taua, a ua latou lē manumalō, e lē toe maua fo'i i le lagi se mea latou te nonofo ai. Ua lafo fo'i le tarako tele, o le gata tuai lea, ua igoa i le tiāp'olo, i le ma Satani, o lē fa'asesē i le lalolagi uma; ua lafo ifo fo'i i le lalolagi, ua lafo ifo fo'i āna agelu fa'atasi ma ia.

Fa'aaliga 12:7-9

E o'o atu lava i le i'uga o le taua i le lagi o taumafai pea lava Satani e taupunipuni i lana mea ua fai, ma su'e se mea na te 'alofaga i ai, ina ia foliga mai ai e sa'o lana mea ua fai. Ua mae'a le folafolaga o le a tuli'esea o ia fa'atasi ma ana 'au mai le mafutaga o le manuia, ona lē toe nanāina loa lea e le ta'ita'i o le fouvalega lona manatu fa'atauva'a i le tulafono a le Atua. Ua fai fa'alaua'itele mai nei ana faitioga ma ana moliga na fai fa'alilolilo. Ua toe fai mai nei o ia e lē mana'omia e agelu se tulafono e pulea ai i latou. Fai mai lana tala e tataua ona tu'u agelu i la latou faitalia e fai le mea e tusa ma o latou loto, ma o lea faitalia o le a ta'ita'iina ai i latou e faia le mea sa'o; e aunoa ma se sesē e maua mai ai. Na ia fa'a'iloa lona 'ino'ino i poloā'iga a le Atua; ua ia fai mai o poloā'iga a le Atua ua fa'aititia ai lo latou sa'olotoga. E lē gata i lea ua ia fai mai o le sini ma le fa'amoemoe o lana galuega o le soloia lea o le tulafono; ma afai e maua e agelu le sa'olotoga mai le tulafono, o lona manatu o le a o'o 'au uma a le lagi i se olaga ma se tulaga e sili ona matagofie ma le fa'aeaina.

(15) INA UA MAE'A ONA LAFO IFO SATANI MAI LE LAGI, O FEA NA IA SA'ILI E FA'ATŪ AI LONA MALŌ?

Ua lafo fo'i le tarako tele, o le gata tuai lea, ua igoa i le ti'āpolo, i le ma Satani, o lē fa'asesē i le lalolagi uma; ua lafo ifo fo'i i le lalolagi, ua lafo ifo fo'i āna agelu fa'atasi ma ia.

Fa'aaliga 12:9

O lo o galue pea lava i le lalolagi le agaga lea na tupu mai ai le fouvalega i le lagi; ua galue nei i le lalolagi lea agaga na te fa'atupuina le leaga ma fa'aosoina nisi fouvalega. Ua fa'aauau nei e Satani i tagata i le lalolagi le mea e tasi na ia faia i agelu i le lagi. Ua pule nei lona agaga i le fanau o le lē usita'i. Pei lava ona faia e Satani, ua fa'apea fo'i ona latou taumafai ina ia talepe i lalo le tulafono a le Atua, ma ua latou folafola atu i isi tagata le sa'olotoga e ala i lo latou solia o poloā'iga a le Atua. E pei lava ona tete'e Satani ma ana 'au, ma latou 'inosia le a'oa'iga a Keriso, o lo o fa'apenā fo'i ona tete'e tagata i le a'oa'iga o le agasala. O le taimi e o'o ifo ai i mafaufau o tagata le fe'au lapata'i a le Atua, o le taimi fo'i lea e galue ai Satani i tagata ina ia latou sa'ilia se mea latou te 'alofaga i ai i a latou agasala, ma ia latou sa'ilia nisi latou te tutū fa'atasi e lagolagoina i latou i la latou amioleaga. Ua latou lē liliu 'ese i lo latou sesē, a ua latou fa'atupu fa'alavelave i lē ua ui atu ai lo latou a'oa'iga; ua peisea'i o le a'oa'iga le pogai o le fa'alavelave. Talu mai lava aso o Apelu se'ia tau mai i lo tatou vaitaimi, o le agaga lava lea e tasi o lo o fa'aalia pea i ē ua mafai ona latou avatua le a'oa'iga o le agasala.

Ua ta'ita'ia e Satani le tagata i le faia o le agasala, e ala i lona faia o le mea e tasi na ia faia i le lagi - o lona fa'auigasesēina lea o le amio a le Atua, ina ia foliga mai ai o Ia o se Atua sauā ma le lē alofa. E o'o mai i le taimi nei o lo o fa'amanuiaina pea lava taumafaiga a Satani i lea itū. Ona soso'o atu loa lea ma le isi moliga a Satani - ua ia fai mai o le leai o se amiotonu o tulafono a le Atua, o le mea lenā ua tupu mai ai le pa'ū o le tagata; ma o le tulafono lava fo'i lea na tupu mai ai lana fouvalega.

(16) O LE Ā LE UIGA MONI O LE ATUA?

Ua afio ane fo'i le Ali'i i ōna luma, ma na ta'u mai, o Ieova, o Ieova, o le Atua alofa mutimutivale ma le alofa fua, e telegese Lona to'asā, a e tele le alofa ma le fa'amaoni; o Lē tausī le alofa e o'o atu i afe o tupulaga; o Lē fa'amagalo fo'i i le amiolētonu ma le solitūlafono ma le agasala, a e lē fa'asaoina lava e Ia o ē agasala; a e tauī atu e Ia le agasala a mātua i a latou fanau ma le fanau a latou fanau, e o'o i le tolu ma le fā o tupulaga.

Esoto 34:6, 7

(17) NA FA'APEFEA ONA FA'AALIA E LE ATUA LONA ALOFA TELE NA'UĀ MA LONA ALOFA MUTIMUTIVALE?

Auā ua fa'apea lava ona alofa mai o le Atua i le lalolagi, ua Ia aumaia ai Lona Atali'i e to'atasi, ina ia lē fano se tasi e fa'atuatua iā te Ia, a ia maua e ia le ola e fa'avavau.

Ioane 3:16

Na fa'aalia e le Atua Lana amiotonu ma le amiotonu o Lona nofoālī'i ina ua tuli'esea e Ia Satani mai le lagi. Peita'i, ua fa'a'iloa mai e le Atua Lona alofa i le tagata, e ala i Lona tu'uina mai o Lona Ālo e to'atasi e maliu e fai ma sui o le fanau a tagata, ina ua latou agasala e ala i lo latou gaua'i atu i le taufa'asesē a le ti'āpolo. Ua fa'a'iloa mai iā i tatou le uiga moni a le Atua e ala i le togiola. E malosī le leo o le satauro e ta'u mai ai i le atulaulu uma le sesē o le ala o le agasala na filifilia e Lusifelo. Ua fa'a'iloa mai fo'i e le satauro e lē mafai ona tu'ua'ia le faigāmalō a le Atua i le fouvalega na fa'atupu e Lusifelo.

(18) SA FA'APEFEA ONA FA'A'UPUINA E TAGATA AMIOLEAGA LE FA'AMOEMOEGA MATA'UTIA O SATANI IA FA'AUMATIA IESU A O FAIA LANA GALUEGA I LE LALOLAGI?

Ona latou toe 'alalaga ai lea, "Inā fa'asatauro ia iā te Ia."

Mareko 15:13

Na fa'aalitino mai le natura moni o le amio a Satani i le taua i le vā o Keriso ma le ti'āpolo, i le vaitaimi o le galuega a le Fa'aola i le lalolagi. O au'upega tigā ma le sauā na fa'aaogā e le ti'āpolo i le Fa'aola o le lalolagi i lea taua, o mea ia ua matuā 'ave'esea ai se masalosalo na totoe i loto ma mafaufau o agelu i le lagi fa'apea ma le atulaulau uma, e fa'atatau iā Satani. O lona 'upuvale ma lona lē migao ina ua ia mana'o e fa'apa'ū ma ifo atu Keriso iā te ia; o lona lē 'āno'ano ma lona 'avea o Keriso i luga o le malumalu ma le tumutumu o le mauga, ma lona mana'o 'āno'anoa ina ia oso fa'apa'ū ifo Keriso mai le tumutumu o le mauga; o lona lē alofa na fa'aalia i le pō atoa na fe'avea'i ai Keriso mo Lona fa'amasinoga mai lea tagata i lea tagata leaga; o lona fa'aosoina o le 'au ositaulaga ma tagata latou te te'ena Lona alofa, ma i'u ai lava ina latou fe'ei ma vala'au atu, "Fa'asatauro iā te Ia! Fa'asatauro iā te Ia," o nei mea uma na o'o ifo ai le maofa atoa ma le ita i loto o le atulaulau uma fa'apea ma agelu.

Ua tū matilatila mai nei le amioleaga a Satani e aunoa ma se mea e 'alofaga i ai. Ua aliali nei le natura moni o lana amio o le pepelo ma le fasioti tagata. Ua iloa nei e agelu o le agaga na pulea ai e Satani le fanau a tagata, o le agaga lava lea semanū na te fa'aaogāina pe ana fa'atagaina o ia na te pulea ai 'au a le lagi. Na fai lana fa'amatalaga o le solia o le tulafono e maua ai le sa'olotoga ma le fa'aeaina. Peita'i o lenei ua va'aia o le solia o le tulafono e i'u i le pologa ma le pa'ū maulalo.

(19) O LE Ā LE MEA NA FA'ATAUNU'UINA E LE ATUA E ALA I LE 'AVEA O LONA ĀLO MA TAULAGA OFO INA IA FA'AALIA AI LONA UIGA I LE ATULAULAU?

O mea uma fo'i e mai le Atua ia, ua uma ona fa'aleleia e Ia o i tatou iā te Ia talu Iesu Keriso, ua tu'uina mai fo'i iā te i matou le galuega o le leleiga.

II Korinito 5:18

Ua fa'aalia nei e le Atua Lona 'ino'ino i fa'avae autū o le fouvalega. Ua va'ai nei le lagi atoa i le fa'aaliga o Lana amiotonu, e ala i le fa'asalaina o Satani ma le togiolaina o le tagata. Na fai le fa'amatalaga a Lusifelo fa'apea afai e lē masuia le tulafono a le Atua, ma afai e lē mafai ona solofua le fa'asalaga o le agasala, o lona uiga o le a masesēi e fa'avavau le Atua ma so'o se tasi na te solia Lana tulafono. Na fai lana tala fa'apea ua o'o le fanau a tagata i le tulaga e lē toe mafai ai ona togiolaina i latou, ma o lona uiga ua 'avea nei i latou uma o tagata o lana itū. Peita'i o le maliu o Keriso e 'avea ma sui o le tagata, o se molimau lea e lē iloa e Satani ona tali i ai. Na pa'ū le fa'asalaga o le agasala i luga o Lē na tutusa ma le Atua; ma ua maua ai nei e le tagata le sa'olotoga na te talia ai le amiotonu a Keriso, atoa ma le manumalō iā Satani e pei ona manumalō le Ālo o le Atua. E maua e le tagata lea manumalō e ala i le olaga salamō ma le loto maulalo. Ua fa'apenā ona fa'aalia le amiotonu a le Atua, a ua maua ai fo'i le ta'uamiotonuina mo i latou uma o ē fa'atuatua iā Iesu.

(20) O LE Ā LE GALUEGA FA'APITOA A KERISO?

'Aua ne'i outou manatu ua 'Ou sau e tatalaina le tulafono po o le 'au perofeta; 'Ou te le'i sau e tatalaina, a ia fa'ataunu'uina.

Mataio 5:17

Peita'i e lē na o le togiolaina o le tagata na afio mai ai Keriso i le lalolagi e puapuagātia ma maliu ai. Na afio mai o Ia na te "fa'asilisilia le tulafono ma fa'amamaluina." Ua Ia faia lea mea e lē gata ina ia manino lelei ai tagata o le lalolagi i lo latou tiute i le tulafono, a ia fa'a'iloa atu ai fo'i i isi lalolagi uma le lē masuia o le tulafono a le Atua. Ana mafai ona soloia le tulafono, semanū e lē mana'omia le tu'uina atu e Keriso o Lona soifua e fai ma togiola o le soliga o le tulafono. Ua 'avea le maliu o Keriso ma fa'amaoniga sili e iloa ai le mausalī ma le tūtūmau e fa'avavau o le tulafono a le Atua. O le alofa lē mafuatia o le Tamā ma le Ālo na faia ai le taulaga mo le togiolaina o ē agasala. Ua fa'aalia atu e lea taulaga i agelu a le lagi ma tagata i so'o se lalolagi, se mea e lē mafai i se isi 'auala ona fa'amaninoina. E leai ma se isi 'auala, ua na o le maliu lava o Keriso e mafai ona fa'a'iloa atu ai, o le amiotonu ma le alofa tunoa o fa'avae ia o le tulafono ma le faigāmalō a le Atua. **(Va'ai le Manatu Fa'aopoopo A).**

(21) I LE FA'AI'UGA O LE FINAUGA TELE, O LE Ā LE TA'UTINOGA O LE A FAIA E MEA UMA NA IA FOAFOAINA?

Ina ia to'otuli o tulivae uma lava i le suafa o Iesu, o ē o i le lagi, ma ē o i le lalolagi, ma ē o i lalo o le lalolagi; ma ia ta'uta'u atu e laulaufaiva uma lava o Iesu Keriso o le Ali'i lava ia, ia i'u ina vi'ia ai le Atua le Tamā.

Filipi 2:10, 11

O le toe vaega o le fa'amasinoga o le a manino ai e leai se mafua'aga lelei mo le tula'i mai o le agasala. O le a fesili atu le Fa'amasino o le lalolagi iā Satani, "O le ā se mafua'aga lelei o lau fouvalega iā te A'u, ma lou fāōa o tagatānu'u o Lo'u malō?" Peita'i, o le a leai se mea e 'alofaga i ai lē na pogai mai ai le amioleaga. O le a tapunia gutu uma lava, ma o le a lē magagana 'au uma o le fouvalega.

(22) O LE Ā LE 'ALAGA NA FA'AILOA MAI AI LE MALAIA O LE A O'O IĀ SATANI?

Ua talia le vineta e Iesu, ona fetalai ane lea o Ia, "Ua taunu'u;" ua fa'agaugau Lona āo, ona tu'uina atu lea o Lona agaga.

Ioane 19:30

Ua fa'aalia mai e le satauro i Kalevario le lē maliua o le tulafono a le Atua; peita'i ua fa'aalia mai ai fo'i i agelu ma tagata o le oti o le totagi lea o le agasala. Na tā le logo o le oti o Satani ina ua vala'au le Fa'aola ma fa'apea mai, "Ua taunu'u." Na iloa ai i lenā taimi le i'uga o le a o'o i ai le taua fa'a'umi'umi i le vā o le lelei ma le leaga; ma ua mautinoa ai fo'i i lenā taimi le fa'a'umatiāga e fa'avavau o le amioleaga. Na ui atu le Ālo o le Atua i le faitoto'a o le tu'ugamau, ina ia mafai ai e Ia e ala i Lona maliu, ona fa'a'umatia le ti'āpolo, o lē na i ai le malosi o le oti (Eperu 2:14).

(23) O LE Ā LE I'UGA TUPITO O SATANI MA LATOU UMA O Ē TAOFIMAU I LE FA'AMAMALUGA MA LE AMIOLEAGA?

Auā fa'auta, o le a o'o mai le aso e mū ai pei o se umu; ona fai ai lea ma tagutugutu o saito o ē fa'amaualuluga uma, atoa ma ē fai amioleaga uma; e susunuina fo'i i latou i le aso o le a o'o mai, ua fetalai mai ai Ieova o 'au; e lē fa'atoeina ai mo i latou se a'a po o se la'au.

Malaki 4:1

O le naunau o Lusifelo i le pule na ia fai ane ai: "Ou te si'itia i luga lo'u nofoāli'i ia sili i fetū a le Atua; ...mā te tutusa ma le Silisili 'Ese." Peita'i ua fetalai atu i ai le Atua: "Ou te 'avea 'oe ma lefulefu i le fogā'ele'ele, ...e lē toe i ai lava 'oe e fa'avavau" (Isaia 14:13, 14; 'Esekielu 28:18, 19).

(24) I LE FA'AI'UGA O LE FINAUGA TELE, O LE Ā LE FOLAFOLĀGA O LE A FA'ATĀUA E LE ATULAULAU UMA?

Se ā ea se mea ua outou mafaufau ai i le Ali'i? E fa'a'umatia lava e Ia; e lē tupu fa'alua mai le puapuagā.

Nauma 1:9

E o'o atu i lea taimi ua molimauina e le lagi ma le atulaulau uma le uiga moni o le agasala, atoa ma lona i'uga. O le galuega o le fa'a'umatiāga o Satani ma le agasala ma ē amioleaga uma, semanū e o'o ai le fefefe i agelu ma ta'uileagaina ai le suafa o le Atua pe ana faia lea galuega i le amataga. Peita'i o le faia o lea galuega i le i'uga, e pei o le fuafuāga a le Atua, o le a fa'amaonia ai Lona alofa ma Lana amiotonu i luma o agelu ma tagata o ē ua teu i o latou loto Lana tulafono, o ē fiafia e fai Lona finagalo. E lē toe aliali a'e le amioleaga. E fai mai le Afioga a le Atua, "E lē tupu fa'alua mai le puapuagā." O le a aloā'ia le tulafono a le Atua e 'avea o le tulafono o le sa'olotoga, a e lē o se amo o le pologa e pei o faitiōga a Satani. O se foafoāga ua tofotofoina ma ua latou fa'amaonia le lelei o le Atua, latou te lē toe liliu 'ese iā te Ia, ona ua latou va'ai lelei i le amiotonu o Lona alofa lē mafuatia, ma Lona poto silisili 'ese.

'Ou te malamalama pe fa'apefea, ona o le mitamitavale, na muā'i fafau ai le agasala i le loto o Lusifelo. 'Ou te iloa o lea lava taimi sa mafai e le Atua ona fa'a'umatia o ia, peita'i ana faia fa'apea, o Āna mea ola uma na foafoaina o le a usiusita'i ona o le fefefe.

Li'o le Tali:

Ioe

Lē Mautonu

Li'o le Tali:	Ioe	Lē Mautonu
<i>Ua 'ou malamalama nei i le poto o le Atua na fa'atagaina ai le agasala ia alu pea ina ia mafai e le atulaulau atoa ona molimauina le mata'utia o lenei afāina ma iloa ai le uiga moni o Satani.</i>		

Li'o le Tali:	Ioe	Lē Mautonu
---------------	-----	------------

[illegible]

Feitaga'i i le Vā o le Tagata ma Satani - 2

(1) O LE Ā LE FOLAFOLAGA OFOFOGIA SA TU'U MAI E LE ATUA O LE FA'AMOEMOE MO LE TAGATA UA PA'Ū?

'Ou te fa'atupuina le feitaga'i iā te 'oulua ma le fafine, o lau fanau fo'i ma lana fanau; na te tu'imomomoina lou ūlu, a o 'oe e te tu'imomomoina lona mulivae.

Kenese 3:15

O le folafolaga na faia e le Atua iā Satani ina ua pa'ū le tagata, o se valo'aga lava lea ua aofia ai augā tupulaga uma se'ia o'o i le i'uga o le lalolagi. Ua fa'a'iloa mai i lenei valo'aga le taua tele o le a a'afia ai nu'u ma itū'aiga uma o tagata o ē o le a ola i le lalolagi.

Na fetalai le Atua: “Ou te fa'atupuina le feitaga'i.” E lē o se uiga moni lea e masani ai le tagata, le feitaga'i ma Satani. Na leaga le natura o le tagata ina ua solia e ia le tulafono a le Atua, ma ua leai se feitaga'i i lo la vā ma Satani, a ua o gatasitasi nei o'na uiga ma le natura o le ti'āpolo. E leai se feitaga'i e masani ai i le vā o le tagata agasala ma lē na pogai mai ai le agasala. Na amioleaga uma i la'ua ina ua la fultua i le Atua ma pa'ū'ū 'ese ma Lana tapulā'a. E lē mālōlō lē ua pa'ū se'ilogā ua maua e ia nisi latou te lagolagoina lana mea ua fai. O le mea lea ua tutū fa'atasi ai agelu ua pa'ū'ū ma tagata amioleaga i se fa'auōga ua latou iloa e i'u i le leaga. Ana leai le Agaga o le Atua, semanū ua faia se feso'ota'iga fa'atasi i le vā o Satani ma le tagata, e tete'e atu ai i le Atua ma le malō o le lagi.

(2) O LE Ā LE FA'ATONUGA FA'APITOA A LE ATUA MA LE LAPATA'IGA IĀ ATAMU MA EVA?

A o le la'au e iloa ai le lelei ma le leaga, 'aia e te 'ai ai; auā o le aso e te 'ai ai e te oti ai lava.

Kenese 2:17

(3) O LE Ā LE MEA NA FAIA I LE LĒ USIUSITA'I NA AUMAIA AI LE FA'AUMATIĀGA I LE LALOLAGI MA SE TULAGA PA'Ū I LE AIGĀ TAGATA?

Ona va'ai atu lea o le fafine i le la'au e lelei lava pe a 'ai, ma ua matagofie mai, o le la'au fo'i e aogā e maua ai le poto, ona tago ai lea o ia i lona fua, ma 'ai ai; na ia avatu fo'i i lana tane fa'atasi ma ia, na 'ai ai fo'i o ia.

Kenese 3:6

(4) O LE Ā LE UIGA O LE FA'AOSOOSOGA?

O'u uso e, ia outou manatu, o le mea e fiafia tele ai pe a maua outou i tofotofoga 'ese'ese; ina ia outou iloa o le tofotofoina o lo outou fa'atutua e tupu ai le onosa'i.

Iakopo 1:2, 3

(5) O AI LE PULE O FA'AOSOOSOGA UMA?

Ua fa'a'uma e le ti'āpolo le tofotofoga uma, ona alu 'ese ai lea iā te ia se'ia i se aso.

Luka 4:13

Na fa'aosoosoina e Satani le tagata ina ia agasala; o Satani fo'i na pogai ai le fouvalega a agelu. Ua faia e ia lea galuega ina ia maua ai nisi latou te tutū fa'atasi i le taua e tete'e atu ai i le Lagi. E leai se 'ese'esega i le vā o Satani ma āna 'au i lo latou loto fia fasioti iā Keriso. E i ai ni fe'ese'esega'iga i lo latou vā i nisi matā'upu; peita'i ua tasi i latou i lo latou tete'e i le pule a le tupu o le Lagi ma le lalolagi. Peita'i na fa'alogalo Satani i le folafolaga e fa'atatau i le feitaga'iiga i le vā o ia ma le fafine, ma le vā o lana fanau ma le fanau a le fafine, ona iloa ai lea e Satani o le a i ai se mea o le a fa'alavelave i āna taumafaiga e toso ai i lalo le natura o le tagata, ma o le a i ai se fesoasoani e maua e le tagata na te mafai ai ona tete'e mai i lona malosi.

(6) O LE FA'ATUSA O AI NA FAIA AI LE TAGATA, MA O LE ĀLA FO'I LEA NA FA'AAOGĀ E SATANI E FA'AUMATIA AI LE AIGĀ TAGATA?

Ona faia lea e le Atua o le tagata i lona fa'atusa, o le fa'atusa o le Atua na Ia faia ai o ia; na faia e Ia o i la'ua o le tane ma le fafine.

Kenese 1:27

Ua ita Satani i le fanau a tagata ona ua 'avea i latou o nisi e fa'a'ailoa i ai le alofa mutimutivale o le Atua e ala iā Keriso. E mana'o Satani ina ia fa'aleaga le fuafuāga a le Atua mo le fa'aolataga o le tagata; e mana'o fo'i Satani ina ia ta'uleagaina le suafa o le Atua e ala i lona fa'aleagaina o le tagata, le galuega a Ōna 'a'ao. E mana'o Satani ina ia lē maua se fiafia i le lagi, ma ia fa'atumulua le lalolagi i le ōi ma fa'atafunaga. ona tu'ua'i loa lea e Satani nei leaga uma i luga o le Atua ona o Lona faia o le tagata.

(7) O LE Ā LE FOLAFOLAGA TĀUA E MAFAI ONA TATOU 'A'APA I AI MA E MAUA E ALA I LE MANA O KERISO?

Ona o lea ua Ia folafolaina mai ai o mea e silisili 'ese lava ma le aogā, ina ia tofusia fa'atasi ai outou i le amio Atua. ina ia sosola 'ese outou i le amio leaga o i le lalolagi i le tu'inanau.

II Peteru 1:4

Ua totōina e Keriso i le loto o le tagata le agaga lelei e tupu a'e ai i le tagata lona 'ino'ino iā Satani. Ana leai lenei agaga ma lenei malosi'aga e maua mai ai le liuga ma le fa'afouga, semanū e pologa pea lava le tagata i lalo ifo o le pule a Satani. Peita'i o le agaga lelei ua totōina e Keriso i le loto o le tagata, ua mafai ai e le tagata ona tete'e i le pule sauā a le ti'āpolo. Ua va'aia le galuega a lenei agaga lelei mai luga, i so'o se tasi ua 'ino'ino i le agasala ma ua lē toe fiafia i ai, ma so'o se tasi na te te'ena ma manumalo i tu'inanau o le tino.

(8) O LE Ā LE UIGA FA'ALE-ATUA O LE SOIFUĀGA O KERISO NA FA'ATUPUINA AI LE MATAU'A I LOTO O Ē LĒ FA'ATUATUA MA SA O'O AI I LE TULAGA NA LATOU FA'ASATAURO AI O IA?

Ua outou iloa fo'i na fa'aalia o Ia ina ia 'ave'eseina e Ia a tatou agasala; e lē o iā te Ia fo'i se agasala.

I Ioane 3:5

Na va'aia manino le faitaga'i i le vā o le agaga o Keriso ma le agaga o Satani, i le tali a le lalolagi iā Iesu i Lona ulua'i malia mai. Na te'ena e tagata Iutaia Iesu ona sa taunu'u mai o Ia e aunoa ma se tamā'o'aiga fa'alelalolagi; a e lē gata i lea na fa'aali mai o Ia e aunoa ma le mamalu ma teuga e masani ai tupu ma ao o malō. Peita'i e lē na ona pau lea o le pogai na latou te'ena ai Iesu. Na latou iloa lelei e i ai Lona mana ma Lona malosi e mafai ona sui a'i le leai o se mamalu ma ni teuga e va'aia i fafo. Peita'i o le soifua mamā ma le soifua pa'ia o Keriso, o le mea lea na oso a'e ai le 'ino'ino ma le fia fasioti tagata o nei tagata amioleaga. Ua 'avea Lona Soifua lē fa'apito ma Lona Soifua fa'apa'iaina o se sasa ma se a'oa'iga faifaipea i le fa'amaua'uga ma tu'inanau o ta'ita'i Iutaia. O le mea tonu lava lenei na oso a'e ai lo latou 'ino'ino ma lo latou fia fasi i le Ālo o le Atua. Na tutū Satani ma āna agelu leaga latou te 'au fa'atasi ma tagata amioleaga. Ua fa'apea ona tu'u fa'atasi le malosi'aga o agelu ua pa'ū'ū ma tagata leaga, i le faiga o la latou tete'e i le Toa o le 'upu moni.

(9) O LE Ā LE FAIGA E MAFAI ONA TATOU MĀTAUINA MAI LE LALOLAGI PE A TATOU MULIMULI IĀ KERISO?

O i latou uma fo'i o ē loto ina nonofo ma le amio Atua iā Keriso Iesu, e sauāina i latou.

II Timoteo 3:12

Ua fa'aalia fo'i le agaga sauā lenei e tasi i so'o o Keriso, e pei ona fa'aalia i lo latou Matai. So'o se tasi na te va'aia le uiga mātagā o le agasala, ma tete'e atu ai i le fa'aosoosoga e ala i le malosi mai luga, o le a lē taumatea le pa'ū o le ita o Satani ma āna 'au i lea tagata. A o tumau pea le agasala fa'apea ma tagata amioleaga i le lalolagi, o le a fa'apenā fo'i ona tumau pea le ita ma le 'ino'ino o le lalolagi i fa'avae mamā o le 'upu moni, o le a tumau fo'i le fa'alumaina ma le sauāina o i latou o ē savavali i ia fa'avae mamā. E lē galulue gatasitasi so'o o Keriso ma 'au'auna a Satani. O lo o tumau lava fo'i le 'ino'ino o le to'atele i le satauro o Keriso. O i latou uma fo'i o ē ola amioatua iā Keriso Iesu, e sauāina i latou.

(10) O Ā LA'ASAGA E LUA E TATAU ONA TATOU MULIMULI I AI INA IA FA'ATO'ILALO AI 'AU A SATANI?

O le mea lea ia outou gaua'i ai i le Atua; ia outou tete'e atu i le ti'āpolo, ona sola 'ese ai lea o ia iā te outou.

Iakopo 4:7

Ua tu'u atoa i ai le malosi o Satani ma ana 'au uma i lenei taua. Aiseā ua lē fetai ai 'au a Satani ma se tete'e malosi mai le itū o tagata o le Atua? Aiseā ua tulemomoe ai ma foliga fa'alēpopole fitafita a Keriso? Auā ua tau leai so latou feso'ota'iga ma Keriso; auā ua matitiva i latou i Lona Agaga. Ua lē foliga 'inosia ma mātagā iā i latou le agasala e

pei ona 'inosia ma mātagā le agasala iā Keriso. Ua latou lē tu'uina lo latou malosi i le te'ena o le agasala e pei ona faia e Keriso. Ua latou lē malamalama i le leaga a'ia'i o le agasala, ma ua latou tauaso ai i le natura moni ma le malosi o le ali'i o le pōuliuli. Ua tau leai se 'ino'ino i le agasala ona ua lē iloa e le to'atele le malosi o le ti'āpolo, ma le leaga a'ia'i o le agasala, ma le to'atele o ē ua a'afia ai i lana tete'e iā Keriso ma Lana ekalesia. O le mea lea ua fa'asesēina ai le to'atele. Latou te lē iloa o lo latou fili o se ta'ita'i'au malosi, o lē ua pulea mafaufau o agelu leaga. Latou te lē iloa fo'i o lo o faia e ia le taua e tete'e atu ai iā Keriso, ina ia taofia ai le fa'aolataga o agaga, ma ua fa'ata'atitia nei ni āna fuafuāga ma ni āna fa'agaoioiga mao'e auā le manuia o lea taua. Ua seāseā tā'ua le igoa o Satani e le to'atele o le 'au Kerisiano, e o'o lava i faife'au o le talalelei. Ua latou lē va'ai i fa'aailoga e iloa ai o lo o galue pea le ti'āpolo, ma e lē o i'uvāle āna taumafaiga. Ua latou fa'atamala i le tele o lapata'iga e fa'ata'au i āna togafiti e tele, ma ua foliga mai ua leai so latou popole i le ti'āpolo.

(11) O LE Ā LE FUAFUĀGA FAIFAPEA A SATANI?

Ua fa'atauasoia manatu o i latou o ē lē talitonu e le atua o le lalolagi nei, ina ne'i pupula atu iā te i latou le malamalama o le tala lelei i le mamalu o Keriso, ua tusa o Ia ma le Atua.

II Korinto 4:4

A o fa'apenā ona tauaso mata o tagata i togafiti a Satani, o lo o mulimuli atu lenei fili mata'alia i o latou ala i taimi uma. O lo o i ai lenei fili i vaega 'ese'ese o le 'aiga, o lo o i ai i itū uma o nu'u, ma 'a'ai, ma le ekalesia, ma le fono faitūlafono a le malō, ma fale fa'amasino. O lo o fai ai lana galuega o le fa'afenumia'i o mafaufau, o le taufa'asesē, o le taufa'aosooso. Ua fa'apea ona fa'aumatia e ia agaga ma tino o tagata e o'o lava i tamaiti. O lana galuega ua malepelepe ai 'aiga, ua fa'atupu ai fe'ese'esea'iga ma taua ma misa ma fouvalega ma le fasioti tagata. Peita'i ua leai lava se popole i ai o le lalolagi Kerisiano i nei mea. E foliga mai ua latou manatu o le finagalo lea o le Atua ia i ai pea lava nei mea uma i le lalolagi.

O lo o sa'ili'ili pea lava Satani i 'auala na te manumalō ai i le fanau a le Atua, e ala i lona lepetia i lalo o pā pupuni ua vā a'i i latou ma le lalolagi. Na maileia Isara'elu anamua ina ia latou faia le agasala, e ala i lo latou faia o ni feso'ota'iga ma ni fa'auōga ma nu'u fa'apaupau, o ni feso'ota'iga ma ni fa'auōga na fa'asāina e le Atua. Ua fa'apenā fo'i ona ta'ita'isesēina Isara'elu i ōna pō nei. “O ē lē talitonu, ua fa'atauasoia i latou e le atua o le lalolagi nei, ina ne'i susulu iā te i latou le malamalama o le talalelei.” O ē uma ua lē faia sa latou filifiliga maumaututū mo Keriso, o 'au'auna i latou a Satani. O le loto e le'i fanaufouina, o lo o fiafia ma fa'apelepele pea i le agasala, ma o lo o sa'ilia e ia ni mafua'aga lelei e fai ma ōna 'alofaga. O le loto ua fa'afouina e 'ino'ino i le agasala, e tū malosi fo'i e tete'e i le agasala. A filifili le 'au Kerisiano e faifaimea fa'atasi ma ē amioleaga ma ē lē talitonu, ua latou ta'ita'iina i latou lava i le fa'aosoosoga. E sau Satani iā i latou ua 'ofu mai i 'ofu latou te lē iloa ai ōna foliga moni, ona faifailemū lea o lana togafiti e ufiufi ai o latou mata. O le a latou lē iloa ua fuafuaina lelei e Satani lo latou malaia, e ala i uō ua latou faifaimea fa'atasi. A o faifaimalie lo latou foliga atu i le lalolagi i a latou amio ma 'upu ma mea e fai, ua fa'apenā fo'i ona atili ai lo latou tauaso.

(12) O LE Ā LE MEA E TASI O LE A MAFAI ONA TATOU SAOGALEMŪ AI MAI LE ŌGATASI MA LE LALOLAGI?

'Aua e te alu i le ala o ē agasala; 'aua fo'i e te ui i le ala o ē amioleaga.

Fa'ata'oto 4:14

O le mulimuli atu o le 'au Kerisiano i tū a le lalolagi, e liua ai le ekalesia i le lalolagi, a e lē liua ai le lalolagi iā Keriso. O le faifaimea ma le agasala e i'u ai ina lē toe foliga o se agasala le agasala. O le faifaimea fa'atasi ma 'au'auna a Satani e lē toe umi a e uma lona fefe iā Satani. Afai o le faiga o lo tatou tiute ua tatou o'o ai i le tofotofoga, tatou te mautinoa e puipuia i tatou e le Atua; peita'i a tatou tu'uina i tatou lava i lalo o le fa'aosoosoga, e i'u lava i lo tatou pa'ū'ū.

(13) O AI O LO'O LAPATA'I MAI 'AUA TATOU TE MULIMULI I AI PE FAI MA OGĀTOTONU E AUTŪ I AI O TATOU MAFAUFAUGA?

'Aua e te losilos i tagata amio leaga; 'aua fo'i e te fia to'aga iā i latou.

Fa'ata'oto 24:1

E masani ona sili le manuia o fuafuāga a Satani pe a ui atu o ia i tagata e lē masalomia e se isi e ono o'o i lalo o lana pule. E fiafia le to'atele o le 'au Kerisiano e 'ave le mamalu ma le vi'iga i ē agava'a ma talenia ma ē ua a'oa'oina lelei; peiseā'i ua talitonu le 'au Kerisiano o nei agava'a ma taleni ua lava lea e sui a'i lo latou lē matata'u i le Atua. O taleni ma agava'a fa'aleatunu'u o ni meaalofo ia mai le Atua; peita'i afai o le a avāne taleni nei ma agava'a ma taumafai e sui a'i le

amioatua, afai ua lē ta'ita'iina i le Atua le tagata a ua ta'ita'i 'esea mai le Atua, ona 'avea ai lea o nei taleni ma agava'a o se malaia ma se mailei. E i ai le manatu ua ta'atele i le to'atele - fai mai lea manatu, so'o se mea e foliga mai o ni fa'aaloaloga, po o tū ma aga fa'atupu, o lona uiga e Kerisiano mea na. E leai se isi sesē e sili atu lona mata'utia i lo lenā. O uiga lelei nei e ao ona fa'amatagofieina ai le amio a Kerisiano ta'itasi, auā o le a malosi atili ai la latou molimau mo Keriso. Peita'i, o nei uiga lelei e ao ona tu'uina atu o se taulaga i le Atua; a aunoa ma lea, o le a 'avea ia o ni mea faigaluega malolosi mo le leaga. E to'atele i latou ua atamamai i le aganu'u, ma e tele o latou uiga tausea'afia, latou te lē fia faia fo'i se mea ua sesē i le va'aiga a tagata. Peita'i, e to'atele nisi o i latou nei ua na o ni meafaigaluega matagofie i lima o Satani. O i latou nei o fili ua lamatiagofie ai le galuega a Keriso; ua sili ona mata'utia i latou nei ona o latou uiga tausea'afia, uiga lelei e fa'asesēgofie ai le to'atele.

(14) O AI LE POGAI E TASI O LE POTO MA LE MALŌSI FA'ALE-AGAGA?

O le Atua, o lo tatou malu ia ma lo tatou malosi; e fai o la ma fesoasoani silisili i puapuagā.

Salamo 46:1

Na maua e Solomona le poto maoa'e na maofa uma ai le lalolagi; na ia maua lea poto e ala i le tatalo fa'atauānau ma lona fa'alagolago i le Atua. Peita'i, na ia pa'ū i le tofotofoga ina ua ia liliu 'ese mai le Atua a e fa'alagolago iā te ia lava. Ona 'avea loa lea o le meaaloa a le Atua o se mea ua fa'aleleia atili ai o ia, ina ia 'avea o se meafaigaluega aogā i lima o le fili o agaga.

(15) O LE Ā LE TOMAI FA'ATAUTAI O LO'O FA'AAOGĀ E SATANI I LANA TAUMAFAGA IA MANUMALŌ AI I LE FINAUGA TELE?

Ia outou fa'autauta, ia outou mataāla, ona o lē ua fai outou mona fili, o le ti'āpolo lea, o lo'o feālualua'i o ia e pei o se leona tagi, ua sa'ili se tasi e 'aina e ia.

I Peteru 5:8

Talu mai lava aso o Atamu, o lo o fa'aaogā pea lava le malosi ma le mana'o le ti'āpolo mo le sauāina ma le fa'aumatiaina o le fanau a le Atua. O lo o sauniuni nei o ia mo lana toe osofa'iga i le ekalesia. O i latou uma e taumafai e mulimuli iā Iesu, o le a fetai i latou ma lenei fili sauā. O le tele o le taumafai o le Kerisiano e fa'ata'ita'i iā Keriso, o le tele fo'i lea o mea o le a osofa'ia ai o ia e Satani. O i latou uma ua galulue punoua'i i le galuega a le Atua, o ē ua sa'ilia 'auala e fa'aaliali a'e ai mea tausea'asesē a le ti'āpolo, a e folafola atu Keriso i luma o tagata, o le a latou ioe i le fa'amatalaga a Paulo ua ia tautala ai e fa'atatau i le 'au'auna atu i le Ali'i i le loto maulalo, atoa ma loimata ma tofotofoga.

(16) O LE Ā LE MEA O LE A PUIPUIA I TATOU MAI TOGAFITI MA MAILEI A LE TI'ĀPOLO?

Ia 'o'ofu outou i ofutau ato'atoa mai le Atua, ina ia outou mafaia ona tete'e atu i togafiti a le ti'āpolo.

Efeso 6:11

Na tu'uina e Satani āna fa'aosoosoga aupito faigatā iā Keriso; peita'i na manumalō ai Keriso i āna osofa'iga uma. Na tau e Keriso lenā taua mo i tatou; o Ōna manumalō ua faigofie ai ona tatou manumalō. E aumaia e Keriso le malosi mo so'o se tasi e ole atu iā te ia mo le malosi. E lē mafai e Satani ona manumalō i se tasi e aunoa ma lona loto i ai. E leai se malosi o le ti'āpolo e mafai ai ona pulea e ia le mafaufau, pe fa'amālosia ai fo'i le tagata na te faia le agasala. E mafai e le ti'āpolo ona aumaia tofotofoga ma fa'aosoosoga, a e na te lē mafaia ona fa'a'ele'eleaina le loto. Na te aumaia puapuagā ma tigā, a e lē o le loto palapalā. Ua manumalō nei Keriso iā Satani. Ia 'avea le manumalō o Keriso o se fa'alototele i Ōna so'o ina ia latou tau ai ma le fa'atamatane le taua e tete'e atu ai i le agasala atoa ma Satani.

(17) E FA'APEFEA ONA MAFAI ONA FA'ASA'OLOTOINA O TATOU OLAGA MAI LE AGASALA?

E fa'apefea ea ona fa'amamāina e le taule'ale'a o lona ala? Ona ua tausi i ai e tusa ma Lau afioga.

Salamo 119:9

(18) O LE Ā LE FOLAFOLAGA A LE ATUA E MAFAI ONA TATOU FA'ALAGOLAGO I AI?

Ua lē maua outou e se tofotofoga e 'ese i lo tagata; a ua fa'amaoni le Atua, o Lē na te lē tu'uina outou i le tofotofoga e sili i se mea ua outou lavātia, a ua sauni fo'i fa'atasi ma le tofotofoga se mea e sao ai, ina ia outou lavā 'o'ono.

I Korinito 10:13

Li'o le Tali:	Ioe	Lē Mautonu
<i>'Ou te tatalo mo le poto fa'aleagaga ma se fa'anaunauga e aupito sili mo le Afioga a le Atua ma, e ala i Lona alofa tunoa, 'ou te taumafai malosi e tete'e i gaoioiga fa'amaualuga a le ti'āpolo.</i>		

Li'o le Tali:	Ioe	Lē Mautonu
<i>'Ou te fa'alagolago i folafolaga a le Atua ina ia lē fa'atagaina a'u ia tofotofoina ia sili atu i le mea e mafai ona 'ou lavātia ma tatalo mo le poto e filifili ai le ala ia sola'ese ai.</i>		

Li'o le Tali:	Ioe	Lē Mautonu
<i>Ua 'ou iloa o i latou uma o ē ola mo Keriso o le a sauāina, ma 'ou te loto ia 'ou lavātia ia mea e tupu ona o le alofa mo Ia.</i>		

Li'o le Tali: **Ioe** **Lē Mautonu**

Manatu Mai le Su'esu'ega	Tatalo e Mana'omia	Tali oTatalo
---------------------------------	---------------------------	---------------------

This image shows a blank sheet of white paper with horizontal ruling lines. The lines are evenly spaced and extend across the width of the page. There are no margins, text, or other markings on the paper.

Matāgaluega a Agaga Leaga 3

(1) E FA'APEFEA ONA FA'AMATALAINA E LE TUSI PA'IA LE MALŌSI O LE AMIOLEAGA I LE FINAUGA TELE?

Auā tatou te lē tau ma tagata, a o ali'i sili, ma faipule, ma ali'i o le pōuliuli o lenei lalolagi, atoa ma agaga leaga i mea o i le lagi.

Efeso 6:12

O le feso'ota'iga i le vā o le lalolagi o mea ua va'aia ma le lalolagi o mea e lē va'aia; o le galuega a agelu a le Atua; o le galuega a agaga leaga - ua manino le a'oa'oga a le Tusi Pa'ia i nei mea uma, ma ua i ai se feso'ota'iga vāvālalata o nei mea uma ma le tala fa'asolopito o le tagata. Ua fa'atuputeleina pea le fuainumera o ē talitonu e leai ni agaga leaga; ua to'atele fo'i i latou o ē ua manatu o agelu o agaga ia o ē ua oti. Peita'i ua ta'u manino mai e le Tusi Pa'ia e i ai agelu lelei; e i ai fo'i agelu leaga; ma ua aumai e le Tusi Pa'ia ni molimau maumaututū e fa'aailoa mai ai o nei agelu uma e lē o ni agaga o tagata ua oti.

(2) O FEA NA I AI UMA AGELU A O LE'I AMATAINA LE FINAUGA TELE?

Na a'u iloa atu fo'i, ma 'ou fa'alogi i le leo o agelu e to'atele, o ē ua fa'ata'ali'oli'o i le nofoāli'i, ma le leo o mea ola e fā atoa ma le 'au toeā'ina; o lo latou faitau aofa'i ua mano ni mano, ma afe ni afe.

Fa'aaliga 5:11

(3) O LE Ā LE IGOA UA FA'AAOGĀINA I LE TUSI PA'IA E FA'ASINO I AGELU UA PA'U'Ū?

Ua e talitonu e to'atasi lava le Atua; ua lelei lava lea; ua talitonu fo'i temoni ma latou tetemū.

Iakopo 2:19

(4) O FEA O LO'O I AI NEI AGELU UA PA'U'Ū?

Ua lafo fo'i le tarako tele, o le gata tuai lea, ua igoa o le ti'āpolo, i le ma Satani, o lē fa'asesē i le lalolagi uma; ua lafo ifo i le lalolagi, ua lafo fo'i āna agelu fa'atasi ma ia.

Fa'aaliga 12:9

(5) O LE Ā LE MAUALUGA NA FAIA AI LE TAGATA E FA'ATATAU I LE TULAGA MA AGELU?

Auā ua E fa'amaulalo ane teisi o ia i agelu; ua E fa'apaleina fo'i o ia i le mamalu ma le matagofie.

Salamo 8:5

E o'o atu i le taimi na foafoa ai le tagata ua i ai agelu; auā fai mai le Tusi Pa'ia na “pepese fa'atasi fetū o le taeao ma 'alalaga fiafia atali'i uma o le Atua” (Iopu 38:7), ina ua fa'ata'atitia e le Atua fa'avae o le lalolagi. Na i ai agelu na 'auina mai e le Atua i Etena latou te leoleoina le la'au o le ola ina ua pa'ū le tagata; na i ai nei agelu a o le'i oti se tagata e to'atasi. O le natura o agelu e maualuga atu i lo tagata, auā ua fai mai le faisalamo, na faia le tagata e “maulalo teisi i lo agelu” (Salamo 8:5).

(6) E FA'APEFEA ONA FA'AMATALA E LE TUSI PA'IA LE AOFA'I O AGELU NA FAIA E LE ATUA?

Na a'u iloa atu fo'i, ma 'ou fa'alogi i le leo o agelu e to'atele, o ē ua fa'ata'ali'oli'o i le nofoāli'i, ma le leo o mea ola e fā atoa ma le 'au toeā'ina; o lo latou faitau aofa'i ua mano ni mano, ma afe ni afe.

Fa'aaliga 5:11

Ua i ai a'oa'oga a le Tusi Pa'ia e fa'atatau i le numera o agelu, e fa'atatau i lo latou malosia ma lo latou mamalu, fa'apea ma la latou galuega i le faigāmalō a le Atua, ma le fa'aolataga o le tagata. Fai mai Ioane i le Fa'aaliga, “Na 'ou iloa atu fo'i, ma 'ou fa'alogi i le leo o agelu e to'atele, o ē ua fa'ata'ali'oli'o i le nofoāli'i.” O 'upu nei ua fa'amatala mai ai e le faisalamo agelu a le lagi: “o ē malolosi tele,” “o Āna 'au'auna o ē faia Lona finagalo,” o ē fa'atalitali “ma usiusita'i i Lona si'ufofoga” (Salamo 103:19-21). E afe ma afe, e mano ni mano fo'i 'avefe'au a le lagi na iloa atu e le perofeta o Tanielu. Na ta'ua fo'i e Paulo “agelu e manomano” (Tanielu 7:10; Eperu 12:22).

(7) E TO'AFIA AGELU NA FILIFILIA LE ALA SESE?

Ua toso e lona i'u i lona tolu o vaega o fetū o le lagi, ma lafo ifo iā i latou i le lalolagi.

Fa'aaliga 12:4

(8) O Ā FOLIGA VA'AIA FA'ALETINO O AGELU?

O le fa'atusa fo'i o mea ola, ua latou tino mai e pei o malala ola o le afi ua mū, ua tino mai pei o lamepa; ua fealualua'i ia i le vā o mea ola; ua pupula fo'i le afi, ma ua 'emo mai le uila ai totonu o le afi. Ua fetaufetulia'i fo'i o mea ola, ua tino mai pei o le uila.

'Esekielu 1:13, 14

Na va'aia e 'Esekielu i le fa'aaliga agelu ua “tino mai e pei o le uila,” ua matuā pupula lo latou mamalu, ma ua saosaoa na'uā lo latou felelei. Ua tautala le Tusi Pa'ia e fa'ataui i le agelu na 'auina mai i le tu'ugamau o le Fa'aola. Fai mai le Tusi Pa'ia o ōna foliga ua pei o se uila, ma ōna la'e'i ua sisina e pei o se kiona, ma ua tetemū ai fitafita na leoleoina le tu'ugamau, ma “ua liua i latou e pei o tagata oti” (Mataio 28:3, 4). O le mea lenei na tupu ina ua tauēmu ma fāifāi i le Atua Sanerivi le tupu fa'amaualuga o Asuria. “O lea lava pō na alu atu ai le agelu a Ieova, ua fasi i le togālauapi a Asuria o tagata e 185,000.” Na fa'apenā ona fa'aumatia e le agelu o “toa malolosi uma, ma ta'ita'i, ma ali'i 'ave 'au” o le vaega'au a Sanerivi. “Ona toe fo'i atu ai lea o ia ma le mā i lona nu'u” (II Nofoa'iga Tupu 32:21).

(9) O LE Ā LE MEA NA TUPU I LENEI MATĀ'UPU SA FA'AALIA AI LE MANA E I AI I SE AGELU E TO'ATASI A LE ATUA?

O lea lava pō na alu atu ai le agelu a le Atua, ua fasi i le togālauapi o Asuria o tagata e selau afe ma afe e vālu sefulu ma afe e lima. Ua ala o latou na totoe i le taeao lava, fa'auta, o tagata oti i latou uma.

II Tupu 19:35

O le mea lenei na tupu ina ua tauēmu ma fāifāi i le Atua Sanerivi le tupu fa'amaualuga o Asuria. “O lea lava pō na alu atu ai le agelu a Ieova, ua fasi i le togālauapi a Asuria o tagata e 185,000.” Na fa'apenā ona fa'aumatia e le agelu o “toa malolosi uma, ma ta'ita'i, ma ali'i 'ave 'au” o le vaega'au a Sanerivi. “Ona toe fo'i atu ai lea o ia ma le mā i lona nu'u” (II Nofoa'iga Tupu 32:21).

(10) O LE Ā LE VAEGA NA TU'U E LE ATUA I AGELU E LE'I PA'U'Ū INA UA UMA ONA AGASALA LE TAGATA?

E lē o agaga e 'au'auna ea i latou uma, ua 'a'auina e 'au'auna ona o i latou o ē a maua le ola?

Eperu 1:14

O agelu o 'avefe'au ia a le lagi ua 'auina mai ma fe'au o le alofa i le fanau a le Atua. Na fa'apenā ona 'auina mai o le agelu iā Aperā'amo ma folafolaga o le manuia; na 'auina mai fo'i agelu i faitoto'a o Sotoma la te lavea'iina Lota mai le afi na fa'atafunaina ai lenā 'a'ai. Na 'auina mai le agelu i a Elia ina ua tai oti o ia i lona lē lavā ma lona fia'ai i le toafa; na 'auina mai fo'i agelu ma kariota afi latou te si'osi'omia le 'a'ai na lamatia ai le ola o Elisaia. Na 'auina mai le agelu i a Tanielu a o ia ole atu mo le poto fa'alelagi o totonu o le maota o se tupu fa'apaupau, ma lavea'iina ai fo'i o ia nai le lua o leona. Na 'auina mai le agelu na te lavea'ia Peteru mai le falepuipui, ma lavea'iina Paulo ma Sila i le falepuipui i Filipi, ma lavea'iina Paulo ma ana uō i le pō na latou āfātia ai i le sami. Na 'auina mai le agelu na te saunia le mafaufau o Konelio na te taliaina le fe'au o le talalelei, ma fa'atasi ma Peteru a o ia avatua le fe'au o le fa'aolataga i lenei tagata o nu'u 'ese. Na fa'apenā ona galulue o agelu a le lagi mo le fanau a le Atua i augātupulaga uma.

(11) O Ā MEA E FAIA E AGELU MO I TATOU TA'TO'ATASI UMA LAVA?

E tō lauapi le agelu a Ieova e si'osi'omia ai ē o matata'u iā te Ia, e lavea'i fo'i o Ia iā te i latou.

Salamo 34:7

Ua tofia se agelu tausi mo so'o uma ta'ito'atasi o Keriso. Ua 'avea ia leoleo fa'alelagi o ni talitā latou te puipuia ē amiotonu mai le malos o le ti'āpolo. E iloa lelei lava e Satani lenei mea. O le mea lea na ia fai atu ai i le Atua: “Ua mata'u fua ea Iopu i le Atua? E te lē o si'osi'omia ea o ia ma lona fale ma ana mea uma i se pā?” (Iopu 1:9, 10). Fai mai 'upu a le faisalamo e fa'ataui i agelu puipui a le Atua: “E tōlauapi le agelu a Ieova e si'osi'omia ai ē o matata'u iā te Ia, e lavea'i fo'i o Ia iā te i latou” Ua fetalai fo'i le Fa'aola e uiga iā i latou o ē fa'atuatua iā te Ia: “Ia outou, ne'i tou manatu fa'atauva'a i se tasi o nei tagata maulalo; auā 'Ou te fai atu iā te outou, o a latou agelu i le lagi e lē aunoa ona latou

va'ava'ai i fofoga o Lo'u Tamā o i le lagi" (Mataio 18:10). E avanoa pea lava le faitoto'a i le nofoāli'i o le Atua, mo agelu ua tofia latou te 'au'auna i le fanau a le Atua.

Ua feagai le fanau a le Atua ma le malosi taufa'asesē o le ali'i o le pōuliuli, fa'apea ma lona taufa'aleaga faifaipē. Ua latou tau le taua ma 'au uma o le pōuliuli. Peita'i ua folafolaina mai e le Atua le fa'atasi mai pea o agelu a le lagi e leoleo iā i latou. Ua lē faia fua lenei folafolaga. Ua fa'apogai lenei folafolaga o le puipuga ma le fa'amalosiga ona o lo o i ai 'au o agaga leaga malolosi o le a latou fetāui - o 'au e mānomāno, o 'au e lē fiugofie, o 'au e ao ona tatou mataāla i lo latou leaga ma lo latou malosi ma a latou fa'agaioiga.

(12) O LE Ā LE MEA NA SUIA AGELU PA'IA MA 'AVEA AI LATOU MA TEMONI?

Auā afai na lē fa'asaina e le Atua le 'au agelu o ē na agasala, a ua na tu'uina atu i latou i maea u'amea o le pogisā i seoli, ina ia taofia i latou e o'o i le fa'amasinoga.

II Peteru 2:4

A o lumana'i le ofi mai o le agasala, sa tutusa lelei i latou nei ma agelu a le Atua i lo latou natura, ma lo latou malosi, ma lo latou mamalu. Peita'i, talu ai lo latou pa'ū'ū ma la latou fouvalega, ua 'u'ulima fa'atasi nei i latou mo le taufa'aleaga i le Atua, ma le fa'a'umatiāga o tagata. Na latou tutū fa'atasi ma Satani i le fouvalega, na tuli'esea fa'atasi fo'i i latou ma Satani mai le lagi. Talu mai lava lenā taimi, o lo o latou galulue fa'atasi pea lava ma Satani i lana tete'e i le pule a le Atua. O lo o tā'ua e le Tusi Pa'ia la latou so'o tu'ufa'atasi, ma la latou faigāmalō, ma le fa'avasegaina o a latou vaega 'ese'ese, ma lo latou atamai, ma a latou togafiti poto, ma a latou fāufauga leaga e tete'e atu ai i le filemū ma le fiafia o tagata.

(13) O Ā ALA O LO'O FA'AAOGĀ E SATANI E FA'ASESĒ MA PULEA AI LE AIGĀ TAGATA?

Auā o agaga ia o temoni e fai fa'ailoga, ua latou ō atu i tupu o le lalolagi ma le atulaulau uma, e fa'apotopoto iā te i latou i le taua i le aso tele o le Atua e Ōna le malosi uma lava.

Fa'aaliga 16:14

Ua tā'ua mai i le tala fa'asolo o le Feagaiga Tuai nisi o a latou fa'agaioiga lilo. Peita'i o ōna pō na soifua ai Keriso i le lalolagi, o le vaitaimi tonu lea fa'ato'ā fa'aalia mai ai le mata'utia o le malosi o agaga leaga. Na afio mai Keriso mo le fa'ataunu'uina o le fuafuāga ua fa'ata'atia mo le fa'aolataga o le tagata. Peita'i, na tonu iā Satani o le a fa'aailoa lana āiā na te pulea ai le lalolagi.

(14) O FEA O LE A NOFOMAU AI 'AU A LE AMIOLEAGA PE A FA'ATAGAINA E LE TAGATA AGASALA?

Ua o'o i le afiafi, ona latou 'aumai ai lea iā te Ia o tagata e to'atele ua ulutinoina e temoni; ona Ia tulia ai lea o agaga i le 'upu lava, ua fa'amalōlōina fo'i e Ia o i latou uma na mama'i.

Mataio 8:16

Ua manino le tala a le Feagaiga Fou e fa'ataui i tagata na ulufia e temoni. E lē o se fa'ama'i masani na maua ai i latou na o'o i ai lenei mea. Na silafia lelei e Keriso le mea ua fetāui nei ma Ia; na Ia silafia ua fa'afesaga'i nei o Ia ma le malosi o agaga leaga.

O le tala i le fa'amalōlōina e Iesu o tagata na ulufia e temoni i le nu'u o Katara, o lea tala ua fa'aailoa mai ai iā i tatou le to'atele o agaga leaga, ma lo latou malosi, ma lo latou leaga, atoa fo'i ma le mana ma le alofa o Iesu. Na malomaloā le fe'e'i o nei tagata e to'alua; e le'i mafai e se isi ona taofia pe fa'afilemūina i la'ua; ua na o le fe'e'i ma tau'alaga solo a o sau le piapia i o la gutu; na la fa'aleaga i o la tino, ma sa lamatia ai fo'i ola o tagata na tau sōsō atu i ai. Ua leaga o la mafaufau, ua fa'aleagaina fo'i ma lavatoto uma o la tino - o se va'aiga na fiafia tele ai le ali'i o le pōuliuli.

(15) E TO'AFIA TEMONI SA ULUTINOINA LE TAGATA MAI LE LAU'ELE'ELE O KATARA?

Ua fesili atu fo'i o Ia iā te ia, Po o ai lou igoa? Ona tali mai lea o ia, ua fa'apea mai, O Lekeona lo'u igoa; auā e to'atele i matou.

Mareko 5:9

O le lekeona i vaega'au a Roma, o se vaega'au lea pe tusa o le 3,000 i le 5,000 fitafita na i ai. Ua fa'avasegaina fo'i 'au a Satani i lekeona, ma e lē itiiti ifo i le lekeona e tasi le fuainumera o temoni na ulufia ai nei tagata e to'alua.

(16) E ALA I LE MANA O LE SUAFA O AI O LE A MAFAI AI ONA SOSOLA 'ESE 'AU A LE AMIOLEAGA?

Ua toe fo'i mai le to'afitugafulu ma le 'oli'oli, ua fa'apea mai, Le Ali'i e, ua usiusita'i mai temoni iā te i matou, ona o Lou suafo.

Luka 10:17

Ua faia le poloā'iga a Iesu, ona ō 'ese ai lea o agaga leaga mai nei tagata. Ua nonofo mai nei i la'ua i vae o le Fa'aola - ua malamalama lelei ma fifilemū....

Na finagalo fo'i le Fa'aola ina ia va'ai tagata o lenā itūmalō i Lona mana e lepeti ai fusi a Satani ma fa'asa'oloto ai ē ua saisaitia e ia. E ui lava la ua tu'ua e Iesu le nu'u, ua i ai nei i totonu o Katara le to'alua na Ia lavea'iina i se vavega la te molimau atu i le alofa mutimutivale o Lē na fa'amalōlōina i la'ua.

(17) O LE Ā LE GALUEGA SA FILIFILIA E ELIMA NA FA'AALIA AI O LE FILIFILIGA A LE TAGATA O LE A MAFAI AI ONA FA'AULUFALEINA LE TI'ĀPOLO?

A o Elima le makoi (auā o le uiga lea o lona igoa), ua tete'e mai o ia iā te i la'ua, ua fia fa'aliliu 'ese atu e ia i le suikonesula i le fa'atuatua.

Galuega 13:8

O le tele o tala i tagata na ulufia e temoni, o ni tala ua fa'ailoa mai ai le puapuagā ma le fa'atāugāina o nei tagata e le ti'āpolo. Peita'i, e le'i fa'apea uma i latou na ulufia e temoni. E i ai nisi na latou manana'o i temoni ina ia latou maua ai le mana e fai ai vavega. E le'i puapuagātia pe fa'atāugāina i latou nei e temoni. O lo o ta'ua e le Tusi Pa'ia ni tagata fa'apea, o ē na latou faia togafiti fa'ataulaitu. O lo o i ai Simona Makusa, ma Elima le taulaitu, fa'apea ma le 'au'auna teine na i ai le aitu vavalo, le teine lea na femulimulia'i iā Paulo ma Sila i Filipi.

(18) E FA'APEFEA ONA FA'AMATALA MAI I LENEI FUAI'UPU LE VA'AIGA FA'ALETINO O LUSIFELO - O LEA UA IGOA NEI O SATANI?

Na fa'amaualugaina lou loto i lou matagofie; ua e fa'amaumau lou poto ma lou matagofie; 'Ou te lafoina 'oe i lalo i le 'ele'ele; 'Ou te tu'uina atu 'oe i luma o tupu ina ia latou va'ava'ai iā te 'oe.

'Esekielu 28:17

Ua fefe Satani ne'i o tatou iloa ōna ala ma āna togafiti; ua leai se isi mea e sili ona fefe i ai o Satani nai lo lea. E fiafia tele Satani pe a fa'atusa o ia e tagata i ni mea e oso ai lo latou taliē ma lo latou lē popole - o le mea tonu lava lea e mana'o ai o ia, ina ia ufiufi ai lona natura moni atoa ma le uiga moni o āna fuafuāga. E fiafia tele o ia pe a tusi pe vāli ni ata ua fa'atusa ai o ia i se manu mātagā po o se mea 'auleaga po o se meaola e 'afa tagata 'afa manu. E fiafia tele fo'i Satani pe a fa'alogo o fa'aogā lona igoa i tausūāga ma ulaga a tagata o ē ua manatu o i latou o ni tagata popoto ma ua a'oa'oina lelei.

(19) O LE Ā LE FA'AGAOIOIGA O LO'O A'OA'O MAI E LE TUSI PA'IA O LE A MAUA AI LE POTO E PUIPUA AI MAI LE TAUF'AASESĒ?

Ia 'o'ofu outou i ofutau ato'atoa mai le Atua, ina ia outou mafaia ona tete'e atu i togafiti a le ti'āpolo.

Efeso 6:11

“E i ai ea se ti'āpolo?” Ua fa'alogoina so'o o faia lenei fesili i le lalolagi. O le faia so'o o lenei fesili ma le lautele o lona salalau i le lalolagi, o fa'amaoniga ia e iloa ai le poto o Satani e fa'alafi lona natura moni ma le uiga moni o lana galuega. Ua to'atele ua talitonu e leai se ti'āpolo. O lea talitonuga ua foliga mai ai ua pepelo le molimau a le Tusi Pa'ia. E to'atele fo'i i latou i le lalolagi Kerisiano ua fiafia i nei talitonuga. Tasi lea mea e iloa ai le fa'amanuiaina o le galuega a le ti'āpolo. O tagata e pito sili ona mauagofie i le galuega a Satani ma āna 'au, o i latou ia o ē manatu e leai se ti'āpolo, po o i latou o ē lē iloa e i ai ni agaga leaga. O le pogai lea ua tu'uina mai ai e le afoia a le Atua ni tala se tele ua fa'ailoa mai ai le leaga o le galuega a Satani, ma fa'aalia mai ai āna 'au fa'alilolilo, ina ia tatou nofo uta ai ma mataāla i āna osofa'iga.

(20) O LE Ā LE FOLAFOLAGA TĀUA E FA'ATATAU I LE PUIPUIGA E MAFAI ONA TATOU TAPĀ PE A OSOFIA I TATOU E 'AU A LE AMIOLEAGA?

Outou o ē ua alolofa atu iā Ieova, ia outou 'ino'ino i mea leaga; o lo'o tausi e Ia i agaga o Ōna tagata amio Atua; Na te lavea'iina i latou ai lima o ē amio leaga.

Salamo 97:10

Ana leai le malosi ma le mana sili o lo tatou Fa'aola tatou te sulufa'i i ai mo le laveā'iga, semanū tatou te atuatuvaale ona o le malosi ma le mana ma le matau'a o Satani ma āna 'au. Ua tatou tapunipuni ma loka o tatou fale ina ia puipuia ai i tatou ma a tatou mea totino mai tagata leaga. Peita'i ua seāseā ona tatou mafaufau i agelu leaga o lo o sa'ili mai pea i taimi uma so latou avanoa iā i tatou. E leai ma so tatou puipuiga mai a latou osofa'iga pe a tatou fa'alagolago i lo tatou lava malosi. Afai e fa'atagaina e le Atua i latou, e mafai ona latou fa'aleaga o tatou mafaufau, ma fa'atāugāina ma fa'atama'ia fo'i o tatou tino, ma fa'a'umatia o tatou ola ma a tatou mea totino. Na o le tasi le mea latou te maua ai le 'oli'oli, o le faia lea o le galuega o le malaia ma le fa'afanoga. E mata'utia le tulaga e o'o i ai i latou o ē te'ena a'oa'oga o le Afioga a le Atua a e gaua'i atu i fa'aosoosoga a Satani. E i'u lava ina tu'uina atu i latou e le Atua e fai i ai le faitalia a agaga leaga. Peita'i o ē mulimuli iā Keriso latou te saogalemū pea lava i lalo o Lana tausiga. E 'auina mai le lagi agelu e sili lo latou malolosi e puipui iā i latou. E lē mafai e Satani ona sao i le pā ua puipuia ai e le Atua Lana fanau.

Ua 'ou maua lemalamalama mai le Afioga a le Atua ua 'a'afia a'u i totonu i se taua fa'aleagaga, i le vā o le lelei ma le leaga. Ua 'ou iloa o le mana fa'atemoni e lē o agaga o tagata ua maliliu, a e peita'i o agelu ua pa'ū'ū o lo'o sa'ili e fa'a'umatia a'u ona ua 'ou talia le meaalofo o le alofa tunoa a le Atua.

Li'o le Tali:

Ioe

Lē Mautonu

'Ou te fa'afetai ina ua 'auina mai e le Atua Āna 'avefe'au fa'alelagi e le'i pa'ū'ū, ma 'au'aunaga mo o'u mana'oga ma puipuia ai a'u a o faia pea lenei finauga.

Li'o le Tali:

Ioe

Lē Mautonu

Ua 'ou iloa e lē mafa'atusaina a'u i le poto, mana, ma agava'a o Satani ma āna 'au amioleaga. 'Ou te fa'afetai i le Atua e mafai ona 'ou 'a'apaatu i le mana fa'alelagi i le suafa o Keriso ia fa'asa'olotoina ai mai nei 'au a le amioleaga.

Li'o le Tali:

Ioe

Lē Mautonu

'Ou te iloa i nei aso tau fa'ai'ui'u o le a fa'aaogā uma le mana o le pogisā e faia ai fa'ailoga fa'avavega ia tau fa'asesē mai iā te a'u. 'Ou te tatalo mo le Agaga Pa'ia ia na ta'ita'i la'u su'esu'ega o le Afioga a le Atua ina ia lē fa'asesēina ai a'u.

Li'o le Tali:

Ioe

Lē Mautonu

Manatu Mai le Su'esu'ega

Tatalo e Mana'omia

Tali o Tatalo

O Mailei a Satani - 4

(1) O LE Ā LE FA'AMOEMOEGA TUPITO O SATANI I LENEI FINAUGA TELE?

Ua ia lafo fo'i iā te ia i le tō e lē gata, ua pupuni fo'i iā te ia, ma tu'uina atu le fa'amaufa'ailoga i ōna luga, ina ia lē toe fa'asesēina e ia o nu'u, se'ia atoa ia tausaga e afē; e mavae fo'i ia, e tataua ona tatalaina o ia i nai aso.

Fa'aaliga 20:3

Ua toetiiti ona fa'ai'uina lea o le taua tele i le vā o Keriso ma Satani, o se taua ua toe itiiti ono afe nei tausaga o fai; ma ua fa'atetele atili nei faiga a le ti'āpolo ina ia fa'ato'ilaloina ai le galuega a Keriso mo tagata, ma ia maua ai i latou i āna mailei. O le sini o galuega uma a le ti'āpolo o lona taofia lea o tagata i le pogisā ma le olaga lē salamō se'ia o'o ina i'u le galuega fautua a le Fa'aola, ona lē toe maua ai lea o se taulaga mo le agasala.

(2) O LE Ā LE FA'ATONUGA E LUA ŌNA VAEGA UA TU'UINA MAI IĀ TE I TATOU E PUIPUA AI I TATOU MAI TAUFUA'ASESĒGA A SATANI?

O le mea lea ia outou gaa'i ai i le Atua; ia outou tete'e atu i le ti'āpolo, ona sola 'ese ai lea o ia iā te outou.

Iakopo 4:7

E leai se popole o Satani pe a leai ni taumafaiga fa'apitoa a tagata ina ia tete'e ai i lona malosi. A va'aia le olaga fa'alēpopole i mea fa'aleagaga i totonu o le ekalesia fa'apea ma le lalolagi, ona lē popole fo'i lea o Satani. Peita'i, o le taimi lava e fa'amanatuina mai ai i tagata le tāua o le ola e fa'avavau, o le taimi lava e fesili ai tagata po o le ā se mea e ao ona latou faia latou te maua ai le ola e fa'avavau, o le taimi lava fo'i lea e tula'i mai ai Satani e fa'afetaui lona malosi ma le malosi o Keriso, ma faia ai so'o se fa'agaioiga e fa'alavelave ai i le galuega a le Agaga Pa'ia.

(3) O LE Ā LE FAUTUAGA FA'ALE-TUSI PA'IA O LE A FESOASOANI IĀ I TATOU E FA'ATO'ILALOINA AI TU'INANAU O LE TINO?

'Ou te fai atu, ia outou savavali i la le Agaga, ona lē faia lea e outou o le tu'inaanau o le tino.

Kalatia 5:16

A lē o lea, ua va'ai Satani ua mamafa i loto o 'au'auna a le Ali'i le tulaga pogisā fa'aleagaga ua ufiufi ai nei tagata. Ua fa'alogi Satani o fai a latou talosaga fa'atauānuu mo le malosi fa'alelagi ina ia lūlūina ai o le olaga fa'alēpopole ma le fa'apaiē o tagata i mea fa'aleagaga. O le taimi lea o le a fa'ateteleina ai le faiga o āna togafiti. Ua ia alu atu nei ma fa'aosooso tagata latou te so'ona 'a'ai po o le fa'amalie fo'i i isi o mana'o o le tino, ina ia 'avea lea ma mea e pē ai le mafaufau ma lē lagonaina ai e tagata le tāua o le fe'au sa tataua ona goto ifo i o latou loto.

(4) O Ā TATA'IGA 'ESE TĀUA E TOLU O LO'O FA'AAOGĀ E SATANI E TA'ITA'I 'ESE AI O TATOU MAFAUFAU MAI MATĀ'UPU E FA'AVAVAU?

O le loto popole i mea a lenei lalolagi, ma le pepelo o le 'oa, ma le tu'inaanau i nisi mea, ua o'o atu i totonu o le loto, ua fetina'iina ai le 'upu, ona lē fua mai lava lea.

Mareko 4:19

Ua iloa lelei lava e Satani e leai se fa'alētonu o lona manumalō iā i latou o ē fa'atamala i le tatalo ma le su'esu'eina o le Tusi Pa'ia. O le mea lea e taumafai malosi ai Satani ina ia pupū le loto o le tagata i lea mea ma lea mea.

(5) E FA'APEFEA ONA FA'AAOGĀINA E SATANI I LATOU O Ē TA'U MAI O LATOU O KERISIANO A E LĒ MONI?

'Ou te 'ai'oi atu fo'i iā te outou, le 'au uso e, ia outou va'ava'ai i ē fa'atupu fevaevaea'iga, ma mea e tausuai ai; o mea ia e lē tusa ma le matā'upu ua a'oa'oina ai outou; ia outou liliu 'ese fo'i iā te i latou.

Roma 16:17

E leai se augātupulaga po o se 'aulotu e lē maua ai i latou o ē fai mai o i latou o Kerisiano a ua latou lē naunau ina ia mulimuli i le 'upu moni. O la latou lotu masani o le sa'ili'ili leaga po o le sa'ili'ili sesē lea i olaga po o talitonuga o tagata latou te lē fiasia i ai. O i latou nei o lima taumatau o Satani. E to'atele i latou ua ta'ua o ē taumōlimoli i le 'au uso; ma e fa'atitino lava la latou galuega i le taimi e galue ai le Atua i loto o Lana fanau, ma ua avatu e Āna 'au'auna le vi'iga

iā te Ia. Latou te taumafai e mimilo 'upu po o mea e fai a i latou o ē usiusita'i i le 'upu moni. A latou va'ai i 'au'auna fa'amaoni ma le ma'elegā a Keriso ona latou fai mai lea o tagata ia ua fa'asesēina po o tagata taufa'asesē fo'i. O la latou galuega masani o le taufa'aleaga lea i amio po o galuega lelei a 'au'auna a Keriso; latou te faia le galuega o le fela'ula'ua'i ma le taufa'aleaga ina ia tupu mai ai le femasalosaloa'i. Latou te fa'aaogāina so'o se 'auala latou te iloina ia mimilo ai le galuega lelei ma le amiotonu ina ia foliga mai ai o se mea mātagā po o se mea taufa'asesē.

(6) Ē FA'APEFEA ONA FA'AILOA MAI E LE TUSI PA'IA I LATOU O Ē TAUFA'ASESĒ?

Tou te iloa i latou i o latou fua. Pe tau mai ea e tagata se fui'ui vine mai le la'au tuitūi, po o mati i le la'au talatala?

Mataio 7:16

Peita'i e lē tatau ona fa'asesēina ai se tasi iā i latou ia. E iloagofie lava i a latou mea e fai lo latou tamā, ma lo latou ta'ita'i... O o latou uiga ua fa'ailoa mai ai e so'o uma lava i latou iā Satani le taufa'aleaga silisili, o ia o lē taumōlimoli i le 'au uso (Fa'aaliga 12:10).

Ua saunia lelei e le ti'āpolo a'oa'oga sesē e tele ina ia fetau lelei ma mana'oga o i latou ua ia galue i ai mo lo latou fa'afanoga. Ua fa'ata'atia le fuafuāga a Satani ina ia aumaia i totonu o le ekalesia i latou o ē le'i liua, ina ia fa'amālosia atili ai le masalosalo ma le lē talitonu, ma fai ma fa'alavelave iā i latou ua galulue mo le fa'alauteleina o le malō o le Atua. E to'atele e leai so latou talitonuga moni i le Atua po o Lana afioga. Peita'i ua latou ioe i ni nai a'oa'oga o le 'upu moni, ona ta'ua ai lea o i latou o ni Kerisiano. Ua fa'apenā ona ofi mai o o latou talitonuga sesē i totonu o le ekalesia, ma ua a'oa'oina ai e pei o ni a'oa'oga a le Tusi Pa'ia.

(7) O LE Ā LE I'UGA E O'O I AI PE A TALIA LE 'UPU MONI?

E iloa fo'i e outou le mea moni, e tu'u sa'oloto fo'i outou e le 'upu moni.

Ioane 8:32

Ua manatu nisi e leai se āfāina tusa lava po o le ā le mea latou te talitonu i ai. O se tasi lenei o mailei ua sili ona manuia a Satani. Ua iloa lelei e Satani e fa'apa'iaina le olaga o le tagata e le 'upu moni pe a talia e ia lea 'upu moni ma le fiafia. O le mea lea ua ia sa'ili'ili ai ina ia fa'aofi mai a'oa'oga sesē po o se isi talalelei i totonu o le ekalesia. Talu mai lava le amataga, o lo o galulue pea 'au'auna a le Atua e tete'e atu i a'oa'o ma perofeta pepelo, o ē fa'aofi maia a'oa'oga pepelo e fano ai le agaga. Na fa'apenā ona tutū atu ma le lē fefefe Elia, ma Ieremia, ma Paulo latou te tete'e iā i latou o ē na taumafai latou te liliu'eseina mafau'au o tagata mai le afioga a le Atua. E le'i lagolagoina e nei 'au'auna a le Atua le manatu fa'apea e lē āfāina po o le ā le mea e te talitonu i ai.

(8) O LE Ā LE MEA O LE A TUPU IĀ I LATOU O Ē FA'AUIGA SESĒ LE AFIOGA A LE ATUA INA IA FETAUI LELEI MA O LATOU LAVA TALITONUGA?

E pei o āna tusi uma lava, o lo'o talatalaina ai nei mea; o i ai nisi 'upu fa'amatalagatā, ua fa'auiga'ese e tagata e le'i a'oa'oina, ma ua lē fa'atuma'ina, fa'apei o isi Tusi fo'i e o'o ai lo latou lava malaia.

II Peteru 3:16

Ua lē masino le anoanoa'i o le mau tala'iga ma a'oa'oga o le Tusi Pa'ia ua maua i totonu o le lalolagi Kerisiano. Ua tula'i mai lenei tulaga ona o le galuega a le fili. Ua mana'o Satani ina ia fenumia'i mafau'au o tagata ma latou lē mafai ai ona iloa po o le fea le 'upu moni. Ua tupu le tele o fevaeaea'iga i totonu o le anoanoa'i o ekalesia i le lalolagi Kerisiano talu ai le mea masani o le lolo'u atu o 'upu o le Tusi Pa'ia e lagolagoina ai se manatu fa'apelepele o nisi. Ua lē su'esu'e le to'atele i le afioga a le Atua i le agaga maulalo ma le fa'aeteete ina ia latou iloa ai le finagalo o le Atua, a ua latou su'esu'e i le Tusi Pa'ia ina ia latou maua ai se mea fou po o se mea latou te fa'aofoina ai nisi.

(9) O LE Ā LE LAPATA'IGA UA TU'U MAI IĀ I LATOU O Ē ATONU UA MANATU LATOU TE SUIA LE UIGA O LE AFIOGA A LE ATUA?

Auā 'ou te ta'utino atu iā te i latou uma o ē fa'alogo i 'upu o le valo'aga o lenei tusi, Ai se tasi e fa'aopoopo mai se 'upu i nei 'upu, e fa'aopoopoina atu e le Atua iā te ia o mala ua tusia i lenei tusi. Ai se tasi fo'i e 'ave'ese se 'upu i 'upu o le tusi o lenei valo'aga, e 'ave'eseina e le Atua lona tofi i le tusi o le ola, ma le 'a'ai pa'ia, ma mea ua tusia i lenei tusi.

Fa'aaliga 22:18, 19

E i ai nisi ua latou tau ane i se mau o le Tusi Pa'ia ona latou taofi mau lea i ai ona e foliga mai ua lagolagoina ai so latou manatu sesē po o mea fo'i o latou faia e lē tusa ai ma a'oa'oga a Keriso. Ua fa'apenā ona latou si'i maia na o se

vaega o le mau e fa'amaonia ai lo latou manatu. Peita'i a latou faitau i le mau atoa, ona latou iloa ai lea o le 'ese'esega tele o le mea ua fai mai ai le Tusi Pa'ia ma le mea ua latou lolo'u i ai 'upu o le afioga a le Atua. Ua popoto i latou e pei o se gata i le atina'e o ni mau ma ni fa'amatalaga fa'alēfetaui e fai ma pā latou te lalafi ai ma fa'amalie ai pea o latou tu'inaanau. Ua fa'apenā ona mimilo ma fa'auigasesēina e le to'atele le afioga a le Atua. O isi ua latou liliu i fuainumera ma ata ma fa'atusa ua fa'aaogāina e le Tusi Pa'ia, ona latou fa'auigaina lea o nei fa'atusa ina ia tusa ai ma o latou mana'o. Ua galo iā i latou e ao ona 'avea le Tusi Pa'ia o lona lava fa'amatala'upu. Ua latou a'oa'o atu fo'i o latou manatu ua peisea'i o ni a'oa'oga mai le Tusi Pa'ia.

O le a faigofie ona lolo'u le afioga a le Atua i le mea e mana'o i ai le tagata pe afai o le a su'esu'eina le Tusi Pa'ia e aunoa ma le tatalo, ma le loto maulalo, ma le agaga fia usita'i.

(10) O LE Ā LE MEA O LE A FAIA I LE MOLIMAU MO LE ALI'I MAI LE MAFAUFAU E AUPITO FAIGOFIE?

E sao le tulafono a Ieova, e fa'afo'isia mai ai le agaga; e fa'amaoni poloā'iga a Ieova, e fa'apotoina ai lē ua faigofie.

Salamo 19:7

Na tusia le Tusi Pa'ia ina ia 'avea o se ta'iala mo i latou uma o ē ua latou fia iloa le finagalo o le Atua. Ua tu'uina mai e le Atua i tagata le 'upu o le valo'aga e sili lona mausalī. Na fa'amalamalamaina fo'i e agelu ma Keriso iā Tanielu ma Ioane mea o le a tutupu i le lalolagi. E le'i tu'ua tagata i le pogisā e fa'ataui i mea e ao ona latou iloa mo lo latou fa'aolataga. E le'i fa'aalia mai fo'i nei mea i se 'auala e ono sesē ai pe fenumia'i ai le mafaufau o le tagata e sa'ili'ili ma le fa'amaoni i le 'upu moni. Na fetalai mai le Ali'i e ala i le perofeta o Sapakuka: “Ia e tusi le fa'aaliga ia manino i luga o papama'a, ina ia momo'e sē savali ma 'ave” (Sapakuka 2:2). Ua manino le afioga a le Atua iā i latou uma o ē su'esu'e i ai i le agaga o le tatalo. O le a lē nonofo pea i le pogisā i latou o ē sa'ili'ili ma le fa'amaoni i le 'upu moni. “Ua lūlūina le malamalama mo ē amiotonu” (Salamo 97:11).

(11) E FA'APEFEA LE SILAFAGA A LE ATUA E FA'ATATAU I LE POTO FA'ALELALOLAGI NEI?

Auā o le poto o lenei lalolagi o le valea lea i luma o le Atua; auā ua tusia, E maua e Ia o ē popoto i a latou lava togafitia.

I Korinito 3:19

Ua manatu nisi e leai se manuia e maua mai su'esu'ega fa'asaientisi. Ua fa'atagaina e le Atua se poto tele i mea fa'asaientisi, fa'apea ma le poto i matā'upu uma e uiga i le tagata, ina ia maua e le lalolagi. Peita'i, e o'o lava i tagata aupito popoto o le lalolagi, a lē ta'ita'iina o latou mafaufau e le afioga a le Atua, na o le fenumia'i e o'o i ai a o latou sa'ili'ili po o le ā tonu le feso'ota'iga po o le vāfeagai ai o le poto fa'aletagata ma le afioga fa'aalia a le Atua.

(12) E FA'APEFEA LE FA'ATATAU A LE TUSI PA'IA E UIGA I LE POTO FA'ALELALOLAGI?

Timoteo e, ia e tausi i le mea na tu'uina atu iā te 'oe, ma 'alo'alo 'ese i 'upu leaga ma le lē aogā, ma fīnauga i mea ua igoa pepelo ai i le poto.

I Timoteo 6:20

E fa'aitūtasi ma lē 'ato'atoa le malamalama o le tagata i mea fa'aleagaga fa'apea ma mea o le lalolagi nei. O le mea lea ua lē mafai ai e le to'atele ona fa'afetaui o latou talitonuga i mea fa'asaientisi, ma mau o le Tusi Pa'ia. E to'atele ua latou talia e pei o le 'upu moni taumatematega a isi tagata; ua latou manatu fo'i e ao ona fua le afioga a le Atua i le fua o a'oa'oga ua ta'ua o le poto fa'asaientisi. Ua matuā lē malamalama i latou i le Atua fa'apea ma Āna galuega. Ua lē mafai e lo latou poto fa'asaientisi ona fa'amatalaina le Atua po o Āna galuega. O le mea lea ua latou manatu ai e lē tataua ona talitonu se tasi i le tala tusia o le tagata e pei ona tu'uina mai e le Tusi Pa'ia. O ē ua manatu e lē sa'o le tala tusia o le tagata e pei ona i ai i le Tusi Pa'ia, ua latou lē talitonu fo'i i le Atua. O le mana o le Atua ua latou fai mai o le natura o mea. Ua fa'apenā ona fesoua'ina i latou i luga o papa o le lē talitonu ona ua latou fa'amamulu lo latou taula.

(13) AISEĀ O LE A LĒ MAFAI AI LAVA E LE TAGATA ONA MALAMALAMA 'ATO'ATO E FA'ATATAU I LE ATUA?

'Auē! le loloto o le tamā'o'iga o le poto ma le silafaga a le Atua. E lē masu'esu'eina Āna fa'amasinoga; e lē mafai fo'i ona iloa Ōna ala.

Roma 11:33

Ua fa'apenā ona 'ese 'ese le to'atele mai le fa'atuatua ma ua maua ai i latou e le ti'āpolo. Ua tele taumafaiga a tagata e fa'ailoa ai e sili atu lo latou poto i lo le poto o Lē na faia i latou. Ua taumafai le poto fa'aletagata e sa'ili'ili ma fa'amatalaina mealilo e le'i finagalo le Atua latou te sa'ili'ili i ai. Ana sa'ili'ili ma malamalama tagata i mea ua fa'aalia mai e le Atua e fa'atatau iā te Ia ma Lona finagalo, semanū ua latou maua se va'aiga o le mamalu matalasi ma le mana o Ieova. Semanū ua 'avea lea malamalama ma mea latou te lagona ai lo latou valea ma lo latou lē iloa o se mea; ona latou malilie ai lea i le mea ua fa'aalia mai e le Atua mo i latou ma a latou fanau.

E to'atele ua latou sa'ili'ili ma fai taumatematega e fa'atatau i mea e lē finagalo le Atua ina ia fa'aalia mai i tagata. O se tasi lenei o au'upega aupito malosī a Satani i lana galuega tauafa'asesē. O le mea lava fo'i lenei na pa'ū ai Lusifelo i le lagi. Na o'o le lē fiafia iā Lusifelo ona ua lē fa'ailoaina atu iā te ia mealilo o le fuafuāga a le Atua. Ua matuā fa'agalo lava e le mafaufau o Lusifelo mea na fa'aalia atu e le Atua iā te ia e fa'atatau i lana galuega, atoa ma le tulaga maoa'e ma le fa'aeaina na tofia o ia i ai. E lē gata i lea ua ia fa'aosoina fo'i le lē fiafia i agelu na i lalo ifo o lana pule, ma ua i'u atu ai fo'i i lo latou pa'ū'ū. Lenei la ua ia taumafai fo'i ina ia fa'aosoosoina mafaufau o tagata i lenei lava agaga leaga, ma ta'ita'iina ai i latou e fa'agalo ma lē usita'i i poloā'iga manino a le Atua.

(14) O AI UA FA'ALĒTONU ONA O LE TALITONU I TAOFI SESĒ E MALOSI MAI?

O lona sau fo'i (a le amioleaga), e pei o le galuega a Satani, i le mana, ma fa'ailoga, ma vavega pepelo, ma mea fa'asesē uma o le amioleaga i ē a fano; auā ua latou lē talia le 'upu moni ma lē fiafia i ai, ina ia fa'aolaina ai i latou. O le mea fo'i lea e 'auina atu ai e le Atua iā te i latou le galuega e fa'asesē ai, ina ia latou talia le mea pepelo; ina ia fa'asalaina o i latou uma lava o e lē talia le 'upu moni, a e fiafia i le amioleaga.

II Tesalonia 2:10-12

O ē ua latou lē fia talia 'upu moni manino o le Tusi Pa'ia, ua latou sa'ili'ili mo ni fa'amatalaga e mālīe i le fa'alogō ina ia fa'afilemūina ai le loto fuatiaifo. E fiafia i latou nei i lauga e lē fa'amamafaina ai le ola fa'apa'aina ma le loto maulalo ma le ola mo isi. Ua latou fa'aaogāina lo latou poto e fa'amalieina ai o latou tu'inanau o le tino. O lo latou fa'afiapoto ua latou lē fia su'esu'e fa'amaoni ai i le Tusi Pa'ia i le tatalo ma le loto maulalo mo le ta'ita'iga a le Atua. Ua fa'apenā ona leai se mea e puipuia ai i latou mai mea tauafa'asesē a le ti'āpolo. Ua nofo sauni Satani na te fa'atumuina le mea e mana'o i ai le loto o le tagata, ma ua fa'asalalauina ana a'oa'oga e sui a'i le 'upu moni. Na fa'apenā ona maua e le pule fa'apope le malosī na te pulea ai mafaufau o tagata. Ua mulimuli atu ai fo'i ma lotu Porotesano i le 'auala lava lea e tasi ina ua latou te'ena le 'upu moni talu ai le faigatā o le amoina o le satauro. E to'atele ua latou lē fia su'esu'e i le afioga a le Atua, a ua latou su'esu'e i ni 'auala faigofie, 'auala e tutusa ma mea e mana'o i ai o latou loto, 'auala e fiafia mai ai le lalolagi iā i latou. O le a tu'ufauina i latou nei e le Atua ina ia latou manatu ai o le 'upu moni a'oa'oga tauafa'asesē. O i latou uma latou te te'ena le 'upu moni, o le a fa'asesēina i latou i mea tauafa'asesē uma a le ti'āpolo. O nisi o i latou o le a 'ino'ino i se tasi mea tauafa'asesē, a e o le a latou talia ma lē fiafia i isi mea tauafa'asesē. Ua tautala Paulo e fa'atatau i ni tagata ua latou lē fiafia e talia le 'upu moni latou te ola ai. Fai mai Paulo: “O le mea fo'i lea e 'auina atu ai e le Atua iā te i latou le galuega e fa'asesē ai, ina ia latou talia le mea pepelo, ina ia fa'asalaina o i latou uma lava o ē lē talia le 'upu moni, a e fiafia i le amioleaga.” A o tatou fa'alogō i lenei lapata'iga, e ao lava ona tatou fa'aeteete ma mataāla ina ia tatou iloa lelei po o le fea a'oa'oga e ao ona tatou talia.

Ua ta'atele i le lalolagi a'oa'oga ma vavega tauafa'asesē a agaga leaga. O se tasi lea o fa'agaoioga aupito sili ona manuia a le ti'āpolo. Ua sau o ia ua ofu mai e pei o se agelu o le malamalama, ma ua fa'ata'atia lana mailei i le mea e lē masalomia ai o ia e se tasi. Ana su'esu'e tagata i le afioga a le Atua ma tatalo fa'amaoni mo le malamalama, semanū e lē nofo pogisā i latou, ma i'u ai ina latou talia a'oa'oga sesē. Peita'i o lo latou te'ena o le 'upu moni, o lo latou pa'ū atu fo'i lea i le mailei ma le mea tauafa'asesē.

(15) O LE Ā LE MEA O LO'O FA'ATONU MAI IA TATOU 'ALO 'ESE AI?

Ua outou fa'alēaogāina ai le afioga a le Atua i a outou 'uputu'u, ua outou tu'uina mai. O isi fo'i mea fa'apenā e tele ua outou faia.

Mareko 7:13

Ua lē masino le mau a'oa'oga sesē ua salalau i totonu o ekalesia 'ese'ese o le lalolagi Kerisiano. E lē mafai ona tatou malamalama i le leaga e i'u i ai le 'ave'esea o se tasi o a'oa'oga autū o le afioga a le Atua. O ē ua amata ona latou te'ena se tasi o nei a'oa'oga, e scāscā gata ai i le tasi. O le to'atele ua uia lea 'auala latou te amata i le te'ena o se a'oa'oga e tasi o le afioga a le Atua, ona soso'o ai lea ma se isi a'oa'oga ma se isi, se'ia o'o lava ina 'avea ai i latou o nisi ua lē toe talitonu i le Atua po o Lana afioga.

E to'atele agaga ua ta'ita'iina ina ia lē toe talitonu i le Atua po o Lana afioga talu ai le a'oa'oga ta'atele fa'apea o le Tusi Pa'ia e lē o le afioga lea a le Atua. E lē mafai e ni tagata fa'apea ona latou talia o ni a'oa'oga e lē ō gatasi ma o latou talitonuga i matā'upu e pei o le amiotonu, ma le alofa tunoa, ma le agalelei. Ua fa'apenā ona latou fa'amasesēi ma le Tusi Pa'ia ona e lē ō gatasi ana a'oa'oga ma o latou manatu. O le a lē mafai fo'i la ona latou talitonu o le Tusi Pa'ia o le afioga a le Atua.

(16) AISEĀ E FAIGATĀ AI LE TAOFIMAU MA LE MATUĀ FA'ATĀUAINA O TŪ MASANI A TAGATA?

Ua fetalai atu fo'i o Ia iā te i latou, Ua lelei lo outou fa'alēaogāina le poloā'iga a le Atua, ina ia outou taofi a outou 'uputu'u.

Mareko 7:9

O le mea tonu lava lenei o lo o mana'o i ai Satani. O le sini numera muamua lenei a Satani ina ia lē toe talitonu tagata i le Atua po o Lana afioga. Ua a'e mai i nei ōna pō le masalosalo i le Atua ma Lana afioga. E to'atele ua latou lē fiasia i le afioga a le Atua ona ua fa'aalia ma a'oa'ia mai ai a latou agasala. O le mea lava fo'i lea na lē fiasia ai Satani i le Atua i le amataga. O ē lē fia usita'i i poloā'iga a le Tusi Pa'ia, ua latou taumafai e lafotūina le pule a le afioga a le Atua. Ua mafua ona latou faitau i le Tusi Pa'ia pe fa'alogo fo'i i a'oa'oga o le Tusi Pa'ia mai le pulela'a, ona o lo o latou sa'ilia ni mea e sesē ai le Tusi Pa'ia, po o ni pona fo'i o le lauga. E to'atele na latou amata i le sa'ilia o ni mau e lagolagoina ai lo latou lē usita'i i poloā'iga, a e fa'ai'u ane ua latou lē toe talitonu i le Atua po o Lana afioga. O isi ua latou talia a'oa'oga fa'apenei ona o lo latou lotovi'i ma le fa'apaiē. Ua latou fiasia i se olaga faigofie, se olaga e lē tau'aveina ai se satauro. Ona latou mana'o loa lea ina ia maua so latou vi'iga, e ala i lo latou faifaipona i a'oa'oga a le Tusi Pa'ia. Ua latou faitio i le Tusi Pa'ia ona o le tele o mea faigatā ua latou lē malamalama i ai. E tele mea e lē mafai ona malamalama i ai le mafaufau fa'aletagata pe a lē fa'asusuluina mai i ai le malamalama o le Atua. E to'atele ua manatu o se mea tāua lo latou faia o ni fesili e masalomia ai le Atua po o a'oa'oga o le Tusi Pa'ia. E foliga mai i fafo nei tagata o ni tagata su'esu'e fa'amaoni i le afioga a le Atua; peita'i o lo o nanā e ia foliga fa'amaoni le fiapoto ma le lotovi'i - o pogai tonu ia ua latou tutū ai i le itū o le masalosalo ma le lē talitonu. Ua fiasia le to'atele latou te sa'ili mo se mea fou po o se mea ofoofogia i le Tusi Pa'ia e fa'aofa ai nisi. O nisi ua latou fesilisili ma masalosalo ona o lo latou fiasia i finauga ma le faia o fa'atau i matā'upu o le Tusi Pa'ia. Latou te lē iloa o le 'auala tonu lava lea latou te lavelavea ai i le mailei ua fa'ata'atia e le ti'āpolo. Atonu na amata o se finauga fa'aulaula, a e fa'ai'u ane ua faigatā ona toe suia lo latou itū ne'i maua ai so latou masiasi. Ua fa'apenā ona latou 'u'ulima fa'atasi ma ē amiroleaga, ma ua latou tapunia ai le Lagi mo i latou lava.

(17) O AI O LE A MAUAINA LE FESOASOANI A LE AGAGA PA'IA?

O lenei, o outou e leaga; afai ua iloa e outou ona avatu o mea lelei ma a outou fanau, e lē sili ea ona foa'iina mai e lo outou Tamā o i le lagi le Agaga Pa'ia i ē ōle atu ai iā te Ia?

Luka 11:13

Ua lava molimau ua tu'uina mai e le Atua i Lana afioga e fa'ailoa mai ai o le Atua e pogai mai ai le Tusi Pa'ia. Ua manino fo'i a'oa'oga a le Tusi Pa'ia e fa'ata'au i 'upu moni autū o le fa'aolataga. E mafai e so'o se tasi ona malamalama i nei 'upu moni uma pe a ole atu mo le ta'ita'iga a le Agaga Pa'ia. Ua folafola mai le Agaga Pa'ia iā i latou uma o ē sa'ili i ai ma le fa'amaoni. Ua tu'uina mai e le Atua se fa'avae mautū e taula i ai le fa'atuatua o so'o se tasi e fia talitonu.

(18) O LE Ā LE FOLAFOLAGA TĀUA I LENEI FUAI'UPU E MAFAI ONA TATOU TAPA I AI?

O le fa'atuatua i le Atua, e sili lea i le fa'alagolago i tagata.

Salamo 118:8

Peita'i, e lē mafai e mafaufau o tagata ona malamalama 'ato'atoa i le finagalo ma fuafuāga a le Silisili 'Ese. Tatou te lē maua le Atua i a tatou su'esu'ega ma sa'ili'iliga. Ia tatou 'alo 'ese mai le fa'aosoosoga o lē fia sa'ili'ili i mea e le'i finagalo le Atua e fa'aalia mai iā i tatou. Fai mai le aposetolo: “Auē le loloto o le tamao'aiga o le poto atoa ma le silafaga a le Atua. E lē masu'esu'eina Āna fa'amasinoga; e lē mafai fo'i ona iloa Ōna ala” (Roma 11:33). Ua pulea e le Atua mea uma i Lōna poto ma Lana amiotonu. 'Aua ne'i tatou lē fiasia pe lē talitonu pe a lē fa'aalia mai e le Atua nisi o mea iā i tatou; o la tatou vaega o le gaua'i ma le usita'i i le āva e tatau ai. E fa'aalia mai e le Atua mea uma e ao ona tatou iloa e fa'ata'au i Lona finagalo ma Āna fuafuāga, pe afai o le mea sili lea mo i tatou. A o se isi mea i tua atu o lenā, e ao ona tatou fa'atuatua le 'a'ao o Lē Ōna le malosia uma lava, ma le Finagalo ua tumu i le alofa.

(19) O LE Ā LE FA'AI'UGA MATA'UTIA O LE AGASALA MA LE LĒ TALITONU O LO'O TU'U MAI I LE LAPATA'IGA I LENEI FUAI'UPU?

Le 'au uso e, ia outou i ne'i ai i so outou le loto leaga ma le lē talitonu, tou te ō 'ese ai i le Atua soifua; a ia outou fēfa'amafanafana'i i lea aso ma lea aso, manū o ta'ua o le aso nei, ina ne'i loto fatu so outou i le pepelo o le agasala.

Eperu 3:12, 13

Ua lava molimau ua tu'uina mai e le Atua e taula i ai lo tatou fa'atuatua; peita'i e lē 'ave'esea e le Atua mea uma e ono fai ma 'alofāga o ē lē fia talitonu. O i latou uma o ē sa'ili'ili mo ni 'alofāga e fa'ama'ite ai lo latou masalosalo, o le a tele ni 'alofāga latou te maua. O i latou uma o ē lē fia usiusita'i i le afioga a le Atua se'ilogā ua fa'alamolemoleina 'auala uma ma ua leai ni toe masalosaloga ma ua maua le tali o a latou fesili uma, e lē o'o lava i latou ia i le malamalama.

(20) O LE Ā LE TALI MAI LE UIGA MONI O SE MAFAUFAU E FA'ALETINO?

Ona 'a'apa atu loa lea e Iesu o Lona 'a'ao, ua tago iā te ia, ua fa'a'apea atu iā te ia, O 'oe nā lē fa'atuatua itiiti, se ā le mea ua e masalosalo vale ai?

Mataio 14:31

O le lē talitonu i le Atua o le fua lea o le loto e le'i fanaufouina. Peita'i o le fa'atuatua o le fua lea o le galuega a le Agaga Pa'ia. E lē mafai ona tupu lea fua se'ia vāganā ona ua fa'apelepele i ai. E leai se tasi e tupu ma malosi lona fa'atuatua e aunoa ma lona galue finafinau; o se tasi o 'auala e tupu ai le fa'atuatua o le mafaufau lea ma talatalanoa i fa'a'ailoga ua tu'uina mai e le Atua mo le fa'amālosia o le fa'atuatua. Peita'i e tupu fo'i le lē talitonu pe a fa'amalosia i masalosaloga ma fesili ma faitioga.

(21) O LE Ā LE TA'IALA FA'ALE-TUSI PA'IA O LE A O'O MULIMULI MAI IĀ I LATOU O Ē MASALOSALO MA LĒ FA'ATUATUA I LE ATUA?

'Aua ne'i fa'asesēina outou, e lē ulagia le Atua auā o le mea e lūlūina e le tagata, o le mea lava lea e seleseleina mai e ia.

Kalatia 6:7

O i latou o ē faia ia faitioga ma ua masalosalo i folafolāga a le Atua, ua latou le āva iā te Ia. O a latou faitioga ma masalosaloga ua lē tosina mai ai isi iā Keriso, a ua 'ave'esea ai nisi mai iā te Ia. Ua pei i latou o ni la'au ua na o lau a e lēai ni fua, ma ua 'avea o latou lālā ma mea ua paologia ai uma isi la'au iti ma ua lē maua ai e i latou le lā e ola lelei ai. O le a ola a'e i se taimi fua o la latou galuega e molimau i le leaga o la latou mea ua fai. Ua latou lūlūina nei fatu o le masalosalo ma le lē talitonu; ma e lē taumatea le tele o le seleselega o le a maua i lea galuega leaga.

(22) O LE Ā LE LA'ASAGA MUAMUA I LE FA'ASA'OLOTOINA MAI LE MASALOSALO I TALITONUGA?

Ai se tasi e fia fai Lona finagalo, e iloa ai e ia le matā'upu, pe mai le Atua, pe 'Ou te tautala fua lava A'u.

Ioane 7:17

O lo o i ai se vaifofō mo ē ua naunau fa'amaoni mo se togafitiga o le masalosalo ma le lē talitonu. Soia le toe faitio ma masalosalo i mea ua latou lē malamalama i ai, a ia latou usita'i ma savavali e tusa ma le malamalama ua sulugia ai i latou. A fa'apenā ona latou faia, o le a latou maua nisi 'ave malolosi o le malamalama e faigofie ai ona latou malamalama i mea ua latou fa'alētonu ai nei.

(23) O Ā ALA E LUA O LO'O I AI MO I TATOU INA IA MAUA AI LE FA'ATUATUA E SILI ONA MAUTŪ?

O lenei, e tupu le fa'atuatua i le taologologo atu, o le taologologo atu fo'i o i le Afioga a le Atua lea.

Roma 10:17

(24) O LE Ā LE FOLAFOLAGA MO I LATOU O Ē O LO'O SA'ILI'ILI?

Ia outou ōle atu, ona fōa'iina mai ai lea iā te outou; ia outou sa'ili, ona outou maua ai lea; ia outou tu'itu'i atu, ona tōina ai lea iā te outou.

Mataio 7:7

E tele 'auala a Satani e fa'aofu mai ai ana mea fa'afoliga ina ia foliga tutusa ai ma le mea moni, ina ia fa'asesēina ai i latou ua loto ina ia fa'asesēina. O i latou ia e fiafia i se olaga faigofie, se olaga e lē tau'aveina ai se satauro ma lē mana'omia ai le ola mo nisi e pei ona mana'omia e le 'upu moni. Peita'i, e lē mafai ona taofia e Satani i lalo o lana pule se agaga e to'atasi ua naunau fa'amaoni na te fia iloa le 'upu moni tusa lava po o ā faigatā e o'o mai. O Keriso o le 'upu moni lea; o Ia fo'i o le malamalama e fa'amalamalamaina ai i latou uma o ē ō mai i le lalolagi (Ioane 1:9). Ua 'auina mai le Agaga o le 'upu moni Na te ta'ita'iina tagata i 'upu moni uma.

(25) AISEĀ E FA'ATAGAINA AI E LE ATUA I TATOU INA IA TOFOTOFOINA?

A e peita'i, ua silafia e Ia lo'u lava ala; a tofotofoina a'u, 'ou te sao atu ai e pei o le auro.

Iopu 23:10

E lē iloa e so'o o Keriso le tele o fāufauga leaga ua fa'ata'atitia nei e Satani ma ana 'au mo i latou. Peita'i o le poto o le Atua ua Ia pulea ai nei mea uma ina ia 'avea nei mailei o se 'auala e fa'ataunu'uina ai Lona finagalo. E fa'atagaina e le Atua Ōna tagata ina ia savavali i le afi o tofotofoga, e lē 'ona o se mea e maua mai ai Sona fiafia, a e ona e tāua tele lenei tofotofoga e sauniunia ai i latou mo lo latou manumalō i le i'uga. O le sini o ia tofotofoga o le sauniunia lea o i latou ina ia mafai ona latou tete'e i fa'aosoosoga leaga uma. O le mea lea e lē mafai ai e le Atua ona taofia le tofotofoga mai iā i latou.

(26) O AI O LE A TATOU MAUA MAI AI LE MALŌSI E TETE'E AI I FA'AOSOOSOGA?

Ua tali mai o ia, ua fai mai iā te a'u, O lo'o fa'a'apea mai, O le afioga lenei a Ieova iā Serupapelu, o lo'o fa'a'apea mai, 'E lē o le fitafita, e lē o le malosi, a o Lo'u Agaga, ua fetalai mai ai Ieova o 'au.'

Sakaria 4:6

E lē mafai e tagata amioleaga po o ti'āpolo ona latou fa'alavelave i le galuega a le Atua pe taofia fo'i le fa'atasi mai o le Atua i Ōna tagata, pe afai latou te ō atu iā te Ia i le salamō ma le loto momomo, pe afai latou te fa'aali ma tu'u 'ese a latou agasala, a e 'u'umau atu i Āna folafolaga e ala i le fa'atuatua. E mafai ona manumalō le fanau a le Atua i tofotofoga uma ma fa'aosoosoga, fa'a'apea ma mailei lilo a le fili.

(27) AISEĀ E LĒ TATAU AI ONA TATOU FEFEFE I LE MALŌSI O LE LEAGA?

Fa'auta, 'Ou te foa'i iā te outou le pule e soli ai gata ma akarava, ma le malosi uma o le fili; e leai lava se mea e leaga ai outou.

Luka 10:19

Ua iloa lelei e Satani tusa lava po o le ā le vaivai o se tasi a e a pipi'i iā Keriso, e sili atu lona malosi i lo le malosi o 'au uma o le pogisā. Ua iloa lelei fo'i e Satani afai e sau fa'aaliali o ia, o le a faigofie ona te'ena o ia. O le mea lea ua sa'ilili ai Satani i ni 'auala e tata'i 'ese atu ai fitafita o le satauro mai lo latou 'olo malosi, a e lalafi o ia ma ana 'au e fa'apō so'o se tasi e ui ane i lona fanua. E ao ona tatou fa'amaulalo ma fa'alagolago i le Atua ma usiusita'i i Āna poloā'iga - ua na o lea le 'auala e mafai ai ona tatou manumalō.

(28) O Ā MEA E LUA NA TU'U MAI E IESU E PUIPUIA AI TATOU MAI LE ULU ATU I FA'AOSOOSOGA?

Ia outou mataāla ma tatalo, ina ne'i o'o mai le fa'aosoosoga iā te outou; ua mana'o i ai le loto, a o le tino ua vaivai.

Mataio 26:41

A aunoa ma le tatalo, e leai se tasi e saogalemū mai osofa'iga a le fili mo se aso po o se itūla e tasi. E ao ona tatou ole atu fa'apitoa i le Ali'i mo le poto e mafai ai ona tatou malamalama i Lana afioga. O Lana afioga ua fa'aalia mai ai mailei 'ese'ese a le fili, atoa ma 'auala e mafai ona tatou tete'e atu ai iā te ia. Ua maua e Satani se poto fa'apitoa na te si'i mai ai mau o le Tusi Pa'ia, ma tu'u i ai ana lava fa'amalamalama'aga, ina ia pogai mai ai lo tatou pa'ū'ū. E ao ona tatou su'esu'eina le Tusi Pa'ia i le loto maualalo ma le agaga fa'alagolago 'ato'atoa i le Atua. E ao ona tatou mataāla ma tatalo e lē aunoa, ina ia puipuia ai i tatou mai mailei a Satani. Peita'i e ao fo'i ona tatou tatalo atu e lē aunoa e ala i le fa'atuatua, “Aua e te ta'ita'iina i matou i le tofotofoga.”

Li'o le tali:	Ioe	Lē Mautonu
'Ou te iloa e fa'aaogā e Satani i latou e ta'u o ē talitonu ma tagata fo'i e lē talitonu e fai ma āna mea faigaluega e tau ta'ita'i 'ese atu ai a'u. O la'u tatalo: "Le Ali'i, fa'amolemole tu'u mai iā te a'u le poto ia 'ou iloa ai nei mea fa'atosina fa'a-satani."		

Li'o le Tali:	Ioe	Lē Mautonu
<i>Ua 'ou fa'afetai mo folafolaga o le a tu'uina mai e le Atua iā i tatou le malosi e tete'e ai le leaga, ma e lē fa'atagaina lava ia tofotofoina a'u e sili atu i le mea 'ou te lavātia. 'Oua te tatolo, e ala i le fa'atuatua ma Lona alofa tunoa, o le a mafai ona 'ou manumalō ma tu'u atu le vi'iga i Lona suafa.</i>		

Li'o le Tali:	Ioe	Lē Mautonu
---------------	-----	------------

Tali o Tatalo

This image shows a blank sheet of white paper with horizontal ruling lines. The lines are evenly spaced and extend across the width of the page. There are no margins, text, or other markings on the paper.

O le Ulua'i Pepelo - 5

O le amataga lava o le tala tu'ufa'asolo o le tagata, na amata mai ai fo'i taumafaiga a Satani e fa'asesē ai iā i tatou. Ua uma ona fa'atupu e Satani le fouvalega i le lagi; a o lenei ua mana'o latou te tutū fa'atasi ma tagata o le lalolagi e fa'aauauina ai lana tete'e i le faigāmalō a le Atua. Na 'ato'atoa le fiafia o Atamu ma Eva a o la usiusita'i i le tulafono a le Atua. O se mea lea na lē fiafia ai Satani, auā sa fai lana fa'amatalaga i le lagi o le tulafono a le Atua e sauā ma lē maua ai se lelei po o se fiafia o ē na faia e le Atua. Na atili ai fo'i le lē fiafia o Satani a o ia tepa i le matagofie o le aiga ua tu'u i ai Atamu ma Eva. Ua tonu iā Satani o le a ia galue ina ia pa'ū'ū i la'ua. A mafai ona 'ave'esea i la'ua mai le Atua ma o'o mai ai i la'ua i lalo ifo o lana pule, atonu o le a 'avea lea ma 'auala na te pulea ai le lalolagi atoa, ona fa'atūina ai loa lea o lona malō i lalo nei e tete'e atu ai i le Silisili 'Ese.

(1) AISEĀ E TĀUA AI LE USITA'I E FAI LE FINAGALO O LE ATUA I LE TAIMI NEI LAVA, A E 'AUA LE FA'ATU'UTU'U?

Tou te le'i iloa ea, o lē tou te tu'uina atu i ai outou e fai ma 'au'auna e 'ana'ana i ai, o āna 'au'auna outou tou te 'ana'ana i ai, po o le agasala e o'o ai le oti, po o le 'ana'ana e o'o ai le amiotonu?

Roma 6:16

Ana sau fa'aaliali Satani ma fa'ailoa mai lona uiga moni ma lana amio, semanū e leai sona avanoa e manumalō ai iā Atamu ma Evā, auā ua uma ona lapata'iina i la'ua e uiga i lenei fili mata'utia. Peita'i na galue Satani i le pogisā, ma fa'auifi le pogai tonu o lana galuega ina ia fa'ataunu'u manuia ai le mea na ia mana'o i ai. Ua ia ui mai i lē gata, o se meaola na matagofie ona foliga i lenā vaitaimi. Ua tautala mai nei Satani iā Eva e ala i le gata ma fa'apea mai: “E moni ea na fetalai mai le Atua lua te lē 'a'ai i la'au uma o le fa'ato'āga?” (Kenese 3:1). Ana taofiofi Eva ma lē faia se finauga ma le tufa'aosooso, semanū e lē āfāina o ia; peita'i na ia taumafai e fai se talanoaga lelei ma le ti'āpolo, ma ua pa'ū ai o iā i lana mailei. Ua fa'apenā ona manumalō mai pea le fili i le to'atele o le 'au Kerisiano. Ua latou masalosalo ma faitio i tulafono a le Atua; ua latou lē faia poloā'iga a le Atua, a ua latou talia a'oa'oga ma manatu o tagata ua fa'alafi mai ai mailei a Satani.

(2) O LE Ā LE PEPELO NA FILIFILI ATAMU MA EVA E TALITONU I AI?

Ona fai mai lea o le gata i le fafine, Lua te lē oti lava.

Kenese 3:4

“Ona tali atu ai lea o le fafine i le gata, 'O fua o la'au o le fa'ato'āga ma te 'a'ai ai lava; a o le fua o le la'au o i totonu o le fa'ato'āga na fetalai mai le Atua e 'aua ma te 'a'ai ai, 'aua fo'i ma te papa'i atu i ai ne'i ma oti'. Ona fai mai lea o le gata i le fafine, 'Lua te lē oti lava; auā ua silafia e le Atua, o le aso lua te 'a'ai ai, e pupula ai o oulua mata ona 'avea ai lea o oulua e pei ni atua o lo o iloa le lelei ma le leaga” (Kenese 3:2-5). Fai mai Satani o le a pei i la'ua o le Atua; o le a sili atu le poto la te maua, ma o le a mafai fo'i ona ola i la'ua i se olaga e 'ese atu lona maua. Ua gaua'i atu Eva i le fa'aosoosoga, ma ua fa'apenā ai fo'i Atamu talu ai Evā. Ua la talia 'upu a le gata ua fai mai e lē o le mea moni lenā na fetalai mai ai le Atua. Ua la lē fa'atuatua i le poloā'iga a Lē na faia i la'ua, a ua la manatu ua fa'aitiitia e le Atua lo la sa'olotoga. E lē gata i lea ua la manatu o le solia o le tulafono a le Atua o le a la maua ai se poto maoa'e ma fa'aeaina ai i la'ua.

(3) O LE Ā LE FA'AI'UGA NA LA MAUA I LEA LAVA TAIMI ONA O LA LA'UA SOLITULAFONO?

A e peita'i o a outou amio leaga ua fai ia ma pupuni i le vā o outou ma lo outou Atua, o a outou agasala fo'i ua 'alo ai Ōna fofoga iā te outou ua Ia lē fa'afofoga mai ai.

Isaia 59:2

(4) O LE Ā LE AGASALA?

O i latou uma lava o ē fai le agasala, ua latou soli fo'i i tulafono; o le agasala o le solitūlafono lava lea.

I Ioane 3:4

(5) O LE Ā LE I'UGA TUPITO O LE AGASALA?

Auā o le oti, o le totoḡi lea o le agasala; a o le ola e fa'avavau, o le mea foa'ifuaina mai lea e le Atua, i lo tatou Ali'i o Keriso Iesu.

Roma 6:23

“O le aso e te 'ai ai e te oti ai lava.” O le ā se malamalama'aga o nei 'upu ua iloa e Atamu ina ua pa'ū o ia? Na ia maua ea se olaga sili a'e ma se olaga fa'aeaina e pei ona fai atu ai Satani iā i la'ua? Ana maua se olaga fa'aeaina fa'apea, semanū ua fa'ailoa mai ai e tele mea lelei e maua i le solia o le tulafono; semanū fo'i e fa'ailoa mai ai o Satani o se tasi e maua mai ai mea lelei mo tagata. Peita'i e lē o le mea lenei na maua e Atamu ina ua agasala. Na fetalai le Atua o le fa'asalaga o lāna agasala o le a toe fo'i lava o ia i le 'ele'ele na fai a'i o ia. “O le efuefu oe, e te toe fo'i atu lava i le efuefu na faia ai 'oe” (Fuai'upu 19). Fai mai 'upu a Satani, “O le aso lua te 'a'ai ai, e pupula ai o oulua mata”. E moni na pupula o la mata; a e na pupula o la mata ma ua iloa ai lo la vālelea. Na la iloa fo'i le leaga; ma ua la tofo i le 'o'ona o le fua o le solia o le tulafono.

Na tū i le ogātotonu o Etena le la'au o le ola, o ona fua e i ai le mana e fa'a'umi'umi ai le ola. Ana tumau Atamu i le usita'i i le Atua, semanū e tumau ai fo'i lona fiafia ona o le a taga iā te ia ona 'ai pea i fua o lea la'au ma ola ai e fa'avavau. Peita'i o lāna agasala ua fa'asāina ai nei ona toe pa'i atu o ia i lea la'au, ma ua fa'apenā loa ona aga'i ifo o ia i le oti. Na fetalai le Atua: “O le efuefu oe, e te toe fo'i lava i le efuefu na faia ai oe”. O lona uiga, o le a i'u 'ato'atoa le ola o le tagata.

(6) O LE Ā LE FA'AMOEMOE E TASI MO LE TAGATA INA IA TOE MAUA AI LE OLA E LĒ MAVAE?

A ua fa'ailoa mai nei i le fa'aalia mai o lo tatou Fa'aola o Iesu Keriso, o Lē ua fa'aumatia lava le oti, a o le ola ma le lē i'u vāle ua fa'amalamalamaina mai lea e Ia i le tala lenei.

II Timoteo 1:10

Na folafolaina i le tagata le ola pea e fa'avavau pe afai e tumau pea o ia i lona usita'i. Peita'i ua mamulu 'ese nei lea fa'amanuiāga ona o le soliga o le tulafono. E lē mafai e Atamu ona foa'i atu i lana fanau se mea ua mamulu 'ese atu ma ona lima. Ma semanū e leai se fa'amoemoe o le tagata pe ana lē toe tū'uina mai e le Atua iā te ia le avanoa na te toe maua ai le ola pea e fa'avavau, e ala i le taulaga a Lona Ālo. E moni ua o'o mai i tagata uma le oti ona ua agasala tagata uma; peita'i, o le maliu o Keriso ua toe maua ai e le tagata le ola e fa'avavau (Roma 5:12). Ua na o Keriso lava e maua ai le ola e fa'avavau. Na fetalai Iesu: “O lē fa'atuatua i le Ālo ua iā te ia le ola e fa'avavau, a o lē lē fa'atuatua i le Ālo e lē iloa e ia le ola” (Ioane 3:36). E maua e so'o se tasi lenei fa'amanuiāga o le ola pea e fa'avavau pe afai na te faia le finagalo o le Atua. Auā e tu'uina mai le ola e fa'avavau iā i latou o ē sa'ilil'i ma le onosa'i i le vi'iga, ma le mamalu, ma le lē i'uvāle (Roma 2:7).

(7) O LE Ā LE MEA E TUPU I LE AGAGA O LE TAGATA AGASALA?

A o le la'au e iloa ai le lelei ma le leaga, 'a'ua e te 'ai ai; auā o le aso e te 'ai ai e te oti ai lava.

Kenese 2:17

Na o Satani lava na ia folafolaina mai iā Atamu le ola e fa'avavau e ala i le faia o le agasala. Fai mai le tala a le gata iā Eva i Etena: “Lua te lē oti lava.” O le ulua'i lauga lenei ua faia i le matā'upu o le Ola pea e fa'avavau o le agaga o le tagata. O lenei lauga ua fa'avae i luga o le pule a Satani. A e ui i lea, ua fa'alogoina lenei lauga i le tele o falesā i le lalolagi Kerisiano; ma ua talia fiafia e le to'atele o le lalolagi lenei lauga i le taimi nei, e pei lava ona talia fiafia lenei matā'upu e o tatou ulua'i mātua. Fai mai le fetalai a le Atua: “O le tagata e agasala, e oti lava o ia” (Esekielu 18:20). Peita'i ua suia e tagata lenei fetalai a le Atua: “O le tagata e agasala, e oti lava o ia a e ola pea e fa'avavau”. Na o le ofo e o'o ifo i o tatou loto pe a tatou manatunatu i le fa'avaleagofie o tagata i 'upu a Satani, a ua latou masalosalo tele i afioga a le Atua.

(8) NA FA'APEFEA ONA TAOFIA E LE ATUA LE OLA IA LĒ FA'AAUAU PEA O LE AGASALA MA TAGATA AGASALA?

Ua Ia tuli atu lava iā Atamu; ua Ia tofia fo'i kerupi e nonofo i le itū i sasa'e o le fa'ato'āga i Etena, ma le pelu afi mumū, o lo'o feliuliua'i e leoleo ai le ala i le la'au o le ola.

Kenese 3:24

Ana fa'atagaina le tagata e 'ai pea i le fua o le la'au o le ola ina ua tuana'i lona lē usita'i, semanū o le a ola pea o ia e fa'avavau, ma o le a fa'apenā ona fa'atumauiina e fa'avavau le agasala. Peita'i na leoleoina le la'au o le ola e se kerupi na iā te ia le pelu afi, ma e leai ma se tasi o le aiga o Atamu ua sao atu i le la'au o le ola. O le mea lea tatou te lē maua ai se tagata agasala e ola pea e fa'avavau.

(9) O LE Ā LE MEA E TUPU I LE TINO MA LE AGAGA O LE TAGATA AMIO LEAGA PE A MAVAE LE FA'AMASINO GA MULIMULI?

'Aua fo'i tou te matata'u i ē fasioti le tino, a e latou te lē mafaia ona fasioti le agaga; a e lelei ona outou matata'u i lē ua mafai ona fano iā te ia le agaga atoa ma le tino i Kena.

Mataio 10:28

(10) O LE Ā LE FINAGALO O LE ALI'I E FA'ATATAU I LE FA'AUMATIĀGA O I LATOU O Ē TE'ENA LE FA'AOLATAGA?

Fai atu ia iā te i latou, O lo'o fetalai mai le Ali'i o Ieova, 'Ou te ola A'u, 'Ou te lē fiafia lava i le oti o lē amio leaga, a ia liliu mai lē amio leaga ai lona ala, ma ola ai; liliu ia outou, ina outou liliu 'ese ia i o outou ala leaga; auā pe se ā ea le mea tou te fia oti ai, le aiga o Isara'elu e?

'Esekielu 33:11

Peita'i na fa'atunuina e Satani āna agelu ina ia faia se taumafaiga fa'apitoa ina ia fa'aofi atu ai i mafaufau o tagata le talitonuga sesē e fa'atatau i le ola pea e fa'avavau o le agaga o le tagata. Ua talitonu tagata i lea pepelo, ona soso'o ai lea ma le isi sesē - ua faia e Satani ina ia talitonu tagata o le a ola pea le tagata agasala i le puapuagātia e fa'avavau. Ua galue nei le ali'i o le pōuliuli e ala i ona sui, e fai le a'oa'oga sesē e taufa'aleaga ai i le amiotonu a le Atua. Ua latou fai mai o le Atua o se pule sauā, Na te lafo i seoli i latou uma e lē fiafia o Ia i ai, ma o le a latou tigā e fa'avavau ona o Lona to'asā. E lē gata i lea a o latou mafatia i le puapuagā e lē mafa'amatalatalaina, a o latou ta'afīfili i le afi e fa'avavau, e silasila atu le Atua iā i latou ma Lona finagalo ua fa'amalieina.

Ua fa'apea ona 'ave uma e le ti'āpolo ona uiga leaga ma le mātagā i Lē na foafoaina mea uma, o Lē Na te foa'iina mai mea lelei uma mo le fanau a tagata. O le lē alofa ma le sauā, o uiga ia o Satani. O le Atua o le alofa lava Ia; o mea uma fo'i na Ia faia sa mamā, ma pa'ia, ma matagofie, se'ia o'o i le aso na ofi mai ai le agasala na ala mai i a Satani ma lana fouvalega. O Satani le fili o lo o fa'aosoosoina tagata ina ia latou faia le agasala, ona taumafai lea o le ti'āpolo na te fa'aumatia i latou. Ona fiafia ai lea o Satani pe a ia mautinoa ua ia maua i latou mo le fa'afanoga. Ana leai le 'a'ao taofiofi o le Atua, semanū e toso uma atu e Satani le fanau a tagata i lana upega. Ana leai le 'a'ao puipui o le Atua, semanū e leai se atali'i po o se afafine o Atamu na te maua se avanoa e sola 'ese mai ai.

(11) O Ā FA'AILOGA TĀUA MA FA'APITOA E FĀ O LO'O FA'ASINO MA FA'AMATALAINA AI LE UIGA MONI O LE ATUA MA LONA MALŌ?

O le amiotonu ma le fa'amasinoga o lo'o tumau ai Lou nofoālī'i; o le alofa ma le fa'amaoni la te muamua atu i Ōu luma.

Salamo 89:14

O lo o galue pea lava Satani ina ia manumalō i tagata i le asō e pei ona manumalō o ia i o tatou ulua'i mātua, e ala i lona fa'aosoosoina o tagata latou te masalosalo ma lē talitonu i le Atua, ma faitio i le amiotonu o Lana faigāmalō, ma Ana tulafono. Ua fa'aosoosoina e Satani tagata ina ia talitonu o le Atua e sili atu Lona leaga i lo le ti'āpolo; ua ia faia lenei mea ina ia foliga mai ai o se mea lelei lana fouvalega. Ua taumafai Satani ina ia tu'ua'iina i luga o le Atua mea leaga uma, o sauāga ma mea mātagā uma, ina ia foliga mai ai ua lē tonu le tuli'esea o ia mai le lagi, ina ua lē gaua'i o ia i le faigāmalō a se pule sauā. Ua ia fa'atepa le lalolagi i le sa'olotoga e mafai ona latou maua i lalo ifo o lana pule; a ua ia fai mai na o le pologa e maua i lalo ifo o le pule sauā a Ieova. Ua fa'apenā ona manuia ana taumafaiga e ta'ita'i'esea ai tagata mai lo latou fa'amaoni atu i le Atua.

(12) O LE Ā LE MEA O LE A TOTOE O TAGATA AMIOLEAGA INA UA MAE'A LE TU'UINA I AI O LO LATOU FA'ASALAGA TONU?

Ona outou solia lea o ē amio leaga; auā e fai i latou ma efuefu i lalo o outou alofivae i le aso ua 'Ou tofia, ua fetalai mai ai Ieova o 'au.

Malaki 4:3

Fai mai le a'oa'oga pepelo a le ti'āpolo, o tagata amioleaga ua feoti o lo o fa'atāugāina i latou e fa'avavau i le afi ma le teiō i seoli. O lona uiga o le a fa'atāugāina i latou e fa'avavau fa'avavau lava talu ai agasala o se olaga pu'upu'u i le lalolagi. Peita'i o se a'oa'oga lenei o lo o lautele lona salalau atu i itū 'ese'ese o ekalesia Kerisiano; o lo o tusia fo'i lenei a'oa'oga i totonu o tusi o talitonuga o le tele o nei ekalesia.

(13) E FA'APEFEA ONA O'O SATANI I LONA FA'AI'UGA?

O āu amioleaga ina tele, ma le pepelo i lou fa'atauina o mea, ua e fa'aleagaina āu mea pa'ia, o le mea lea 'Ou te fa'atupuina ai se afi ai totonu iā te 'oe, 'Ou te 'avea 'oe ma lefulefu i le fogā'ele'ele i luma o i latou atoa o ē va'ava'ai iā te 'oe.

Esekielu 28:18

Afai tatou te ioe i le a'oa'oga ua fai mai e 'oli'oli le Atua talu ai Lona silasila mai i le fa'atāugāina e fa'avavau o tino o le 'au amioleaga; afai e moni lea mea, o le ā se manuia po o se lelei e maua mai ai e le Atua i lea mea? O le ā se aogā i le Atua o le ōi ma le fe'ei o le 'au amioleaga i le 'a'asa'o le afi o seoli? Fa'amata o le a 'avea ea nei leo o le ōi ma le tigā o se leo mālīe i fofoga o Lē ua lē mafuatia Lona alofa? Ua latou fai mai o le fa'atāugāina e fa'avavau o tino o le 'au amioleaga, e fa'ailoa mai ai le 'ino'ino o le Atua i le agasala, le agasala na s'ave'uina ai le filemū ma le nofo lelei o Lana fanau. O le 'upuvale lava lenei mea i le Atua. Ua peiseā'i o le 'ino'ino o le Atua i le agasala o le a fa'atūmauina ai pea e fa'avavau le fa'asalaga o le agasala! Fai mai a'oa'oga a lenei 'aufailotu, o le fa'atāugāina e fa'avavau e aunoa ma se toe fa'amoemoe po o se alofa tunoa, o le a fa'aita atili ai le 'au amioleaga, ma o le a latou fe'ei ai ma 'upu leaga i le Atua, ma o le a fa'aopoopo atu lea i a latou 'avega o le agasala. E lē maua ai se vi'iga o le Atua i le fa'atūmauina e fa'avavau o le agasala po o le fa'aopoopoina fo'i o le agasala i augātupulaga e fa'avavau.

E lē mafai ōna malamalama le mafaufau o le tagata i le tele o le leaga ua fanau mai talu ai lenei a'oa'oga sesē o le fa'asalaga e fa'avavau o le 'au amioleaga. O le talalelei o le Tusi Pa'ia e tumu i le alofa fua ma le agalelei ma le alofa mutimutivale o le Atua. Peita'i ua fa'apogisāina le talalelei ona o talitonuga fa'anū'upō ma uiga sauā o le ti'āpolo. Ua fa'asino e le ti'āpolo nei uiga leaga ma uiga lē alofa uma i le Atua. Lētioa to'atele ua fefefe ma 'ino'ino ma va'ai ma le ita i lo tatou Atua alofa. O nei a'oa'oga pepelo e fa'atatau i le Atua ua faia lava i pulela'a ma falesā o le tele o ekalesia Kerisiano, ma ua maua mai ai le miliona ma miliona o le 'au lē talitonu i le Atua ma Lana afioga.

(14) O LE Ā LE FA'AMATALAGA UA TU'UINA MAI I LENEI FUAI'UPU E FA'AMATALAINA AI TALITONUGA SESĒ?

Ona mulimuli atu ai lea o le tasi agelu, ua fa'apea atu, Ua pa'ū, ua pa'ū Papelonía o le 'a'ai tele, auā ua ia fa'ainu i nu'u uma i le uaina o le to'asā i lana faita'aga.

Fa'aaliga 14:8

O le fa'atāugāina e fa'avavau o ē amioleaga o se tasi lea o a'oa'oga sesē ua fa'aopoopo i le uaina o le faita'aga a Papelonía, le uaina lea ua fa'ainuina ai e Papelonía nu'u uma o le lalolagi (Fa'aaliga 14:8; 17:2). E faigatā ona tatou malamalama po ua mafai fa'apefea e le 'aufailotu a Keriso ona latou talia lenei mea pepelo, ona latou a'oa'oina lea o a'oa'oga sesē fa'apea i luga o le fata pa'ia.... Afai tatou te liliu 'ese mai le afioga a le Atua ma talia a'oa'oga sesē ona o ni a'oa'oga na faia e o tatou tua'ā, o le a maua e i tatou le fa'asalaga e pei ona tu'uina atu iā Papelonía. O lona uiga ua tatou inu i le uaina o lana faita'aga.

(15) O LE Ā LE MEA O LE A TU'UINA E LE ATUA I Ē AMIOTONU FA'APEA FO'I MA TAGATA AGASALA?

Fa'auta fo'i, 'Ou te vave alu atu; ua iā te A'u fo'i le tau'i 'Ou te tau'i ta'itasi atu ia tusa ma lana amio ua fai.

Fa'aaliga 22:12

Peita'i e i ai le to'atele ua latou lagona le lē fetau i le a'oa'oga o le fa'asalaga e fa'avavau, ona sosola 'ese ai lea. Ua latou sosola 'ese i lenei a'oa'oga sesē a e maua tutū fo'i i latou i se isi a'oa'oga sesē. Ua latou iloa le a'oa'oga a le Tusi Pa'ia e fa'atatau i le alofa ma le alofa mutimutivale o le Atua. Ua latou talitonu e lē mafai e se Atua alofa ona lafoina tagata na la faia i se afi o le a fa'atāugāina ai i latou e fa'avavau. Peita'i ua latou talitonu o le agaga o le tagata e ola pea e fa'avavau. O le mea lea ua latou manatu ai o le a fa'aolaina tagata uma. Ua latou fai mai o lapata'iga ma 'upu malolosi a le Tusi Pa'ia e fa'atatau i le fa'asalaga, ua na o se mea lea e taufa'amata'u ai tagata ina ia latou usiusita'i, a e lē o ni mea o le a fa'ataunu'uina moni. O lona uiga e mafai lava ona ola le tagata amioleaga i lona olaga agasala ma fa'amalieina ōna tu'inaanu uma, ma soli i tulafono a le Atua, a e a o'o mai le i'uga, e maua lava e ia le ola e fa'avavau. E fiefia tele le loto

amioleaga i se a'oa'oga fa'apea, se a'oa'oga e pi'imau i le alofa mutimutivale o le Atua, a e lē fia va'ai i le amiotonu a le Atua. O se a'oa'oga lea o le a fa'amālosia ai pea le tagata agasala i lana amioleaga.

E i ai ni fa'amaoniga ma oti ua tu'uina mai e le Atua i Lana afioga e fa'ailoa mai ai o Ia lava o le a Ia fa'asalaina i latou o ē solia Lana tulafono. O ē ua latou fa'ase'e iā i latou lava ma fai mai e lē mafai e le Atua alofa mutimutivale ona faia se fa'amasinoga tonu e fa'asala ai le tagata amioleaga, e ao ona latou tepa atu i le satauro i Kalevario. O le maliu o le Ālo pa'ia o le Atua, o se molimau lea e fa'avavau e fa'ailoa mai ai “o le oti o le totogi lea o le agasala,” ma o lo o i ai se tau amiotonu mo soligātulafono uma lava. E leai se agasala a Keriso; peita'i na fai o Ia ma agasala ona o le tagata. Na Ia tau'aveina le sala o le soliga o le tulafono; e le'i fa'ailoa mai fo'i iā te Ia fofoga o le Tamā a o Ia tau'aveina lenei sala, se'ia o'o ai lava ina fa'amomomoina Lona finagalo, ma solipalaina ai o Ia se'ia o'o i le oti. Na faia lenei taulaga ina ia togiolaina ai le tagata agasala. E leai se isi 'auala e mafai ona fa'asa'olotoina ai le tagata mai le fa'asalaga o le agasala. Ai se tasi na te lē talia le taulaga togiola ua faia i se tau maua luga fa'apea, ia tau'ave lava e ia i lona lava tino le fa'asalaga o le soliga o le tulafono.

(16) O Ā MEA TĀUA E MANA'OMIA E TATAU ONA I AI ONA MAUTINOA LEA O LE FA'AOLATAGA?

Ua fetalai mai fo'i o Ia iā te a'u, Ua uma ona fai. O A'u o le Alefa ma le Omeka, o le amataga ma le gata'aga. O lē ua fia inu 'Ou te foa'ifuaina atu iā te ia ai le puna o le vai ola. O lē manumalō e maua e ia mea uma, e fai fo'i A'u mona Atua, e fai fo'i o ia Mo'u atali'i.

Fa'aaliga 21:6, 7

Na o i latou lava ua fiainu ua fai i ai lenei folafolāga. Na o i latou lava ua latou lagona lo latou galala mo le vai o le ola, ma ua latou nofo sauni e lafoa'i mea uma ona o lea vai, ua na o i latou ia o le a tu'uina mai i ai le vai o le ola. Afai tatou te fia o'o i le manuia i le lagi, e ao ona tatou tete'e ma manumalō i le agasala.

Na fetalai mai le Ali'i e ala i le perofeta o Isaia ma fa'apea mai: “Fai atu ia i lē ua amiotonu, e manuia o ia. ... Oi talofa i lē ua amioleaga, e malaia o ia; auā e tu'uina atu iā te ia le tau o ona lima,” (Isaia 3:10, 11). Fai mai le poto: “E ui lava ina fa'aselau ona fai o mea leaga e le tagata amioleaga, ma ua fa'afualoaina lona ola, ou te iloa e sili atu lava le manuia o ē matata'u i le Atua, o ē matata'u i Ona luma. A e lē manuia lē ua amioleaga,” (Failauga 8:12, 13). Fai mai le molimau a Paulo, ua fa'aputuina e le tagata agasala mo ia lava “le to'asā i le aso o le to'asā ma le fa'aaliga o le fa'asala tonu a le Atua, o Lē na te tu'uina atu le tau ta'itasi i tagata e tusa ma a latou galuega” (Roma 2:5, 6).

(17) O LE Ā LE MEA O LE A FAIA E LE ATUA I LE FOUVALEGA MA LE AGASALA?

Ua afio ane fo'i le Ali'i i ona luma, ma na ta'u mai, 'O Ieova, o Ieova, o le Atua alofa mutimutivale ma le alofa fua, e telegese Lona to'asā, a e tele le alofa ma le fa'amaoni; o Lē tausi le alofa e o'o atu i afe o tupulaga; o Lē fa'amagalo fo'i i lē amiolētonu ma lē solitūlafono ma lē agasala, a e lē fa'asaoina lava e Ia o ē agasala; a e tau atu e Ia le agasala a mātua i a latou fanau ma le fanau a latou fanau, e o'o i le tolu ma le fa o tupulaga.'

Esoto 34:6, 7

E tausi Ieova i ē alolofa atu iā te Ia uma lava; a e fano iā te Ia o ē amio leaga atoa uma.

Salamo 145:20

Ua tu'uina mai e le Atua Lana tulafono, o le fa'aaliga lea o Lana amio; ua Ia fa'ailoa mai fo'i le i'uga o le agasala ma ē amioleaga.... O le a fa'aaogāina le mana ma le pule o le malō o le Atua e fa'ato'ilalo ai le fouvalega. Peita'i o le a ō gatasi le to'asā o le Atua ma Lana amio o le alofa mutimutivale, ma le onosa'i, ma le agalelei.

(18) O LE Ā LE VALA'AU A LE ATUA I TAGATA AGASALA UMA TA'ITO'ATASI?

O lo'o fa'apea mai Ieova, 'Ō mai ia, inā tatou filifili ia, e ui lava ina pei o ofu mūmū a outou agasala, e sisina ia pei o le kiona; e ui lava ina mūmū ia pei o le 'ie 'ula'ula, e 'avea e pei o fulufulu mamoe.'

Isaia 1:18

E lē fa'amālosia e le Atua le loto po o le faitalia a se tasi. E lē maua Sona fiasia i le usita'i e fai fa'amalosi. E naunau o Ia ina ia 'au'auna atu iā te Ia i latou na Ia faia, ona ua latou iloa lelei ua talafeagai o Ia ma lo latou alofa. E finagalo o Ia ina ia latou usiusita'i atu iā te Ia ona ua latou malamalama lelei i Ōna uiga ma ua tāua iā i latou Lōna pōto, ma Lana amiotonu, ma Lona alofa agalelei. O i latou uma ua latou iloa ia uiga lelei uma o le Atua, o le a latou alolofa iā te Ia, ona ua tosina i latou iā te Ia i Lona alofa fa'amaoni ma le amiotonu.

O le agalelei, ma le alofa na a'oa'oina e Iesu ma va'aia fo'i i Lona soifuāga, o se ata manino lava lea o le finagalo ma le amiotonu o le Atua. Na fetalai mai Keriso Na te lē faia lava se a'oa'oga se'i vāganā ua tu'uina mai iā te ia e le Tamā. Ua fetalai lelei lava fa'avae autū o le malō o le Atua ma le tulafono na fetalai i ai Iesu ina ua Ia p'oloa'i mai: "Ia outou alolofa atu i ē ua ita mai iā te outou." E tu'uina mai e le Atua Lona to'asā i ē amioleaga mo le lelei o le atulaulau uma na Ia faia fa'apea i latou i le lagi, atoa fo'i ma ē amioleaga, i latou o le a o'o mai i ai le to'asā o le Atua. E finagalo le Atua ia maua e i latou uma le fiafia pe a mafai ona faia lea tulaga e tusa ai ma tulafono o Lona malō, fa'apea ma le amiotonu o Lana amio. Ua Ia si'osi'omia i latou i fa'ailoga o Lona alofa, ua Ia avatua iā i latou le malamalama e uiga i Lana tulafono, ua Ia tulimuli'auina i latou ma ofoina atu iā i latou Lona alofa tunoa. Peita'i ua latou manatu fa'atauva'a i Lona alofa, ua latou fa'alēaogāina Lana tulafono, ma ua latou te'ena Lona alofa tunoa. Ua latou fa'aaogāina pea Āna meaalofa iā i latou, peita'i ua latou lē fia usita'i iā te Ia. Ua latou ita i le Atua ona ua latou iloa lelei Lona 'ino'ino i a latou agasala. Ua onosa'i pea le Atua i lo latou leaga; peita'i e i ai le itūaso ua atofaina e maua ai lo latou i'uga. Fa'amata o le itūaso ea lea o le a Ia saisaia ai i latou i ni filifili u'amea ma tu'u ai i latou i Ōna tafatafa? Fa'amata o le a Ia faia fa'amalosia i latou ina ia latou usiusita'i iā te Ia ma faia Lona finagalo?

(19) O LE Ā LE 'ALAGA O LE A FA'ALOGOINA MAI Ē AMIOLEAGA A O LATOU FA'AFEAGAI MA LE AFIO MAI O LE ALI'I?

Ua latou fai atu fo'i i mauga ma papa, 'Mafuli mai ia iā te i matou, ma tanumia i matou ai le silafaga a Lē ti'eti'e i le nofoāli'i, ma le to'asā o le Tama'i Mamoe.'

Fa'aaliga 6:16

O ē na latou 'avea Satani o lo latou ta'ita'i ma ua pulea i latou e lona mana, ua le'i saunia i latou e ulufale atu i luma o le silafaga a le Atua. Ua latou pi'imau i a latou amio o le fa'amauualuga, ma le taufa'asesē, ma le fa'amalieina o tu'inaanau, ma le sauā. E mafai ea ona avatua i latou i le lagi ē nonofo fa'atasi ai ma ē na latou ita ma 'ino'ino i ai a o i le lalolagi? E lē mafai ona suamalie le 'upu moni i le tagata pepelo; e lē fa'amalieina fo'i le loto o le tagata fa'amauualuga fiavi'ia i le avatua i ai o le agamalū ma le loto mauualo. E lē fiafia fo'i le tagata amio palapalā i le tu'uina i ai o le mea mamā. E lē tosina fo'i le tagata manatu fa'apito pe a ta'u atu i ai se mea e faia ona o le alofa mo nisi. E leai se mea o i le lagi e maua ai le fiafia o i latou ua pupū o latou loto ma alu lo latou ola atoa i le sa'ilia o mea e fa'amalieina ai o latou lava mana'o.

Ana mafai ona avatu fa'afuase'i i le lagi i latou na fa'aalu lo latou ola atoa i le fouvale i le Atua, ana mafai ona o'o fa'afuase'i atu i latou i le lagi, ma latou molimauina ai le mauualuga ma le pa'ia ma le 'ato'atoa o le ola i le lagi - o inā ua fa'atumulua ai loto uma i le alofa, ua va'aia ai le 'oli'oli i foliga uma, ua fa'alogoina ai pese mālīe ma le matagofie ua vivi'i a'e ai le lagi i le Atua ma le Tama'i Mamoe, ua va'aia ai fo'i le ō atu o 'ave o le malamalama mai lē o i le nofoāli'i ma ua o'o atu i le 'au fa'aolaina - fa'amata e mafai e i latou o ē ua tumu o latou loto i le ita ma le 'ino'ino i le Atua, ma Lana 'upu moni, ma le olaga pa'ia, ona latou pepese fa'atasi ma agelu ma le 'au fa'aolaina a o faia a latou vi'iga ma fa'ane'etaga i le Atua? Fa'amata e mafai ona latou tutū atu i luma o le pupula o le Atua ma le Tama'i Mamoe? E leai, e leai lava. Ua fia tausaga o tu'uina atu i ai le avanoa e saunia ai o latou olaga mo le lagi. Peita'i latou te le'i fia a'oa'oina le lesone o le olaga mamā; latou te le'i fia a'oa'oina le gagana a le lagi, ma ua fai sina tuai o le toe faia o ni sauniuniga i lea taimi. Ua lē saunia i latou mo le lagi ona o lo latou olaga na fa'aaluina i le tete'e i le Atua. O le a 'avea le pa'ia ma le mamā ma le filemū o le lagi o se mea tigā iā i latou; a o le pupula o le Atua o le a 'avea o se afi mūmū iā i latou. Na o lo latou fia sosola 'ese o le a o'o i ai. O le a latou fa'afetai pe a o'o atu le fa'afanoga ina ia ufitia ai i latou mai Lē na malū mo lo latou fa'aolataga. E faia e le 'au amioleaga lo latou lava i'uga e ala i la latou lava filifiliga. O la latou lava filifiliga ua latou lē tutū atu ai i luma o le Atua i le lagi; ma ua fa'aalia ai i inā le amiotonu ma le alofa tunoa o le Atua.

(20) O LE Ā LE FETALAIGA MAI LE ATUA O LE A FA'AMAUINA AI LE I'UGA O LE FANAU A TAGATA ATOA MO LE GATA'AGA?

O lē amiolētonu ia amiolētonu pea o ia, o lē 'ele'elea ia 'ele'elea pea o ia, o lē amiotonu ia amiotonu pea o ia, o lē pa'ia ia pa'ia pea o ia.

Fa'aaliga 22:11

O le o'o mai o le l'olo i aso o Noa na fa'ailoa ai ua leai se toe mea e mafai ona fai mo le 'au amioleaga. O le a fa'apenā fo'i pe a o'o mai le afi i lenā aso tele - ua lē mafai se sofō mo ē amioleaga. Ua latou lē fia gaua'i atu i le pule a le Atua. Ua leva ona fa'aaogāina o latou mafaufau i le faiga o le fouvaleaga. Lenei la ua o'o mai le i'uga, ua fai si tuai o le toe taumafai ina ia liliu le mafaufau i le mea sa tatau ona alu i ai, ua fai si tuai o le toe liliu i le usita'i mai le soliga o le tulafono, mai le ita i le Atua i le alofa i le Atua.

(21) O LE Ā LE FA'AI'UGA O LE FA'ASAOINA E LE ATUA O KAINO INA UA MAE'A ONA IA FASIOTI APELU?

Ua silafia e le Atua ua leaga tele lava tagata i le lalolagi, o manatu uma ua mafaufau ifo ai i o latou loto ua na ona leaga ia i aso uma lava.

Kenese 6:5

E le'i fa'a'umatia e le Atua le ola o Kaino le fasioti tagata. Ua fa'aaogā e le Atua le olaga o Kaino e fa'ailoa mai ai i le lalolagi le i'uga e o'o i ai pe a tu'u le tagata agasala e ola ma fa'aauau lana savāli i le 'auala o le amioleaga, ma ua lē taofia e se tulafono. O le a'oa'oga a Kaino fa'apea ma lana amio na ta'ita'iina ai le afe ma afe o ē na tutupu mai iā te ia, ina ia latou faia le agasala, se'ia o'o ina “ua leaga tele lava tagata i le lalolagi, o manatunatuga uma fo'i o o latou loto ua na o le leaga ia i aso uma lava....Ua leaga lava le lalolagi i luma o le Atua, ma ua tumu le lalolagi i le sauā” (Kenese 6:5, 11).

O le alofa o le Atua i le lalolagi na Ia fa'a'umatia ai tagata amioleaga i le vaitaimi o Noa. O le alofa fo'i na Ia fa'a'umatia ai tagata amioleaga o le 'a'ai o Sotoma. E fesoasoani le mana taufa'asesē o Satani i le 'aufaigaluega o le amioleaga ina ia latou maua ai nisi e alolofa iā i latou ma lagolagoina la latou galuega; ma ua fa'apenā ona latou ta'ita'ia ai nisi latou te tutū fa'atasi i le faiga o le fouvalega. Na fa'apenā i aso o Kaino; na fa'apenā fo'i i ona pō o Noa, ma le vaitaimi o Aperā'amo ma Lota; ua fa'apenā fo'i i lo tatou vaitaimi. O le alofa o le Atua i Lana foafoāga uma o le a Ia fa'a'umatia ai i latou ua latou te'ena Lona alofa tunoa.

(22) E FA'APEFEA ONA MAFAI E LE TAULAGA OFO A KERISO ONA TOGIOLAINA TAGATA AGASALA UMA UA SALAMŌ?

Auā afai o le to'atasi na malō ai le oti i le agasala a le to'atasi, e silisili lava ona malō ma ola ē ua maua le faula'i mai o le alofa tunoa atoa ma le mea alofa o le amiotonu lea, ona o le to'atasi, o Iesu Keriso....Auā afai ua lelei i tatou ma le Atua i le maliu o Lona Alo, ina o fai i tatou Mona fili, e matuā fa'aolaina lava i tatou i Lona soifua, o i tatou ua lelei ma Ia.

Roma 5:17, 10

Na o'o mai le oti i le fanau a tagata talu ai le agasala a Atamu. Ua fa'apenā ona ō ifo tagata uma i le tu'ugamau. Ua i ai fo'i i le fuafuāga o le fa'aolataga se vaitaimi o le a toe tūtū a'e ai tagata uma mai o latou tu'ugamau.

(23) E FA'APEFEA ONA FILIFILIA LE FUA O LE FA'ASALAGA O LE A MAUA E TAGATA AMIOLEAGA?

Auā e sau le Atali'i o le tagata fa'atasi ma Āna agelu i le mamalu o Lona Tamā; ona tauia lea e Ia e ta'itasi e tusa ma lana galuega.

Mataio 16:27

"O le a i ai se toe tūtū mo ē ua oti, o ē amiotonu fa'apea ma ē amioleaga" (I Korinito 15:22). Peita'i e i ai se 'ese'esega o le a iloa i ē o le a toe tūtū mai. “Auā e o'o mai le aso e fa'alogi ai i Lona leo i latou uma ua i tu'ugamau, ma latou ō mai ai; o ē na amio lelei, e toe tūtū i le ola; a o ē na amioleaga, e toe tūtū i le fa'asala” (Ioane 5:28, 29). E manuia, e pa'ia fo'i i latou ua ta'uaogāina mo le toe tūtū i le ola. E leai se malosi o le oti fa'alua i a i latou nei (Fa'aaliga 20:6). A o ē amioleaga, o ē le'i fa'amagaloina a latou agasala e ala i le salamō ma le fa'atuatua, e maua e i latou le tau i le soliga o le tulafono - o le totogi lea o le agasala. O le a latou maua le fa'asalaga e tusa ai ma a latou mea ua fai. Peita'i o le a i'u uma ia fa'asalaga i le oti lona lua. E lē mafai e le Atua ona fa'aolaina le tagata agasala fa'atasi ma āna agasala. E lē talafeagai lea mea ma Lana amiotonu ma Lona alofa tunoa.

(24) O LE Ā LE TULAGA FA'AI'U O LE AGAGA E AGASALA?

Auā o le oti, o le totogi lea o le agasala; a o le ola e fa'avavau, o le mea foa'ifuaina mai lea e le Atua, i lo tatou Ali'i o Keriso Iesu.

Roma 6:23

O le a fa'apenā ona maua le i'uga o le agasala, fa'apea ma le ōi ma le fa'afanoga na tupu mai ai. Fai mai le faisalamo: “Ua fa'a'umatia e 'Oe o ē amioleaga, ua E soloi'esega o latou igoa e o'o i le fa'avavau fa'avavau lava. Ua o'o i le fili le fa'atafunaga e fa'avavau” (Salamo 9:5, 6). Na fa'alagoina e Ioane i le fa'aaliga se vi'iga o le a pepese ai le lagi ma tagata uma, se vi'iga -o le a lē toe fa'alagoina ai se leo pa'ūlua o le agasala. Na ia fa'alagoina agelu ma tagata uma ua latou avatua le vi'iga ma le fa'ane'etaga i le Atua (Fa'aaliga 5:13). O le a lē fa'alagoina ē ua fano o faia ni 'upu faifai i le

suafo o le Atua a o latou ta'afifili i le afi. E lē fa'atāugāina fo'i i latou e fa'avavau. E leai nisi o le a ta'afifili e fa'avavau ma fe'ei i seoli.

(25) O LE Ā LE TULAGA O LO'O I AI TAGATA UMA UA MALILIU?

Auā o ē ua ola, ua latou iloa e oti i latou; a o ē ua oti, latou te lē iloa se mea; ua leai fo'i se toe totogi iā te i latou, auā ua fa'agalagaloia i latou.

Failauga 9:5

O le a'oa'oga sesē e fa'atatau i le fa'asalaga e fa'avavau, ua fanau mai ai fo'i ma se isi a'oa'oga sesē - o le a'oa'oga lea ua fai mai e lagona ma iloa mea e i latou ua feoti. E tutusa lava ia a'oa'oga sesē ona e lē o ni a'oa'oga e fa'avaeina i luga o le Tusi Pa'ia. Fai mai lenei a'oa'oga sesē o lo o i le lagi ē ua oti, ma ua latou va'ava'ai mai ai i mea uma o lo o tutupu i le lalolagi, a e maise lava olaga o tagata ua pele i a i latou, tagata ua latou tu'ua i lalo nei. Peita'i, e fa'apefea ona maua se fiafia o ē ua oti pe afai latou te iloa fa'alavelave uma ma puapuagā o ē o ola? E fa'apefea ona maua so latou fiafia pe afai o lo o latou molimauina agasala uma o lo o faia e tagata ua pele iā i latou? E fa'apefea ona maua so latou fiafia pe afai latou te va'ava'ai mai o ōi ō latou tagata i le tigā ma le mafatia, ma puapuagā, ma fa'amoemoe ua lē taulau i lalo nei? E fa'apefea ona maua so latou fiafia i le manuia i le lagi pe afai o lo o latou fa'aopeopea lava pea i luga a'e o o latou tagata i le lalolagi? Fai mai le a'oa'oga sesē lava lenei, e tu'ua loa e le mātānāvā le tino o le tagata amioleaga, ona o'o atu loa lea o lona agaga i le afi i seoli. Se talitonuga ina 'ā fa'aoso 'ino'ino! Talofa i le tigā ma le mafatia e o'o i a i latou o ē va'ai ua oti a latou uō a e le'i sauniuni, ma ulu atu ai a latou uō i se mea o le a latou ōi ai ma tigāina e fa'avavau! E i ai nisi ua i'u i le valea o latou mafaufau ona o lo latou manatunatu i lenei mala mata'utia.

O le ā le tala a le Tusi Pa'ia i nei mea uma? Fai mai Tavita e lē toe iloa se mea e le tagata pe a oti. “E alu 'ese lona agaga, e fo'i atu i le 'ele'ele na i ai o ia; e fa'umatia i lea lava aso ōna manatunatuga” (Salamo 146:4).

(26) O LE Ā LE MEA E MAFAI E LE TAGATA O LO'O OLA ONA FAI A E LĒ MAFAI ONA FAIA E LE TAGATA UA OTI?

Auā e lē vivi'i atu le tu'ugamau iā te 'oe; e lē fa'ane'ene'e lē oti iā te 'oe; o ē ō ifo i le lua latou te lē fa'amoemoe i lou fa'amaoni. O lē ua ola, o lē ua ola, o ia lava e vivi'i atu iā te 'oe, e pei o a'u lava i le aso nei; e fa'a'ailoa lou fa'amaoni e le tamā i lana fanau.

Isaia 38:18, 19

Na 'oli'oli le tupu o Esekia ina ua talia e le Atua lana talosaga ma ua fa'aopoopoina ai ni tausaga se 15 i lona olaga. O lea na ia tu'uina atu ai i le Atua se vi'iga o le fa'afetai mo Lona alofa tele. Ua fa'a'ailoa mai i 'upu o lenei vi'iga le fa'apogai ua ia 'oli'oli ai: “Auā e lē vivi'i atu le tu'ugamau iā te 'oe; e lē fa'ane'ene'e le oti iā te 'oe; o ē ō ifo i le lua latou te lē fa'amoemoe i lou fa'amaoni. O lē ua ola, o ia lava e vivi'i atu iā te oe, e pei o a'u lava i le aso nei.” Fai mai le a'oa'oga sesē e ō i le lagi le 'au amiotonu pe a feoti i latou; o inā o le a latou ulufale atu ai i le manuia ma latou vi'ia ai le Atua e fa'avavau. Peita'i e le'i iloa e Esekia se 'oli'olisaga fa'apenā i le taimi o le oti. Ua ō gatasi 'upu a Esekia ma le molimau a le faisalamo: “Auā e leai se manatu iā te oe i le oti; o ai ea se vivi'i atu iā te oe i le tu'ugamau?” “E lē vivi'i atu iā te 'oe ē ua oti, ma i latou uma o ē ō ifo i le mea ta'aligoligoa” (Salamo 6:5; 115:17).

(27) O FEA O I AI LE TUPU O TAVITA I LE ASŌ?

Sema e, le 'au uso e, se'i 'ou matuā fai atu iā te outou i lea tupuga o Tavita, ua malia o ia, ua tanumia fo'i, ua i a i tatou lona tu'ugamau ua o'o i ōna pō nei.

Galuega 2:29

Ua fa'a'ailoa mai i lenei mau o lo o i ai pea Tavita i lona tu'ugamau se'ia o'o i le aso o le toe tū. O se molimau lenei e fa'amaonia ai e lē ō i le lagi le 'au amiotonu pe a oti i latou. Fa'ato'ā o'o lava Tavita i le lagi pe a o'o i le aso o le toe tū, ma e mafai ona toe tūtū mai le 'au amiotonu auā ua manumalo Keriso i le tu'ugamau ma ua toe tū mai o Ia.

(28) O FEA O LE A Ō MAI AI TAGATA UA MALILIU I LE ASO O LE TOE TŪ?

'Aua tou te ofo i lenei mea, auā e o'o mai aso e fa'alogoa ai i Lona leo o i latou uma ua i tu'ugamau, ma latou ō mai ai; o ē amio lelei, e toe tūtū i le ola; a o ē amio leaga, e toe tūtū i le fa'asala.

Ioane 5:28, 29

(29) O LE Ā LE MEA O LE A AUMAIA E KERISO I LONA AFIO MAI, O LONA UIGA E LĒ TUSA AI MA LE MANATU O I LATOU UA OTI E Ō I LE LAGI PO O SEOLI A E LE'I TOE AFIO MAI O IA?

Fa'auta fo'i, 'Ou te vave alu atu; ua iā te A'u fo'i le tau'i 'Ou te tau'i ta'itasi atu ia tusa ma lana amio ua fai.

Fa'aaliga 22:12

Fai mai le molimau a Paulo: “Auā afai e lē toe tūtū mai ē ua oti, po ua lē toe fa'atūina mai Keriso. Afai fo'i ua lē toe fa'atūina mai Keriso, ua leai se aogā o lo outou fa'atuatua, ua nofosala pea outou; i le ma lea fo'i, ua fano ē ua momoe i a Keriso” (I Korinito 15:16-18). Afai e moni ē ō i le lagi le 'au amiotonu i le taimi o lo latou oti, o lona uiga e o'o atu i le taimi o Paulo ua fā afe tausaga talu ona ō sa'o tagata amiotonu i le lagi i le taimi o lo latou oti. Afai la e moni nei mea uma, aiseā ua fai mai ai Paulo a leai se toe tūtū ua fano ē ua momoe i a Keriso? Afai ua ō uma nei tagata i le lagi i le taimi o lo latou oti, o lona uiga e lē mana'omia se aso o le toe tū.

(30) I LE AFIO A'E O KERISO I LE LAGI, O LE Ā LE FOLAFOLAGA TĀUA NA IA TU'U MAI MO I LATOU O Ē O LO'O NAUNAUTA'I MO LONA TOE AFIO MAI?

E tele mea e nonofo ai i le maota o Lo'u Tamā; ana leai, po ua 'Ou fai atu iā te outou; 'Ou te alu e sauni se mea e nonofo ai outou. Afai fo'i 'Ou te alu ma sauni se mea e nonofo ai outou, 'Ou te toe sau, 'Ou te talia fo'i outou ia fa'atasi ma A'u; ina ia i ai outou i le mea 'Ou te i ai A'u.

Ioane 14:2, 3

Peita'i a o sauni Iesu e tu'ua Ōna so'o i le lalolagi a e toe fo'i atu i le lagi, e le'i fa'apea atu Iesu i Ōna so'o ua toeitiiti ona latou ō atu lea iā te Ia i le lagi.... Fai mai le molimau a Paulo: “E afio ifo mai le lagi le Ali'i lava ma le 'alaga, ma le leo o le agelu sili, ma le pū a le Atua; e muamua fo'i ona toe tūtū mai o ē ua oti o i a Keriso; ona fa'afuase'i lea ona 'aveina a'e o i tatou o ē ola ma totoe, fa'atasi ma i latou i ao, tatou te fetaia'i ai ma le Ali'i i le vānimonimo; ona tatou fa'atasi pea lava lea ma le Ali'i. O lenei, ia outou fefa'amafanafana'i i nei 'upu” (I Tesalonia 4:16-18). Na tepa Paulo i le lumana'i i le taimi o le toe afio mai o le Ali'i, le taimi e motusia ai filifili o le tu'ugamau, ma toe tūtū mai ai ē ua oti mo le ola e fa'avavau.

(31) O LE Ā LE MEA E MATA'UTIA MA MAMALU E TATAU ONA TUPU A E LE'I MAUA E LE 'AU AMIOTONU MA Ē AMIOLEAGA O LATOU TAU'I?

Ua fa'apea atu ma le leo tele, Ia outou matata'u i le Atua, ma avatu iā te Ia le vi'iga, auā ua o'o mai le itūaso o Lana fa'amasinoga; ma ia outou ifo i Lē na faia le lagi, ma le fanua, ma le sami, atoa ma puna o vai.

Fa'aaliga 14:7

A o le'i o'o atu se tasi i maota o le manuia, e ao ona su'esu'eina o latou igoa ma a latou amio i le fa'amasinoga su'esu'e a le Atua. O le a fa'amasinoina tagata uma e tusa ma mea ua tusia i tasi a le lagi, ma o le a maua lo latou tau'i e tusa ma a latou galuega na fai. E lē o le taimi o le oti e fai ai lenei fa'amasinoga. Matau lelei 'upu a Paulo: “Auā ua fa'atūina e Ia le aso e fa'amasinoina ai le lalolagi ma le tonu, e le Tagata ua tofia e Ia; ua Ia toe fa'atūina mai o Ia nai ē ua oti, e 'avea o se fa'amaoniga i tagata uma” (Galuega 17:31). Ua manino le tala a le aposetolo - ua atofaina se aso e fa'amasinoina ai le lalolagi, ma sa loma lea aso a o tusia nei 'upu e Paulo.

Ua tautala fo'i Iuta i lenei mea e tasi. Fai mai Iuta: “O agelu fo'i o ē ua lē taofi i lo latou mamalu, a ua tu'ua e i latou lo latou aiga, ua taofia e Ia i latou i noanoataga e fa'avavau i lalo o le pogisā, se'ia o'o i le fa'amasinoga o le aso tele.” Ua tautala mai fo'i Iuta i 'upu a Enoka ma ua fa'apea mai: “Fa'auta e afio mai le Ali'i ma Lana 'au pa'ia e manomano, e fa'amasino ai i tagata uma” (Iuta 6, 14, 15).

A o le a lē aogā o se fa'amasinoga i le lumana'i pe afai ua 'oli'oli nei le 'au amiotonu i le manuia i le lagi, a ua ta'affili mai le 'au amioleaga i le afi i seoli? Ua manino le a'oa'oga a le Tusi Pa'ia e fa'atatau i nei matā'upu tāua. E mafai ōna malamalama i ai so'o se tasi. A o ai se mafaufau sa'o e mafai ōna malamalama i le poto o le a'oa'oga e pei ona latou faia nei? Fai mai le Tusi Pa'ia o le i'uga o le fa'amasinoga o le 'au amiotonu o le a latou fa'alogoina ai le fa'amalō ua fa'apea mai: “Le 'au'auna lelei e ma le fa'amaoni, ...ulufale maia i le fiafia o lou Ali'i.” O le ā le aogā o lenei fa'amalō pe afai ua fia augātupulaga o nonofo le 'au amiotonu i le lagi? Fai mai le Tusi Pa'ia o le a fa'alogoina e le 'au amioleaga 'upu nei i le i'uga o le fa'amasinoga: “O outou ua fa'afanoina, ō 'ese atu ia iā te A'u i le afi e fa'avavau.” O ai o le a avatu i ai lenei i'uga pe afai ua leva ona fa'atāugāina i latou i lo latou fa'asalaga i seoli? O nei a'oa'oga o se tauēmuga maoa'e lava lea o le poto ma le amiotonu o le Atua.

(32) O LE Ā LE TULAGA MAU O LE A I AI PEĀ Ē UA MALILIU SE'IA O'O I LE TOE TŪ A'E?

E to'atele fo'i o ē momoe i le efuefu o le 'ele'ele latou te ala mai, o isi i le ola e fa'avavau, a o isi i le fa'alumaina ma le 'inosia e fa'avavau.

Tanielu 12:2

E leai se mau e tasi i le Tusi Pa'ia ua ta'u mai ai fa'apea e o le 'au amiotonu i le lagi i le taimi e feoti ai, a o le 'au amioleaga i lo latou fa'asalaga pe a latou oti. E leai se tala fa'apea ua tu'uina mai e le 'au pateriaka ma le 'au perofeta iā i tatou. E leai fo'i sina fa'amatalaga na faia e Iesu ma Lana 'au aposetolo e ta'u mai ai lenei mea. Ua manino le tala a le Tusi Pa'ia - e lē o sa'o tagata i le lagi pe a feoti. Fai mai le Tusi Pa'ia o lo o momoe i latou se'ia o'o i le aso o le toe tū (I Tesalonia 4:14; Iopu 14: 10- 12). O le aso lava e motu ai le maea ario, ma ta'e ai le ipu auro (Failauga 12:6), o le aso fo'i lea e fa'a'umatia ai manatunatuga uma o le tagata. O ē o ifo i le tu'ugamau, o lo o i ai i latou i le mea ta'aligoligoa. Latou te lē toe iloa se mea o faia i lalo o le lā (Iopu 14:21). Ua mālōlō ai i inā le 'au amiotonu mai a latou 'avega mamafa. Pe umi pe pu'upu'u la latou fa'atalitali i le tu'ugamau, ua na o se minute lava iā i latou. Latou te momoe i le tu'ugamau se'ia o'o ina fagua i latou i le leo o le pū a le Atua, ma latou o atu ai loa i le manuia e fa'avavau. Auā e ilia le pū a le Atua, “e toe tūtū mai fo'i ē ua oti ma le ola pea ... Pe a ofu fo'i lenei tino i'uvāle i le tino ola pea, a ofu fo'i lenei tino oti i le tino lē oti lava, ona taunu'u ai lea o le 'upu ua tusia, Ua fa'a'umatia le oti i le manumalō” (I Korinito 15:52-54).

(33) O LE Ā LE 'ALAGA O LE MANUMALŌ A LE 'AU AMIOTONU UA TOE TUTŪ A'E?

Le oti e, o fea o i ai lou tui? Le tu'ugamau e, o fea o i ai lou manumalō?

I Korinito 15:55

A o fa'apenā ona latou ala mai nai la latou moe, ua latou ta'itasi ma manatunatu po o fea tonu na latou momoe ai. O le toe mea lava na latou manatua o le tigā o le oti; o le mea mulimuli lava na latou manatunatu i ai o lo latou o ifo lea i lalo o le pule a le tu'ugamau. Lenei la ua latou tutū a'e nai le tu'ugamau. O lo latou ulua'i manatu ua fa'ailoa mai lea i le 'alaga manumalō ua fa'apea mai: “Le oti e, o fea o i ai lou tui? le tu'ugamau e, o fea o i ai lou manumalō?”

'Ou te iloa le mua'i pepelo i le aigā tagata e fa'apea, "Lua te lē oti lava." E manino lava ua a'oa'o mai le Tusi Pa'ia o le fa'ai'uga e aumaia e le agasala e le'i salamō ai, o le oti mulimuli lea e a'afia ai le tino ma le agaga.

Li'o le Tali:

Ioe

Lē Mautonu

Ua 'ou maua mai le Afioga a le Atua, e pau lo tatou fa'amoemoe mo le ola e fa'avavau o le taliaina lea o le taulaga mo le fa'aleleiga na faia e Keriso.

Li'o le Tali:

Ioe

Lē Mautonu

Ua 'ou va'ai i le fa'amaoniga o le finauga tele ma le taumafaiga a Satani e fa'atalitonu le lalolagi o le malō o le Atua e sauā ma e fa'apito. A e peita'i ua fa'amaonia i le Tusi Pa'ia o fa'amasinoga uma a le Atua e tonu, e fa'amaoni, ma e tigāalofa.

Li'o le Tali:

Ioe

Lē Mautonu

'Ou te va'aia le fa'amaoniga o le alofa tunoa o le Atua ina ua fa'a'umatia le 'au amioleaga i le afi o seoli a e ua mae'a Ōna maua o latou tau tonu. O le a le fa'aumiumi ona mafatia o latou tino po o agaga mo se taimi e leai se gata'aga.

Li'o le Tali:

Ioe

Lē Mautonu

Ua ta'u mai i le Tusi Pa'ia e lē o fai vi'iga i le Atua i le lagi ē ua maliliu. E le o iā i latou se lagona, manatu, pe iloa se isi lava mea, a e peita'i o lo'o momoe i o latou tu'ugamau e fa'atalitali ai i le toe tū.

Li'o le Tali:

Ioe

Lē Mautonu

Lē Mautonu

Tali o Tatalo

This image shows a single sheet of white paper with horizontal blue or grey ruling lines. The lines are evenly spaced and run across the width of the page. There are approximately 20 lines visible. The paper has a slight shadow on the right side, suggesting it's resting on a surface.

E Mafai e Tagata Oti Ona Tautala Mai? - 6

O le tausiga ma le 'au'auna mai o agelu pa'ia, e tusa ma le fa'amatalaga o le Tusi Pa'ia, o se iloologa mulimuli iā Keriso. Peita'i e fa'anenefuina ma ua nanāina lenei matā'upu tāua ona o a'oa'oga sesē o nisi faigālotu. Fai mai le a'oa'oga a le Tusi Pa'ia o ē ua oti latou te lē iloa se mea. Peita'i ua fāōa le tulaga o lenei a'oa'oga a le Tusi Pa'ia, e se a'oa'oga sesē na nonō mai tagata fa'apaupau i le vaitaimi o le pogisā ma le tu'umuli fa'aleagaga, ona aumaia lea a'oa'oga i totonu o talitonuga o le ekalesia Kerisiano. O a'oa'oga sesē lenei ua fai mai e ola pea e fa'avavau le agaga o le tagata. E to'atele na'uā ua latou talitonu o agaga o ē ua oti ua liua e fai ma agelu po o “agaga e 'au'auna, ua 'auauna mai e 'au'auna mo i latou o ē a maua le ola” (Eperu 1:14). E to'atele ua latou talitonu i lenei a'oa'oga sesē e ui lava ua leva ona i ai agelu a o le'i oti se tagata e to'atasi, e pei ona fa'aalia manino mai e le Tusi Pa'ia.

(1) O LE Ā LE MEA E LĒ MAFAI ONA FAIA E LE TAGATA UA OTI INA UA ŪLU ATU I LE TU'UGAMAU?

Ua ta'ape le ao ua mavae atu, e fa'apea lē ua alu ifo i le tu'ugamau, e lē toe alu a'e o ia.

Iopu 7:9

O le talitonuga lea ua fai mai e toe ō mai agaga o ē ua oti e fesoasoani i ē o ola, o le talitonuga lea ua tutupu mai ai le tele o a'oa'oga sesē fa'aonapōnei ua fa'apea mai e mafai ona faia ni feso'ota'iga i le vā o tagata ola ma ē ua oti. Afai e moni ua fa'atasi nei ē ua oti ma le Atua ma le 'au agelu pa'ia, afai ua latou maua se poto e sili atu i lo le poto na latou maua i le lalolagi, aiseā ua latou lē toe fo'i mai ai i le lalolagi e a'oa'o mai i ē o ola? Afai e moni le talitonuga ua a'oa'oina e le tele o faife'au fa'apea o lo o fa'aopeoplea agaga o ē ua oti i luga a'e o a latou uō ma aiga i le lalolagi, aiseā ua lē tāutala mai ai nei agaga i o latou aiga ma a latou uō e lapata'i mai ai e uiga i ni mea leaga o le a tutupu mai, pe ō mai fo'i ma ni fe'au o le fa'amafanafanaga mo o latou 'aiga i le taimi o lo latou fa'anoanoa? O se faitoto'a tāua lenei ua fa'aaogāina e Satani e ui mai ai ana mea taufa'asesē ina ia fa'ataunu'uina ai ana fuafuāga. Ua 'avea o ana 'avefe'au agelu ua pa'ū'ū; o i latou ia ua ō mai ma fa'apea mai ua latou aumaia ni fe'au mai le lalolagi o agaga. A o fai le pepelo a Satani fa'apea ua feso'ota'i nei tagata ola ma o latou aiga ua maliliu, ua fa'apenā ona faifaimalie mai pea le pulea e Satani o o latou mafafau.

(2) O LE Ā LE AGAVA'A O LO'O I Ē AMIOLEAGA MA O LE A FA'AAOGĀ I LE TAUMAFAGA E TAUF'AASESĒ LE LALOLAGI?

Auā o agaga ia o temoni e fai fa'ailoga, ua latou ō atu i tupu o le lalolagi ma le atulaulu uma, e fa'apotopoto iā te i latou i le taua i le aso tele o le Atua e Ōna le malosi uma lava.

Fa'aaliga 16:14

E i ai le mana'o Satani na te aumaia ai i luma o tagata nisi ua foliga mai o o latou aiga ua maliliu. Ua manatu lava tagata o o latou aiga moni lava nei ona ua foliga mai lava i tagata o o latou aiga; o si'uleo fo'i ma a latou 'upu ua leai lava se 'ese'esega e tasi. Ua fa'apenā ona fiafia le to'atele ona o nei mea ua foliga mai o ni molimau ua fa'a'iloa mai ai o lo o fiafia i le lagi a latou uō po o tagata o latou aiga. Ua fa'apenā ona usita'i atu le to'atele i agaga taufa'asesē ma a'oa'oga a temoni e aunoa ma so latou iloa ua latou la'a atu i se tulaga latou te pagātia ai.

E muamua ona fa'asesē e Satani tagata ina ia latou talitonu e moni lava o ē ua oti e mafai ona toe fo'i mai ma tautala mai iā i latou. E talitonu loa tagata i lenei mea, ona faia loa lea o le togafiti a Satani ina ia fa'aali mai ai i latou na feoti e le'i sauni, i latou na feoti o lo o latou faia pea lava le amioleaga. Ua latou fa'aali mai nei ma fai mai o lo o latou fiafia ma 'oli'oli i le lagi; a e lē gata i lea ua mautofi ai fo'i i latou ma fa'aeaina i le lagi. Ua fa'apenā ona salalau le tala'iga fa'apea e leai se 'ese'esega o ē amiotonu ma ē amioleaga i le lagi. O nisi o taimi ua tāutala mai ai i latou ua oti ma ua latou fai mai ni lapata'iga e fa'atatau i se mea o le a tupu. O nisi o taimi e fa'ataunu'uina ai lava a latou valo'aga. Ua fa'apenā ona atili ai ona talitonu i ai tagata. O le taimi lea e aumaia ai loa e Satani i tagata ni a'oa'oga e 'ave'esega ai lo latou fa'atuatua mai le Tusi Pa'ia. Ua faia e Satani ina ia fa'aalia mai e nei agaga leaga ni 'upu ma ni foliga alofā mo ē o lo o ola, ina ia faigofie ai ona talitonu tagata i a latou a'oa'oga taufa'asesē. A i ai ni a latou valo'aga e taunu'u, ona atili ai lea ona fa'atuatua a latou fe'au e tagata ola. Ua fa'apenā ona lautele le salalau atu o nei a'oa'oga sesē, ma ua talitonu i ai tagata ua pei lava o ni 'upu moni pa'ia mai le afioga a le Atua. Ua lē toe popole tagata i le tulafono a le Atua, ua latou manatu māmā i le Agaga Pa'ia, ma ua latou tauemu i le toto ma le maliu o Keriso. Ua ta'u mai e nei agaga e lē o le Atua Keriso. E lē gata i lea, ua latou fai mai e tutusa lelei lava o latou tulaga ma le tulaga o Lē na foafoa le lagi ma le lalolagi. Ua fa'apenā ona fa'aauuina i lalo nei le fouvalega a Satani na amatalia i le lagi, tusa ua ono afe nei tausaga.

(3) I LENEI FA'AA'OA'OGA FA'ALE-TUSI PA'IA, O AI LEA NA FA'AFOLIGA I AI AGAGA LEAGA?

Ona fai atu lea o ia iā te ia, 'O le ā lona tino mai?' Ua fai mai o ia, 'O le toea'ina ua alu a'e, o lo'o 'ofu i le 'ofu talaloo.' Ona iloa ai lea e Saulo, o Samuelu lea; ua punoa ona mata i le 'ele'ele, ma ifo atu iā te ia.

I Samuelu 28:14

E to'atele ua latou fai mai o nei mea uma o togafiti taufa'ase'e a tagata popoto. E moni e i ai togafiti taufa'ase'e a tagata ua manatu isi tagata o galuega a agaga leaga; peita'i e tele fo'i fa'aaliga uiga 'ese ua faia e se mana mai fafo. Na fa'alogoia ni tu'itū'i i se puipui o se fale i se pō. O nei tu'itū'i o ni mea na faia e agelu leaga. Peita'i ua 'avea ia tu'itū'i ma amataga o fa'agaioiga ua talitonu le to'atele o ni feso'ota'iga fa'aōnapōnei i le vā o tagata ola ma ē ua oti. O le amataga lenā o se galuega taufa'asesē ua sili ona manuia, ma ua fano ai le to'atele o tagata. E to'atele o le a fa'asesēina ona ua latou manatu o nei mea uma ua faia e le poto taufa'ase'e o le tagata. E fetaui tutū loa i latou nei ma vavega a le ti'āpolo, ona latou fai mai loa lea o le mana lea o le Atua.

(4) O Ā VAEGA E TOLU O LO'O FA'AMATALAINA AI LE FA'AALITINOINA O PULEGA FA'ASATANI?

O lona sau fo'i e pei o le galuega a Satani, i le mana uma, ma fa'ailoga, ma vavega pepelo, ma mea fa'asesē uma o le amio leaga i ē a fano; auā ua latou lē talia le 'upu moni ma lē fiasia i ai, ina ia fa'aolaina ai i latou.

II Tesalonia 2:9, 10

Ua galo i nei tagata le molimau a le Tusi Pa'ia e fa'ataui i vavega na faia e Satani ma ana 'au. O le galuega a Satani na mafai ai e le 'au fa'ataulaitu a Farao ona faia mea na foliga i le galuega a le Atua. Fai mai le molimau a Paulo o le a i ai ni fa'aaliga tetele fa'apea o le mana'o Satani a o lumana'i ai le afio fa'alua mai o Keriso. A o le'i afio mai Keriso, o le a fa'aalia le malosi o le mana'o Satani e fai ai fa'ailoga ma vavega pepelo ma mea fa'asesē uma o le amioleaga. Ua fa'amatalaina mai fo'i e Ioane i 'upu nei le mana faivavega o le a fa'aalia mai lona malosi i aso o le i'uga. Fai mai Ioane: "Ua faia fo'i e ia fa'ailoga tetele, o lea ua fai ai e ia ina ia alu ifo le afi mai le lagi i le lalolagi i luma o tagata. Ua ia fa'asesē fo'i i ē ua nonofo i le lalolagi ona o ia fa'ailoga ua tu'uina atu iā te ia na te faia" (Fa'aaliga 13:13, 14). E lē o ni togafiti poto a tagata taufa'ase'e ua vālo'ia maiinei e Ioane. Ua fa'asesēina tagata ona o vavega ua faia e 'au a Satani - o vavega a e lē o ni mea ua foliga mai o ni vavega.

(5) O LE Ā LE GALUEGA AUPITO SILI A SATANI UA FA'AALIA AI LONA AGAVA'A I LE TAUFASESĒ?

Auā o i latou o aposetolo pepelo i latou, o le 'au faigaluega 'ole'ole, ua liua i latou e i latou ma aposetolo a Keriso. E lē se mea fo'i lea e ōfo ai, auā o Satani lava, ua liua o ia e ia ma agelu o le malamalama.

II Korinito 11:13, 14

Ua tele augātupulaga o fa'aaogā le malosi o le mafaufau o le ali'i o le pōuliuli i lana galuega tele o le taufa'asesē. Ua fa'apenā ona maua e Satani le agava'a ma le poto masani na te fuafua mai ai āna fa'aosoosoga, ina ia fetaui lelei ma mana'oga ma tulaga o vasega 'ese'ese o tagata. Afai o tagata atamamai ma ē maua i latou ma le 'au popoto, ona fuafua lelei mai fo'i lea i ai e Satani ana togafiti ina ia fetaui lelei ma mea e manana'o i ai ia itū'aiga tagata. Ua fa'apenā ona fa'amanuiaina le galuega a le ali'i o le pōuliuli. Fai mai le aposetolo o Iakopo, o le poto e maua i mea fa'ataulaitu, o le poto lea e lē mai le Atua, a o le poto fa'alalolagi, o le mea fa'aletino, o mea fa'atemoni (Iakopo 3:15). Peita'i e fa'alafi lenei mea e Satani pe afai e tusa ai ma ana fuafuāga. Na alu atu Satani iā Keriso i le vāo ua ofu atu i le pupula o serafi o le lagi; e fa'apenā fo'i ona sau o ia i tagata e lafi mai i ni uiga matagofie ma le lalelei, ua pei o se agelu o le malamalama. Ua fa'apenā ona lafi mai o ia i tua o matā'upu ua tāua i manatu o le au atamamai, fa'apea ni va'aiga ua matagofie i mata o tagata, atoa ma ana lauga lelei e fa'ataui i le alofa ma le agalelei. Na te fa'aoso le 'au popoto ina ia latou manatunatu i ni matā'upu e maua ai so latou vi'iga i le lalolagi, ona ia ta'ita'ia lea o i latou ina ia latou mitamita i lo latou poto a e manatu māmā ai i le Silisili 'Ese. Na mafai e Satani ona 'ave le Fa'aola o le lalolagi i luga o se mauga maua i latou ma fa'aali atu ai iā te Ia le mamalu o malō uma o le lalolagi. O le ti'āpolo lava lea e tasi o lo o aumaia āna fa'aosoosoga i tagata i auala 'ese'ese e ono fa'asesēina ai i latou o ē ua lē 'avea le mana o le Atua o lo latou lafitaga.

(6) O LE Ā LE POGAI O LE POTO UA FA'ASĀ E LE ATUA MA LE FIA FA'AEAINA O 'OE LAVA IA O LO'O NAUNAUTA'I I AI TAGATA AMIOLEAGA?

E lē o le poto lenei ua alu ifo mai lugā; a o la le lalolagi ia, o le mea fa'aletino, o le fa'atemoni ia.

Iakopo 3:15

E pei lava ona fa'asesēina e Satani Eva i le fa'ato'āga i Etena, ua fa'apenā fo'i ona fa'asesēina e ia tagata i le asō - e ala i mea taufa'ase'e, e ala i lona fa'alālā atu i ai o se poto ua fa'asā e le Atua, fa'apea ma le naunau mo ni “tulaga fa'aeaina. O le fa'apelepele o Satani i manatu fa'apea na pogai ai lona lava pa'ū; o fa'aosoosoga lava fo'i ia ua ia fuafuaina o le a ala mai ai le fa'afanoga o tagata. Fai mai lana tala i le fa'ato'āga: “O le a pei oulua ni atua; o le a lua iloa le lelei ma le leaga” (Kenese 3:5). O ē ua talitonu i a'oa'oga fa'ataulaitu ua latou talitonu i se manatu fa'apea o le tagata e la'ala'a pea i luma lona olaga se'i o'o lava i le lagi, e la'ala'a pea lava aga'i i le aiga Atua.

Ua fa'apenā ona aumaia e Satani le uiga agasala o le tagata e 'avea o fua fa'atautau e fa'aaogā i le fa'amasinoga, e sui a'i le amiotonu 'ato'atoa o le Atua Silisili 'Ese. E lē o se la'ala'a i luma lenei mea a o le solomuli i tua.

(7) O LE Ā LE ALA E TASI E MAFAI AI ONA FA'AEAINA LE AIGĀ TAGATA?

A ua foa'i mai e la le alofa tunoa e sili; o lea ua fa'apea mai ai, 'E tete'e atu le Atua i ē fa'amaualuga, a e foa'i mai le alofa tunoa i ē fa'amaualo.

Iakopo 4:6

E lē mafai ona o'o le tagata i se tulaga e maualuga a'e nai lo le tapula'a ua ia fa'ata'atia e fai mona sini. Afai ua nofo lava ia ma fai o ia ma tapula'a e fua i ai ana gaioiga uma, o lona uiga e lē o'o lava ia i se tulaga e sili atu nai lo ia lava. Pau le mea e o'o i ai na o le solomuli atili i tua ma le goto ifo i lalo. Na o le galuega lava a le Agaga o le Atua e mafai ai ona si'itia a'e ma fa'aeaina le tagata. A e a tu'u i le poto o le tagata, na o le tasi lava le itū e i'u i ai lana alu - na o le pa'ū ma le to'ilalo.

(8) O LE Ā LE VAEGA E FAIA E LE TAGATA INA IA GALULUE FA'ATASI AI MA LE ATUA E TETE'E ATU AI I LE FA'AMALIEINA O ŌU LAVA TU'INANAUGA?

O i latou uma o ē fai aigofie e fai fa'atatau i mea uma lava; o i latou fo'i ua latou fa'apea ina ia maua le pale palagofie, a o i tatou, ina ia maua le pale e lē pala lava.

I Korinito 9:25

E 'ese ofu e sau ai Satani i ē naunau i le fa'amalieina o o latou tu'inanau, o ē ua fa'aalu lo latou taimi i mea fa'afiafia. Ua fuafua lelei mai e Satani ana maili ina ia fetau ma mea e manana'o i ai lenei vasega o tagata. Ua māt'auina lelei e Satani vaivaiga uma o le uiga o lea tagata ma lea tagata, ona nofo lea o ia ma va'ava'ai ni avanoa lelei e fa'amalieina ai tu'inanau ma le amioleaga o nei tagata. E tau fa'aosooso Satani ina ia so'onafai ma lē faifa'atautau lelei tagata i le faiga o mea lelei, ina ia pa'ū ai i latou e ala i le lē faifa'atautau lelei, ma vaivai ai i latou i le itū i le tino, ma le mafaufau, fa'apea ma le itū fa'aleagaga. E afe ma afe ua fa'amalepeina e Satani o latou olaga e ala i le fa'amalieina o le tu'inanau o le tino; ma ua fa'apenā ona toso ifo ai e Satani le uiga o tagata ina ia latou amio e pei o ni manu. E fa'apefea ona faia le galuega a Satani? Ua tautala mai o ia e ala i agaga leaga, agaga ia ua talitonu tagata o agaga o o latou aiga ua feoti. Ua tautala mai o ia ma fai mai: “O le poto moni e si'itia a'e ai le tagata ina ia lē toe mana'omia ai e ia le tulafono. E leai se mea o toe sesē; ua sa'o mea uma lava. E lē ta'usalaina se tasi e le Atua. O agasala uma o lo o faia e tagata, o mea mamā uma ia”. Ua fa'apenā ona fa'asesēina tagata, ma ua latou talitonu ai o le mana'o o le tagata, o le tulafono lava lea; o le sa'olotoga moni o le fa'atagaga lava lea e fai ai le mea ua mana'o i ai le loto o le tagata; a e a o'o i le fa'amasinoga, e fa'amasinoina e le tagata ia lava. E lē tioa mumū fa'a-afi le amioleaga ma amio matagā i so'o se itū tatou te liliu i ai. Ua fialia le to'atele latou te talia ni a'oa'oga ua latou maua ai le sa'olotoga e fai ai mea uma e mana'o i ai le loto amioleaga. Ua leai se pulea lelei o le olaga, a ua fai le faitalia a le tu'inanau; o le malosi o le loto ma le mafaufau ua fa'aalu uma i le fa'amalieina o tu'inanau fa'amanū. Ua fa'apenā ona maua i le upega a Satani le to'atele o ē ua fai mai o i latou o so'o o Keriso.

(9) O LE Ā LE LAPATA'IGA UA TU'UINA MAI E LE TUSI PA'IA I LE 'AUFATASI AI I TALITONUGA E FA'ATATAU I AGAGA O Ē UA OTI?

'Aua tou te fa'asaga atu iā i latou o i ai aitu vavalo, 'aua fo'i e te sa'ili i taulāitū e leaga ai outou; o A'u o Ieova lo outou Atua.

Levitiko 19:31

Peita'i e lē tataua ona sesē se tasi i fa'a'upuga pepelo a ē ua talitonu i a'oa'oga ma togafiti fa'ataulaitu, o ē ua fai mai e mafai ona faia ni feso'ota'iga i le vā o tagata ola ma ē ua oti. Ua lava le malamalama ua tu'uina mai e le Atua e

mafa'i ai ona tatou iloa le mailai. E pei ona fa'ailoa i luga, ua tete'e a'oa'oga uma a le Tusi Pa'ia i le manatu lea ua fai ma fa'avae o talitonuga fa'ataulaitu ma a'oa'oga sesē e fa'atatau i feso'ota'iga i le vā o tagata ola ma ē ua oti. Fai mai le Tusi Pa'ia o ē ua oti latou te lē iloa se mea, ua lē toe i ai ni o latou manatu; e leai sa latou toe āiā i so'o se mea o lo o faia i lalo o le lā; ma ua latou lē toe iloa fo'i ni fiafiaga po o ni fa'anoanoāga o ē na pele iā i latou i le lalolagi (Failauga 9:5).

(10) INA IA FA'AALIA LE TĀUA O LE MATĀ'UPU E FA'ATATAU I AGAGA O Ē UA OTI, O LE Ā LE FA'ASALAGA SA FOLAFOLAINA E LE ATUA MO I LATOU O Ē NA 'A'AFIA AI?

O se tane fo'i po o se fafine e i ai se aitu vavalo, po o ua fai ma taulāitū, ia fasiotia lava ia; latou te fetogi i a i latou i ma'a; e iā te i latou o latou toto.

Levitiko 20:27

E lē gata i lea a ua fa'asāina fo'i e le Atua ni feso'ota'iga i le vā o tagata ola ma agaga leaga. Na i ai fo'i nisi na fai ma feso'ota'iga i le vā o tagata ola ma ē ua oti i le vaitaimi o le nu'u o Isara'elu. Na fa'aigoa e tagata i latou nei o ē na i ai aitu vavalo, a o le ta'u i ai a le Tusi Pa'ia “o agaga o temoni” (Numera 25:1-3; Salamo 106:28; 1 Korinito 10:20; Fa'aaliga 16:14.) O le 'a'apa atu o le fanauga a Isara'elu i aitu vavalo po o agaga leaga, o se mea lea na 'inosia e le Atua; o le oti le fa'asalaga o se tasi na ia faia lenei mea (Levitiko 19:31; 20:27). O le mea lea ua 'inosia ai le 'upu fa'ataulaitu i le asō. Peita'i ua toe a'e mai lenei mea i ōna pō nei, a ua sau i se igoa fou ma ua ofu mai i ofu o le malamalama. E miliona ma miliona ua liua i le talitonuga fa'apea e mafai ona faia ni feso'ota'iga i le vā o tagata ola ma ē ua oti. Ua ofi atu lenei talitonuga i fa'alapotopotoga o tagata popoto ma ē atamamai, ua ofi atu lenei talitonuga i le tele o ekalesia, ua ofi atu fo'i i totonu o fonofaitūlāfono a atunuu, ma ua o'o atu lava i maota o tupu. Atonu e fai sina 'ese o foliga o lenei mea i ōna pō nei, peita'i o mea fa'ataulaitu lava nei na fa'asāina e le Atua anamuā.

E tele molimau e ao ai ona te'ena lenei talitonuga e le 'au Kerisiano; peita'i o le molimau lava e ao ona fa'amuumua o le manatu lea ua fai mai e leai se 'ese'esega i le lagi o ē amiotonu ma le 'au amioleaga, leai se 'ese'esega o le aposetolo aupito amiotonu a Keriso ma le tagata aupito sili ona amioleaga i 'au a Satani. Fai mai a'oa'oga a Satani ua lē gata ina ō i le lagi tagata amioleaga, a ua mautofi ai fo'i i latou i le lagi ma ua fa'aeaina ai. O lona uiga ua fa'apea atu Satani i le lalolagi: “Tusa lava po o le ā lou amioleaga, tusa lava pe e te talitonu i le Atua ma le Tusi Pa'ia pe leai, fai le mea e te mana'o i ai, a e a o'o mai le oti, o le lagi e te o'o i ai”. Fai mai le afioga a le Atua: “O'i talofa iā i latou o ē fai mai, ua lelei le mea leaga a e leaga le mea lelei; o ē fai ma malamalama le pōuliuli a e fai ma pōuliuli le malamalama” (Isaia 5:20).

(11) AISEĀ UA NA O LE TUSI PA'IA AI LE FA'AVAE E MAFAI ONA FA'ALAGOLAGO I AI MO LE FA'AMATALAGA E FA'ATATAU I AGAGA O Ē UA MALILIU?

Ia e fa'apa'iaina i latou i Lau 'upu moni; o Lau afioga o le 'upu moni lea.

Ioane 17:17

Ua ō mai agaga leaga ua foliga mai o i latou o le au aposetolo, ona latou folafolaina mai lea o mea e fa'alēaogāina ai a'oa'oga na tusia e le au aposetolo i lalo ifo o le ta'ita'iga a le Agaga Pa'ia a o i ai i latou i le lalolagi. E lē gata i lea ua latou fai mai e lē mai le Atua le Tusi Pa'ia. Ua fa'apenā ona latou tu'ipalaina le fa'avae o le fa'amoemoe o le Kerisiano, ma ua latou tapēina le mōli ua fa'aalia mai ai le auala i le lagi. O lo o galue Satani ina ia talitonu tagata o le Tusi Pa'ia ua na o se tasi o ni fāgogo ma ni tala fatu. A lē o lea ua ia fai mai o le Tusi Pa'ia sa aogā i le taimi o le pōpōfou o le fanau a tagata, a o le taimi nei ua leai sona toe aogā tele. Fai mai Satani o le galuega a le afioga a le Atua ua sui tulaga mai i ai fa'aaliga a agaga. O se mea lenei ua i lalo ifo 'ato'atoa o lana pule; o lona uiga o le a fai lana faitalia i mea o le a a'oa'oina i le lalolagi. O le a solipalaina le Tusi Pa'ia ma ana a'oa'oga; o lona mana'o tonu lava lea. O le Fa'aola o le lalolagi o le a tu'u i se tulaga e tutusa ai ma tagata uma o le lalolagi. E pei lava ona fa'asalalau e fitafita Roma le tala pepelo na 'ave i ai e ositaulaga ma ta'ita'i Iutaia ina ia fa'ailoa mai ai e le'i toe tū Keriso, o le a fa'apenā fo'i ona fai le tala'iga e i latou ua talitonu i agaga, ina ia fa'ailoa mai ai e leai se mea e 'ese'ese ai le soifuāga o Keriso ma olaga o isi tagata. E fa'amanuiaina loa la latou taumafaiga i lea matā'upu, ona latou fa'atepa loa lea o mafaufau o tagata i a latou vavega. O le a latou fai mai e sili mamao atu a latou vavega nai lo vavega na faia e Keriso.

(12) O LE Ā LE POGAI O LE MANA O LO'O FA'AILOA MAI E LE TALITONUGA E FA'ATATAU I AGAGA O Ē UA MALILIU?

A o le tasi tagata, o Simona le igoa, sa mua'i fai togafiti fa'ataulāitū i lea 'a'ai ua fa'atupu ai le ōfo o le nu'u o Samaria, ua ia fa'apea, o ia lava o lē silisili; ua naunau atu i latou uma lava iā te ia, o tagatānu'u atoa ma ali'i, ua fa'apea ane, 'O le mana tele o le Atua lenei tagata.'

Galuega 8:9, 10

Ua ofu mai nei galuega fa'ataulaitu a Satani i se ofu fou, se ofu o le malamalama, se ofu Kerisiano. Peita'i e lē mafai ona nanāina ana fa'amatalaga na faia i tausaga ua mavae, ni 'upu na folafolaina mai i pulela'a fa'apea ma nusipepa fa'asalalau. O ana a'oa'oga nei e iloagofie ai le amio a lē ua ta'ita'i i lenei galuega taufa'asesē.

Ua sili atu le mata'utia o a'oa'oga fa'ataulaitu i nei ōna pō ona o ofu ua lafi mai ai. O tausaga ua mavae na latou tete'e iā Keriso ma le Tusi Pa'ia; o le taimi nei ua latou folafola mai ua latou talia Keriso ma le Tusi Pa'ia. Peita'i ua latou fa'amatalaina le Tusi Pa'ia i se auala e fiafia i ai taliga o tagata e le'i liua olaga, a e fa'amāmāsagia ai a'oa'oga autū o le afioga a le Atua. Ua latou fa'amamafaina le alofa o le Atua; peita'i o le alofa ua latou tala'ia o se alofa papa'ū, na o se lagona; o se alofa e lē maua ai se 'ese'esega i le vā o le lelei ma le leaga. Ua fa'apenā ona latou tala'ia na o le alofa a ua lē tā'ūa lava a'oa'oga e pei o le amiotonu o le Atua ma Lona 'ino'ino i le agasala, fa'apea ma le tausiga o le tulafono pa'ia a le Atua. Ua latou a'oa'o tagata ina ia latou talitonu ua leai se toe aogā o le tulafono. Ua fa'apenā ona l'olofi tagata i lo latou fia fa'alogi o a'oa'oga fa'apenei, a'oa'oga e ta'ita'iina ai tagata ina ia latou te'ena le Tusi Pa'ia, le fa'avae o lo latou fa'atuatua. E leai lava se 'ese'esega o le tulaga ua latou tu'u i ai Keriso i le taimi nei, ma le tulaga na latou te'ena ai o ia i tausaga ua mavae. Peita'i, ua fa'atauasoina e Satani mafauafau o tagata, ma ua latou lē iloa ai le mailei.

(13) O LE Ā LE FA'ATONUGA UA TU'U MAI E LE AFIOGA A LE ATUA E PUIPUIA AI I TATOU MAI LE FA'ASESEINA?

Ia e taumafai ina ia 'avea 'oe ma lē ua fiafia mai i ai le Atua, o lē faigaluega e leai se mea e mā ai, na te vavaetonuina le 'upu moni.

II Timoteo 2:15

E to'aititi lava i latou ua latou malamalama lelei i le malosi o le mana fa'ataulaitu ma le mana taufa'asesē o agaga leaga, o ē ua latou faia togafiti ma vavega ina ia talitonu ai le lalolagi e mafai ona faia ni feso'ota'iga i le vā o tagata ola ma ē ua oti. E to'atele ua latou l'olofi i mea o fai ai le galuega ma a'oa'oga a Satani ona o lo latou fia va'ai ma le fiaailoa. E leai so latou talitonuga moni i ai; e leai fo'i sa latou fuafuāga o le a latou gaua'i atu ma tu'uina atu i latou i lalo o le pule a agaga leaga. Peita'i ua latou sopo atu i le mea ua fa'asāina; ona fa'apenā lea ona maua o i latou e le ali'i o le pōuliuli, e ui lava latou te le'i manana'o i ai. E tosina atu loa i latou ina ia pulea o latou mafauafau e agaga leaga mo sina taimi e tasi, ona taofi mau loa lea o i latou e le ti'āpolo e lē toe fa'amamuluina. E lē mafai i lo latou lava malosi ona latou sosola 'ese mai le malosi o le mana taufa'asesē o le ti'āpolo. Na o le tasi lava le auala e mafai ai ona latou toe mamulu 'ese mai 'ave malolosi o lenei mailei - o le mana lea o le Atua e foa'iina mai, e 'avea o se tali i talosaga fa'atauānuu, talosaga ua faia i le fa'atuatua.

(14) O LE Ā LE I'UGA E O'O I AI PE A FAIA MA LE ILOA SO'O SE AGASALA?

A e peita'i o a outou amio leaga ua fai ia ma pupuni i le vā o outou ma lo outou Atua, o a outou agasala fo'i ua 'alo ai Ōna fofoga iā te outou ua la lē fa'afofoga mai ai.

Isaia 59:2

O ē uma o lo o latou fa'amalieina le agasala i o latou olaga, o ē uma o lo o latou fa'apelepele i se mea ua latou iloa o le agasala, o i latou ia ua latou fa'aafe maia Satani ma āna fa'aosoosoga i o latou olaga. O lo latou faia o lenei mea, o lo latou vavae'esea lava lea o i latou mai le Atua ma le leoleoga a Āna agelu. A o fa'asolosolo atu i ai fa'aosoosoga a le ti'āpolo, o le a faigofie ona latou pa'ū'ū auā ua leai so latou puipuiga. Ua fa'apenā ona tu'uina atu e nei tagata i latou lava i lalo ifo o le pulega a Satani, e aunoa ma so latou iloa o le mea o le a latou o'o i ai. E maua 'ato'atoa loa i latou e le ti'āpolo, ona fa'aaogāina loa lea o i latou e fai ma māunu ina ia fa'atosina mai ai nisi i le fa'afanoga.

(15) AISEĀ O LE A TALITONU AI LE TO'ATELE I "MANATU PEPELO?"

O le mea lea 'ou te onosa'i ai i mea uma ona o le 'au filifilia, ina ia maua e i latou lava le ola o lo'o iā Keriso Iesu ma le manuia e fa'avavau. O le 'upu moni lenei; auā pe afai tatou te oti fa'atasi ma Ia, tatou te ola fa'atasi ai fo'i.

II Tesalonica 2:10, 11

Fai mai le perofeta o Isaia: “A latou fai atu fo'i iā te outou, Sa'ili atu ia i aitu vavalo, ma taulaitu o ē leo 'i'i, ma ē ua memu, ia outou tali atu, A lē sa'ili atu ea le nu'u i lo latou Atua? E sa'ili atu ea, i ē ua oti mo ē o ola? Inā sa'ilia i le tulafono ma le mau; afai latou te lē tautala e tusa ma ia 'upu, ua leai lava se malamalama iā te i latou” (Isaia 8:19, 20). Ana talia e tagata le a'oa'oga manino a le Tusi Pa'ia e fa'atatau i le natura o le tagata, atoa ma le tulaga e o'o i ai le tagata pe a oti, semanū o le taimi latou te va'ai ai i fa'aaliga ma vavega fa'apea, o le taimi lava lea latou te iloa ai o nei fa'aaliga

ma vavega pepelo uma o le galuega a Satani. Peita'i e to'atele ua latou lē fia fulitua i le agasala ona o lona suamalie, ma ua fa'apenā ona latou pupuni o latou mata ma savavali sa'o e aunoa ma so latou fia tepa i lapata'iga ua tu'uina mai mo lo latou puipuiga. Ua fa'apenā ona maua i latou uma nei i le mailēi a le fili. “Auā ua latou lē talia le 'upu moni ma lē fiafia i ai ina ia fa'aolaina ai i latou. O le mea fo'i lea e 'auina atu ai e le Atua iā te i latou le galuega e fa'asesē ai, ina ia latou talia le mea pepelo.”

(16) PE A TATOU TUMAU I LE 'UPU MONI A LE ATUA, O AI O LO'O TATOU TETE'E I AI?

Auā ua 'ou mautinoa, e lē mafaia e le oti, po o le ola, po o agelu, po o ali'i, po o ē malolosi, po o mea i nei ōna pō, po o mea atalī, po o le maua luga, po o le loloto, po o se tasi mea na faia, e lē mafaia e ia mea ona fa'ate'a'eseina mai i tatou i le alofa o le Atua, o lo'o i a Keriso Iesu lo tatou Ali'i.

Roma 8:38, 39

O ē ua tete'e i a'oa'oga fa'ataulaitu ma galuega taufa'asesē a agaga leaga e fa'atatau i feso'ota'iga i le vā o tagata ola ma ē ua oti, ua latou faia se taua e tete'e atu ai e lē na o tagata, a ua fa'apea fo'i ma Satani ma 'au uma o le pogisā. E lē solomuli Satani i se inisi e tasi se'ia vaganā ua osofa'ia o ia e le malosi ma le mana o 'avefe'au fa'alelagi. E ao i le fanau a le Atua ona latou fa'afetaia'ia le fili e pei ona faia e lo latou Fa'aola ina ua ia fetalai atu iā Satani: “Ua tusia.” E mafai e Satani ona si'itia mai mau o le Tusi Pa'ia e pei ona ia faia iā Keriso; e mafai fo'i e Satani ona mimilo ma fa'augasesē a'oa'oga a le Tusi Pa'ia ina ia lagolagoina ai ana matā'upu taufa'asesē. Afai o le manumalō e manana'o i ai le fanau a le Atua i lenei taimi uigā, e ao ona su'esu'e ifo i latou lava i le molimau a le Tusi Pa'ia, a e lē o le fa'alagolago i a'oa'oga ua avatu e isi iā i latou.

(17) PE AFAI TATOU TE FETAIA'I MA AGAGA LEAGA O LO'O FA'AFOLIGA MAI PEI O E UA MALILIU, O LE Ā LE 'UPU MONI O LE A PUIPUIA I TATOU MAI IA MEA E TAUF'AASESĒ?

Auā o ē ua ola, ua latou iloa e oti i latou; a o ē ua oti, latou te lē iloa se mea; ua leai fo'i se toe totogi iā te i latou; auā ua fa'agalagaloina i latou.

Failauga 9:5

E to'atele o le a latou va'ai i agaga leaga ua ō mai ua foliga i o latou aiga pele po o a latou uō ua maliliu. O le a ō mai nei aiga po o uō pele ma ta'u mai ni a'oa'oga e matuā 'ese'ese mamao ma a'oa'oga a le Tusi Pa'ia. O le a ō mai i latou ma ōleōle mai i ni leo mālū, ma o le a latou faia ni vavega e lagolagoina ai a latou fa'amatalaga. E ao ona tatou nofo sauni nei e tau ma i latou, ma fa'aaogā i ai le au'upega o le Tusi Pa'ia ua fa'apea mai, o ē ua oti latou te lē iloa lava se mea e tasi, ma o ē ua faia nei fa'aaliga ma vavega, o agaga ia o temoni.

(18) PE AFAI TATOU TE MULIMULI I LE AFIGA A LE ATUA, O LE Ā LE FOLAFOLAGA OFOFOGIA E MAFAI ONA TATOU TAPA I AI A O TATOU I AI I LE 'ITULĀ O FA'AOSOOSOGA?"

Ua e tausia le 'upu o Lo'u onosa'i, o lea fo'i 'Ou te tasi ai iā te 'oe i le itū aso e tofotofoina ai, a o'o mai i le lalolagi uma, e tofotofo ai i ē o nonofo i le lalolagi.

Fa'aaliga 3:10

Ua toetoe lava o'o mai iā i tatou le itūlā o le tofotofoga lea o le a o'o mai i le lalolagi uma. O le a fa'asesēina ma to'ilalo i latou uma o ē le'i fa'avaeina lo latou fa'atuatua i luga o le afiga a le Atua. O le a galue Satani i le malosi sili o lona mana taufa'asesē, ina ia pulea ai e ia le fanau a tagata, ma o le a fa'atupula'ia pea ana galuega taufa'asesē. Peita'i, fa'ato'ā manuia lava ana taumafaiga pe a gaua'i ma filifili tagata latou te mulimuli i āna fa'aosoosoga. Peita'i o le a 'avea le Atua o le 'olo malosi o i latou o lo o sa'ili ma le fa'amaoni i le 'upu moni ma latou usita'i i ai, ma fa'apenā ona latou sauniuni ai mo le fetaia'iga ma le fili. Fai mai le fetalaiga a le Fa'aola: “Ua e tausia le 'upu o Lo'u onosa'i, o lea fo'i 'Ou te tasi ai iā te oe.” Ua nofo sauni le Atua e 'auina mai agelu uma e mana'omia e Lana fanau mo le taua; e lē fia silasila o Ia ua manumalō Satani i se tasi o Lana fanau ua fa'amoemoe iā te Ia.

(19) O LE Ā LE FAIGATĀ E MAUA PE A TALIA MA LE LĒ MALAMALAMA TALITONUGA A E LĒ SE'I SA'ILI'ILI MO LE 'UPU MONI ONA TALIA LEA MO LE TAGATA LAVA IA?

Ua fa'aumatia Lo'u nu'u ina ia ua leai se poto; o 'oe fo'i na e tete'e atu i le poto, o le mea lea 'Ou te tete'e atu ai iā te 'oe, e lē fai 'oe ma ositaulaga iā te A'u; ua e fa'agalagalo le tulafono a lou Atua, o A'u fo'i 'Ou te fa'agalagalo i lau fanau.

Hosea 4:6

Ua fa'ailoa mai e Isaia le fa'asesēga tele o le a o'o mai i le 'au amioleaga, o ē ua manatu ua lē āfāina i latou i le fa'amasinoga a le Atua: “Ua osia la matou feagaiga ma le oti; ua fai fo'i la matou feagaiga ma seoli; a ui ane le sasa e lofia ai, e lē o'o mai lea iā te i matou; auā ua matou faia le pepelo mo matou malu; ua matou lalafi fo'i i tala o'ole” (Isaia 28:15). Ua fa'ailoa mai inei le 'au amioleaga ua lē fia salamō, a ua latou manatu ua lē āfāina i latou auā e leai se fa'asalaga mo ē amioleaga. Ua latou manatu fo'i tusa lava po o le ā le leaga o le tagata, e ō uma lava i le lagi; ma o inā o le a fa'aeaina ai i latou ina ia tutusa ma agelu a le Atua. Ua fa'ailoa mai fo'i i lenei mau i latou ua osia le feagaiga ma le oti ma le feagaiga ma seoli. Ua latou fulitua i le 'upu moni na tu'uina mai e le lagi e fai ma puipui i le 'au amiotonu i le aso o le fa'aosoosoga, a ua latou 'avea pepelo a Satani o lo latou lafitaga - o pepelo lava ia a i latou ua fai mai ua latou faia ni feso'ota'iga ma ē ua oti.

(20) O LE Ā LE PEPELO NA TA'UINA E SATANI I LE FA'ATO'AGA SA 'AVEA MA FA'AVAE O TALITONUGA UMA E FA'ATATAU I LE TULAGA O AGAGA O Ē UA MALILIU?

Ona fai mai lea o le gata i le fafine, 'Lua te lē oti lava.'

Kenese 3:4

Ua leva ona fai sauniuniga a Satani mo lana toe osofa'iga e fa'asesēina ai le lalolagi. Na fa'ata'atia le fa'avae o lana galuega i 'upu na ia fai atu ai iā Eva i le fa'ato'āga: “Lua te lē oti lava.” “O le aso lua te 'a'ai ai, e pupula ai o oulua mata; ona 'avea ai lea o oulua e pei ni atua o lo o iloa le lelei ma le leaga” (Kenese 3:4, 5). Na faifaimalie mai ana sauniuniga mo lenei osofa'iga tele, lana toe osofa'iga o le a fa'asesēina ai le lalolagi e ala i fa'ailoga ma vavega e faia e agaga leaga. E le'i fa'ataunu'uina 'ato'atoa ana fuafuāga ma ana faufauga; peita'i o le a tualugaina ana fa'agaioiga uma i le taimi o le i'uga. Fai mai le perofeta: “Ona ou iloa ai lea o agaga leaga e to'atolu e pei o rane, ...auā o agaga ia o temoni, ua latou ō atu i tupu o le lalolagi ma le atulaulau uma, e fa'apotopoto iā te i latou i le taua i le aso tele o le Atua e Ōna le malosi uma lava” (Fa'aaliga 16:13, 14). O le a fa'asesēina ai le lalolagi atoa i lenei fa'asesēga tele, se'i vaganā i latou na taofia e le mana o le Atua, e ala i lo latou fa'atuatua i Lana afioga. Ua fa'apenā ona o'o ifo i tagata i ōna pō nei le manatu fa'alēpopole; ua latou manatu ua leai se mea e āfāina ai i latou. Fa'ato'ā tete'i lava i latou nei pe a liligiina ifo le to'asā o le Atua.

(21) PE A FA'AI'UINA LENEI FINAUGA TELE, O LE Ā LE MEA O LE A TUPU I LE "LĀFIGA O PEPELO" A SATANI?

'Ou te faia le fa'amasinoga ia fa'atatauina i le fua fa'ata'oto, 'Ou te faia fo'i le amiotonu ia fa'atatauina i le fua fa'atautau; e tafea le malu o le tala pepelo i le uato'a, e lofia fo'i le lafitaga i le vai.

Isaia 28:17

E ala i la'u su'esu'ega, ua 'ou iloa o le a taumafai le ali'i o le leaga i aso fa'ai'u e tu'u fa'amalosi lona mana fa'atosina i o tatou mafauafau ia molimau mai o lo'o i ai pea le feso'ota'iga i le vā o tagata o lo'o ola ma ē ua maliliu.

Li'o le Tali:

Ioe

Lē Mautonu

Ou te fa'afetai i le Atua mo le fa'ailoaina o taufa'asesē e lua a Satani - o le ola pea e lē gata o le agaga, ma le tulaga o manatunatuga ina ua oti, - a e ona o Lana Afioga, o le a lē fa'asesēina a'u.

Li'o le Tali:

Ioe

Lē Mautonu

Ua 'ou iloa le tāua o le su'esu'eina o le Afioga a le Atua. 'Ou te taliaina le folafolaga a le Atua e fa'aali mai iā te a'u le 'upu moni a o o'u sa'ili'ili i ai ina ia 'ou lē pa'ū atu i taufa'asesē a Satani.

Li'o le Tali:

Ioe

Lē Mautonu

'Ou te iloa ua lapata'iina tatou i le Tusi Pa'ia e fa'atatau i taimi o puapuagā o le a tatou feagai ai i aso fa'ai'ui'u o le lalolagi ma 'ou te fa'afetai mo le folafolaga pe a 'ou tausi Āna afioga, e Na te tausia fo'i a'u. E ala i Lona mana, o le a 'ou maua le folafolaga o le ola e fa'avavau.

O Le Taua Ua Fa'amālūmālu Mai - 7

(1) O LE Ā LE TULAGA O LO'O FA'AALIA MAI PE A SOLIA E TUSA LAVA PE NA O LE TASI O SE TULAFONO A LE ATUA?

Auā o sē tauti le tulafono uma, a e agasala i se mea e tasi, ua nofo sala ia i mea uma.

Iakopo 2:10

Talu mai lava le amataga o le finauga tele, e tasi lava le sini o lo o galue aga'i i ai Satani - o le fa'alēaogāina lea o le tulafono a le Atua. O le sini lea na ia galue aga'i i ai ina ua faia lana fouvalega i le Atua i le lagi. E ui lava ina ua tuli'esea o ia mai le lagi, o lo o fa'aauauina pea lana tete'e i le Atua i le lalolagi. Na te taumafai ina ia fa'asesē muamua tagata, ona faigofie ai lea ona latou solia le tulafono a le Atua - o le ala lenā e fa'ataunu'uina ai le mea ua ia mana'o i ai. Pe lafoa'i le tulafono atoa, po o le te'ena na o se vaega o le tulafono, e leai se 'ese'esega iā Satani, auā e i'u uma lava i le mea e tasi. O lē ua soli i le poloā'iga e tasi, ua ia nofosala i le tulafono atoa.

(2) O LE Ā LE FUAFUĀGA A SATANI I LONA FA'ALĒAOGĀINA O TULAFONO A LE ATUA?

O lenei se ā ea sa tatou 'upu? O le agasala ea le tulafono? 'Aua ne'i fa'apea. E moni lava, ana lē se anoa le tulafono, po ua 'ou lē iloa le agasala; auā ana lē fai mai le tulafono, 'Aua e te tu'inaanau, po ua 'ou lē iloa le tu'inaanau.

Roma 7:7

Auā e lē ta'uamiotonuina se tagata e to'atasi i Ōna luma i galuega o le tulafono; auā o le tulafono e iloa lelei ai le agasala.

Roma 3:20

Ua fesuia'i ma fa'auigasesē e Satani a'oa'oga a le Tusi Pa'ia, ma ua fa'apenā ona talitonu ai le afe ma afe o tagata i a'oa'oga sesē. O le toe taua i le vā o le 'upu moni ma mea pepelo, o le vaega mulimuli lava lea o le taua tele o lo o fai nei i le vā o poloā'iga a tagata ma le tulafono a Ieova, le vā o a'oa'oga a le Tusi Pa'ia ma manatu ma 'uputu'u a tagata.

(3) O LE Ā LE FA'AMOEMOEGA O LE AFIIGA A LE ATUA MA LE TULAFONO O LO'O AOFIA AI?

O Lau afiiga o le sulu lea i ō'u vae, ma le malamalama i lo'u ala.

Salamo 119:105

Ua amata nei ona fa'agaioi 'au a le ti'āpolo; o 'au ia o le a tu'ufa'atasi e tete'e atu i le 'upu moni ma le amiotonu i le taua o lo o loma nei. Ua lē o toe manatu mamafa le to'atele i le Tusi Pa'ia. Ua tofu Tusi Pa'ia le to'atele, a e peita'i, e to'aititi lava i latou ua latou 'avea le Tusi Pa'ia o le ta'iala i o latou olaga.

(4) O LE Ā LE MAFUA'AGA O LE LĒ FA'AMAONI?

Ua fa'amāina ē popoto, ua matata'u i latou, ma ua maua; fa'auta, ua latou lafoa'i le afiiga a Ieova; se ā fo'i se poto ua iā te i latou?

Ieremia 8:9

E to'atele le 'au Kerisiano ua latou te'ena a'oa'oga autū o le ekalesia Kerisiano. O a'oa'oga e pei o le foafoāga, le pa'ū o le tagata, le galuega o le togiola, ma le tulafono a le Atua - o nisi ia o poutū o le ekalesia Kerisiano ua latou te'ena. A talitonu 'ato'atoa le tagata i le Tusi Pa'ia, ona manatu lea o le to'atele o se fa'ailoga lea o se fai'ai vaivai po o se tagata valea fo'i. Ua latou manatu e iloa le ma'ai ma le malosi o le mafaufau o le tagata pe a faitio i a'oa'oga a le Tusi Pa'ia. E to'atele le 'aufailotu ua latou a'oa'oina tagata ma fai i ai ua suia le tulafono a le Atua ma ua fa'alēaogāina. A o ē o lo o latou tausia pea poloā'iga a le Atua ua latou ulagia ma tauemuina.

(5) O LE Ā LE FAIGATĀ E O'O MAI PE A TETE'E I LE 'UPU MONI?

Ona fai mai lea o Pilato iā te Ia, 'O lenā fo'i, e te se tupu ea 'Oe?' Ua tali atu Iesu, 'O lea lava, o A'u o le Tupu. O le mea lenei na fanau mai ai A'u, o le mea fo'i lenei na 'Ou sau ai i le lalolagi, ina ia 'Ou molimau i le 'upu moni. O i latou uma lava o i le 'upu moni, e fa'alogo mai i latou i Lo'u leo.'

Ioane 18:37

Ua latou te'ena le 'upu moni; o lona uiga ua latou te'ena fo'i Lē na tu'uina mai le 'upu moni. Ua latou te'ena le tulafono a le Atua; o lona uiga ua latou te'ena fo'i le pule a Lē na tu'uina mai le tulafono. E leai se 'ese'esega tele o le ifo i se a'oa'oga sesē ma le ifo i tupua ua tā. Ua mimilo ma fa'auigasesē e Satani a'fioga a le Atua, ma ua fa'apenā ona ia ta'ita'ia tagata ina ia latou talitonu o le Atua o se Matai sauā ma le lē alofa. Ua ifo ma tapua'i le to'atele i tupua ma atua o o latou manatu ma a'oa'oga a tagata, a ua to'aitiiti i latou o lo o tapua'i i le Atua soifua e pei ona fa'aalia mai i Lana a'fioga, e pei ona fa'aalia mai e Keriso, fa'apea ma galuega a Ōna 'a'ao. E afe ma afe ua latou ifo i mea ua foafoaina e le Atua, a ua latou te'ena le Atua, o Lē na faia mea uma lava. E fai si 'ese'esega o foliga o tupua i le lalolagi Kerisiano i ōna pō nei; peita'i o tupua uma lava e pei o tupua na ifo i ai le fanauga a Isara'elu i le vaitaimi o Elia. E leai se 'ese'esega tele o le atua o le 'au popoto o le lalolagi, fa'apea ma ta'ita'i o malō, ma le 'au tusitala, ma ē atamamai ma ē a'oa'oina i a'oga maualuga—e leai se 'ese'esega tele o lo latou atua, o o latou manatu ma a'oa'oga sesē lea, ma Pa'ala lea na ifo i ai le fanauga a Isara'elu.

(6) O LE Ā LE UMI O LE A AOGĀ AI PEA LE TULAFONO A LE ATUA?

E moni lava Lau a'fioga talu le amataga; e fa'avavau fo'i Āu fa'amasinoga tonu uma lava.

Salamo 119:160

Ua fa'asaga Satani e a'oa'o le lalolagi ina ia talitonu ua soloia le tulafono. Ua tu'u uma i ai le malosi o Satani i le faiga o lenei a'oa'oga sesē, auā ua ia iloa o le fa'avae lava lenei ma le ma'a tulimanu o le faigāmalō a le Lagi. E tofu malō ma tulafono ua faia ina ia aloa'ia e tagata ma latou usita'i i ai. E lē mafai ona fai se faigāmalō e aunoa ma tulafono. E fa'apefea la ona fai mai tagata e leai se tulafono e pulea ai i latou uma na faia e le Atua o le lagi ma le lalolagi? Fa'amata o le ā le umi e onosa'i ai se malō i ni faife'au ua fai a latou lauga ma tala'iga ma fai mai e pule lava le tagata ia pe tausi i tulafono a le malō pe leai? Ua latou fai mai o tulafono a le malō ua 'ave'esea ai le sa'olotoga o tagata, ma ua 'ave'esea ai la latou faitalia, ma e lē tataua ona toe usita'i se isi i ai. Fa'amata e fa'atagaina pea i latou ia e fai a latou lauga fa'apea? O le fea e sili atu ona mamafa? O le lē tausia o tulafono a le malō ma le atunu'u po o le solia o poloā'iga pa'ia a le Atua, o poloā'iga lava ia ua fai ma fa'avae o faigāmalō uma i le lalolagi?

(7) O LE Ā LE UIGA O LE SOLITULAFONO?

O i latou uma lava o ē fai le agasala, ua latou soli fo'i i tulafono; o le agasala o le solitūlāfono lava lea.

I Ioane 3:4

Atonu e feololo pe a soloia tulafono a malō a e tu'ufau o latou tagata e fai la latou faitalia. Peita'i e matuā lē talafeagai lava ma le amio a le Atua le soloia o Lana tulafono, ona tu'u ai lea o le lalolagi e aunoa ma se tapula'a ma se fua e fa'amasinoina ai ē amioleaga ma ta'uamiotonuina ai ē usita'i. Afai tatou te fia iloa le i'uga e o'o i ai pe a soloia le tulafono a le Atua, ona tatou liliu lea i le tala tusia o le atunu'u o Farani. O inā na fa'ata'ita'i ai e tagata ona latou 'ave'esea le Atua ma 'ave'esea Lana tulafono, ona fai ai lea o la latou pule e aunoa ma le Atua po o Lana tulafono. Ona matamata ai lea o le lalolagi i le i'uga na o'o i ai - o le 'ave'esea e tagata o le tulafono a le Atua, o lo latou talia lava lea o le pule a tagata e sili ona sauā ma pule fa'amalosi. A 'ave'esea le tapula'a o le amiotonu, ona tatala atu ai lea o le faitoto'a e fa'atūina ai le pule a le ali'i o le pōuliuli i le lalolagi.

So'o se mea e te'ena ai poloā'iga a le Atua, o inā fo'i e lē toe mātagā ai le amioleaga, a e lē toe naunau ai fo'i tagata i le amiotonu. E lē mafai e se isi ona pulea lelei lona lava olaga pe afai e tete'e ma fouvale i le faigāmalō a le Atua. O a'oa'oga fa'apea a tagata o le a fa'ama'a'aina ai loto o le fanau ma le 'au talavou, ona fanau mai ai lea o se nu'u ua tumu i le amioleaga. E to'atele o le a latou fa'atauemu ma ūlagia i latou o ē fa'amaoni i le tausiga o poloā'iga a le Atua; peita'i ua latou fusi ma opo i fa'asesēga a Satani. Ua latou faia e tusa ai ma o latou faitalia, ma ua latou fa'amalieina so'o se tu'inanau o le tino ma amioleaga uma na o'o mai ai le to'asā o le Atua i ē fa'apaupau.

(8) O LE Ā LE TA'IALA FA'ALE-TUSI PA'IA O LE A FA'ATAUNU'UINA PE A TU'U'ESE TULAFONO A LE ATUA?

'Aua ne'i fa'asesēina outou, e lē ulagia le Atua auā o le mea e lūlūina e le tagata, o le mea lava lea e seleseleina mai ai e ia.

Kalatia 6:7

O ē ua latou a'oa'o tagata ina ia latou manatu fa'atauva'a i poloā'iga a le Atua, ua latou lūlūina le fa'alogogatā ina ia maua mai ai le lē usita'i. Fa'ata'ita'i ona lafotūina 'ato'atoa le tulafono a le Atua, ona lē pine lea a e lē toe popole tagata i tulafono fa'alemalō. Ua manana'o tagata e 'ave'esea le tulafono a le Atua ona ua fa'alavelave i le sa'iliga o lo latou

tamao'aiga. Peita'i e lē iloa e nei tagata le mata'utia e o'o i ai pe a 'ave'esea le tulafono a le Atua. Afai e moni ua soloia le tulafono, o le ā le mea o le a toe fefe ai se isi e soli i so'o se tulafono? Afai e soloia le tulafono, e lē toe saogalemū se mea totino a se tagata. O le a 'ave fa'amalosī e tagata mea totino a ō latou tuā'oi; o ē sili ona malolosī ma tele a latou au'upega, o i latou fo'i nā o le a sili ona tamao'aiga. O le a lē toe popole tagata i le ola o isi tagata. O le a lē toe aloa'ia e tagata le tautōga i le vā o ulugali'i. A i ai lava le mana'o ma lava le malosī, e leai se mea o le a taofia ai le alu atu o le tagata ma 'ave fa'amalosī le āvā a lona tuā'oi. O le a fa'apenā fo'i ona lafo i fafo le poloā'iga e lima atoa ma le poloā'iga e fā. O le a lē toe fefefe tamaiti e fasioti i o latou mātua ina ia fa'ataunu'uina ai mana'oga leaga o o latou loto. O le a 'avea le lalolagi malamalama o se ana pogisā o tagata faomea ma ē fasioti tagata. O le a lē toe maua i le lalolagi se mapusaga po o se filemū, po o se fiafia.

(9) O LE Ā LE FA'AMANUIĀGA O LE A LĒ ILOA PE A LĒ USIUSITA'I I POLOA'IGA A LE ATUA?

Lo'u atali'i e, 'a'ua ne'i galo iā te 'oe La'u tulafono; a ia tausia A'u poloā'iga i lou loto. Auā e fa'aopoopoina ai iā te 'oe o aso e tele, ma tausaga e te ola ai, atoa ma le manuia.

Fa'ata'oto 3:1, 2

Amu'ia i latou o ē fai Āna poloā'iga, ina ia taga iā i latou le la'au o le ola, ma ia latou ūlu atu i le 'a'ai i ōna faitoto'a.

Fa'aaliga 22:14

Ua amata lava ona tatou va'aia le mumū fa'a-afi o le amioleaga i le lalolagi i le taimi nei. O fua lava ia o le a'oa'oga fa'apea ua fa'asa'olotoina tagata mai poloā'iga a le Atua. O le ola so'onafai, o tu'inanau o le tino, o amioleaga 'ese'ese uma - o mea ia ua tatafe mai nei e pei o le sau o le galulolo i o tatou luga. O lo o galue ma le mataāla Satani i le talepeina o 'āiga, a e maise lava 'āiga Kerisiano. Ua lūlūina e Satani i le vā o ulugali'i le loto leaga, o le masalosalo, o uiga fa'aFaresaio, o le lē fetautalatala'i, o misa, o le lē fa'amaoni i le to'alua, ma le fa'amalieina o tu'inanau o le tino. O tulafono ma a'oa'oga fa'alelotu sa tatau ona fai ma fa'avae o olaga o tagata o le ekalesia, ua foliga mai nei o se fale a pa'ū.

(10) O LE Ā LE I'UGA E O'O I AI PE A PULEA E LE 'AU SOLITULAFONO TA'ITA'I O MALŌ?

O le solitūlāfono ma le pepelo iā Ieova; o le ō 'ese i lo matou Atua; o le tautala fa'asauā ma le 'upu fa'afouvale; o le manatunatu ma le tautala mai i 'upu pepelo mai le loto. Ua fa'afo'isia i tua le fa'amasinoga, ua tū mamao atu le amiotonu; auā ua pa'ū le fa'amaoni i le malae, e lē mafai ona ūlu mai le amio sa'o.

Isaia 59:13, 14

Ua leai se amiotonu e maua i fale fa'amasino. Fa'ato'ā gaoioi lava ta'ita'i o malō ma nu'u pe afai o se mea e maua ai so latou vi'iga po o so latou tamao'aiga, po o se mea fo'i e fa'amalieina ai se tu'inanau o le tino. O le lē fa'ata'au lelei ua fa'anenefu ai mafaufau o le to'atele ma ua toetiiti ai lava pule 'ato'atoa ai Satani i o latou olaga. O le 'au fa'amasino ma ē faia fa'ai'uga o fa'amasinoga, ua fa'atauina i tupe lo latou fa'amaoni ma la latou amiotonu. O leoleo ma i latou ua fa'amālosia tulafono a le malō, ua tumu i latou i le 'onā ma le pisapisaō, o le loto leaga ma le lē fa'amaoni ma le fa'amalieina o tu'inanau. “Ua tū mamao atu le amiotonu; auā ua pa'ū le fa'amaoni i le malae, e lē mafai ona ulu mai le amio sa'o.”

(11) O LE Ā LE I'UGA E O'O MAI PE A LEAI SE FA'ATUATUA I LE AFIGA A LE ATUA?

Ua lololo o latou loto e pei o le ga'o; o a'u, 'ou te 'oli'oli lava i Lau tulafono.

Salamo 119:70

O le amioleaga ma le pogisā fa'aleagaga i ōna pō o le pule a Roma, o fua lava ia o lona fa'asāina o le Tusi Pa'ia. A o le ā le mafua'aga o le amioleaga ua tumu ai nei le lalolagi, fa'apea ma le te'ena o le tulafono a le Atua, ma le amioleaga ua fanau mai ai? O le ā le mafua'aga o le tele o le amioleaga ua faia nei i le tupulaga o le malamalama, le tupulaga ua sulugia i le malosī o le malamalama o le talalelei? Ua iloa e Satani na te lē toe mafai ona taofia le lalolagi i lalo ifo o lana pule e ala i lona fa'asāina o le Tusi Pa'ia. O le mea lea ua ia uia ai nisi auala ina ia fa'ataunu'uina ai lona mana'o. E taunu'u lona mana'o pe a fa'a'umatia le Tusi Pa'ia; peita'i tusa lava pe 'u'u Tusi Pa'ia uma tagata, e taunu'u lava lona mana'o pe a fa'a'umatia le fa'atuatua o tagata i le Tusi Pa'ia. E taunu'u lona mana'o pe a vālelea tagata ma latou lē iloa poloā'iga a le Atua e pei ona tusia i le Tusi Pa'ia; peita'i e taunu'u fo'i lona mana'o pe a iloa e tagata poloā'iga o le Tusi Pa'ia, a ua latou soli i ai ona o le talitonuga fa'apea ua soloia le tulafono. Ua fa'aaogā e Satani le ekalesia o se au'upega e fa'ataunu'uina ai lana fuafuāga, e pei lava ona ia fa'aaogāina le ekalesia i augātupulaga ua mavae. Ua lē fia

fa'alogo le tele o lotu ma ekalesia i a'oa'oga manino a le Tusi Pa'ia; ua latou tete'e i ai e ala i lo latou fa'auigaseseina o mau o le Tusi Pa'ia, ma ua fa'apenā ona latou lūlūina fatu o le lē talitonu i le Atua ma Lana afioga.

(12) O LE Ā LE FOLAFOLAGA FA'ALELAGI UA TU'UINA MAI E FA'ATATAU I LE TULAGA MAUTŪ O LE TULAFONO A LE ATUA?

'Aua ne'i outou manatu ua 'Ou sau e tatalaina le tulafono po o le 'au perofeta; 'Ou te le'i sau e tatalaina, a ia fa'ataunu'uina.

Mataio 5:17

E moni lava Lau afioga talu le amataga; e fa'avavau fo'i Āu fa'amasinoga tonu uma lava.

Salamo 119:160

(13) O LE Ā LE UIGA E AUPITO TĀUA O I LATOU O Ē ALOLOFA I LE ATUA MA UA 'AVEA O ŌNA LAVA TAGATA I ASO O LE 'UGA?

O le mea lenei ua i ai le onosa'i o le 'au pa'ia; o le mea lenei ua i ai ē ua tausi i poloā'iga a le Atua ma le fa'atuatua i a Iesu.

Fa'aaliga 14:12

Ua ita fo'i le tarako i le fafine, ona alu atu ai lea o ia e tau le taua ma i latou ua totoe o lana fanau, o ē ua tausi poloā'iga a le Atua, ma ua taofi le mau iā Iesu Keriso.

Fa'aaliga 12:17

(14) E UI INA LĒ AMANA'IA E LE TO'ATELE, O LE Ā LE ASO O LO'O FETALAI MAI LE ATUA IA TATOU TAUSIA E FAI MA SAPATI?

Ia e manatua le aso Sapati e te fa'apa'iaina. O aso e ono e te galue ai, ma fai ai āu galuega uma lava; a o le aso fitu o le sapati lea iā Ieova lou Atua; 'aua e te fai ai se galuega e tasi, o 'oe, ma lou atali'i, ma lou afafine, o lau 'au'auna tane, ma lau 'au'auna fafine, o āu manu fo'i, ma le tagata 'ese o lo'o mau ma 'oe. Auā na faia e Ieova i aso e ono o le lagi ma le lalolagi, atoa ma le sami, ma mea uma lava o i ai, ona malōlō ai lea o Ia i le aso fitu; o le mea fo'i lea na fa'amanuia ai e Ieova le aso Sapati, ma na fa'apa'iaina ai.

Esoto 20:8-11

A o folafola atu i tagata le finagalo o le Atua e fa'atatau i le poloā'iga e fā, o le a latou iloa o le Sapati aso fitu o lo o tautala i ai le Tusi Pa'ia. Peita'i e to'atele le 'aufailotu ua latou lē fia faia le mea ua ta'u mai e le poloā'iga e fā. O le mea lea ua latou a'oa'oina ai tagata ma fai i ai ua soloia le tulafono atoa a le Atua. Ua fa'apenā ona latou lafoa'i le Sapati, fa'atasi ai ma le tulafono. A o salalau atu le a'oa'oga e fa'atatau i le Sapati moni, o le a fa'apenā fo'i ona sosolo i le lalolagi atoa le a'oa'oga ua te'ena ai le tulafono atoa a le Atua ona o le mumusu o tagata e usita'i i le poloā'iga e fā. O a'oa'oga a le 'aufailotu Kerisiano ua tatalaina ai le faitoto'a ua ofi mai ai i le ekalesia le lē talitonu i le Atua ma Lana afioga; ua ofi mai ai a'oa'oga sesē e fa'atatau i mea fa'ataulaitu ma feso'ota'iga i le vā o tagata ola ma ē ua oti; ma ua ofi mai ai fo'i le manatu fa'atauva'a i le tulafono pa'ia a le Atua. O luga o le 'aufailotu lenei o le a pa'ū i ai le leaga o le amioleaga tele ua lofia ai le lalolagi Kerisiano atoa.

(15) O LE Ā LE MEA UA VALO'IA MAI E LE AFIGA A LE ATUA O LE A TAUMAFAI LE PULE A LE MANU FE'AI IA SUIA?

Na te faia 'upu i Lē Silisili 'Ese, ma fa'a'umatia le 'au pa'ia a Lē Silisili 'Ese, e manatu o ia e fa'aliliu i tausaga ma tulafono; e tu'uina atu fo'i i latou i lana pule se'ia mavae le tausaga, ma tausaga, ma le vaeluāgalemū o le tausaga.

Tanielu 7:25

(16) O Ā MAILEI MA PEPELO O LE A SUIA LE 'UPU MONI O LO'O LAPATA'I MAI AI I TATOU?

Ia outou, ne'i fa'atagataot'auaina outou e se tasi i le poto lē aogā e fa'asesē ai, e tusa ma le 'uputu'u a tagata, e tusa ma matā'upu muamua a le lalolagi, a e lē tusa ma matā'upu a Keriso.

Kolose 2:8

Peita'i o le 'aufailotu lava lenei ua latou fai mai ua pogai lenei amioleaga tele ona o le solia o le Aso Sā; fai mai i latou o le fa'amamaluina o le Aso Sā o le a si'itia ai le tulaga o le amio a tagata. Ua ta'atele na'ua lenei manatu i Amerika, le atunu'u na pito sili ona salalau atu ai le tala'iga o le Sapati moni. O le atunu'u lea ua masani ai ona o fa'atasi le tala'iga o le Aso Sā ma le tala'iga o le fai fa'ataua lelei. Ua fa'apenā ona fai mai le au tala'i o le Aso Sā ua latou galulue mo le lelei o tagata. O ē lē ioe i la latou galuega ua latou fai mai o fili ia o le galuega o le fai fa'ataua lelei. Peita'i o le a lē 'avea le pipi'i atu o le tala'iga o le mea sesē i se galuega lelei, ma mea o le a lelei ai le tala'iga sesē. Atonu e mafai ona tatou nanāina le mea o'ona i totonu o se mea'ai lelei; peita'i o le a lē 'avea lea ma mea o le a suia ai le natura o le mea o'ona. O le a atili ai ona leaga ma mata'utia lenei mea o'ona ona ua fa'alafi lona uiga moni i totonu o se mea lelei. O se tasi lenei o au'upega lelei a Satani - ua ia fa'aopoopo sina 'upu moni itiiti i le mea sesē ina ia foliga sa'o ai le mea sesē. Atonu e faia e le 'au tala'i o le Aso Sā ni a'oa'oga lelei ua mana'omia e tagata, o ni a'oa'oga e o gatasi ma le Tusi Pa'ia. Peita'i a momono mai i ai ma ni a'oa'oga e lē talafeagai ma le tulafono a le Atua, e lē tatou ona galulue fa'atasi 'au'auna a le Atua ma i latou nei. O le a lē 'avea se mea lelei ua latou faia ma mea o le a ta'uleleia ai lo latou 'ave'esea o le tulafono a le Atua a e sui i ai poloā'iga a tagata.

(17) O LE Ā LE I'UGA MULIMULI O LE A O'O I AI LATOU O Ē LĒ USITA'I 'ATO'ATO'A?

Auā afai e lē iloa e se tasi ona pule i lona lava aiga, pe fa'apefea ona tausia e ia le ekalesia a le Atua?

II Timoteo 3:5

Ua toetoe lava leai se 'ese'esega o tagata ua fai mai o latou o Kerisiano ma tagata amioleaga lē lolotu. Ua fiafia le 'au Kerisiano i mea e fiafia i ai le lalolagi; ua sauni fo'i le 'au Kerisiano latou te tutū ma faifaima fa'atasi ma le lalolagi. O le sini lava lea a Satani ina ia tu'ufa'atasia le 'au Kerisiano ma le lalolagi i se tino e tasi. O le faiga lenā o le a fa'amālosia ai lana galuega, ma faigofie ai ona maua i latou uma i le fa'asesēga tele a agaga leaga ma fa'agaoiiga fa'ataulaitu. O le a lē faigatā ona fa'asesēina tagata pope i nei vavega ma fa'asesēga, auā ua latou talitonu o vavega o le fa'ailoga lava lea o le ekalesia moni. O le a lē faigatā fo'i ona fa'asesēina le 'au Porotesano auā ua latou lafoa'ia le 'upu moni sa fai ma o latou talitā ma lafitaga mai mea taufa'asesē a le fili. O le a fa'apenā ona fa'asesēina le 'au Katoliko, ma le 'au Porotesano, ma tagata o le lalolagi, i mea ua foliga mai o se amioatua a e aunoa ma le mana o Keriso. O le a latou talitonu o le galuega tele lenei o le a liua ai le lalolagi atoa i le Atua, ma tatalaina ai loa le faitoto'a mo le amataga o le meleniuma.

(18) O LE Ā LE I'UGA MULIMULI O LE A O'O I AI LE FANAU A TAGATA INA UA TETE'E PEA I LE TULAFONO A LE ATUA?

Ua fa'anoanoa le lalolagi, ua mamae; ua fa'avaivai le atulaulau, ua mamae; ua fa'avaivai ali'i sili o le nu'u. Ua leaga le nu'u i ē o nonofo ai; auā ua latou solia tulafono; ua latou liliu 'ese le sauniga; ua latou solia le feagaiga e fa'avavau.

Isaia 24:4, 5

E galue fo'i Satani e ala i le natura o mea ina ia o'o mai ai le fa'afanoga i tagata e le'i faia sa latou sauniuniga mo le oti. Ua leva ona matauina e Satani le fa'agaoiiga o natura o mea i le lalolagi, ma ua ia nofo sauni na te fa'aaogāina lona malosi atoa na te pulea ai mea tutupu i le lalolagi pe a fa'atagaina o ia e le Atua. Na fa'ataga atu loa o ia e le Atua e fa'asauā iā Iopu, e le'i umi lava a e fa'a'umatia e Satani lafu manu uma a Iopu, ma ana 'au'auna ma ōna fale, ma lana fanau, i fa'alavelave na fa'alausoso'o atu i le aso lava e tasi. Ana leai le puipuiga a le Atua i luga o Lana fanau, semanū ua fano uma i latou i le galuega a Satani. Peita'i, fa'auta i le manatu māmā o le 'au Kerisiano i le tulafono a Ieova. Ua lata mai le taimi e 'ave'esea ai e le Atua Āna fa'amanuiāga mai le lalolagi e pei ona Ia folafola mai. O le a Ia 'ave'esea fo'i Lana puipuiga mai ē ua fouvale i Lana tulafono. O ē uma ua 'ave'esea ai le puipuiga fa'apitoa a le Atua, ua i ai i latou i lalo ifo o le pule a Satani. O le a fai fa'alelei e Satani nisi o tagata, ma 'ave i ai le tamao'aiga ina ia fa'ataunu'uina ai āna fuafuāga, a e o le a avatu e Satani na o fa'alavelave i isi. Ona fa'aosooso lea e Satani i latou ia ina ia latou tu'ua'ia le Atua ona o puapuagā ua latou tigāina ai.

O le a ofu mai Satani i ofu o le malamalama ma ia faia vavega e fa'amālōlōina ai ma'i uma o le fanau a tagata; peita'i o ia lava fo'i ua pogai mai ai fa'ama'i 'ese'ese, ma mala o le a fa'atafunaina ai le tele o 'a'ai tetele o le lalolagi. Ua tatou va'aia lava i le asō le amataga o lana galuega. Ua tatou va'aia lana galuega i fa'alavelave tetele ua fa'afuase'ia ai le to'atele i le sami ma le lau'ele'ele; ua tatou va'aia le lima o Satani i afi tetele i lea itū ma lea itū o le lalolagi, fa'apea afā fulifaō, ma timu uato'a, o matagi tetele ma lōlōga, o afā tetele ma asiosio, o galulolo ma mafui'e i lea itū ma lea itū o le lalolagi. O mea uma nei ua fa'ailoa ai le mana o Satani na te aumai ai le fa'afanoga i le to'atele o ē le'i sauni mo le oti; ona mulimuli mai ai lea o oge ma fa'ama'i ma puapuagā. E lūlūina e Satani se mea 'o'ona i le ea, ona fano ai lea o le afe ma afe i le fa'ama'i ma le mala. O le a fa'asolosolo ina tutupu so'o nei mala, ma o le a fa'asolosolo fo'i ina sili atu lo latou malolosi. O mala nei o le a fano ai tagata fa'apea ma meaola. Ua mātūtū ma mavaevae le lalolagi, ua mamae; ua

atuatuvāle fo'i ta'ita'i o malō. Ua fa'aleaga e tagata le lalolagi; ua latou solia tulafono; ua latou liliu le poloā'iga; ua latou solia le feagaiga e fa'avavau.

(19) O LE Ā LE I'UGA MATA'UTIA E O'O PE A FAIA E I LATOU UA FA'ASESĒINA FUAUFUĀGA A SATANI?

E tulia outou i sunako e i latou; a e o'o lava i le aso e manatu ai sē na te fasioti iā te outou, ua na faia le taulaga i le Atua.

Ioane 16:2

Ona fa'aosooso lea e Satani tagata ina ia latou talitonu ua tutupu nei mala uma talu ai i latou ua fa'amaoni i le Atua. O le a tu'ua'ia e le 'au amioleaga le fanau a le Atua ona o fa'alavelave ma mala ua o'o mai i le lalolagi. O le a latou fai mai ua to'atama'i le Atua ona o le soliga o le Aso Sā, ma o le agasala lea ua o'o mai ai nei mala. E lē mavae fo'i nei mala se'i vaganā ua fa'amālosia le fa'amamaluina o le tausiga o le Aso Sā. O le a ta'u mai fo'i o ē ua tausia le Sapati o le poloā'iga e fā, o i latou ia ua latou 'ave'esea le mamalu o le Aso Sā, o i latou ia o ni tagata fa'atupu fa'alavelave i le malō; o i latou lava ia ua fa'atuai ai ona toe fa'asusulu mai o fofoga o le Ali'i i luga o le malō, ma latou maua ai lo latou tamao'aiga fa'alelalolagi. O le a fa'apenā ona toe fa'aluaina le tu'ua'iga a A'apo na faia i le 'au'auna a le Atua o Elia. “Ua iloa atu e A'apo Elia, ona fai atu lea o A'apo iā te ia, O 'oe 'ea o lē fa'atigā iā Isara'elu? Ona tali mai ai mai lea o ia, E lē o a'u lē fa'atigā iā Isara'elu, a o 'oe ma le 'āiga o lou tamā; auā ua outou tu'ua o poloā'iga a Ieova, ma outou mulimuli atu iā Pa'ala” (I Tupu 18:17, 18). O le a 'avea tu'ua'iga pepelo ma mea o le a ita tele ai tagata i le 'au fa'amaoni a le Atua. O le a latou faia fo'i i le fanau a le Atua, e pei ona faia e Isara'elu anamua iā Elia.

(20) O LE Ā LE POGAI MALOSI O TAUF'A'ASESĒGA O LE A FA'AAOGĀINA E SATANI I ASO TAUF'A'AI'U INA IA FA'ASESĒINA AI LE TO'ATELE I ĀNA FUAUFUĀGA?

Auā o agaga ia o temoni e fai fa'ailoga, ua latou ō atu i tupu o le lalolagi ma le atulaulau uma, e fa'apotopoto iā te i latou i le taua i le aso tele o le Atua e Ōna le malosi uma lava.

Fa'aaliga 16:14

O le a fa'aaogāina le mana faivavega o le ti'āpolo e ala i agaga leaga ma fa'agaoioiga fa'ataulaitu, e fa'ailoa ai le tete'e o Satani i le 'au fa'amaoni o ē ua filifili latou te usiusita'i i le Atua a e lē o tagata. O le a ō mai 'au a Satani e ala i tagata, ma latou ta'u mai ua 'auina fa'apitoa mai i latou e le Atua ina ia fa'ailoa atu le sesē o ē ua tete'e i le Aso Sā. O le a latou fa'atunuina fo'i tagata ina ia latou tausia tulafono a le malō e pei lava o le tulafono a le Atua. O le a latou fa'ailoa mai lo latou fa'anoanoa ona o le tele o le amioleaga i le lalolagi; o le a latou lagolagoina le manatu o a'oa'o pepelo o ē na fai mai o nei mala ma le amioleaga i le lalolagi ua aliali mai talu ai le lē tauti fa'amamalu i le Aso Sā. O i latou uma o ē lē talia le fe'au a nei agaga, o le a fetui i latou ma le ita ma le to'asā o nu'u ma malō ma tagata.

O togafiti na faia e Satani i le lagi i le amataga o le finauga tele, o togafiti lava ia o le a toe fa'aaogāina e Satani i le taua mulimuli o le finauga tele. Na ia fai mai o lo o ia sa'ilia auala e fa'atumaui ai le faigāmalō a le Atua; peita'i na ia faia fa'alilolilo ana fa'agaoioiga uma ina ia talepe ai ma lafotūina le malō o le Atua.

(21) I LE FA'AAOGĀINA O ĀNA GAOIOIGA O LE FA'ATOSINA I ALA MATAGOFIE MA LE MALOSI, O LE Ā LE FUAUFUĀGA A SATANI MO LENEI TAUO O LO'O FA'AMĀLUMĀLU MAI?

Ia 'outou fa'autauta, ia outou mataāla, ona o lē ua fai outou mona fili, o le ti'ap'olo lea, o lo'o feālualua'i o ia e pei o se leona tagi, ua sa'ili se tasi e 'aina e ia.

I Peteru 5:8

E lē fa'amālosia e le Atua le faitalia a le tagata ma lona loto fuatiaifo. Peita'i o le mea masani lava lea a Satani o le fai fa'amalosia e ala i sauāga, ina ia mafai ai ona ia pulea i latou ua lē tosina atu iā te ia. E fa'aaogā e Satani le taufa'amata'u e fa'amālosia ai tagata latou te avatu iā te ia le vi'iga ma le tapua'iga. Ua ia galue e ala i pulega fa'alelotu ma pulega fa'alemalō ina ia latou faia ma fa'amamaluina tulafono a tagata e tete'e atu ai i le tulafono a le Atua.

(22) O LE Ā LE UIGA O TAGATA O LE ATUA I ASO MULIMULI O LE A FAFAGUINA AI LE MALOSI O SATANI MA ĀNA 'AU?

Ua fetalai mai le Agaga ma le fa'ato'ānofotane, 'Inā sau ia;' inā fai atu fo'i ia o lē fa'alogo, 'Inā sau ia; o lē fia inu, inā sau ia, atoa ma lē mana'o i ai, inā 'ave fua ia le vai o le ola.'

Fa'aaliga 22:17

O i latou o ē fa'amaoni i le tausiga o le Sapati o le Tusi Pa'ia o le a fa'aigoa o fili o le filemū ma le nofolelei o nu'u, o ē ua latou lepeti tulafono a malō ma nu'u, o ē ua pogai mai ai le amioleaga ma fouvalega, o ē ua mafua ai le o'o mai o le to'asā o le Atua i le lalolagi. O lo latou fa'amaoni i le Atua o le a fa'aigoaina o le fia popoto ma le fa'ama'a'a i pulega a le malō. O le a molia i latou ona o le fa'atupu fa'alavelave ma le fouvale. O le 'aufailotu o ē ua te'ena le tulafono a le Atua, o i latou ia o le a latou fa'atonuina tagata ina ia latou usita'i i le pule fa'alemalō ona o i latou ia ua fa'au'uina e le Atua. O le a fa'amasinoina le fan'au tasi tulafono a le Atua i totonu o maota faitūlāfono ma maota fa'amasino. O le a mimilo ma fa'auigasesēina a latou 'upu ina ia mautinoa ai lo latou fa'asalaga.

(23) O LE Ā LE FA'AGAOIOIGA O LE A AMATAINA E PULE'AGA FA'ALEMALŌ MA FA'AMAONIA E LE TO'ATELE O TAGATA EKALESIA IA TAUMAFAI E FA'AMALOSI Ē O LO'O TAUSI POLOĀ'IGA A LE ATUA INA IA SOLIA MA FA'ASESĒ O LATOU LOTO FUATIAIFO?

Ina ia lē mafaia ona fa'atau mai pe fa'atau atu e se tasi, tau lava o ē ua i ai le fa'ailoga, po o le igoa o le manu fe'ai, po o le faitau ao'fa'i o lona igoa.

Fa'aaliga 13:17

O le a te'ena e ekalesia Porotesano a'oa'oga manino a le Tusi Pa'ia ua fa'ailoa mai ai le tāua o le tulafono a le Atua. O le a latou manana'o fo'i ina ia 'ave'esea i latou ua fai ma fa'alavelave i le nu'u, i latou ua fa'amaoni pea i le Atua. Ua latou la'a atu nei i se auala o le a latou sauāina ai ē ua latou lē fia uia le auala ua uia nei e le to'atele o le lalolagi Kerisiano, o ē ua latou lē fia tausia le sapati na fa'atūina e le pule fa'apope.

O le a faia le feso'ota'iga fa'atasi a le ekalesia ma le malō ina ia latou galulue ai e fa'atosina ma fa'amālosia tagata uma latou te tasi le Aso Sā. O le a latou fa'atau fo'i i tupe le fa'amaoni o nisi ina ia latou fa'amamalu i le aso na fa'atūina e Roma. E leai se mau o le Tusi Pa'ia ua fa'atonuina ai le tausia o lea aso; peita'i, afai ua leai se fa'atonuga a le Tusi Pa'ia mo le tausia o lea aso, o le a latou tu'u i ai poloā'iga a le ekalesia ma tulafono a le malō e fa'amālosia ai le fa'amamaluina o lea aso. O le faia o le amiolētonu e ta'ita'i o malō; o le mea lea ua lē maua ai se alofa ma se amiotonu i totonu o malō; o le mea fo'i lea ua latou manatu māmā ai i le 'upu moni. E o'o lava i Amerika, le atunu'u o le sa'olotoga, o le a gaua'i atu ta'ita'i ma sui o le fono faitūlāfono i le mea e manana'o i ai tagata, ina ia fafia atu ai tagata iā i latou. O le a fa'apenā ona latou gaua'i atu i le faia o se tulafono e fa'amālosia ma fa'amamaluina ai le tausiga o le Aso Sā. O le a lē toe aloa'ia e se isi le sa'olotoga o mea tau tapua'iga, le sa'olotoga na tu'uina atu ai ola o le to'atele. O le a tatou va'aia i le taua o lo o loma nei le fa'ataunu'uga o 'upu a le perofeta ua fa'apea mai: “Ua ita fo'i le tarako i le fafine, ona alu atu ai lea o ia e tau le taua ma i latou ua totoo o lana fanau, o ē ua tasi i poloā'iga a le Atua, ma ua taofi le mau iā Iesu Keriso” (Fa'aaliga 12:17).

Ua 'ou iloa nei o lo'o fa'amatala manino mai e le Tusi Pa'ia le fete'ena'iga o lo'o fa'amālumālu mai "o se mea e le'i tupu fa'apea" o le a amata a o tatou tau lata atu i le fa'ai'uga o le tala fa'asolopito o le lalolagi.

Li'o le Tali:

Ioe

Lē Mautonu

'Ou te iloa e mai le amataga o le agasala, o osofa'iga a Satani i lenei finauga tele e fa'asino lava lea i tulafono pa'ia e tumau e fa'avavau a le Atua - o le fa'avae o Lona malō.

Li'o le Tali:

Ioe

Lē Mautonu

Ua fa'aalia mai i le Fa'aaliga 12:17 o le fa'amoemoe fa'ai'u o Satani o le ta'uleagaina lea o tulafono a le Atua mo le fa'amoemoe ia mafua ai le matuā te'ena o nei ta'iala pa'ia.

Li'o le Tali:

Ioe

Lē Mautonu

'Ou te iloa ua fa'aali mai e le Tusi Pa'ia o poloā'iga a le Atua e pa'ia ma e fa'avavau e ui ina o lo'o taumafai pea Satani ma le tagata e "manatu ia suia taimi ma tulafono" (Tanielu 7:25).

Li'o le Tali:

Ioe

Lē Mautonu

O le Afioga a le Atua e Malutia ai - 8

(1) O LE Ā LO TATOU MALU MAI MEA FA'AFOLIGA A SATANI?

Ona tali atu lea o Iesu iā te ia, ua fa'apea atu, "Ua tusia, 'E lē na o mea 'ai e ola ai le tagata, a o afioga uma a le Atua."

Luka 4:4

Inā sa'ili ia i le tulafono ma le mau; afai latou te lē tautala e tusa ma ia 'upu, ua leai lava se malamalama iā te i latou.

Isaia 8:20

Ua tu'uina mai e le Atua le Tusi Pa'ia i Lana fanau e fai ma o latou lafitaga mai a'oa'o pepelo, fa'apea ma le mana taufa'asesē o agaga o le pouliuli. Ua fa'aaogā e Satani so'o se togafiti na te iloa ina ia lē maua ai e tagata se malamalama'aga o le Tusi Pa'ia, auā o a'oa'oga manino o le afioga a le Atua ua fa'aalia mai ai ana fa'asesēga. So'o se mea lava e fai ai se galuega o le fa'afouga i olaga o le fanau a le Atua, o inā fo'i ua fa'atitino i ai faiga a Satani. Ua tu'uina atoa e Satani lona malosī i le taimi nei mo se toe osofa'iga lava e fa'ai'u ai lana tete'e iā Keriso ma Ōna so'o. Ua lē toe mamao ona tatou va'aia loa lea o le toe fa'asesēga tele a Satani. O le a tatou va'ai i vavega ofoofogia o le a faia e le anetikeriso i o tatou luma. Toetoe lava leai se 'ese'esega i le vā o le mea moni ma le mea fa'afoliga. O le a lē mafai ona iloa lea 'ese'esega se'i vaganā ua i ai le malamalama o le Tusi Pa'ia. O le Tusi Pa'ia lava e ao ona fai ma fua po o tapula'a e fua a'i so'o se vavega ma so'o se fa'amatalaga.

(2) O LE Ā LE POGAI O LE A MAUA AI LO TATOU MALOSI E USITA'I AI I LE ATUA A E LĒ O LE TAGATA?

A o le Atua e Ōna le alofa tunoa uma lava, o Lē na vala'auina i tatou ia i'u atu i Lona manuia fa'avavau o iā Keriso Iesu, pe a tigāina outou i nai aso, ia fa'a'ato'atoaina outou e Ia lava, ia fa'atuma'ina ia fa'amālosia, ma ia fa'avaeina outou.

I Peteru 5:10

O le a ulagia ma tauemuina i latou o ē taumafai e usiusita'i i tulafono uma a le Atua. Na o le Atua lava o le a mafai ai ona latou manumalō. Afai o le a latou manumalō, e ao ona latou malamalama nei i le finagalo o le Atua mo i latou, e pei ona fa'aalia mai i Lana afioga. E lē mafai ona latou avatua iā te Ia le vi'iga se'i vaganā ua latou maua le malamalama'aga tonu e fa'ataui i Lana amio, ma Lana faigāmalō, ma Āna fuafuāga, ma latou savavali e tusa ai ma le malamalama ua latou maua. Na o i latou lava ua atina'e ma fa'amālosia o latou mafaufau i 'upu moni o le afioga a le Atua, ua na o i latou ia o le a mafai ona tutū manumalō i le toe taua o le finauga tele. O le a o'o mai iā i tatou uma le fesili: O ai o le a 'ou usita'i i ai - o le Atua po o tagata? Ua lata mai lava lea itūlā. Ua mautū ea la tatou tutū i luga o le papa o le afioga lēmasuia a le Atua? Ua tatou nofo sauni ea tatou te tutū atu ma le mausalī e finau mo poloā'iga a le Atua ma le fa'atuatua iā Keriso?

(3) AISEĀ UA TU'U MAI AI E LE ATUA VALO'AGA I TOTONU O LANA AFIOGA?

O mea uma fo'i na tusia anamua, na tusia ia e a'oa'o mai ai iā te i tatou; ina ia tatou maua le fa'amoemoe e tupu mai i le onosa'i, ma le fa'amafanafana mai o Tusi.

Roma 15:4

A o le'i fa'asatauroina Keriso na Ia fa'amalamalamaina i Lona 'au so'o le matā'upu e fa'ataui i Lona maliu ma Lona toe tū mai, ma sa i ai agelu na latou mōlio'o nei 'upu i o latou loto ma mafaufau. Peita'i na fa'atalitali le 'au so'o mo se laveā'iga fa'aletino mai le amo a Roma; latou te le'i fia fa'alogi i se tala e fa'ataui i se oti mātagā o le a o'o i Lē ua ogātonu i ai o latou fa'anaunauga ma lo latou fa'amoemoe. Ua galo i o latou mafaufau le fetalaiga a Iesu sa tataui ona latou manatua; ma o le mea lea na latou lē sauni ai ina ua o'o mai le taimi o le tofotofoga. Na matuā lepeti lava e le maliu o Iesu lo latou fa'amoemoe, ua pei lava e le'i 'avea i ai e Iesu se lapata'iga. Ua fa'apenā fo'i ona fa'amanino mai iā i tatou e valo'aga le lumana'i, e pei lava ona fa'amanino atu i le 'au so'o i le fetalaiga a Keriso. Ua manino ona fa'aalia mai i le valo'aga mea o le a tutupu a'o lumana'i ai le tapunia o le alofa tunoa, fa'apea ma le galuega o le sauniuniga mo le taimi o puapuagā. Peita'i e to'atele latou te lē iloa nei a'oa'oga, ua pei lava e le'i fa'aalia mai nei mea e le Atua i tagata. O lo o mataāla Satani i lana galuega. Na te pu'e ma fa'alēaogā so'o se manatu ma so'o se lagona e ono maua ai e le tagata le poto mo le fa'aolataga; ona o'o mai ai lea o le taimi o puapuagā, a e maua i latou e lē o sauni.

(4) O Ā LAPATA'IGA E TOLU MO ASO FA'AI'U O LE A 'AVEA MA VALA'AU E FAFAGUINA AI I TATOU IA VIA LE ĀLA O LE FA'AOLATAGA?

Na a'u iloa fo'i le tasi agelu ua lele i taulotoā'iga o le lagi, ua iā te ia le tala lelei e fa'avavau e folafola atu i ē nonofo i le lalolagi i atunu'u uma, ma itū'aiga, ma gagana 'ese'ese, ma nu'u, ua fa'apea atu ma le leo tele, 'Ia outou matata'u i le Atua, ma avatu iā te Ia le vi'iga, auā ua o'o mai le itū aso o Lana fa'amasinoga; ma ia outou ifo i Lē na faia le lagi, ma le fanua, ma le sami, atoa ma puna o vai. Ona mulimuli atu ai lea iā te ia o le tasi agelu, ua fa'apea atu, 'Ua pa'ū, ua pa'ū Papelonía o le 'a'ai tele, auā ua ia fa'ainu i nu'u uma i le uaina o le to'asā o lana faita'aga.' Ona mulimuli atu ai lea iā te i la'ua o lona to'atolu o agelu, ua fa'apea atu ma le leo tele, 'Ai se tasi e ifo i le manu fe'ai ma lona fa'atagata, ma talia le fa'aailoga i lona muāūlu po o lona lima, e inu lava ia i le uaina o le to'asā o le Atua, ua liligiina atu e lē suia i le ipu o Lona to'asā, e puapuagātia fo'i ia i le afi ma le teiō i luma o le 'au agelu pa'ia ma luma o le Tama'i Mamoe.'

Fa'aaliga 14:6-10

E tāua tele fe'au o le lapata'iga ua 'auina mai e le Atua i tagata. O le mea lea ua ta'u mai ai ua folafolaina lea fe'au e agelu pa'ia ua felelei i le taulotoā'iga o le lagi. O le mea fo'i lea ua finagalo ai le Atua ina ia usita'i i ia fe'au tagata uma o ē ua i ai le mafaufau lelei. E mata'utia le to'asā o le a sasa'a mai iā i latou o ē ifo i le manu fe'ai ma lona fa'atagata (Fa'aaliga 14:9-11). O le mea lea e ao ai ona ma'elegā tagata uma i le su'esu'ega o valo'aga, ina ia latou iloa ai le uiga o le fa'aailoga o le manu fe'ai, ina ia latou iloa ai fo'i ona 'alo 'ese ne'i maua e i latou lea fa'aailoga. Peita'i o le to'atele o tagata ua latou lē fia fa'alogi i le 'upu moni, a ua latou liliu i 'uputu'u ma tala o le vavau. A o tepa le aposetolo o Paulo i aso o le i'uga, o 'upu ia na ia tusia: “Auā e o'o i ōna pō latou te lē mafafai ai ona talia o le matā'upu e ola ai” (II Timoteo 4:3).

(5) E FA'APEFEA ONA FA'AMATALAINA E PAULO UIGA TU'INANAU O LO'O TA'ITA'IINA 'ESE LE TO'ATELE MAI LE 'UPU MONI ONA UA MANANA'O I TALITONUGA MA 'UPUTU'U UA MASANI AI?

Auā e o'o i ōna pō latou te lē mafai ai ona talia o le matā'upu e ola ai, a e tusa ma o latou lava tu'inanau, latou te fa'apotopoto ai a'oa'o mo i latou, ina ua feū o latou taliga; latou te liliu'ese fo'i o latou taliga i le 'upu moni, a e liliu atu i tala o le vavau.

II Timoteo 4:3, 4

Lenei ua o'o mai le taimi lea na tautala i ai Paulo. E afe ma afe e lē manana'o i le Tusi Pa'ia ona e fa'alavelave i le faiga o mana'oga leaga o o latou loto. E 'ave e Satani iā i latou nei le fa'asesēga ua latou manana'o i ai.

(6) E FA'APEFEA ONA FILIFILI LE TALITONUGA MONI E I LATOU O LO'O MULIMULI MA LE FA'AMAONI IĀ KERISO?

Inā sa'ili ia i le tulafono ma le mau; afai latou te lē tautala e tusa ma ia 'upu, ua leai lava se malamalama iā te i latou.

Isaia 8:20

Peita'i o le a i ai i le lalolagi le fanau a le Atua o ē fa'amaoni i le Tusi Pa'ia, na o le Tusi Pa'ia lava, e fai ma tapula'a o a'oa'oga uma, e fai fo'i ma fa'avae o fa'afouga uma. O manatu o le 'au popoto, o fa'ai'uga a ē atamamai i le poto fa'alelalolagi, o i'ugāfono a sinoti ma fono a le ekalesia, o le leo o le to'atele - e leai se mea o nei mea uma e ao ona 'avea ma fa'amaoniga o le sa'o po o le sesē o se a'oa'oga fa'alelotu. Na o le tasi lava le fa'amaoniga e ao ona fa'alagolago i ai lo tatou talia po o lo tatou te'ena o se a'oa'oga fa'alelotu. E fa'alagolago i le tali o le fesili: Ua fai mai ai ea le Tusi Pa'ia?

(7) O LE Ā LE GALUEGA FA'APITOA UA TU'U MAI E LE ATUA IĀ I TATOU IA A'OA'O ATU I ISI?

Ua sili ona amio lelei o i latou nei i tagata Tesalonía; auā ua latou talia le 'upu ma le fiafia tele, ua sa'ili i Tusi i lea aso ma lea aso, pe moni ia mea.

Galuega 17:11

O lo o to'aga pea lava Satani e fa'aliliu 'ese mata o tagata mai le Atua, a e mulimuli atu i mea ua fai mai ai tagata. E mana'o Satani ina ia mulimuli tagata i mea ua fai mai ai epikopō, ma faife'au, ma a'oa'o o matā'upu fa'alelotu, a e 'aua ne'i su'esu'e ifo i latou lava i le Tusi Pa'ia ina ia iloa ai le mea e ao ona fai. Ua iloa e Satani afai na te pulea mafaufau o nei ta'ita'i ma le 'aufailotu, o lona pulea lava lea o loto o le miliona ma miliona o ē ua fa'alagolago ma mulimuli i mea ua fai mai ai nei ta'ita'i.

(8) O LE Ā LE I'UGA O LE MALŌ O IUTAIA INA UA LATOU FA'ALAGOLAGO I O LATOU TA'ITA'I MO LE FA'AMALAMALAMAINA O LE TUSI PA'IA?

Ua 'inosia ma tu'ulafoa'ina o Ia e tagata; o le tagata fa'anoanoa, ua masani fo'i ma le tigā; e peiseā'i ua 'alo 'ese mata iā te Ia; ua 'inosia o Ia, ma ua tatou lē manatua lava o Ia.

Isaia 53:3

Sa fiafia le lautele o tagata e fa'alogo iā Keriso ma 'upu o le ola na Ia fetalai mai ai; e to'atele na talitonu iā te Ia - e o'o lava fo'i i nisi o le 'au ositaulaga fa'apea ma faipule. Peita'i na tonu i le faitaulaga sili ma ta'ita'i o le nu'u o Iutaia o le a latou te'ena ma ta'uleagaina Āna a'oa'oga. Na i'uvale a latou taumafaiga e su'e ai ni mea leaga e ono molia ai o Ia; na logo i o latou tino le fa'atasi mai o le Agaga o le Atua i 'upu ma galuega na faia e Ia. Peita'i na latou lē fia o 'ese mai le pogisā o o latou manatu; na latou te'ena molimau manino na fa'ailoa mai ai o Ia lava o le Mesia; na latou mumusu e ioe i le 'upu moni ne'i 'avea i latou o nisi o Ōna so'o. O ta'ita'i lava nei na 'ave i ai le āva ma le fa'aaloalo e tagata Iutaia ma a latou fanau; na a'oa'o'ina e tagata a latou fanau ina ia usiusita'i i nei ta'ita'i e aunoa ma se fesili. Ua fesili nei la tagata ma fai mai: “Afai e moni o Keriso lenei, aiseā ua lē talitonu ai i ai o tatou faipule ma le 'au tusi'upu atamamai?” O 'upu ma uiga fa'aalia o nei ta'ita'i na fa'apogai ai le te'ena o le Fa'aola e le nu'u o Iutaia.

O le agaga na una'ia lenei 'au ositaulaga ma faipule, o le agaga lava lea e tasi ua fa'aalia e le to'atele o le 'aufailotu i le asō. Ua latou mumusu e su'esu'e i le molimau a le Tusi Pa'ia e fa'ataui i 'upu moni fa'apitoa mo nei ōna pō. Ua latou fa'atusatusa lo latou to'atele ma lo latou tama'o'aiga, i le to'a'itiiti ma le matitiva o ē ua fa'amaoni i le 'upu moni. Ua latou fai mai o le talitonuga o le 'au fa'amaoni ua pogai ai lo latou vāvāmamao ma le lalolagi.

(9) O LE Ā LE POGAI E TASI E MAFAI ONA PUIPUIA AI MAI LE TAUF'A'ASESĒ?

Ia e taumafai ina ia 'avea 'oe ma lē ua fiafia mai i ai le Atua, o lē faigaluega e leai se mea e mā ai, na te vavaetonuina le 'upu moni.

II Timoteo 2:15

Na silafia e Keriso o le fa'ata'ape'apeina o le nu'u o Iutaia o le a lē gata ai i inā le faia o le pule malosi a le 'au tusi'upu ma le 'au Faresaio. Na silafia e Keriso le lumana'i o le galuega o le si'itia a'e o le tulaga o ta'ita'i, latou te pulea ai le sa'olotoga o tagata i mea tau tapua'iga. O le mea lava lenei na fai ma mala i le ekalesia i le tele o augātupulaga. O 'upu mamafa na Ia a'oa'ia ai le 'au tusi'upu ma le 'au Faresaio, fa'apea ma Āna lapata'iga i tagata ina ia 'aia latou te mulimuli i nei ta'ita'i tauaso, ua tusia nei mea uma ina ia fai ma lapata'iga mo augātupulaga fāi mai.

(10) E TUSA AI MA LE TUSI PA'IA, O AI O LE A FA'ATASI MA I TATOU A O LO'O LATOU TOTŌ TALITONUGA SESĒ?

Sa i ai fo'i i le nu'u o perofeta pepelo, e pei ona i ai iā te outou, o a'oa'o pepelo, latou te fa'atupuina fa'alilolilo o vavaeaga e fano ai, ma latou fa'afiti i le Ali'i na ia fa'atau mai iā te i latou, o i latou lava e o'o mai ai iā i latou le malaia e vave mai lava.

II Peteru 2:1

E ui lava i lapata'iga ua tu'uina mai e le Tusi Pa'ia e fa'ataui i a'oa'o pepelo, e to'atele ua latou nofo sauni e tu'uina atu o latou loto ma agaga e pule ai le 'aufailotu. E afe ma afe le 'au Kerisiano ua latou lē iloa pe aiseā ua latou talitonu ai i mea ua latou talitonu i ai. Na o le tasi lava le tali ua latou iloa ta'u mai - O le mea lenā na a'oa'o'ina ai i matou e a matou faife'au. Ua latou la'aloa a'oa'oga a le Fa'aola, a ua latou fa'avae lo latou fa'atuatua i luga o 'upu a faife'au. A e aunoa ea nei faife'au ma se sesē ma ni agasala? E fa'apefea ona tatou tu'uina atu lo tatou ola e fa'avavau i o latou lima, se'i vaganā ua tatou mautinoa mai le afioga a le Atua ua iā i latou le malamalama? E to'atele ua fefefe latou te faia se mea e 'ese nai le mea ua faia e le to'atele o le lalolagi. O le mea lea ua mulimuli ai le to'atele i tulagavae o le 'au popoto. O lo latou lē fia su'esu'eina o le 'upu moni mo i latou lava, o le pogai lea ua latou lavelavea ai i le tele o noanoataga o a'oa'oga sesē. Ua latou va'ai i le 'upu moni mo nei ōna pō e pei ona fa'aalia manino mai e le Tusi Pa'ia; ua latou fa'alogoia fo'i le mana o le Agaga Pa'ia i le tala'iga o lenei 'upu moni. Peita'i ua latou lē fia mulimuli i le 'upu moni ona ua latou iloa e lē o fiafia i ai le 'aufailotu. Ua lagona i o latou loto ma mafaufau le mea moni; peita'i ua lē lava lo latou malosi e mafai ai ona latou faia se filifiliga e 'ese ai nai le mea ua mana'o i ai le faife'au. Ua fa'apenā ona latou fa'amulimuli la latou lava filifiliga ma lo latou ola e fa'avavau, talu ai le lē talitonu, le fa'amauualuga, ma manatu sesē o a latou faife'au

(11) I LUGA O AI O LE A PA'Ū I AI LE TIUTE TAU'AVE E SA'ILI'ILI AI MO 'UPU MONI O LE FA'AOLATAGA?

O lenei, 'au pele e, fa'apei ona outou 'ana'ana mai e lē aunoa, e lē gata ina o tatou nonofo ma outou, a o lenei ua atili ai ina ua 'ou lē i ai iā te outou, ia outou galulue a'ia'i ma le mata'u atoa ma le gatete, ina ia fa'aolaina outou.

Filipi 2:12

E lē mafai ona tu'ese'eseina le 'upu moni ma le vi'iga o le Atua. E lē mafai ona vi'ia le Atua i o tatou talitonuga sesē a'o ta'atia le Tusi Pa'ia i o tatou autafa sa tatau ona fai ma o tatou ta'iala. E to'atele ua latou fai mai e le āfāina po o le ā le mea e te talitonu i ai pe afai o sa'o lou olaga. Peita'i o le olaga o le tagata, ua fa'atonutonuina e ōna manatu ma ōna talitonuga. Afai ua i o tatou autafa le 'upu moni ma le malamalama a ua tatou lē fa'aaogāina avanoa ua tatou maua tatou te fa'alogoma faitau ai i ai, ua tusa lava ua tatou te'ena le 'upu moni. Ua tusa lava ua tatou filifilia le pouliuli a e lē o le malamalama.

(12) AISEĀ E FAIGOFIE AI ONA LĒAMANA'IA LE AFIGA A LE ATUA?

O i ai le ala ua tonu i le manatu o le tagata; a o lona taunu'uga, o ala ia e oti ai.

Fa'ata'oto 16:25

E lē 'avea lo tatou lē iloa o le 'upu moni o se mea tatou te 'alofaga i ai i a tatou agasala ma o tatou talitonuga sesē a'o lo o tele avanoa tatou te iloa ai le finagalo o le Atua. Ua taunu'u atu se tagata faimalaga i se magāala o lo o tū mai ai se laupapa e ta'u mai ai le mea e alu i ai lea maga o le auala ma lea maga o le auala. Afai e tu'u le mea ua fai mai ai le fa'asino ala a e fai lona poto, tusa lava po o le ā lona tinoū ma lona ma'elegā, e lē taumate ona o'o o ia i le taunu'uga sesē ona ua ia lē mulimuli i le mea ua fai mai ai le laupapa ua fai ma ta'iala.

Ua tu'uina mai e le Atua Lana afiga ina ia tatou fa'amasani ma a'oa'oga ua i ai, ma tatou iloa ai Lona finagalo mo i tatou. Ua sau le ali'i a'oa'o tulafono iā Iesu ma fai mai: “O le ā se mea e tatau ona ou faia ou te maua ai le ola e fa'avavau?” Na fa'asino o ia e le Fa'aola i le Tusi Pa'ia ina ua Ia fetalai atu i ai: “O le ā le mea ua tusia i le tulafono? O le ā lau faitau?” O le ā lē 'avea le lē iloa o le 'upu moni o se mea e 'alofaga i ai se tasi, o le 'au matutua atoa ma le fanau. E lē 'avea fo'i le lē iloa o le 'upu moni ma mea e solofua ai le fa'asalaga o le soliga o le tulafono a le Atua, auā ua i o latou lima le Tusi Pa'ia ua i ai le tulafono ma le finagalo o le Atua mo i latou ta'ito'atasi. E lē lava lo tatou faia o fuafuāga lelei; e lē lava le faia e le tagata o le mea ua ia lagona e sa'o; e lē lava fo'i le mulimuli i le mea ua fai mai ai le faife'au e sa'o. E ao ona su'esu'e au'ilili le tagata i le Tusi Pa'ia mo ia lava, auā ua fa'alagolago i ai lona i'uga e fa'avavau. Tusa lava po o le ā le malosi o ōna lagona ma ōna talitonuga, tusa lava po o le ā lona iloa lelei o le faife'au ma lona poto i le Tusi Pa'ia, e lē tatau ona 'avea lea o fa'avae o lona fa'atuatua. Ua i ōna lima le fa'afanua ma le ta'iala ua fa'asino mai ai le ala i le lagi; e lē tatau ona taumatemate o ia i se mea e tasi.

(13) E FA'APEFEA ONA FA'ASINO MAI E LE TUSI PA'IA LE AUALA E SU'ESU'E AI I ŌNA ITŪLAU?

Auā o lo'o i ai le 'upu ma le 'upu, o le 'upu ma le 'upu; o le vavao ma le vavao, o le vavao ma le vavao; o sina mea itiiti i inei ma sina mea itiiti i inā.

Isaia 28:10

O le tiute o le tagata e ao ona fa'amuumua i mea uma, o lona su'esu'e lea i le Tusi Pa'ia po o le ā le 'upu moni, ona savali lea i le malamalama ma fesoasoani i isi ina ia latou mulimuli i lana fa'ata'ita'iga. E ao ona tatou tinoū ma ma'elegā i le su'esu'eina o le Tusi Pa'ia i lea aso ma lea aso, ma tatou fa'atusatusa lenei mau ma le la mau. E ao ona tatou faia la tatou lava filifiliga po o le ā le mea moni, auā o le a ta'ito'atasi ona tatou tutū ma tali atu mo i tatou lava i luma o le fa'amasinoga a le Atua.

(14) PE AFAI TATOU TE SU'ESU'E LE TUSI PA'IA E SA'ILI AI INA IA FAIA LE FINAGALO O LE ATUA, O LE Ā LE FOLAFOLĀGA E MAFAI ONA TATOU FA'ALAGOLAGO I AI?

Ai se tasi e fia fai Lona finagalo, e iloa ai e ia le matā'upu, pe mai le Atua, pe 'Ou te tautala fua lava A'u.

Ioane 7:17

E manino 'upu moni ua fa'aali mai i le Tusi Pa'ia. Peita'i ua nonofo le 'au popoto ma fa'anefu ma afifi le 'upu moni i le pogisā. Ua fa'ailoa lo latou poto i lo latou a'oa'o ma fai mai e i ai uiga lilo o mau o le Tusi Pa'ia, o uiga fa'aleagaga e lē o manino i le gagana ua fa'aaogāina e le Tusi Pa'ia. O a'oa'o pepelo i latou ia. O i latou ia na fai aga'i i ai le fetalaiga a Iesu: “Ua outou lē iloa a'oa'oga a le Tusi Pa'ia, ma le mana o le Atua” (Mataio 12:24). E tatau lava ona malamalama mau o le Tusi Pa'ia i le gagana ua tusia ai, se'i vaganā ua i ai ni fa'atusa ma ni ata ua fa'aaogāina. Fai mai le folafolaga a Keriso, “Ai se tasi e filifili na te faia le finagalo o le Atua, o le a iloa e ia pe mai le Atua A'u a'oa'oga, pe mai

iā te A'u lava." Ma'imau pe ana talitonu tagata i 'upu e pei ona tusia i le Tusi Pa'ia, ma'imau pe ana leai ni a'oa'o pepelo latou te fa'auigasesē ma fa'afenumia'i a'oa'oga o le afioga a le Atua, semanū ua fa'ataunu'uina le galuega e fa'afiafiaina ai agelu, semanū ua aumaia i le lotoā a Keriso le afe ma afe o ē o lo o fesēa'i nei i a'oa'oga sesē.

(15) O Ā LA'ASAGA O LE A MAUA AI FA'AI'UGA NA FOLAFOLAINA MAI E KERISO?

Ona outou vala'au ai lea iā te A'u, e ō fo'i outou ma tatalo iā te A'u, 'Ou te fa'alogo fo'i iā te outou. E sa'ili mai outou iā te A'u, tou te maua fo'i, pe a outou sa'ili mai iā te A'u ma outou loto atoa.

Jeremia 29:12, 13

E ao ona tatou tu'uina atu le malosi atoa o o tatou mafaufau e su'esu'eina ai le Tusi Pa'ia ina ia tatou malamalama i a'oa'oga loloto o le malō o le Atua. Peita'i, e ao fo'i ona tatou ō atu i le Tusi Pa'ia ma le agaga o le tamaitiiti, le agaga fiailoa ma le agaga gaua'i. E lē mafai ona fo'ia fa'afitauli o a'oa'oga a le Tusi Pa'ia e ala ua fa'aaogāina e fo'ia ai fa'afitauli o le poto fa'alelalolagi. E lē tatau ona tatou ō atu i le Tusi Pa'ia ma le fa'afiapoto ua masani ai tagata i le su'esu'ega o matā'upu fa'alelalolagi. E ao ona tatou ō atu i le Tusi Pa'ia ma le agaga o le tatalo ma le fa'alagolago i le Atua, ma le agaga naunau ina ia iloa le finagalo o le Atua. Ia tatou ō atu ma le agaga o le loto maulalo ma le usiusita'i ina ia tatou maua ai le poto mai le Silisili 'Ese. A aunoa ma le usiusita'i ina ia tatou maua ai le poto, latou te fa'atauasoina o tatou mata ma fa'ama'a'a i o tatou loto ina ia tatou lē lagona le tāua o le 'upu moni.

(16) O AI O LO'O FOLAFOLA I AI LE POTO FA'ALE-TUSI PA'IA?

Ona fetalai atu lea o Iesu iā Iutaia, ē ua talitonu iā te Ia, 'Afa'i tou te tumau pea i La'u matā'upu, o O'u so'o moni outou. E iloa fo'i e outou le mea moni, e tu'u sa'oloto fo'i outou e le 'upu moni.'

Ioane 8:31, 32

Fai mai le 'au popoto e tele vaega o le Tusi Pa'ia ua tumu i mea lilo e lē malamalama i ai se isi; ua latou fai mai fo'i e leai se tāua o ia vaega. Peita'i e tele ni fa'amafanafanaga ma a'oa'oga o lo o i ai mo le tagata na a'oa'oina i le a'oga a Keriso. E to'atele faia'oga o matā'upu fa'alelotu ua latou tapuni o latou mata i 'upu moni latou te lē fia savavali ai; o se tasi lea o pogai ua latou lē maua ai se malamalama'aga manino o le afioga a le Atua. O le malamalama'aga o 'upu moni o le Tusi Pa'ia e lē fa'alagolago tele lea i le malosi o le mafaufau o le tagata, a e fa'alagolago tele i le malosi o lona fa'anaunauga i lona fia iloa o le amiotonu a Keriso.

(17) E FA'AFEFEA ONA MAUA LE MALAMALAMA I 'UPU MONI FA'ALEAGAGA?

A e lē talia e le tagata fa'aletino o mea a le Agaga o le Atua; auā o mea valea ia iā te ia, na te lē mafai fo'i ona iloa, auā e fa'amasinoina fa'aleagaga.

I Korinito 2:14

E lē tatau ona faia se su'esu'ega o le Tusi Pa'ia e aunoa ma le tatalo. Na o le Agaga Pa'ia lava e mafai ai ona tatou lagona le tāua o a'oa'oga ua faigofie ona malamalama i ai; ua na o le Agaga Pa'ia fo'i e mafai ai ona taofia i tatou mai lo tatou fa'auigasesēina o mau ua faigatā ona malamalama i ai. E 'auina mai e le Atua Āna agelu latou te saunia le loto o le tagata ina ia lava lona malamalama'aga i le afioga a le Atua, e mafai ai ona fīafia o ia i le matagofie o Āna a'oa'oga, ma aogā ai iā te ia Āna lapata'iga, ma fa'amālosia ai lona olaga i Āna folafolaga. E ao ona tatou tatalo atu ma le faisalamo: "Ia e fa'apupula mai o'u mata, ia ou va'ai lava i mea e ofo ai i Lau tulafono" (Salamo 119:18). E tele taimi ua foliga mai ai ua malolosi fa'aosoosoga ma ua lē mafai ona manumalō i ai. Ua tupu mai lea tulaga talu ai le fa'atamala i le tatalo ma le su'esu'eina o le Tusi Pa'ia, ma ua lē manatua ai e le tagata folafolaga a le Atua e 'avea o a'u'upega e fa'afetaia'i ai Satani. Peita'i o lo o si'osi'omia e agelu a le Atua i latou o ē naunau ina ia latou iloa Lona finagalo; o agelu lava ia latou te fa'amanatuina mai nei folafolaga iā i tatou, i le taimi tonu tatou te mana'omia ai. O le a fa'apenā ona fa'atūina e le Agaga o le Atua o se tagāvai e tete'e atu ai i le fili pe a pesi mai e pei o se vaitafe lona ita mai (Isaia 59:19).

(18) I TAIMI O FAIGATĀ, O LE A FA'AFEFEA ONA TATOU MANATUA 'UPU MONI FA'ALEAGAGA?

A o le Fesoasoani, o le Agaga Pa'ia lea, e 'auina mai e le Tamā i Lo'u igoa, o Ia lava na te a'oa'o iā te outou i mea uma lava; e fa'amanatu mai fo'i o Ia iā te outou i mea uma ua 'Ou fai atu ai iā te outou.

Ioane 14:26

Peita'i e ao ona mua'i teuina a'oa'oga a Keriso i le mafaufau ina ia mafai ona fa'amanatu mai iā i tatou e le Agaga Pa'ia o le Atua, i le taimi tatou te mana'omia ai. “Ua ou teu i lo'u loto Lau afioga, ina ne'i o'u agasala iā te 'Oe” (Salamo 119:11).

(19) O LE Ā LE I'UGA MATA'UTIA O LE LĒ TALITONU I LE AFIOGA A LE ATUA?

Ua latou lē loto fo'i e taofi i le matā'upu i le Atua, o lea ua tu'uina atu ai i latou e le Atua i le loto leaga, latou te fai ai mea e lē tusa.

Roma 1:28

Le 'au uso e, ia outou ne'i ai i so outou le loto leaga ma le lē talitonu, tou te o'ese ai i le Atua soifua.

Eperu 3:12

E ao ina mataāla i latou uma o ē ua tāua iā i latou le ola e fa'avavau, ina ne'i ofi mai mea e fa'apogai ai lo latou lē talitonu. O le a fa'asaga le ti'āpolo e osofa'i a'oa'oga ua 'avea o poutū o le 'upu moni. O le a faia osofa'iga a le ti'āpolo e ala i 'upu fa'aulaula ma tauemuga, atoa ma fa'amatalaga a ē popoto i mea fa'alelalolagi. O mea lava ia ua fa'aaogā e fai ma a'u'upega fa'aōnapōnei e atina'e ai le lē talitonu. Ua fuafua mai lava e Satani āna fa'aosoosoga ina ia fetau lelei ma mana'oga ma a'oa'oga a lea vasega ma lea vasega o tagata. O 'upu tausua ma 'upu fa'aulaula e sasa a'i i latou o ē lē lava sa latou a'oa'oga; a'o fa'amatalaga fa'asaientisi e fa'afetaui a'i le 'au atamamai. O nei mea uma ua fuafua lelei ina ia atina'e ai le lē talitonu ma le manatu māmā i le Tusi Pa'ia. E o'o lava i le 'au talavou ua latou fa'aali lo latou fiapoto ma lo latou lē talitonu ma le masalosalo i fa'avae autū o le talitonuga fa'aKerisiano. E ui lava ina papa'u nei fa'amatalaga, e to'atele nisi o le a tosina 'ese ai ma le 'upu moni. O le a fa'apenā ona tauemu le to'atele o le 'au talavou i talitonuga o o latou tua'ā, ma latou 'upuvale i le Agaga Pa'ia (Eperu 10:29). E to'atele i latou o ē na foliga mai i le amataga o le a 'avea o se vi'iga i le Atua ma se fa'amanuiāga i le lalolagi. Peita'i ua fa'aleagaina ia olaga e le nanamu leaga o le lē talitonu i le Atua. O ē uma ua fa'alagolago i le poto o le tagata ma fa'amatalaga fa'asaientisi e fa'afetaui a'i le mana fai vavega o le Atua, o i latou uma ua manatu latou te mafai ona o'o i le 'upu moni e aunoa ma le ta'ita'iga a le Atua, o i latou ia ua lavelavea leaga i le maille a Satani.

(20) PE AFAI UA TATOU 'AVEA LE AFIOGA A LE ATUA MA 'OLO MALOSI, O LE Ā LE I'UGA PE A O'O I LE TAIMI E TOFOTOFOINA AI I TATOU?

'Ou te avāne lona tolu o vaega i le afi; 'Ou te fa'ate'a'ese ai le 'ele'ele iā te i latou, e pei ona fa'ate'a'eseina ai le 'ele'ele o le ario; 'Ou te tofotofoina i latou, e pei ona tofotofoina o le auro; e vala'au i latou i Lo'u igoa; o A'u fo'i, 'Ou te tali atu ai iā te i latou; 'Ou te fai ane, 'O Lo'u nu'u lava i latou; a e fai mai i latou, 'O Ieova o lo'u Atua lava o Ia.'

Sakaria 13:9

Amu'ia le tagata o lē fa'atuatua iā Ieova, o lē ua fai Ieova mona fa'atuatuāga. Auā o ia e fa'apei o le la'au ua totō i tafatafa ane o le vai, ua sosolo atu ōna ā'a i tafatafa ane o le vaitafe, na te iloa fo'i pe a o'o mai le vevela, a e lauōlaola ōna lau; e lē atuativāle i le tausaga o le lā mala, e fua mai pea lava ōna fua.

Jeremia 17:7, 8

A o'o mai le taimi o le tofotofoga, o le taimi lea o le a iloa ai i latou o ē na latou 'avea le afioga a le Atua o o latou ta'iala. E leai se 'ese'esega tele e va'aia i le taimi o le taumafanafana i le vā o la'au e lanumeamata pea ma isi la'au. Peita'i a agi mai loa matagi o le taumalūlū, ona tutumau pea lea o le lanu o la'au e lanumeamata pea, a'o isi la'au ua to'ulu uma o latou lau. E fa'apenā ona lē iloa nei se 'ese'esega i le vā o le Kerisiano moni ma le Kerisiano fa'afoliga. Peita'i ua toetoe lava o'o mai le taimi e manino mai ai lenei 'ese'esega. E laulaututū a'e loa le 'au tete'e, e toe amataina loa sauāga, ona māluelue loa lea ma pa'u'ū le 'au fa'a'afa'afa ma le Kerisiano fa'afoliga. Peita'i o le taimi lea o le a va'aia ai le tū a'e o le Kerisiano moni ua mausalī e pei o le papa, ua atili malosī ai lona fa'atuatua nai lo aso o le sololelei.

Ua 'ou iloa i aso fa'ai'u o le tala fa'asolopito o le lalolagi, o le a fa'aaogā e Satani so'o se togafiti ina ia lē mafai e se tagata e to'atasi ona maua se malamalamaga o le Afioga Pa'ia a le Atua.

Li'o le Tali:

Ioe

Lē Mautonu

O le Lapata'iga Mulimuli - 9

(1) O LE Ā LE FE'AU O LAPATA'IGA MO ASO FA'AI'UTU O LE A FA'AALIA E ALA MAI LE "AGELU" O LE FA'AALIGA 14:8?

Ona mulimuli atu ai lea o le tasi agelu, ua fa'apea atu, 'Ua pa'ū, ua pa'ū, ua pa'ū Papelonía o le 'a'ai tele, auā ua ia fa'ainu i nu'u uma i le uaina o le to'asā i lana faita'aga.'

Fa'aaliga 14:8

Ua mavae ia mea, ona 'ou iloa atu lea o le agelu o lo'o alu ifo i le lagi, ua iā te ia le pule sili; ua malamalama fo'i le lalolagi uma i lona pupula. Ua matuā alaga fo'i o ia ma le leo tele, ua fa'apea ane, 'Ua pa'ū, ua pa'ū Papelonía le 'a'ai tele, ua 'avea fo'i o ia ma mea e nofo ai temoni, ma mea e puipui ai agaga leaga uma, o le mea fo'i e puipui ai manu felelei uma e leaga ma le 'inosia.'

Fa'aaliga 18:1, 2

(2) INA UA TOE FA'AILOA MAI LENEI LAPATA'IGA E IOANE I LE FA'AALIGA 18, O LE Ā LE ŌLEGA UA TU'UINA MAI I Ē O LO'O MULIMULI MA LE FA'AMAONI I LE ATUA?

Ua 'ou fa'alogofa'i i le tasi leo mai le lagi, ua fa'apea mai, 'Lo'u nu'u e, ia outou ō 'ese ia iā te ia, ina ne'i fa'atasia outou i āna agasala, ina ne'i tofusua fo'i outou i ōna mala.'

Fa'aaliga 18:4

Ua fa'asino i le lumana'i 'upu o lenei mau, i le taimi e toe folafolaina ai le pa'ū o Papelonía e pei ona fa'ailoa mai e le agelu lona lua o le Fa'aaliga 14 (fuai'upu 8). Peita'i o le a fa'aopoopo i le folafolaga i lea taimi le tele o le amiolētonu ma mea sesē na ofi i ekalesia ma isi fa'apotopotoga ua aofia ai i le 'upu Papelonía talu mai le ulua'i folafolaga o lenei fe'au, i le taumafanafana o le tausaga 1844. Ua fa'amatalaina mai i ia 'upu se tulaga mata'utia ua o'o i ai le lalolagi o mea fa'alelotu. O le tele o 'upu moni e te'ena e tagata, o le atili pogisā fo'i lea o o latou mafaufau, o le atili ma'a'a fo'i lea o o latou loto, se'ia o'o ina ma'a'atū ai i latou i le lē talitonu i le Atua ma Lana afioga. E ui lava ua tu'uina mai i ai e le Atua lapata'iga, o le a latou soli pea lava se tasi o poloā'iga o le tulafono, se'ia o'o lava ina latou sauāina i latou o ē ua latou tasi ma fa'apa'ia i lea poloā'iga. Ua latou tauemu iā Keriso, e ala i lo latou manatu māmā i Lana afioga fa'apea ma Ōna tagata. A o fa'asolosolo atu pea ina to'atele ekalesia Kerisiano latou te talia fa'agaoioiga fa'ataulaitu ma talitonuga e fa'atatau i feso'ota'iga i le vā o tagata ola ma ē ua oti, o le a fa'apenā ona 'ave'esea tulafono o lo o pulea ai le tu'inanau o le tino. Ona 'avea ai lea o le igoa o le lotu ma ofu o le a fa'alafi ai amioleaga ua sili ona mātagā. O le talitonuga i agaga ma lo latou mana fai vavega, o le a 'avea lea ma mea e tatalaina ai le faitoto'a i agaga leaga ma a'oa'oga a temoni. O le a fa'apenā ona ofi mai o fa'agaoioiga a agelu leaga i totonu o ekalesia 'ese'ese.

(3) O LE Ā LE MAUALUGA O LE A O'O I AI "AGASALA" A PAPELONIA?

Auā ua pa'i atu āna agasala i le lagi, ua manatua fo'i e le Atua āna amioleaga.

Fa'aaliga 18:5

Ua tumu le ipu o lana amioleaga, ma ua o'o mai le taimi o lona fa'asalaga. Peita'i o lo o i ai pea i Papelonía nisi o le fanau a le Atua; e ao ona vala'au ia ō 'ese mai i latou ia a o le'i o'o mai le to'asā o le Atua, ne'i fa'atasia i latou i āna agasala, ma tofusua i latou i ōna mala. O le pogai lea o le fa'agaoioiga lea ua fa'atusa mai i le agelu mai le lagi, le agelu lea ua malamalama ai le lalolagi i lona pupula, le agelu lea na 'alaga ma le leo tele ma folafolaina mai agasala a Papelonía. O le 'alaga fo'i lenei na sau ai ma le vala'au: "Lo'u nu'u e, ia outou ō 'ese ia iā te ia." O le tu'ufa'atasiga o le 'alaga a le agelu lenei ma le fe'au a le agelu lona tolu e maua mai ai le toe lapata'iga e tu'uina atu i le lalolagi.

(4) O Ā FA'ASALAGA O LE A FA'AO'O E LE PULE'AGA A LE FA'ATUSA O LE MANU FE'AI I TAGATA O LE ATUA, O Ē TETE'E E MULIMULI I ŌNA TALITONUGA SESĒ?

Ina ia lē mafaia ona fa'atau mai pe fa'atau atu e se tasi, tau lava o ē ua i ai le fa'ailoga, po o le igoa o le manu fe'ai, po o le faitau aofa'i o lona igoa.

Fa'aaliga 13:17

Ua tu'uina atu fo'i iā te ia na te avatua le mānavā i le fa'atagata o le manu fe'ai, ina ia tautala le fa'atagata o le manu fe'ai, ma ia faia ina ia fasiotia i latou uma o ē lē ifo atu i le fa'atagata o le manu fe'ai.

Fa'aaliga 13:15

E mata'utia mea o le a fa'afeagai ma le lalolagi i lea taimi. O le a tutū fa'atasi malō o le lalolagi e tete'e atu i poloā'iga a le Atua, ona latou faia lea o le poloā'iga e a'afia ai tagata uma, o tagatā nu'u atoa ma ali'i, o ē mau'oa ma ē matitiva, o ē sa'oloto ma ē pologa (Fa'aaliga 13:16). Ua poloa'iina tagata uma ina ia latou usita'i ma mulimuli i le ekalesia i le tausiga o le sapati sesē (Va'ai Manatu Fa'aopoopo B, C, D). O i latou uma o ē lē usita'i o le a feagai ma fa'asalaga a le malō, se'i o'o lava ina faia se folafolaga e fa'ao'o ai iā i latou le oti (Va'ai Manatu Fa'aopoopo F).

(5) O LE Ā LE FE'AU LAPATA'I O LO'O TU'U MAI E LE ATUA E ALA I LONA TOLU O AGELU, IĀ I LATOU O Ē FILIFILI E TAPUA'I I LE MANU FE'AI?

Ona mulimuli atu ai lea iā te i la'ua o lona to'atolu o agelu, ua fa'apea atu ma le leo tele, 'Ai se tasi e ifo i le manu fe'ai ma lona fa'atagata, ma talia le fa'aailoga i lona muāulu po o lona lima, e inu lava ia i le uaina o le to'asā o le Atua, ua liligiina atu e lē suia i le ipu o Lona to'asā, e puapuagātia fo'i ia i le afi ma le teiō i luma o le 'au agelu pa'ia ma luna o le Tama'i Mamoe.

Fa'aaliga 14:9, 10

Peita'i ua i ai fo'i le tulafono a le Atua ua fa'atonuina ai le tausia o le Sapati o Lē na faia mea uma, ma ua folafola mai fo'i e le Atua Lona to'asā i ē uma latou te soli i lea poloā'iga. O le a manino le ta'atitia mai o nei mea uma i luma o tagata ta'ito'atasi o le lalolagi. So'o se tasi o le a soli i le tulafono a le Atua i lea taimi ina ia usita'i ai i poloā'iga a tagata, ua maua loa e ia le fa'aailoga o le manu fe'ai. Ua ia talia nei le fa'aailoga e iloa ai lona fa'amaoni i le pule ua ia filifilia a e lē o le Atua. Fai mai le lapata'iga mai le lagi: “Ai se tasi e ifo i le manu fe'ai ma lona fa'atagata, ma talia le fa'aailoga i lona muāulu po o lona lima, e inu lava ia i le uaina o le to'asā o le Atua ua liligiina atu e lē suia i le ipu o Lona to'asā.”

Peita'i e leai se tasi o le a o'o i ai le to'asā o le Atua se'i vaganā ua ia te'ena le 'upu moni e ui lava ua manino lelei i ai lona loto ma lona mafaufau. E to'atele latou te le'i maua se avanoa latou te fa'alogo ai i 'upu moni fa'apitoa mo le taimi nei. E le'i fa'amanoina atu iā i latou le uiga moni o lo latou tiute e fa'atatau i le poloā'iga e fā. E silafia e le Atua mea uma; Na te faitauina mea uma o lo o i loto ta'ito'atasi. So'o se tasi ua naunau na te fia iloa le 'upu moni, e lē tu'ua e le Atua lea tagata ina ia fa'asesēina i matā'upu ua mafua ai nei le finauga tele. O le a manino tagata uma e fa'atatau i le fa'amamaluina o le Aso Sā ma le tausiga o le Sapati o le Atua, ina ia fai ai ma le malamalama a latou filifiliga po o le fea e ao ona latou usita'i i ai.

(6) E TUSA AI MA LE TUSI PA'IA, O LE Ā LE MEA E FA'ASINO I AI LE SAPATI O LE POLOA'IGA E FĀ?

Ia outou fa'apa'iaina fo'i O'u sapati; e fai fo'i ia ma fa'aailoga iā te A'u ma outou, ia iloa ai e outou, o A'u lava o Ieova lo outou Atua.

Na 'Ou avatu fo'i iā te i latou O'u sapati, e fai ma fa'aailoga iā te A'u ma i latou, ia latou iloa ai o A'u o Ieova Lē fa'apa'iaina i latou.

Esekielu 20:20, 12

Ia tausi e le fanauga a Isara'elu i le sapati, e fai ma sapati i a outou tupulaga amulī, o le feagaiga e fa'avavau. O le fa'aailoga lea e fa'avavau iā te A'u atoa ma le fanauga a Isara'elu; auā o aso e ono na fai ai e Ieova le lagi atoa ma le lalolagi; a o le aso fitu na Ia malōlō ai, ma mapu ai.

Esoto 31:16, 17

O le Sapati o le matā'upu fa'apitoa lea o le a iloiloaina ai tagata uma po o le fea itū ua latou fa'amaoni i ai; o le matā'upu lea ua fa'asinotonu nei i ai le finauga tele. E faia loa lenei iloiloiga, ona va'aia loa lea o le 'ese'esega i le vā o ē 'au'auna i le Atua ma i latou o ē tete'e iā te Ia. O le tausiga o le sapati sesē o le a fa'aailoa ai le usita'i i le poloā'iga a le malō, o le a fa'aailoa ai le tete'e i le poloā'iga e fā, ma fa'aailoa ai fo'i le fa'amaoni o le tagata i le pule ua tete'e i le Atua. Peita'i o le tausiga o le Sapati moni o le a fa'aailoa ai le usita'i i le tulafono a le Atua, ma fa'aailoa mai ai fo'i le fa'amaoni o le tagata i Lē na foafoaina mea uma. O le vaega muamua latou te maua le fa'aailoga o le manu fe'ai talu ai lo latou gau'i i le pule fa'alelalolagi; peita'i o le vaega lona lua ua latou filifilia le aso ua fai ma fa'aailoga o le pule fa'alelagi, ma ua latou maua le fa'amaufa'aailoga a le Atua.

E o'o mai lava i lea taimi e lē o manatu mamafa lava se isi i 'upu moni ua fa'aailoa mai e i latou o ē ua folafolaina le fe'au a lona tolu o agelu. O a latou valo'aga e fa'atatau i le 'ave'esea o le sa'olotoga i mea tau tapua'iga i le Iunaite Setete, fa'apea ma le tu'ufa'atasia o le ekalesia ma le malō ina ia sauāina ai i latou ua tausia poloā'iga a le Atua, ua

fa'aigoa nei valo'aga e tagata o mea valea ma mea e leai ni fa'amaoniga. Ua fai le 'upu a le to'atele e lē suia lava le Iunaite Setete; o le a tumau pea lava Amerika i le puipuia o le āiā tatau o tagata i mea tau tapua'iga. Peita'i a'o fa'aopoopoina pea le to'atele o ē lagolagoina le fa'amamaluina o le Aso Sā, ua fa'apenā ona va'aia o le taulalata mai o le mea na lē talitonu i ai le to'atele. O mea uma nei o le a maua ai se suiga i le manatu o tagata i le fe'au a lona tolu o agelu, se suiga semanū e lē mafai pe ana lē tutupu mai nei mea.

(7) O AI LE "FANAUGA A ISARA'ELU" I LE FA'ATATAU A LE ATUA?

A e lē peiseā'i ua i'u vale le a'fioga a le Atua; auā o tagata mai iā Isara'elu, e lē o Isara'elu i latou uma lava. E lē o le fanau fo'i i latou uma, auā na tupu mai iā Apera'amo i latou, a e fa'apea mai, E vala'auina lau fanau e iā Isa'ako. O lona uiga lenei, o le fanau a le tino, e lē o le fanau a le Atua i latou; a e peita'i o le fanau o i le 'upu ua folafolaina, e ta'ua i latou o le fanau.

Roma 9:6-8

(8) O AI O LE A FA'ASAGA I AI LE TO'ATELE O LO'O FIAFIA PEA I TU'INANAU MO SO LATOU TA'ITA'I FA'ALEAGAGA I ASO TAUF'A'I'U?

Ia e tala'i atu le 'upu, ia e fa'amalosi i ōna aso e taugalemū ai, ma ōna aso e lē taugalemū ai, ia e fa'atonu atu, ia e a'oa'i atu, ia e apoapoa'i atu ma le onosa'i uma atoa ma le a'oa'o atu. Auā e o'o i ōna pō latou te lē mafafai ai ona talia o le matā'upu e ola ai, a e tusa ma o latou lava tu'inaanau, latou te fa'apotopototo ai a'oa'o mo i latou, ina ua feū o latou taliga. Latou te liliu 'ese fo'i o latou taliga i le 'upu moni, a e liliu atu i tala o le vavau.

II Timoteo 4:3, 4

(9) UA FA'AFEFEA LE TATAU AI ONA AUMAIA O LE FE'AU A LE ATUA MO ASO O LE I'UGA?

Ia e tala'i atu le 'upu, ia e fa'amalosi i ōna aso e taugalemū ai, ma ōna aso e lē taugalemū ai, ia e fa'atonu atu, ia e a'oa'i atu, ia e apoapoa'i atu ma le onosa'i uma atoa ma le a'oa'o atu.

II Timoteo 4:2

Ua tofua lava le augātupulaga ma 'au'auna a le Atua ua 'auina mai latou te avatua le a'oa'iga i le lalolagi fa'apea ma le ekalesia. Peita'i e manana'o tagata e avatu iā i latou ni 'upu mol'emole, a e lē manana'o i le 'upu moni tu'usa'o e aunoa ma ni teuteuga. E to'atele ni 'au'auna a le Atua na latou mafaufau loloto a'o le'i amatalia la latou galuega, ma sa tonu iā i latou o le a latou savavali ma le fa'aeteete i le faiga o le galuega o le osofa'ia o agasala a le ekalesia ma le atunu'u. Na i ai lo latou fa'anaunauga o le a 'avea lo latou olaga amioatua ma le olaga mamā fa'a-Kerisiano ma mea o le a toe ta'ita'ia ai tagata i a'oa'oga o le Tusi Pa'ia. Peita'i na o'o atu iā i latou le Agaga o le Atua e pei ona o'o atu iā Elia, ma fa'atonuina ai o ia na te a'oa'ia agasala a le tupu amioleaga ma ōna tagata ifo i tupua. Na fa'atonuina i latou ina ia latou folafolaina atu fe'au tu'usa'o o le a'fioga a le Atua, fe'au na latou lē manana'o e folafolaina. Na una'iina i latou ina ia latou folafola atu ma le malosi ma le ma'elegā le 'upu moni, fa'apea ma mea e ono lamatia ai agaga o tagata. Na fa'apenā ona latou folafolaina fe'au na tu'uina atu iā i latou e le Atua e aunoa ma so latou popole i o latou ola; na fa'apenā ona fa'alogo tagata i le lapata'iga.

(10) O AI O LE A FA'AAOGĀ E LE ATUA E AUMAIA I LE LALOLAGI LE FE'AU A AGELU E TO'ATOLU O LE FA'AALIGA 14?

O A'u uō outou, pe afai toe te faia mea uma lava 'Ou te fai atu ai iā te outou. 'Ou te lē toe ta'ua outou o 'au'auna, auā e lē iloa e le 'au'auna mea e faia e lona ali'i; a ua 'Ou ta'ua outou o uō, auā ua 'Ou fa'a'ailoa atu iā te outou mea uma na 'Ou fa'alogo ai i Lo'u Tamā. Ua lē filifilia A'u e outou, a ua filifilia outou e A'u; ua 'Ou tu'uina atu fo'i outou, ia outou ō, ma ia outou fua mai ni fua, ma ia tumau o outou fua; ina ia fōa'iina atu iā te outou e le Tamā mea uma lava tou te ōle atu ai iā te la i Lo'u igoa.

Ioane 15:14-16

O lenei ia outou ō atu e fai nu'u uma lava ma so'o, ma papatiso atu iā te i latou i le suafa o le Tamā, ma le Atali'i, ma le Agaga Pa'ia; ia outou a'oa'o atu iā te i latou ia tausī i mea uma ua 'Ou fai atu ai iā te outou; fa'auta fo'i, 'Ou te iā te outou i aso uma lava, e o'o lava i le gata'aga o le lalolagi. Amene.

Mataio 28:19, 20

E fa'apenā fo'i le auala o le a folafolaina ai le fe'au a lona tolu o agelu. A o'o mai le taimi e ao ai ona tu'uina atu lenei fe'au i lona malosi e tatau ai, o le a galue le Atua e ala i meafaigaluega fa'atauva'a, i latou ua fa'apa'iaina o latou olaga ma tu'uina atu i latou mo Lana galuega. O le a maua e le 'aufaigaluega le agava'a e tatau ai, e ala i le fa'au'uga a le Agaga Pa'ia, a e lē o le potō mai iunivesetē ma kolisi maua luga. O le a una'ia le 'au fa'atuatua ma i latou e masani i le tatalo, ina ia latou o atu i le ma'elegā pa'ia latou te folafolaina atu fe'au ua tu'uina atu e le Atua iā i latou.

(11) PE A FA'AALIA TALITONUGA SESĒ O PAPELONIA, O LE Ā LE FOLAFOLAGA E TATAU ONA TAPĀ E I LATOU O Ē O LO'O SA'ILI MA LE FA'AMAONI E MULIMULI I TALITONUGA MONI A KERISO?

Ona fetalai atu ai lea o Iesu iā Iutaia, ē ua talitonu iā te Ia, 'Afai tou te tumau pea i La'u matā'upu, o O'u so'o moni outou. E iloa fo'i e outou le mea moni, e tu'u sa'oloto fo'i outou e le 'upu moni.

Ioane 8:31, 32

O le a fa'apenā ona fa'aaliali a'e agasala a Papelonia. O i'uga mata'utia o le fa'amamaluina e le malō o poloā'iga a le ekalesia, o le lofia o le ekalesia i fa'agaoioiga fa'ataulaitu ma talitonuga i feso'ota'iga i le vā o tagata ola ma ē ua oti, o le vave o le fa'atupula'ia o le malosi ma le pule a le ekalesia pope e aunoa ma le iloa e le to'atele - o le a fa'aaliali a'e ia mea uma. O lapata'iga uigā nei o le a fāgua ai le to'atele. E afe ma afe o le a fa'afofoga i mea latou te le'i fa'alogu muamua i ai. O le a latou maofa a'o latou fa'alogu o Papelonia o le ekalesia lea ua pa'ū talu ai āna amioletonu ma āna a'oa'oga sesē, atoa ma lona te'ena o le 'upu moni na 'auina atu iā te ia mai le lagi. Ua o atu nei tagata i a latou faife'au ma fesili i ai pe moni nei mea uma. Peita'i o le a fai mai i ai e le 'aufailotu ni valo'aga o 'upu lamol'emole ma 'upu suamalie, e fa'anofo ai i latou ma fa'afilemū ai o latou mafaufau ua fāgua nei. Peita'i e to'atele o le a lē fa'amalieina i latou i 'upu a tagata, ma ua latou fai i a latou faife'au po o fea ni mau o le Tusi Pa'ia e fa'amaonia ai a latou 'upu. O mea fa'apea o le a oso ai loa le to'atama'i o le 'aufailotu e pei lava o le 'au Faresaio anamuā, ona ua lē talia e nisi le 'upu ua latou fai atu ai. Ua fa'apenā loa ona ta'uleagaina e lenei 'aufailotu le fe'au ma latou fai mai o lea fe'au e pogai mai iā Satani. Ua latou fa'aosoa fo'i le 'au amioleaga latou te 'upu leaga ma sauāina ē na folafolaina lenei fe'au.

(12) O LE Ā LE VALO'AGA I LENEI FUAI'UPU O LE A FA'ATAUNU'UINA IĀ I LATOU O Ē FILIFILI E USITA'I I POLOA'IGA A LE ATUA A E LĒ O TALITONUGA SESĒ O PAPELONIA?

Ua ita fo'i le tarako i le fāfine, ona alu atu ai lea o ia e tau le taua ma i latou ua totoe o lana fanau, o ē ua tausi i poloā'iga a le Atua, ma ua taofi le mau iā Iesu Keriso.

Fa'aaliga 12:17

A o sosolo atu pea le finauga tele ma a'afia ai ma isi matā'upu fa'alelotu, ma ua ta'ita'ia atu ai manatu o tagata i le soliga o le tulafono a le Atua, ua fa'apenā loa ona amata fa'agaoioiga a Satani. Ua feita 'au'auna a Satani ona o le malosi ma le mana ua folafolaina ai le fe'au a lona tolu o agelu. Ua tu'u atoa le malosi o le 'aufailotu latou te tapunipuni uma ai avanoa e ono susulu mai ai le malamalama i luga o a latou lafu mamoe. O le a fa'aalu lo latou malosi ma lo latou potō e taofia ai le talanoaina o nei matā'upu uigā. O le a tu'ufa'atasia le ekalesia pope ma ekalesia Porotesano i lo latou fa'atalosagaina o le lima malosi o le malō e fa'amamaluina ai a latou poloā'iga. A o fa'asolosolo ina malosi le una'iga o le fa'amamaluina o le Aso Sā, o le a fa'amālosia loa le tulafono i ē ua tausia poloā'iga a le Atua. O le a fa'amata'uina i latou i sala tupe ma le falepuipui; o le a ofoina atu ni tulaga-tofi lelei ma ni tau i ina ia tosina 'ese ai i latou mai lo latou talitonuga. Peita'i na o le tasi la latou tali: "Fa'aali mai lo matou sesē mai le afioga a le Atua," le tali lava lea na fa'aaogāina e Luteru ina ua o'o o ia i se tulaga fa'apea. O ē o le a avatua i luma o fa'amasinoga o le a latou avatua ni tali lelei e fa'amaonia ai le 'upu moni; o a latou tali o le a ta'ita'ia ai nisi latou te talia ma tausia poloā'iga uma a le Atua. O le a fa'apenā ona o'o atu le malamalama i ē semanū latou te lē fa'alogu i nei 'upu moni.

(13) O LE Ā LE MEA O LE A TUPU, E O'O LAVA I TOTONU O AIGA ONA O ISI E FILIFILI E USIUSITA'I I LE 'UPU MONI?

E tu'uina atu fo'i le uso e le uso ia oti, e tu'uina atu fo'i e le tamā lona atali'i, e tutū atu fo'i le fanau i o latou mātua, ina ia fasiotia i latou.

Mareko 13:12

O ē usita'i i le afioga a le Atua o le a fa'asalaina e peisea'i ua latou faia se fouvalega. O le a fa'apenā ona sauā mātua i a latou fanau po o le pule fo'i i a latou 'au'auna. O le a tutuli 'ese e mātua a latou fanau mai o latou aiga. O le a taunu'u ai 'upu a Paulo ua fa'apea mai: "O i latou uma fo'i o ē ola amioatua iā Keriso Iesu, e sauāina i latou" (II Timoteo

3:12). O le a fa'apenā ona sauāina i latou ua tete'e i le fa'amamaluina o le sapatu Aso Sā. O nisi o i latou o le a lafo i falepuipui, o nisi o le a fa'aaunu'ua, o nisi fo'i o le a fai ma pologa. Atonu e fa'apea mai le poto fa'aletagata e lē mafai ona tutupu ni mea fa'apea i aso o le malamalama. Peita'i e 'ave'esea loa le Agaga o le Atua mai tagata ma o'o atu ai i latou i lalo ifo o le pule a Satani, e 'ese mea o le a tutupu mai. E 'ese le sauā o le loto o le tagata pe a 'ave'esea ai le alofa ma le mata'u i le Atua

(14) O LE Ā LE MEA E TATAU ONA Ō FA'ATASI MA LO TATOU ILOA O LE 'UPU MONI INA IA 'AUA NE'I 'AVEA AI I TATOU MA ŌNA FILI AUPITO SILI?

O sē fa'apea, Ua 'ou iloa o Ia, a e lē tausi e ia i Āna poloā'iga, o le pepelo lava lea, e lē o i totonu iā te ia le 'upu moni. A o lē tausi i Lana afioga, e moni, ua 'ato'atoa le alofa i le Atua i totonu iā te ia. O le mea lea ua tatou iloa ai o i totonu iā te Ia i tatou.

I Ioane 2:4, 5

A o fa'amālumālu mai nei mea uma, e to'atele nisi o le ekalesia o le a latou tu'ua le 'upu moni a e tutū fa'atasi ma le itū tete'e, a e maise i latou o ē na fai mai e talitonu i le fe'au a lona tolu o agelu a e le'i fa'apa'aina i latou e ala i lo latou usita'i i le 'upu moni. Ua tai leai lava se 'ese'esega o a latou mea e fai ma mea e fai a le lalolagi, auā ua latou tutū ma le lalolagi ma ua ulufia fo'i i latou i le agaga e tasi. O le a latou filifilia le auala faigofie i le taimi e o'o mai ai le tofotofoga. O nisi o tagata a'oa'oina ma le agava'a na fiafia i le 'upu moni i se taimi ua mavae, ua latou fa'aaogāina nei lo latou malosi latou te fa'asesēina ai tagata. O i latou nei o le a 'avea o filii aupito mata'utia o le fanau a le Atua. O a'u'upega aupito sili nei i lima o Satani i le faia o moliga pepelo pe a avatua le fanau a le Atua i luma o fa'amasinoga.

(15) E FA'APEI O PETERU MA IOANE, O LE Ā LE FILIFILIGA O LE A FAIA E I LATOU O LE A FA'APUAPUAGĀTIA PE A LATOU TALA'I ATU LE 'UPU MONI?

A ua tali atu Peteru ma Ioane, ua fa'apea atu iā te i latou, 'Pe tonu i luma o le Atua, ona ma fa'alogi iā te outou, a e ma te lē fa'alogi i le Atua, inā filifili ia outou. Auā ma te lē mafai ona lē tautala i mea ua ma va'ai i ai ma fa'alogi i ai.'

Galuega 4:19, 20

O le a tofotofoina le fa'atuatua o le fanau a le Atua. Ua uma ona latou avatua le lapata'iga e ala i lo latou tepa taula'i atu i le Atua ma Lana afioga. O le una'iga a le Agaga o le Atua na latou molimau atu ai. Ua latou faia la latou galuega i le ma'elegā pa'ia e aunoa ma so latou popole po o le ā le mea o le a tupu iā i latou talu ai lo latou folafolaina o le fe'au ua tu'uina atu e le Atua iā i latou. Latou te le'i popole i a latou mea totino po o o latou igoa, po o lo latou ola. Ua aumai le oti ma le fa'a'umatiāga e fa'amata'u a'i i latou. Ua lē toe va'aia so latou fiafia po o so latou ma'elegā; peita'i e lē mafai ona latou fultua. O le taimi o lo latou matuā lē mafai o se mea, o le taimi lea ua latou sulufa'i atu ai i le Silisili 'Ese mo Lana fa'amalosī'aga.

O tofotofoga lava nei na o'o i tagata o le Atua i augātupulaga ua mavae. O i latou uma nei na latou folafola atu e ao ona 'avea le Tusi Pa'ia o tapula'a e fua aga'i i ai so'o se a'oa'oga. Na pesi atu le malosi o sauāga iā i latou, peita'i e le'i taofia ai lo latou folafolaina o le 'upu moni. E lē o se galuega a 'au'auna a le Atua le popole po o le ā le mea o le a tupu pe a latou faia le finagalo o le Atua. E ao ona faia lo latou tiute, a e tu'u i le Atua po o le ā le lumana'i ma mea o le a tutupu mai.

(16) O FEA O LE A MAFAI ONA TATOU MAUA MAI AI LE MALOSI PE A O'O I NEI TAIMI O PUAPUAGĀ?

E te lē iloa ea? E te le'i fa'alogi ai ea? O le Atua o le vavau, o Ieova o Lē na faia tulu'iga o le lalolagi, e lē vaivai o Ia, e lē tigāina fo'i, e lē masu'esu'eina Lona mafaufau.

Na te avatua le malosi i ē ua vaivai; a o ē ua leai se malosi, Na te fa'atupu tele i ai le malosi.

E vaivai ma tigāina tamā matutua; o taulele'a fo'i, e pa'u'ū lava i latou.

A o ē fa'atalitali iā Ieova, e toe fa'afouina lo latou malosi; latou te si'i a'e 'apa'au e pei o aeto; latou te femo'ei, a e lē vaivai; latou te savavali, a e lē tigāina.

Isaia 40:28-31

O le Atua, o lo tatou malu ia ma lo tatou malosi; e fai o Ia ma fesoasoani silisili i puapuagā. O le mea lea tatou te lē fefefe ai, pe a fa'aliliuina le lalolagi, ma lulūina mauga i totonu o le sami; pe a ta'alili ma sousou na suāsami, ma fa'agateteina ai mauga i lona maua luga.

O le vaitafe, e fa'afiafia ōna magāvai i le 'a'ai a le Atua, o le mea pa'ia, o i ai afio'aga o Lē Silisili 'ese. O lo'o i totonu iā te ia le Atua, e lē fa'agaē'etia lava ia, e fesoasoani le Atua iā te ia i le vaveao. Ua vāvāō nu'u 'ese, ua

fa'aga'e'etia malō; ua tulei mai Lona si'ufofoga, ona liu suāvai lea o le lalolagi. Ua i a te'i tatou Ieova o 'au; o le Atua o Iakopo o lo tatou 'olo maua luga ia.

Inā ō mai ia, inā va'ava'ai i galuega a Ieova, o Lē ua faia fa'atafunaga i le lalolagi. Ua fa'ai'ua e Ia o taua e o'o lava i tulū'iga o le lalolagi; ua gagau e Ia le aufana, ma vavae le tao; ua susunuina fo'i e Ia karioti i le afi. Inā soia, ma ia outou iloa o A'u lava o le Atua; e vi'ia A'u i nu'u 'ese e vi'ia A'u i le lalolagi. Ua iā te i tatou o Ieova o 'au, o le Atua o Iakopo, o lo tatou 'olo maua luga.

Salamo 46

A o fa'atupula'ia pea le 'a'asa o faiga a le fili ma sauāga, na femēmēā'i 'au'auna a le Atua ona ua peiseā'i o i latou ua mafua ai lenei finauga. Peita'i o le Tusi Pa'ia ma le musumusuga a le Agaga Pa'ia na latou iloa ai ua latou savavali i le mea tonu. E ui lava la i le mamafa o tofotofoga, na latou maua le fa'amalosi'aga. Na fa'apenā ona fa'asolosolo a'e pea le malosi o le finauga ma sauāga; peita'i na fa'apenā fo'i ona tuputupu a'e o lo latou fa'atuatua ma lo latou lototele. Fai mai la latou ta'utinoga: “Ia mamao iā i matou lo matou solia o le tulafono a le Atua. E lē mafai ona matou vaevea Lana tulafono pa'ia, ona fa'aigoa lea o lenei vaega e tāua a'o se isi vaega e lē tāua ina ia fiafia mai ai le lalolagi. Ua matou 'au'auna i le Ali'i; ua i ai Lona mana e mafai ai ona lavea'iina i matou. Ua manumalō Keriso i 'au uma o le pogisā ma le lalolagi; e i ai ea la se mea tatou te toe fefefe ai i le lalolagi ua uma ona fa'ato'ilaloina?

(17) O LE Ā LE MEA O LE A O'O IĀ I TATOU PE A TATOU 'AU'AUNA FA'AMAONI IĀ KERISO?

Ona latou tu'uina atu ai lea o outou i le puapuagā, ma latou fasiotia outou; e 'inosia fo'i outou e nu'u uma ona o Lo'u igoa.

Mataio 24:9

E leai se tasi e mafai ona 'au'auna i le Atua e aunoa ma le fa'asagasaga mai i ai o 'au o le pouliuli. O le a osofa'ia lea tagata e agelu leaga ne'i 'avea lana galuega ma mea o le a toe mamulu 'ese atu ai tagata nai o latou lima. O le a taumafai fo'i le 'au amioleaga latou te 'ave'esea o ia mai lona pi'itaga i le Atua, e ala i lo latou avatua iā te ia o tamao'aiga ma tulaga ma isi mea e ono maileia ai o ia. Afai e lē fa'amanuiaina nei taumafaiga uma, ona fa'aogāina loa lea o faiga faifa'amalosi e u'una'iina ai le mafaufau o le tagata.

(18) O AI O LE A PULEA 'ATO'ATO A PEA TA'ITA'I FA'ALELALOLAGI, E UI LAVA I NEI TAIMI O FAIGATĀ?

O le finagalo o le tupu, o vaita'i ia i le 'a'ao e Ieova; Na te liliuina i mea uma ua Ia finagalo i ai.

Fa'ata'oto 21:1

Peita'i, a'o faia pea le galuega fautua a Keriso i le malumalu i lugā, o le a fa'apenā fo'i ona lagonaina e ta'ita'i o malō ma o latou tagata le galuega a le Agaga Pa'ia. O le Agaga lea o lo o i ai Lona leo i le faiga o nisi tulafono o le atunu'u. Ana leai nei tulafono, semanū ua o'o lo tatou lalolagi i se tulaga e sili atu le leaga nai lo le tulaga ua i ai nei. E moni ua 'avea le tele o o tatou ta'ita'i o sui o Satani; peita'i ua i ai fo'i sui o le Atua i tofi maua luga o le malō. E fealua'i Satani na te musumusu atu i ana 'au'auna ni tulafono taua'atofi e ao ona faia ina ia taofia ai pe fa'alavelaveina ai le galuega a le Atua. Peita'i e ta'ita'iina fo'i e agelu a le Atua ta'ita'i o ē matata'u i le Ali'i, ina ia mafai ai ona taofia nei tulafono taua'atofi. E fa'apenā ona fa'aogāina e le Atua se 'au to'aitiiti e taofia mai ai le pesi malosi mai o galu o le leaga. O le a taofia fa'apenā le galuega a le fili o le 'upu moni, ina ia mafai ai ona faia le galuega a lona tolu o agelu. O le a fa'ate'ia mafaufau o tagata o lo o fai ma sui o le Atua pe a o'o ina folafolaina le lapata'iga mulimuli. E i ai nisi o i latou o le a latou talia le lapata'iga ma latou tutū atu ai fa'atasi ma le fanau a le Atua i le taimi o puapuagā.

(19) O AI O LE A 'AUINA MAI E LE ATUA E TOSINA AI LOTO O TAGATA IA TALIA LANA FE'AU LAPATA'I MO ASO O LE I'UGA?

O ōna aso e gata ai, o lo'o fa'apea mai le Atua, e i'u ina 'Ou liligi ifo ai Lo'u agaga i luga o tagata uma lava; ona perofeta mai lea o outou atali'i ma o outou afafine, e iloa fa'aaliga e o outou taulele'a, e fai miti fo'i o outou toea'ina.

Galuega 2:17

O le a foliga lenei galuega i le mea na tupu i le Aso Penetekoso. Na pa'ū mai le “uāga muamua” i le taimi o le liligiina ifo o le Agaga Pa'ia i le tau amataga o le galuega o le talalelei, ina ia totogo a'e ai le fatu saito lelei. O le a fa'apenā fo'i ona pa'ū mai o le “uāga mulimuli” ina ia matua ai le saito ma saunia ai mo le selesalega. “E afio mai fo'i o Ia iā te i tatou e pei o le ua, e pei o le timu mulimuli ma le timu muamua i le 'ele'ele” (Hosea 6:3). “O outou fo'i o le fanau a

Siona e, ia outou fiasia ma 'oli'oli iā leova lo outou Atua, auā ua la foā'iina fa'atatau mai iā te outou le uāga muamua, Na te fa'atotoina ifo fo'i le ua mo outou, o le uāga muamua atoa ma le uāga mulimuli” (Ioelu 2:23). “O ōna aso e gata ai, o lo o fa'apea mai le Atua, e i'u ina 'Ou liligi ifo ai Lo'u agaga i luga o tagata uma lava.”

O le a sili atu le malosi o le uāga mulimuli i luga o le galuega o le talalelei nai lo le uāga muamua. O valo'aga ia na fa'ataunu'uina ina ua fa'atotoina ifo le uāga muamua i le tau amataga o le talalelei, o valo'aga lava fo'i ia o le a toe fa'ataunu'uina i le uāga mulimuli i le fa'ai'uga o le talalelei. Ua fa'aigoa e Peteru lenei mea o tausaga e fa'afouina ai po o tausaga e filemū ai. “O lenei, inā salamō ia outou ma outou liliu, ina ia soloi'esea a outou agasala ina ia o'o mai ai o tausaga e filemū ai mai luma o le Ali'i, ina ia 'auina mai fo'i e Ia Lē na mua'i tala'iina ia te outou, o Iesu Keriso lea” (Galuega 3:19).

(20) A O TU'UINA MAI E LE ATUA FA'AILOGA MA MEA OFOFOGIA IA FA'AMALOSI AI LANA FE'AU LAPATA'I, O LE Ā LE MEA O LE A FAIA FO'I E SATANI, E ALA I ŌNA SUI, E TAUMAFAI AI E TETE'E LE MANA O LE AGAGA O LE ATUA MA FA'ASESĒ AI LE TO'ATELE?

Ua fai fo'i e ia fa'ailoga tetele, o lea ua fai ai e ia ina ia alu ifo le afi mai le lagi i le lalolagi i luma o tagata.

Fa'aaliga 13:13

O le a fetaufetūlia'i 'au'auna a le Atua mai lea nu'u i lea nu'u latou te folafolaina ai le fe'au mai le lagi. O le a va'aia se fiasia tele i o latou foliga a'o latou tu'uina atu i latou e fa'apa'iaina mo Lana galuega. O le a tu'uina atu le lapata'iga e leo e afe ma afe i itū uma o le lalolagi. O le a faia vavega, o le a fa'amālōlōina ma'i, ma o le a va'aia fo'i fa'aailoga e tele i mea e galulue ai le 'au fa'atuatua. Peita'i o le a galue fo'i Satani i le faia o ana vavega pepelo, e o'o lava i lona aumaia o se afi mai le lagi i luma o tagata. O le a fa'apenā ona sauniunia e le Atua tagata uma o le lalolagi mo le faia o la latou filifiliga.

(21) O LE Ā LE I'UGA E O'O I AI PE A TOSINA LOTO E LE FE'AU LAPATA'I MULIMULI A LE AGAGA O LE ATUA?

O ōna aso e gata ai, o lo'o fa'apea mai le Atua, e i'u ina 'Ou liligi ifo ai Lo'u agaga i luga o tagata uma lava; ona perofeta mai lea o outou atali'i ma o outou afafine, e iloa fa'aaliga e o outou taulele'a, e fai miti fo'i o outou toea'ina.

O ia aso fo'i 'Ou te liligi ifo ai Lo'u Agaga i luga o A'u 'au'auna tane, ma A'u 'au'auna fafine, latou te perofeta mai ai.

'Ou te faia fo'i vavega i le lagi i lugā, ma fa'aailoga i le lalolagi i lalo, o le toto, ma le afi, ma le asuasua e fa'aniutū.

E muamua ona liua o le lā i le pōuliuli, ma le masina i le toto, i le o'o ai i le aso tele ma le silisili o le Ali'i.

E i'u fo'i ina fa'aolaina o i latou uma lava o ē vala'au atu i le suafa o le Ali'i.

Galuega 2:17-21

E lē o finauga a tagata a'o le galuega a le Agaga o le Atua o le a fa'alagolago i ai le taliaina e tagata o le fe'au. Ua uma ona faia fa'amalamalama'aga o le fe'au. Ua mae'a le lūlūina o le fatu. Ua fa'atali nei mo lona tofoga a'e ma lona fua mai. Ua uma fo'i le galuega a tusi ma pepa na fa'asalalauina e le 'aufaigaluega; peita'i e to'atele nisi latou te le'i malamalama 'ato'atoa i le 'upu moni e ui lava ina latou fiasia i le fe'au. O lo latou lē manino 'ato'atoa i le fe'au ua latou lē usita'i ai fo'i i ai. Peita'i o le taimi o le uāga mulimuli o le a ati atu ai le susulu o le malamalama i mea pogisā uma, ma o le a manino lelei ai le 'upu moni. Ua fa'apenā ona motusia e le fanau a le Atua fusi na noatia ai i latou i lenei lalolagi. Ua leai nei se malosi o fusi fa'ale'āiga, po o fusi fa'alelotu e taofia mai ai i latou. Ua sili atu iā i latou le 'upu moni nai lo isi mea uma. E ui lava i le malolosi o 'au a le fili na tu'ufa'atasia e tete'e atu ai i le 'upu moni, e to'atele o le a latou la'a mai ma tutū i le itū a le Ali'i.

'Ou te fa'afetai i le Ali'i mo fe'au lapata'i o le Fa'aaliga 14 ua la tu'u mai iā i tatou ina ia saunia ai tatou e tete'e i mea tau'afasesē.

Li'o le Tali:

Ioe

Lē Mautonu

'Ou te tatalo mo le Agaga Pa'ia ina ia ta'ita'i a'u ma tu'u'ese manatu ua muā'i faf'auina e fa'alavelave mai ai i lo'u taliaina o le 'upu moni.

Li'o le Tali:

Ioe

Lē Mautonu

Lē Mautonu

Tali o Tatalo

[illegible]

O le Taimi o Puapuagā - 10

(1) O LE Ā LE FA'AALIGA FA'ALAUATTELE A KERISO MAI LE MALUMALU FA'ALELAGI O LE A FA'AILOGAINA AI LE FA'AI'UGA O LE TAIMI O LE ALOFA TUNOA MO LE AIGĀ TAGATA?

O lē amiolētonu ia amiolētonu pea o ia, o lē 'ele'elea ia 'ele'elea pea o ia, o lē amiotonu ia amiotonu pea o ia, o lē pa'ia ia pa'ia pea o ia.

Fa'aaliga 22:11

Ua liligi fo'i e lona to'afitu o agelu lana ipu i le matagi; ona tulei mai ai lea o le si'ufofoga tele mai le malumalu o i le lagi mai le nofoāli'i, ua fa'a'apea mai, 'Ua uma ona fai.'

Fa'aaliga 16:17

E mae'a loa le fe'au a lona tolu o agelu, ona tapunia loa lea o le galuega o le alofa tunoa mo le lalolagi solitūlāfono. Ua mae'a le galuega a le fanau a le Atua. Ua latou maua le uāga mulimuli ma le fa'afouga mai le Agaga o le Ali'i, ma ua saunia nei i latou auā le itūaso o le tofotofoga ua ta'atia mai nei i o latou luma. Ua fo'i atu i le lagi se tasi o agelu ma le fe'au ua mae'a lana galuega i le lalolagi. Fai mai ua mae'a le iloiloga mulimuli o le lalolagi; o ē uma ua fa'amaoni i poloā'iga a le Atua ua latou maua nei le fa'amaufa'ailoga a le Atua soifua. Ona mae'a ai lea o le galuega fautua a Keriso i le malumalu i le lagi. Ua sisi'i a'e Ōna 'a'ao ma folafola mai i se leo tele, “Ua mae'a.” Ona to'ese lea o paleali'i o le 'au agelu uma a'o tu'uina mai e Keriso le folafolaga fa'ai'u: “O lē amiolētonu ia amiolētonu pea o ia, o lē 'ele'elea ia 'ele'elea pea o ia, o lē amiotonu ia amiotonu pea o ia, o lē pa'ia ia pa'ia pea o ia” (Fa'aaliga 22:11). Ua maua nei le i'uga o tagata ta'ito'atasi uma - o nisi mo le ola, o nisi mo le fa'afanoga e fa'avavau. Ua faia e Keriso le togiola mo Ōna tagata, ma ua soloi'esea a latou agasala. Ua maua nei le faitauaofa'i o tagata o Lona malō; ua fa'atali nei le tu'uina atu o le malō iā i latou o sulī o le fa'aolataga; ma o le a 'avea loa Iesu o Tupu o tupu ma Ali'i o ali'i (Fa'aaliga 17:14).

(2) O LE Ā LE MEA MATA'UTIA O LE A TUPU I LE VĀ O LE FA'AI'UGA O LE TAPUNIA O LE ALOFA TUNOA MA LE ULUA'I TOE TŪ?

O ōna pō fo'i ia e tula'i ai Mekaeli, le Ali'i sili, o Lē na tula'i ona o tagata o lou nu'u; e o'o mai fo'i aso vale, e leai sona tusa talu ona fa'ato'ā tupu o nu'u, ua o'o i ia lava aso; o ōna pō fo'i ia e lavea'iina ai Ōu tagata, o i latou uma o ē ua tusia i le tusi.

Tanielu 12:1

A o tu'ua e Keriso le malumalu, sa ufitia tagata uma o le lalolagi i le pogisā. O le taimi mata'utia lea o le a ola ai le 'au amiotonu i luma o le silafaga a le Atua e aunoa ma se fautua. Ua 'ave'esea nei le 'a'ao taofiofi o le Atua na i luga o le 'au amioleaga, ma o le a pulea 'ato'atoa loa e Satani le 'au amioleaga. Ua tapunia nei le faitoto'a o le alofa tunoa o le Atua. Ua te'ena e le lalolagi Lona alofa tunoa, ua latou fa'atauemu i Lona agalelei, ma ua latou solipala i Lana tulafono. Ua tumu nei le ipu o soligātulafono a le 'au amioleaga - ua fai ma a latou masani le te'ena o le galuega a Lona Agaga, ma ua 'ave'esea loa Lona Agaga a e tu'ufau atu ai i latou i la latou faitalia. Ua leai nei se 'a'ao puipui o le Agaga o le Atua e lavea'iina ai i latou mai le ti'āpolo. O le taimi lea o le a fa'asaga ai loa Satani e fai lana toe galuega tele o le fa'ao'o mai o le puapuagā tele i le lalolagi.

(3) O AI SUI O LE ATUA O LO'O TAOFIA NEI I TUA AFĀ MATA'UTIA O TAUA SE'IA FA'AMAUF'A'AILOGAINA TAGATA O LE ATUA?

Ua mavae atu ia mea, ona a'u iloa ai lea o agelu e to'afā o tutū mai i itū e fā o le lalolagi, o taofi i matagi e fā o le lalolagi, ina ia lē agi atu le matagi i le fanua, po o le sami, po o se la'au e tasi.

Fa'aaliga 7:1

Ua lē toe taofia nei e agelu a le Atua matagi malolosi o le amioleaga a tagata, ua tu'ufau nei mea uma e fai la latou faitalia. O le taimi lea o le a o'o ai le lalolagi i ni puapuagā e sili atu lona mata'utia i puapuagā na o'o iā Ierusalem anamua.

Na o se agelu e to'atasi na fasia ulumatua uma a Aikupito ma fa'atumulua ai le nu'u i le tagi auē. E to'atasi fo'i le agelu na ala mai ai le fa'a'umatiāga na fai ma fa'asalaga, ina ua faia e Tavita le agasala i lona faitauina o le aofa'i o le nu'u o le Atua. O le mana fa'a'umatia lea na fa'aaogāina e agelu a le Atua ina ua latou usita'i i Lana poloā'iga, o le mana fa'a'umatia lava fo'i lea o le a fa'aaogāina e agelu leaga pe a fa'atagaina i latou e le Atua. Ua tutū nei 'au a agelu leaga e

fa'atalitali le taimi e fa'ataga atu ai i latou e le Atua, ona fai ai loa lea o la latou galuega tele o le fa'afanoga ma le fa'a'umatiāga.

(4) O Ā UIGA E LUA O TAGATA O LE ATUA O LE A FAFAGUINA AI LE ITA MA LE SAUĀ I LOTO O LE 'AU AMIOLEAGA?

O le mea lenei ua i ai le onosa'i o le 'au pa'ia; o le mea lenei ua i ai ē ua tausī i poloā'iga a le Atua ma le fa'atuatua iā Iesu.

Fa'aaliga 14:12

O ai ua pogai ai le to'asā ua liligiina mai nei i luga o le lalolagi? O ai ua mafua ai mafui'e ma lologa ma isi mala i le lalolagi? O ai ua tutupu mai ai taua ma fevaevae'iga ua tumu ai le lalolagi i le oi ma le mapuitigā? O nei mea uma ua tu'ua'ia i luga o ē ua fa'amaoni i le tulafono a le Atua. Ua tumu le 'au amioleaga i le ita ma le lē fiafia ona o le malosī o le alu o le galuega o le lapata'iga; ua fa'asinotonu nei lo latou ita i ē ua latou talia le fe'au, ma o le a fa'aoso e Satani le agaga o sauāga ma le fia fasioti iā i latou nei.

(5) O LE Ā LE TULAGA FA'ALEAGAGA LEA E TASI O LE A I AI I LE TO'ATELE O Ē FA'AFIAAMIOTONU I ASO O LE I'UGA, E PEI ONA I AI I ŌNA PŌ O KERISO?

Ua fa'alatalata mai iā te A'u lenei nu'u i o latou gutu, ma vivi'i mai iā te A'u i o latou laugutu, a o latou loto ua taumamao iā te A'u. E tapua'i fua mai i latou iā te A'u i lo latou fai ma matā'upu o poloā'iga a tagata.

Mataio 15:8, 9

E le'i iloa e le 'au ositaulaga fa'apea le lautele o tagata Iutaia le taimi na 'ave'esea ai le Agaga o le Atua mai le nu'u o Iutaia. E ui lava ua i ai nei le nu'u o Iutaia i lalo o le pule a Satani ma ua fa'apenā ona latou fuafuaina ai ni amioleaga mata'utia, sa latou manatu pea lava o i latou o le 'au filifilia a le Atua. Na fai pea lava sauniga o le malumalu e pei ona masani ai. Na fa'aauau pea lava le faiga o a latou taulaga i luga o fata palapalā. Na latou tatalo atu fo'i i lea aso ma lea aso mo le fa'amanuiāga a le lagi i luga o se nu'u ua uma ona latou fasiotia le Ālo o le Atua ma o lo o latou fia fa'ao'o fo'i le oti i 'au'auna a le Atua ma Āna aposetolo. O le a fa'apenā fo'i ona lē iloa e le lalolagi le taimi e fai ai le folafolaga fa'ai'u i le malumalu i le lagi, le folafolaga lea e fa'amaufa'ailogaina ai e fa'avavau le i'uga o tagata ta'ito'atasi uma i le lalolagi. O le a fa'apenā fo'i ona fa'aauau pea lava e tagata o le lalolagi le faiga o a latou sauniga lotu e pei ona masani ai, o sauniga e foliga mai e amioatua a'o le mana o le Atua ua latou te'ena; ua 'ave'esea ai fo'i le Agaga Pa'ia iā i latou. Ua galulue nei 'au'auna a le fili i le ma'elegā fa'a-Satani i le fa'ataunu'uina o ana fuafuāga leaga; peita'i, o lea ma'elegā fa'a-Satani o le a foliga mai o se ma'elegā mo le Atua

(6) O LE Ā LE MEA O LE A TAUMAFAI LE 'AU AMIOLEAGA E FAI, MA LE MANATU O LE 'AU'AUNAGA ATU LEA I LE ATUA?

E tulia outou i sunako e i latou; a e o'o lava i le aso e manatu ai se na te fasioti iā te outou, ua na faia le taulaga i le Atua.

Ioane 16:2

O le Sapati ua 'avea ma matā'upu ogātotonu o le finauga tele i atunu'u Kerisiano uma. Ua faia le feso'ota'iga fa'atasi a ekalesia ma le pule a le malō e fa'amamaluina ai le tausiga o le Aso Sā. O lo o fa'ailoa pea lava le lē gaua'i o le 'au fa'amaoni to'aitiiti i le mea ua lolo'u i ai le to'atele. Ua 'avea nei lea lē gaua'i ma mea ua itagia ai i latou i le lalolagi atoa. Fai mai 'upu a le to'atele e lē tatau ona toe 'avea se avanoa i lenei vaega to'aitiiti o lo o fa'ataute'e pea i le finagalo tu'ufa'atasi o le ekalesia ma le malō. Ua latou fai mai e sili le fa'ao'o o le puapuagā iā i latou nei nai lo le 'avea o i latou ma fa'apogai o le o'o mai o mala ma le fa'afanoga i lea atunu'u ma lea atunu'u. O fa'a'upuga lava fo'i nei na faia e ta'ita'i o le nu'u o Iutaia e fa'atatau iā Keriso ua tusa nei o le lua afe tausaga ua mavae. Fai mai 'upu a le tagata pi'opi'o o Kaiafa: “E aogā iā te i tatou ona oti o le tagata e to'atasi ma sui o le nu'u, ina ia lē fano le nu'u uma lava” (Ioane 11:50). O le a manatu le to'atele ua lava ma totoe lenei fa'amatalaga, e lē toe mana'omia se isi molimau. O le a fa'apenā loa ona faia se poloā'iga e ta'uamioleagaina ai i latou o lo o fa'apa'ia i le Sapati o le tulafono e fā, ma ta'u mai ai a mavae loa le taimi ua atofaina, ona tu'u loa lea o i latou nei i le faitalia a tagata e fa'ao'o ai iā i latou le oti (Va'ai i Manatu Fa'aopoopo E ma le F).

(7) O LE Ā LE MEA NA TUPU O LE A FA'ATUSATUSA I AI LENEI FA'ATAFUNAGA MATA'UTIA O LE A O'O I TAGATA O LE ATUA?

Auē! auā o le aso tele lea, e leai sona tusa; o ōna pō lava ia o le puapuagā o Iakopo, a e fa'aolaina ai o ia.

Jeremia 30:7

O le a fa'apenā loa ona o'o atu le fanau a le Atua i se vaitaimi o le puapuagā tele ma sauāga. Na fa'aigoa e Jeremia lea vaitaimi o le taimi o puapuagā o Iakopo. "E moni, o lo'o fa'apea ona fetalai mai o le Ali'i le Atua, Ua tatou lagona le ta'alili o le gatete, o i ai le mata'u, a e lē o le filemū....O mata uma fo'i ua liua, ua matamata vale lava. Auē, auā o le aso tele lea, e leai sona tusa; o ōna pō lava ia o puapuagā o Iakopo; a e fa'aolaina ai o ia (Jeremia 30:5-7).

Ua fa'atusaina le puapuagā o le fanau a le Atua i le puapuagā o Iakopo, i le pō na ia fa'atauānu atu ai i le Atua i le tatalo mo le laveā'iga mai lima o Esau (Kenese 32:24-30). O le mea lava fo'i lea e ao ona faia e so'o o Keriso a'o tau lalata atu i latou i le taimi o puapuagā. E ao ona latou faia mea uma e mafai ona latou faia ina ia manino lelei ai tagata e uiga i lo latou talitonuga, ina ia 'ave'esea ai manatu sesē o tagata, ma liliu 'ese ai fo'i fa'alavelave e ono tupu mai i le sa'olotoga i mea tau tapua'iga.

(8) O AI LE TARAKO?

Ua lafo fo'i le tarako tele, o le gata tuai lea, na igoa i le ti'apolo, i le ma Satani, o lē fa'asesē i le lalolagi uma; ua lafo ifo i le lalolagi, ua lafo fo'i āna agelu fa'atasi ma ia.

Fa'aaliga 12:9

(9) O LE Ā LE TALI A LE TARAKO E FA'ATATAU IĀ I LATOU O Ē FA'AMAONI E TAUSI POLOA'IGA A LE ATUA?

Ua ita fo'i le tarako i le fafine, ona alu atu ai lea o ia e tau le taua ma i latou ua totoe o lana fanau, o ē ua tausi i poloā'iga a le Atua, ma ua taofi le mau iā Iesu Keriso.

Fa'aaliga 12:17

E pei lava ona fa'aosoina e Satani Esau e fa'asagatau iā Iakopo, o le a fa'apea fo'i ona ia fa'aosoina le 'au amioleaga latou te fa'a'umatia le fanau a le Atua i le taimi o puapuagā. E pei lava ona faia ana moliga e fa'atatau i le agasala a Iakopo, o le a fa'apenā fo'i ona faia o ana moliga e fa'atatau i le fanau a le Atua. Ua iloa e Satani a mafai ona fasiotia uma le 'au fa'amaoni to'aitiiti lea o lo o fa'ataute'e mai pea i lana pule, ona 'ato'atoa ai lea o lona manumalō. E iloa e Satani o lo o leoleoina lenei to'aitiiti e agelu pa'ia, ma ua manatu ai Satani ua fa'amagaloina agasala a lenei 'au fa'amaoni. E lē iloa e Satani ua uma ona faia le i'uga o nei tagata i le malumalu i le lagi. Ua iloa lelei e Satani agasala na faia e tagata ona o āna fa'aosoosoga; o agasala ia ua ia fa'atetele ma fa'a'ailoa atu i le Atua, ina ia fa'amaonia ai e ao ona tutusa lo latou fa'asalaga ma lona fa'asalaga. Fai mai le tala a Satani o le a lē talafeagai ai pe a fa'amagalo e le Atua agasala a lenei to'aitiiti a e fa'a'umatia o ia ma āna agelu. Fai mai o ia o tagata uma nei o lona malō, ma ua tataui nei ona tu'uina mai i latou i ōna lima se'i fai i ai lana faitalia.

(10) O LE Ā LE ITŪ TĀUA O LE UIGA O LE KERISIANO O LE A TOFOTOFOINA I LENEI TAIMI O PUAPUAGĀ?

O le tofotofo fo'i o lo outou fa'atuatua, e silisili ona aogā i le auro e fa'a'umatia, e ui lava ina tofotofoina i le afi, e 'avea ma mea e i'u i le vi'iga, ma le mamalu, ma le manuia pe a fa'aalia mai Iesu Keriso.

I Peteru 1:7

Ina ua outou iloa o le tofotofoina o lo outou fa'atuatua e tupu ai le onosa'i.

Iakopo 1:3

A o faia moliga a Satani e fa'atatau i agasala a le fanau a le Atua, o le a fa'atagaina o ia e le Atua na te tofotofoina i latou i le mea sili na te mafaia. O le a matuā lūlūina lava ma tofotofoina lo latou fa'atuatua i le Atua. A o latou tutū ma va'ava'ai fa'alemafaufau i o latou olaga i le taimi ua tuana'i, o le a gau ifo lo latou fa'amoemoe ona o le tele o le leaga ma le vaivai o le olaga na latou o mai ai. Ua taumafai nei Satani na te fa'avaivai ma fa'amata'u iā i latou e ala i lona fa'amanatu atu i ai o le matagā ma le leaga o o latou olaga. Ua ia fai i ai e lē mafai ona fufulu'esea nei pisipisia leaga mai o latou olaga. E mana'o Satani na te fa'alēaogāina lo latou fa'atuatua, ina ia faigofie ai ona latou gaua'i i āna fa'aosoosoga ma liliu 'ese ai mai lo latou fa'amaoni i le Atua.

(11) O LE Ā LE FOLAFOLAGA UA TU'UINA MAI E LE ATUA I LANA FANAU, O Ē O LE A TŪTŪMAU E ALA I LE FA'ATUATUA?

Ua e tausia le 'upu o Lo'u onosa'i, o lea fo'i 'Ou te tausi ai iā te 'oe i le itū aso e tofotofoina ai, a o'o mai i le lalolagi uma, e tofotofo ai i ē o nonofo i le lalolagi.

Fa'aaliga 3:10

E ui lava ua si'osi'omia le fanau a le Atua e fili sauā ua manana'o ina ia fasiotia i latou, e lē o le pogai lea o lo latou puapuagā. Ua latou puapuagātia ona o lo latou lē mautinoa po ua atoa lo latou salamō i a latou agasala uma. Auā afai e i ai ni agasala latou te le'i salamō ai, ona lē fa'ataunu'uina ai lea iā i latou le folafolaga a le Fa'aola ua fa'apea mai: “Ou te tausia fo'i oe i le itūaso o le tofotofoga o le a o'o mai i le lalolagi uma.” Ma'imau pe ana ua latou mautinoa ua fa'amagaloina i latou, semanū ua latou lē toe fefefe i sauāga po o le oti. A e afai latou te lē manumalō, ma o'o ai le oti iā i latou ona o ni leaga i o latou olaga, ona o'o mai ai lea o le luma i le suafa pa'ia o le Atua.

Ua latou fa'apuapuagātia o latou loto i luma o le Atua, ma ua latou ta'uta'u atu lo latou salamō ona o a latou agasala e tele i le taimi ua mavae. Ua latou pi'imau atu i le folafolaga a le Fa'aola o Lē na fetalai mai: “Ia u'umau o ia i Lo'u malosī, ina ia fa'alelei ai o ia ma A'u, ona maua ai lea o le leleiga i le vā o ia ma A'u” (Isaia 27:5). E le'i vave maua se tali o a latou talosaga; peita'i sa tumau pea lo latou fa'atuatua. E ui lava i le tigā matuitui o o latou puapuagā, e le'i taofia ai a latou talosaga. Ua latou u'umau atu i le malosī o le Atua, e pei ona pi'imau atu Iakopo i le Agelu. Ua latou ole atu fa'atasi ma Iakopo: “Ou te lē tu'uina atu lava oe se'ia e fa'amanuia mai ia te a'u.”

(12) O LE A FA'APEFEA LE FA'ATATAU A LE ATUA I TALOSAGA A Ē O LO'O LĒ AMANA'IA PEA ĀNA TULAFONO, A E OLA MA AGASALA E LĒ O FA'AALIA?

O lē ua liliu 'ese ōna taliga a e lē fa'alologologo i le tulafono, e 'inosia lana lava tatalo.

Fa'ata'oto 28:9

O lenei, o lē fa'alēaogā mai, ua ia lē fa'alēaogā i tagata, a o le Atua Lē ua foa'i mai Lona Agaga Pa'ia iā te i matou.

I Tesalonía 4:8

Ua leva ona salamō Iakopo i lana agasala a'o le'i o'o i le pō o le fagatuāga ma le Agelu. Ana le'i mua'i salamō o ia i lea agasala, semanū e lē talia e le Atua lana talosaga ma lavea'iina ai lona ola. O le a fa'apea fo'i i le taimi o puapuagā. Afai e i ai ni agasala a le fanau a le Atua e le'i fa'aalia, ma o le a tutū a'e ia agasala i o latou luma i le taimi o lo latou puapuagā ma le popole, o le a goto ifo i latou i le mamafa o le 'avega. O le a motusia lo latou fa'atuatua ona ua latou lagona le leai o so latou fa'amoemoe, ma o le a lē mafai ai ona latou ole atu i le Atua mo le lavea'iga. Peita'i e ui lava i so latou lē aogā i la latou lava va'ai, ua leai nei sa latou agasala na natia e le'i fa'aalia. Ua leva ona o'o i le fa'amasinoga a le Atua a latou agasala ma ua soloi'esea; ua latou lē toe manatua ia agasala.

(13) E FA'APEFEA ONA TAUIA E LE ATUA I LATOU O LO'O FA'AMAONI I MEA ITITI?

Ona fai atu ai lea o lona ali'i iā te ia, 'Ua lelei ia, le 'au'auna lelei e, ma le fa'amaoni, ua e fa'amaoni i nai mea itiiti, 'ou te tofia 'oe e pule i mea e tele; inā ulufale mai ia i le fiafia o lou ali'i.'

Mataio 25:21

E i ai le manatu o le to'atele fa'apea e lē popole le Atua i lo latou lē fa'amaoni i mea iti o le olaga. Peita'i o le tala iā Iakopo ua fa'a'iloa mai ai e lē fa'atagaina e le Atua so'o se agasala. O le a manumalō Satani iā i latou uma o lo o taumafai e su'e ni 'alofaga mo a latou agasala, po o le taumafai fo'i e natia o latou leaga, ma i'u ai ina lē fa'amagaloina a latou agasala ma tumau ai pea i tusi a le lagi. O le maoa'e o a latou ta'utinoga e fa'atatau i o latou olaga fa'aKerisiano fa'apea ma le maualuga o o latou tulaga tofi, o le mata'utia fo'i lea o lo latou tulaga i le silafaga a le Atua. O i latou fo'i ia ua mautinoa e Satani lona manumalō i ai. O ē fa'atuatua i a latou sauniuniga mo le aso tele o le Atua, o le a latou lē maua lea sauniuniga i le taimi o puapuagā po o se isi lava taimi mulimuli ane ai. Ua leai se fa'amoemoe mo se isi o i latou ia.

(14) O LE Ā LE FUA O LE SALAMŌ MONI?

Auā 'ou te ta'uta'uina atu la'u amio leaga; 'ou te atuatuva'e ona o la'u agasala.

Salamo 38:18

Ona outou manatunatu ai lea i o outou lava ala leaga ma mea sa outou faia e lē o i ai se lelei, tou te 'ino'ino ai lava outou iā te outou ona o a outou amio leaga, atoa ma a outou mea e 'inosia.

Esekielu 36:31

O Kerisiano e o'o atu i lea taimi e le'i faia sa latou sauniuniga mo le aso tele o le Atua, o i latou ia o le a 'alalaga ma fa'aali atu a latou agasala i lo latou mafatia ma lo latou lē maua o se fa'amoemoe, a e taliē ma ula mai i ai le 'au amioleaga. O le fa'aaliga o agasala a i latou nei ua leai se 'ese'esega ma le fa'aaliga o agasala a Esau, po o Iuta. Ua latou salamō ona o le fa'asalaga o le soligātulafono, a e leai se salamō ona ua latou lagona le leaga o le agasala ua latou faia. E leai so latou salamō fa'amaoni, e leai fo'i so latou 'ino'ino i le agasala. Ua latou ioe i la latou agasala ona o lo latou fefefe i le fa'asalaga. Peita'i e 'ave'esega loa le fa'asalaga ona latou toe fo'i lava lea e pei o Farao i la latou amioleaga.

(15) PE AFAI UA TATOU TOE FO'I I LE ALI'I MA LE SALAMŌ MONI, O LE Ā LE I'UGA O LE A O'O I LE AFI O TOFOTOFOGA?

A e peita'i ua silafia e Ia lo'u lava ala; a tofotofoina a'u, 'ou te sao atu ai e pei o le auro.

Iopu 23:10

O le tofotofa fo'i o lo outou fa'atuatua, e silisili ona aogā i le auro e fa'a'umatia, e ui lava ina tofotofoina i le afi, e 'avea ma mea e i'u i le vi'iga, ma le mamalu, ma le manuia pe a fa'aalia mai Iesu Keriso.

I Peteru 1:7

O le tala iā Iakopo ua tatou mautinoa ai fo'i e lē tulia lava i fafo e le Atua i latou na fa'asesēina ma tofotofoina ma fa'alaina i le agasala, a ua latou toe liliu atu iā te Ia i le salamō moni. Tigā lava taumafaiga a Satani e fa'a'umatia ai i latou fa'apea, e 'auina mai lava e le Atua Āna agelu e fa'amalosi ma fa'amafanafana ma puipui iā i latou i le taimi o lo latou puapuagā. E malolosi ma faifaipea le faiga o osofa'iga a Satani; e mata'utia lona mana taufa'asesē. Peita'i o lo o silasila mai le Atua i Ōna tagata; o lo o fa'afofoga mai o Ia i a latou fa'atoga. E mata'utia lo latou puapuagā; ua peiseā'i o le a fa'a'umatia i latou i le 'a'asa o le ogāumu o le tofotofoga. Peita'i, e mae'a le galuega a le afi ona ta'atia mai ai lea o i latou o le auro ua fa'amamāina i le afi. E leai se 'ese'esega o le alofa o le Atua i Lana fanau i le taimi o le tofotofoga ma puapuagā, ma le taimi o lo latou manuia ma le fiafia. Peita'i e mana'omia le tu'uina o i latou i totonu o le ogāumu 'a'asa, ina ia uma 'ese ai lo latou fiafia i le lalolagi, a e fa'aalia manino mai ai le fa'atua o Keriso iā i latou.

(16) O Ā ITU'AIGA TATALO E AUPITO TALILELEIA?

Ia fēfa'aalia'i a outou agasala, ma tatalo le tasi mo le tasi, ina ia fa'amalōlōina outou. Ua aogā tele le tatalo fa'atauānau a le tagata amiotonu.

Iakopo 5:16

Ua ta'atia mai nei i o tatou luma le itūaso o puapuagā. Tatou te mana'omia i lea taimi se fa'atuatua e lavā ona tatali le vaivai, ma le fa'atuai, ma le fia'ai - se fa'atuatua e lē mate tusa lava po o le ā le mamafa o tofotofoga. Na manumalō Iakopo ona o lona finafinau ma lona lē fiugofie. O lona manumalō o se molimau lea e fa'amaonia ai le mana o le tatalo fa'atauānau. O i latou uma o ē taofi mau i folafolaga a le Atua e pei ona faia e Iakopo, ma latou tatalo atu ma le naunauta'i ma le fa'atauānau e pei ona faia e ia, o le a manumalō i latou e pei ona manumalō Iakopo. E lē maua lea manumalō e i latou o ē lē fia tete'e iā i latou lava, ma latou lē fia salamō ma fa'amaulalo atu i luma o le Atua, ma latou lē fia tatalo fa'atauānau atu mo Āna fa'amanuiāga. O le fagatuāga ma le Atua - e to'aititi lava i latou ua latou iloa le uiga o lenei mea. E to'aititi lava ua latou ole atu ma le naunauta'i ma tu'uina le malosi atoa o o latou loto e fa'atauānau atu ai i luma o le Atua. A pesi mai galu o puapuagā ma faigatā, e to'aititi lava ua mafai ona latou pi'imau atu i folafolaga a le Atua, e ala i le fa'atuatua.

(17) O LE Ā LE MAEALAVEA'I A LE KERISIANO MONI, MO LE TAIMI NEI MA LE TAIMI E O'O MAI AI PUAPUAGĀ?

Auā ua fa'aalia mai ai le amiotonu a le Atua i le fa'atuatua, ina ia fa'atuatua ai, pei ona tusia, 'E ola le tagata amiotonu i le fa'atuatua.

Roma 1:17

O ē lē o pipi'i atu nei i le Atua i le fa'atuatua, o le a faigofie lava ona pa'u'u atu i latou i fa'asesēga a Satani, atoa ma le poloā'iga o le a fa'amālosia ai mea tau tapua'iga. Tusa lava fo'i pe manumalō i latou i lea tofotofoga, o le a toe o'o i latou i se popole ma le fenumia'i tele i le taimi o puapuagā ona e le'i masani ona latou fa'alagolago i le Atua. O lesonea o le fa'atuatua na latou fa'atamala i ai i le taimi o le filemū, o le a latou o'a'o'ina ia lesonea i le taimi o puapuagā ma le lotovaivai.

(18) O LE Ā LE TALI E MAFAI AI ONA FA'ATUMAU PEA LA TATOU MAEFAFA'AOLA O LE FA'ATUATUA?

Ona fa'afuase'i lea ona 'aveina a'e o i tatou o ē ola ma totoe, fa'atasi ma i latou i āo, ina ia fētaia'i ma le Ali'i i le vā nimonimo; ona tatou fa'atasi pea lava lea ma le Ali'i.

I Tesalonia 5:17

E ao ona tatou fa'amasani atu nei i le Atua e ala i lo tatou tofotofoina o Āna folafolaga. Ua tusia e agelu talosaga uma ua e faia ma le naunauta'i ma le fa'amaoni. Ia sili atu iā i tatou le lē fa'amalieina o o tatou mana'o fa'apito, a e 'aua lava ne'i fa'atamala i le feso'ota'iga ma le Atua. E sili atu le mativa masaesae, ma le ola foa'i pe a tusa ai ma le finagalo o le Atua, nai lo tamao'aiga, ma mamalu, ma le ola lē popole, a e solia ai le finagalo o le Atua. 'Aua tatou te fefefe e fa'aalu se itūlā i talosaga. Afai o le a pupū o tatou mafaufau na o mea o le lalolagi, atonu o le a 'ave'esea e le Atua a tatou tupua e pei o le auro, o fale, o fanua, ina ia maua ai so tatou taimi mo Ia.

(19) AISEĀ E LĒ MAFAI AI ONA TATOU FA'ALAGOLAGO I O TATOU AIGA, UŌ, PO O TATOU TA'ITA'I FA'ALEAGAGA E LATOU TE FA'ATUMAUINA LA TATOU MAEALAVEA'I FA'ALEAGAGA?

O lenei, a'u pele e, fa'apei ona outou 'ana'ana mai e lē aunoa, e lē gata ina o tatou nonofo ma outou, a o lenei ua atili ai ina ua 'ou lē i ai iā te outou, ia outou galulue a'ia'i ma le mata'u atoa ma le gatete, ina ia fa'aolaina outou.

Filipi 2:12

Ua toetoe lava o'o mai i o tatou luga le taimi o puapuagā e leai sona tusa. E le'i saunia o tatou olaga mo lenā taimi; e to'atele fo'i nisi ua tele le fa'apaiē po o le mumusu fo'i e fai se sauniuniga mo lea taimi. O ia puapuagā o le a sili mamao atu le leaga nai lo fa'amatalaga uma ua tatou fa'alogi i ai. O le a tutū atu ta'ito'atasi i tatou i luma o le Atua i lea taimi o le tofotofoga. Fai mai le fetalaiga a leova: Ana i ai i lea taimi Noa, ma Tanielu, ma Iopu, o le a lē lavea'iina so latou atali'i po o so latou afafine i la latou amiotonu; o le a lavea'iina ai na o i latou lava (Ezekielu 14:20).

(20) PE AFAI TATOU TE TU'UFA'ATASI O TATOU VAIVAIGA MA LE MALOSI O LE ATUA, O LE Ā LE ITŪ'AIGA UIGA MONI O LE A MAFAI ONA TATOU MAUA?

Ona o lea ua Ia folafolaina mai ai o mea e silisili 'ese lava ma le aogā, ina ia tofusia fa'atasi ai outou i le amio Atua, ina ua sosola 'ese outou i le amioleaga o i le lalolagi i le tu'inaanu.

II Peteru 1:4

A o faia e la tatou Faitaulaga Sili le togiola mo i tatou, o le taimi lenei e ao ai ona tatou sa'ilia se olaga 'ato'atoa iā Keriso. E le'i gaua'i le Fa'aola i fa'aosoosoga a le ti'āpolo, e o'o lava i se manatu leaga. E maua e Satani i loto o tagata se mana'o fa'alelalolagi e ono fai ma āuala e ofi mai ai āna fa'aosoosoga.

E ao ona tatou 'ave'esea le agasala i o tatou olaga e ala i le fa'atuatua i le toto togiola o Keriso. Ua vala'au mai le Fa'aola ina ia tatou so'o fa'atasi ma Ia; ina ia tu'u fa'atasi lo tatou vaivai ma Lona malosī; lo tatou valea ma Lona fa'autauta; lo tatou olaga lē tusa ai, ma Lana galuega o le fa'aolataga.

(21) O Ā FUAFUĀGA E TOLU A SATANI MA ŌNA SUI AMIOLEAGA O LE A FA'AAOGĀ E TAUFUA'ASESĒ AI LE TO'ATELE?

O lona sau fo'i e pei o le galuega a Satani, i le mana uma, ma fa'ailoga, ma vavega pepelo.

II Tesalonia 2:9

O le a faia i le vānimonimo se fa'aaliga o ni va'aiga mata'utia ua faia e le mana fai vavega o temoni. O le a ō atu agaga o temoni i ta'ita'i o malō ma le lalolagi uma ina ia fa'amausaliina ai i latou i le fa'asesēga, ma una'iina ai i latou ina ia tutū fa'atasi ma Satani i lana fouvalega i le faigāmalō a le Atua. O vavega nei o le a fa'asesēina ai tagatā nu'u o malō fa'apea ma o latou ta'ita'i. O le a tutū mai nisi ma fai mai o i latou o Keriso; o le a latou tau'aveina le suafa o le Fa'aola ma latou manana'o ina ia ifo ma tapua'i atu tagata iā i latou. O le a latou faia ni vavega ofoofogia ma fa'amālōlō i ma'i; o le a latou fai mai fo'i ua latou maua ni fa'aaliga fa'apitoa mai le lagi. Peita'i o nei mea ua latou fa'aigoa o fa'aaliga, e 'ese'ese mamao ma molimau a le afioga a le Atua.

(22) O LE Ā LE GAOIOIGA TAUFUA'ASESĒ E AUPITO MAUALUGA?

Auā e tutū mai keriso pepelo, ma perofeta pepelo, latou te faia fo'i fa'ailoga tetele ma vavega, ina ia fa'asesē ai i ē ua filifilia lava, pe afai e mafai ai.

Mataio 24:24

O le a taualuga e Satani lana galuega tele o le taufa'asesē, e ala i lona sau ua foliga mai o ia o Keriso. Ua leva ona tulimata'i le ekalesia i le afio fa'alua mai o le Fa'aola; o Lona afio mai o le taunu'uga lea po o le o'o'o'oga o o latou fa'amoemoega uma. O lea la o le a sau nei Satani ua foliga mai o ia o Keriso ua afio fa'alua mai. O le a faia e Satani lenei mea i itū 'ese'ese o le lalolagi. O le a sau o ia i se pupula matagofie, ua fa'afetaui uma lava ōna foliga i foliga o le Ālo o le Atua e pei ona tu'uina mai e Ioane i le Fa'aaliga (Fa'aaliga 1:13-15). O le mamalu ma le matagofie ua si'osi'omia mai ai o ia e leai sona tusa; fa'ato'ā va'ai lea o mata o tagata i se va'aiga fa'apea. Ua fa'alogoia le 'alaga manumalō ua fa'apea mai: "Ua afio mai Keriso! O Keriso lenei ua afio mai!" Ua fa'apa'u'ū fāō tagata ma ifo fiafia iā te ia, a ua sisi'i a'e ona lima ma ua ia fa'amanuia iā i latou e pei lava ona fa'amanuia Iesu i Ōna so'o a'o soifua o Ia i le lalolagi. O si ōna leo mālū ua pei o se pese lelei i le fa'alogo a tagata. O le a tautala mai o ia i se leo mālū ma se si'uleo alofa. O le a tautala o ia i ni 'upu moni fa'alelagi e pei lava ona fetalai i ai le Fa'aola; o le a ia fa'amalōlōina ma'i. Ona faia loa lea o lana folafolaga ma fai mai ua suia le Sapati i le Aso Sā, ma ua faia loa lana poloā'iga ina ia fa'apa'ia uma tagata i le aso ua ia fa'apa'iaina. Ua fa'aauau lana folafolaga ma fai mai o i latou uma o ē fa'ama'a'a pea ma tausia le aso fitu, o i latou ia ua 'upuvale i lona igoa ona ua latou lē usita'i i āna agelu ua 'auina mai iā i latou ma le malamalama ma le 'upu moni. O le taualuga lenei o le galuega tele taufa'asesē a Satani. E miliona ma miliona o le a talitonu i ai, e pei lava ona talitonu tagata Samaria i vavega fa'ataulaitu a Simona ma ua latou 'alalaga ma fai mai: O le fa'aaliga lava lenei o le mana ofoofogia o le Atua (Galuega 8:10).

(23) O LE Ā LE MEA O LE A PUIPUIA TAGATA O LE ATUA MAI TAUMAFaIGA TAUFa'ASESē?

Inā sa'ilī ia i le tulafono ma le mau; afai e latou te lē tautala e tusa ma ia 'upu, ua leai lava se malamalama iā te i latou.

Isaia 8:20

Peita'i o le a lē fa'asesēina ai le fanau a le Atua. E le ō gatasi a'oa'oga a lenei keriso pepelo ma 'upu moni o le Tusi Pa'ia. Ua fa'asinotonu lana fa'amanuiāga i ē ua ifo i le manu fe'ai ma lona fa'atagata, i latou lava ia o le a liligiina ifo i ai le to'asā o le Atua e pei ona fai mai ai le Tusi Pa'ia.

(24) O LE Ā LE TULAGA O LE A TOE AFIO MAI AI LE KERISO MONI?

Ona iloa ai lea i le lagi o le fa'ailoga o le Atali'i o le tagata; ona taufaitagitu'i ai lea o itū'aiga uma o le lalolagi; latou te iloa fo'i le Atali'i o le tagata ua sau i ao o le lagi ma le mana ma le mamalu tele.

E 'a'auina atu fo'i e Ia o Āna agelu ma le leo tele o le pū, latou te fa'apotopoto fo'i i ē ua filifilia e Ia mai matāmatagi e fā, e amata i le tasi tulu'iga o le lagi, e o'o i le tasi tulu'iga.

Mataio 24:30, 31

E lē gata i lea, o le a lē fa'atagaina e le Atua Satani ina ia sau i ao o le lagi e pei o le afio mai o Keriso. Ua tu'uina mai e le Fa'aola lapata'iga i Ōna tagata e fa'atatau i lenei itū, ma sa Ia valo'ia manino mai mea o le a iloa tonu ai Lona afio mai. "Auā e tutū mai Keriso pepelo, ma perofeta pepelo, latou te faia fo'i galuega tetele ma vavega ina ia fa'asesē ai i ē ua filifilia lava. Afai latou te fai mai iā te outou, Fa'auta, o i le vao ia, 'Aua tou te fa'alogo i ai. Auā e pei ona "emo mai o le uila i sasa'e, ma malamalama atu i sisifo, e fa'apea fo'i ona sau o le Atali'i o le tagata" (Mataio 24:24-27, 31; Fa'aaliga 1:7; 1 Tesalonia 4:16, 17). E lē mafai e Satani ona fai sana mea fa'afoliga i lenei va'aiga. O le a va'aia ma molimauina le afio mai o Keriso e le lalolagi atoa.

(25) AISEĀ O LE A FA'ASESēINA AI LE TO'ATELE O TAGATA?

O mea fa'asesē uma o le amioleaga i ē a fano; auā ua latou lē talia le 'upu moni ma lē fiafia i ai, ina ia fa'aolaina ai i latou.

II Tesalonia 2:10

O le a 'ave fa'atagataotauaina le lalolagi uma e Satani i le taualuga o āna fa'asesēga uma. Peita'i, na o i latou lava na su'esu'e ma le ma'elegā i le Tusi Pa'ia ma latou fiafia i le 'upu moni, na o i latou ia o le a puipuia mai lenei fa'asesēga tele. O i latou ia o le a latou iloagofie foliga a Satani i totonu o āna mea taufa'asesē. O le molimau a le Tusi Pa'ia o le a latou iloa ai le 'ese'esega o le mea moni ma le mea taufa'asesē.

(26) O Ā MAILEI E TOLU O LO'O LAPATA'I MAI TATOU E 'ALO 'ESE AI?

Auā o mea uma lava o i le lalolagi, o le tu'inanau o le tino, ma le tu'inanau o mata, ma le fa'alialia o lenei olaga, e lē mai le Tamā ia, a e mai le lalolagi.

I Ioane 2:16

O le a o'o mai le tofotofoga i tagata uma. O tofotofoga nei o le a iloa ai le Kerisiano moni. Fa'amata ua mausalī nei le fa'avae o le fanau a le Atua i luga o Lana afioga, ina ia lē fa'asesēina ai i latou i vavega o le a latou va'ai ma fa'alogo i ai ma tagotago fo'i i ai o latou lima? Fa'amata o le a latou pi'imau pea i le Tusi Pa'ia, na o le Tusi Pa'ia lava? O le a taumafai malosi Satani ina ia lē maua se taimi e fai ai sa latou sauniuniga mo lenā aso tele. O le a fa'atulaga lelei e Satani mea tutupu ina ia lavelavea ai i latou i mea e tāua i le lalolagi, ina ia latou tau'aveina ni 'avega mamafa o tiute ma meafai o lenei olaga, ina ia fa'apenā ona latou pisi i lea mea ma lea mea, ona o'o mai ai lea o le aso o le tofotofoga iā i Latou, ua pei o le sau o se gaoi.

(27) O FEA O LE A SA'ILI LE TO'ATELE O LE 'AU FA'ATUATUA A LE ATUA IA MAUA AI SE LAFITAGA I NEI TAIMI O PUAPUAGĀ?

E mau lava o ia i le mea maua luga, o 'olo papa o lona malu lea; e foa'iina iā te ia āna mea e 'ai, e tumau pea iā te ia le vai.

Isaia 33:16

Ua faia nei le poloā'iga e ta'ita'i o atunu'u Kerisiano 'ese'ese o le lalolagi, e fa'atagaina ai le 'au amioleaga latou te fa'ao'o le oti i ē o lo o fa'amaoni pea i le tausiga o poloā'iga uma a le Atua. Ua sosola nei le fanau a le Atua mai 'a'ai 'ese'ese ma nu'u, ma ua latou feiloa'i nei i ni kamupani laiti i le vao, po o vaega tu'ufua o le atunu'u. E to'atele o le a maua so latou lafitaga i ana ma luga o mauga. E pei lava ona faia e tagata Ualetenese i auvaemauga o le Pietimoni i Italia, o le a fa'apenā fo'i ona 'avea luga o mauga ma lafitaga o le fanau a le Atua.

(28) O LE Ā LE FOLAFOLAGA E MAFAI ONA TALIAINA E LE TO'ATELE A O FA'ATIGĀINA I LATOU I LE FALEPUIPUI ONA O LO LATOU FA'ATUATUA?

E galo ea i le fafine lana tama ua susu, na te lē alofa i le tama o lona lava manava? Ai lava e galo iā te i latou, a e lē galo lava 'oe iā te A'u. Fa'auta, ua 'Ou taia lou fa'atusa i Ō'u alofilima; e tūmau ōu pa i Ō'u huma.

Isaia 49:15, 16

Peita'i e to'atele o le a fa'afalepuipuiina ona o ni fa'ai'uga lē sa'o, ma o le a fa'apologaina i latou. O le a fa'apenā ona saisaitia ai le fanau a le Atua i filifili u'amea, ua falepuipui e fa'atali ai le aso o lo latou oti. O nisi fo'i ua tu'u ai lava i totonu o ana pogisā ma le mālūlū toe palapalā, ua fa'aoge ai i latou i inā e fa'atali ai le aso o lo latou oti. O le a leai ni tagata ola latou te lagona atu le leo o lo latou oi; e leai fo'i se tasi e fesoasoani atu iā i latou.

E galo ea i le Atua Lana fanau i lenei itūlā faigatā? Na galo ea iā te Ia le fa'amaoni o Noa ina ua o'o mai Lona to'asā i le lalolagi i le taimi o le lolo? Na galo ea iā te Ia Lota ina ua sau le afi mai le lagi ma fa'a'umatia ai Sotoma ma Komoro? Na galo ea iā te Ia Iosefa a'o si'osi'omia o ia e Aikupito ifo i tupua? Na galo ea iā te Ia Elia a'o tuliloaina o ia e le ita o Iesepela? Na galo ea iā te Ia Ieremia a'o i ai o ia i le ana pogisā ma le mālūlū o le falepuipui? Na galo ea iā te Ia talavou e to'atolu i totonu o le ogāumu 'a'asa, po o Tanielu i le lua o leona?

“A ua fai mai Siona, Ua lafoa'iina a'u e Ieova; ua galo mai a'u i le Ali'i. E galo ea i le fafine lana tama ua susu? Na te le alofa ea i le tama a lona lava manava? Ai lava e galo iā te i latou, a e le galo lava oe ia te a'u. Fa'auta, ua ou tāina lou fa'atusa i o'u alofilima.” (Isaia 49:14-16). “Auā o lē pa'i atu iā te outou, ua pā'ia e Ia le tamatama'i mata o Lona fofoga” (Sakaria 2:8).

Atonu e lafo i latou e o latou fili i falepuipui; peita'i, e lē mafai e pā o le falepuipui ona taofia le feso'ota'iga i le vā o i latou ma Keriso. Ua silafia e Keriso o latou vaivaiga uma, ua masani fo'i o Ia ma tofotofoga uma; e 'auina mai fo'i e Ia Āna agelu i nei ana pogisā o le falepuipui, e aumai iā i latou le malamalama ma le mapusaga mai le lagi. O le a 'avea le falepuipui o se maota, auā ua nonofo ai nei i latou o ē tamao'aiga i le fa'atuatua. O le a malamalama pā o le falepuipui, e pei lava o le mea na o'o iā Paulo ma Sila a'o fai a la talosaga ma vi'iga i le valuapō i le falepuipui i Filipi.

(29) E FA'APEFEA ONA FA'AMATALAINA E LENEI FUAI'UPU LE FA'AGAOIOIGA A LE ATUA E AUMAI AI LE FA'AMASINOGA I LUGA O Ē AMIOLEAGA?

Auā e tula'i atu Ieova e pei ona faia i le mauga o Faresa, e to'asā fo'i o Ia e pei ona fai i le vanu o Kipeona, ina ia faia Lana mea e fai, ua 'ese lava; ina ia faia fo'i Lana galuega, o Lana galuega 'ese lava.

Isaia 28:21

O le a o'o mai le to'asā o le Atua iā i latou o ē o lo o sauāina Lana fanau ma sa'ilia lo latou oti. Ua 'avea Lona onosa'i fa'a'umi'umi ma mea ua fa'ama'a'aina ai tagata i lo latou amioleaga. Peita'i, e o'o mai lava lo latou fa'asalaga. “Auā e tula'i atu Ieova e pei ona faia i le mauga o Faresa, e to'asā fo'i o Ia e pei ona faia i le vanu o Kipeona, ina ia faia Lana galuega uiga 'ese, o se galuega e lē masani ai lava.” O se galuega uiga 'ese le galuega o le fa'asalaga, i lo tatou Atua alofa mutimutivale. “O lo o fetalai mai le Ali'i o Ieova, ...Ou te lē fiafia lava i le oti o lē amioleaga” (Esekielu 33:11). “O Ieova o le Atua alofa mutimutivale ma le alofa fua, e telegese Lona to'asā a e tele Lona alofa ma le fa'amaoni. O Lē fa'amagalo fo'i i le amiolētonu ma le solitūlāfono ma le agasala, a e lē fa'asaoina lava e Ia ē agasala” (Esoto 34:6, 7). “O Ieova e telegese Lona to'asā a e tele Lona mana: Na te lē fa'asaoina lava ē ua agasala” (Nauma 1:3). E mata'utia mea o le a faia e Ia i Lana amiotonu, ina ia fa'amaonia ai le pule o Lana tulafono ua solipalaina e tagata.

(30) O Ā MALA MATA'UTIA E FITU O LE FA'AMASINOGA O LE A ILOA E I LATOU O LO'O I AI LE FA'AILOGA O LE LĒ USIUSITA'I?

1. Ona alu atu ai lea o lē muamua, ua liligi ifo lana ipu i le fanua; ona o'o lea o le papala leaga e tigā ai tagata ua i ai le fa'ailoga o le manu fe'ai, atoa ma ē ua ifo i lona fa'atagata.
2. Ua liligi fo'i e lona to'alua o agelu lana ipu i le sami; ona liu toto ai lea pei o le toto o le tagata oti; ona mamate ai lea o meaola uma i le sami.
3. Ua liligi fo'i e lona to'atolu o agelu lana ipu i vaitafe ma puna o vai; ona liu toto ai lea.
4. Ua liligi fo'i e lona to'afā o agelu lana ipu i le lā; ua tu'uina atu i ai ia mu ai tagata i le afi.
5. Ua liligi fo'i e lona to'alima o agelu lana ipu i le nofoāli'i o le manu fe'ai; ona fa'apōuliuligia lea o lona malō; ona latou fe'ati ai lea o latou laulaufaivā ona o le puapuagā.
6. Ua liligi fo'i e lona to'aono o agelu lana ipu i le vaitafe tele o Eufirate; ona mate ai lea o lona vai, ina ia saunia le ala o tupu mai nu'u e alu a'e ai le lā.
7. Ua liligi fo'i e lona to'afitu o agelu lana ipu i le matagi; ona tulei mai ai lea o le si'ufofoga tele mai le malumalu o i le lagi mai le nofoāli'i, ua fa'apea mai, 'Ua uma ona fai.' Ona tutupu ai lea o leo, ma faititili, ma uila, sa i ai fo'i le mafui'e tele, e lē fa'apea ona tele se mafui'e ua tele na'uā talu ona i ai tagata i le lalolagi.

Fa'aaliga 16:2-4, 8, 10, 12, 18

E mae'a loa le galuega fa'afautua a Keriso i le malumalu i le lagi, ona liligi mai loa lea o le ipu e lē suia o Lona to'asā i luga o ē ifo i le manu fe'ai ma lona fa'atagata ma talia lona fa'ailoga (Fa'aaliga 14:9, 10). O le a sili atu le mata'utia ma le to'atele o tagata e a'afia i mala o aso o le i'uga, nai lo mala na o'o iā Aikupito. O fa'apuga nei a Ioane i le Fa'aaliga e fa'ataui i nei mala: “Ona o'o lea o le papala leaga e tigā ai i tagata ua i ai le fa'ailoga o le manu fe'ai, atoa ma ē ua ifo i lona fa'atagata.” “Ona liu toto ai lea o le sami, e pei o le toto o le tagata oti, ona mamate ai lea o meaola uma o i le sami.” Ua liu toto ai fo'i vaitafe ma puna o vai. E mata'utia na'uā nei mala; peita'i ua ioe le lagi ma le lalolagi i le amiotonu o le Atua. Fai mai le agelu a le Atua: “Le Ali'i e, ua tonu Āu fa'amasinoga. ...Auā na latou fa'amaligiina le toto o tagata pa'ia ma perofeta, o lea ua E avatu ai iā i latou le toto e inu ai, auā ua tataua lea mo i latou” (Fa'aaliga 16:2-6). O lo latou ioe atu ina ia fa'asalaoti le fanau a le Atua, ua latou nofo sala nei i le fa'amaligiina o le toto o le fanau a le Atua. Na fa'apenā fo'i i le taimi o Keriso ina ua Ia fetalai ua nofosala tagata Iutaia o lea vaitaimi, i le toto o tagata pa'ia uma na fa'amaligiina talu mai aso o Apelu; auā na iā i latou le agaga fasioti tagata lava lea e tasi na ulufia ai ē na fasiotia le 'au perofeta.

E lē so'o le lalolagi i nei mala, ne'i fa'aumatia ai tagata uma o le lalolagi. Peita'i fa'ato'ā va'ai lea o tagata ola i se mata'utia ua 'ese e pei o le mata'utia o nei mala. O mala ma fa'asalaga na o'o mai i le lalolagi a'o le'i punitia le alofa tunoa, na fa'afefiloi mai ia mala ma le alofa tunoa. O le toto togioa o Keriso na puipuia ai le tagata agasala mai le malosi atoa o lona fa'asalaga. Peita'i, o mala e o'o mai ina ua tapunia le alofa tunoa, o mala ia e liligiina ifo ua lē toe suia i Lona alofa tunoa.

(31) PE A O'O INA MAFATIA LE 'AU AMIOLEAGA I LE FIA'A'AI, O LE Ā LE MEA O LE A FA'ATUMAUIA LE 'AU FA'ATUATUA?

O lē ua savali i le amiotonu, ma tautala i 'upu tonu; o lē ua 'ino'ino i le 'oloa e maua i le fa'asauā, ua lia'iina e ia ōna lima ina ne'i tago i se taui, ua pupuni e ia ōna taliga ina ne'i fa'alogu atu i pulega o fasiga, ua moe fo'i ōna mata ina ne'i va'ai atu i le leaga.

E mau lava o ia i le mea maualuga, o 'olo papa o lona malu lea; e foa'iina iā te ia āna mea e 'ai, e tumau pea iā te ia le vai.

Isaia 33:15, 16

E moni o le a sauāina ma puapuagātia le fanau a le Atua; peita'i e ui lava o le a fa'aoaga i latou, o le a lē fano ai i latou. O Lē na tausia Elia i le vao, o Ia lava lea o le a tausia fo'i Lana fanau. E o'o atu le oti i le 'au amioleaga ona o lo latou fia'a'ai; peita'i o le a tausia e agelu le fanau a le Atua ma foa'i mai mea latou te manana'o ai. Fai mai le folafolaga ua faia i le tagata amiotonu: “E foa'iina iā te ia ana mea e 'ai, e tumau pea iā te ia le vai.”

(32) PE A FOLIGA MAI UA MATUĀ LEAI SE FA'AMOEMOE, A E PEI O IAKOPO I LONA TAIMI SA PUAPUAGĀTIA AI, O LE Ā LE ŌLEGA O LE A TU'U ATU E LE 'AU AMIOTONU?

Ua fa'apea mai fo'i o Ia, Tu'u mai ia o A'u a 'Ou alu, auā ua ao. A ua tali atu ia, 'Ou te lē tu'uina atu lava 'oe se'ia e fa'amanuia mai iā te a'u.

Kenese 32:26

A e ui i lea, o le a foliga mai i le va'ai fa'aletagata o le a fa'ai'uina i le oti le molimau a le fanau a le Atua, e pei ona faia e le 'au maturo na muamua iā i latou. Ua o'o ifo fo'i lea lava manatu e tasi i le fanau a le Atua. O se taimi lea o le tigā mata'utia ma le puapuagā. O le a latou vala'au atu i le Atua i le ao ma le pō ina ia lavea'i mai iā i latou. O le a fe'ei fiafia le 'au amioleaga ma fai mai: “O fea nei la lo outou fa'atuatua? O le ā le mea ua lē lavea'ia ai outou e lo outou Atua pe afai lava e moni o outou o Lana fanau?” O le taimi lea na manatua ai e le 'au fa'amaoni Iesu a'o tautau o Ia i luga o le satauro a'o ula ma fa'ataumu le 'au ositaulaga ma le 'au faipule ma fai ane: “Na Ia fa'aolaina isi tagata a e lē mafaia e Ia ona fa'aola iā te Ia lava. Afai o Ia o le Tupu o Isara'elu, ia alu ifo nei loa o Ia nai le satauro, ona tatou talitonu ai lea iā te Ia” (Mataio 27:42). Ua fagatua i latou uma ma le Atua e pei ona faia e Iakopo. Ua fa'ailoa mai i o latou foliga le mamafa o le 'avega o lo o latou tau'aveina i o latou mafau. E ui lava ina va'aia le mafatia i o latou foliga, sa lē fa'avaivai ai lo latou fa'atauānu atu i le Atua i talosaga.

(33) O AI UA FA'ATONUINA MO LE PUIPUIA O LE 'AU FA'ATUATUA?

E tolauapi le agelu a Ieova e si'osi'omia ai ē matata'u iā te Ia, e lavea'i fo'i o Ia iā te i latou.

Salamo 34:7

Ana mafai ona pupula mata o tagata i le va'aiga fa'alelagi, semanū ua latou va'aia agelu malolosi ua laulaututū i 'autafa o i latou ua fa'amaoni pea i le 'upu moni a le Atua. Ua va'ava'ai agelu i lo latou puapuagā, ua latou fa'alogofa fo'i i a latou fa'atoga. O lo o latou fa'atali nei mo le fetalaiga mai lo latou Ta'ita'i ina ia mafai ai ona latou fa'avaveina 'ese lenei 'au fa'amaoni mai lo latou faigatā. Peita'i e ao ona latou onosa'i teisi pea. E ao ona inu le fanau a le Atua i le ipu, ma papatisoina i latou i le papatisoga o tofotofoga. O se mea tigā iā i latou le fa'atuai mai o le lavea'iga; peita'i o le tali sili lenei mo a latou talosaga. A o latou taumafai e fa'atalitali ma onosa'i ma fa'amoemoe i le Ali'i, o le umi o lo latou fa'atalitali o le a fa'amālosia ai lo latou fa'atuatua, ma tupu ai le fa'amoemoe ma le onosa'i - o mea nei e le'i lava ona latou atina'e i le vaitaimi o lo latou olaga fa'aKerisiano. A e ui i lea, o le a fa'apu'upu'uina lea vaitaimi ona o le va'ai alofa i le 'au fa'amaoni. “O le 'a lē faia ea e le Atua le amiotonu mo Lana 'au filifilia, o ē ua 'alalaga atu iā te Ia i le ao ma le pō? ...Ou te ta'u atu, o le a fa'avave ona faia e Ia le mea e tusa ai mo Lana fanau” (Luka 18:7, 8). O le a manatu nisi o le a tuai ona o'o mai o le i'uga; peita'i o le a vave o'o mai. O le a aoina le saito ma fusifusia mo le falesaito o le Atua; a'o le a fusifusia fo'i le titania e tafu ai le afi o le fa'afanoga.

(34) I LE FA'ATONUGA A LE TAMĀ, O LE Ā LE VALO'AGA OFOFOGIA O LE FOLAFOLĀGA O LE A FA'ATAUNU'UINA?

E pa'u'ū se to'aafe i ōu tafatafa, ma le mano i lou itū taumatau; a e lē taitai ane iā te 'oe.

Salamo 91:7

O lo o mataāla pea leoleo fa'alelagi i la latou galuega i 'autafa o le 'au fa'amaoni. Ua i ai se poloā'iga ua atofaina ai le taimi e fa'ao'o ai le oti i le 'au fa'amaoni i poloā'iga a le Atua. Peita'i o le a i ai nisi o le vaega a le fili o le a latou taumafai e fa'ao'o le oti i le fanau a le Atua a'o le'i o'o mai le taimi e pei ona atofaina i le poloā'iga. Peita'i e leai se tasi o 'au a le fili o le a mafai ona sopo atu i talatu o le mea ua tutū ai leoleo fa'alelagi. O le a fa'alavelave nisi o le fili a'o taumafai le fanau a le Atua e sosola 'ese mai 'a'ai tetele ma nu'u. Peita'i na pa'u'ū ma leai se aogā o a'u'upega na si'i a'e e fasiotia ai i latou. Ua fa'apenā ona puipuia e agelu le fanau a le Atua.

A o silasila mai le Atua i le fa'asologa mai o augātupulaga uma o le lalolagi, sa taula'i Ōna fofoga i le vaitaimi o puapuagā o Ōna tagata, le taimi e tutū fa'atasi ai malō o le lalolagi ina ia fa'a'umatia i latou. O le a fa'amata'uina i latou i le oti. Peita'i o le Atua, o Lē na vaeluaina le Sami 'Ula'ula mo Isara'elu, o le Atua lava lea o le a fa'ailoa mai Lona mana

<i>'Ou te alofa i le Ali'i ma lo'u loto atoa. 'Ou te tatalo ia faitauina 'au i lona itū pe a Ia fetalai mai, "O lē e amiotonu, ia amiotonu pea."</i>		
Li'o le Tali:	Ioe	Lē Mautonu
<i>Ua 'ou iloa nei o lo'o sa'ili Satani, pei o se leona, mo sē na te fa'a'umatia. 'Ou te tatalo mo le poto e su'esu'e ai pea ma talia le afioga a le Atua ia 'alo'ese ai mai tausā'asesē a Satani o le a fa'aalitino mai i taimi tau fa'ai'u o le tala fa'asolopito o lenei lalolagi.</i>		
Li'o le Tali:	Ioe	Lē Mautonu
<i>'Ou te fa'afetai i le Atua mo lapata'iga mo i tatou e fa'atatau i le "taimi mata'utia o puapugā" o le a o'o mai iā i latou o ē lē fa'amamalu Āna tulafono pa'ia.</i>		
Li'o le tali:	Ioe	Lē Mautonu
<i>'Ou te tatalo o le a fa'amamāina e le Atua la'u amio ma fa'amālosia lo'u fa'atuatua ina ia mafai ona 'ou manumalō ma fa'amamaluina ai o Ia, e ala i Lona alofa tunoa.</i>		
Li'o le Tali:	Ioe	Lē Mautonu
<i>Ona o le alofa ma le fa'atuatua, 'ou te tu'u atu mea uma i 'a'ao o le Atua. 'Ou te tatalo ia ala mai se vavega e fa'asaoina ai le ola po o le oti ona o le fa'atuatuāga, o le a Ia fa'aaogāina a'u ia vi'ia ai Lona suafa.</i>		
Li'o le Tali:	Ioe	Lē Mautonu

[illegible]

Ua Lavea'iina Tagata o le Atua - 11

E 'ave'esea loa le puipuiga fa'aletulafono mai iā i latou o ē o lo o fa'amaoni i poloā'iga uma a le Atua, ona amata loa lea o fa'agaioiga mo lo latou fa'a'umatiāga i atunu'u 'ese'ese. A o tau lalata mai le taimi ua atofaina e fa'ao'o ai le oti i nei tagata e tusa ai ma le poloā'iga, o le a 'au fa'atasi loa tagata e faia ni fuafuāga fa'alilolilo ina ia matuā fa'a'umatiaina ai nei tagata ua latou 'inosia. O le a fuafuaina se pō e tasi ia iloga ona matuā osofa'ia ai o i latou, ina ia lē toe fa'alogoina ai e fa'avavau o latou leo.

(1) O LE Ā LE FOLAFOLAGA E MAFAI ONA 'A'APA I AI I LATOU O Ē TUMAU PEA LE FA'ATUATUA?

Ua e tausia le 'upu o Lo'u onosa'i, o lea fo'i 'Ou te tausi ai iā te 'oe i le itūaso e tofotofoina ai, a o'o mai i le lalolagi uma, e tofotofo ai i ē o nonofo i le lalolagi.

Fa'aaliga 3:10

O lo o fa'atoga atu pea le fanau a le Atua mo Lana puipuiga. O nisi o i latou o lo o i ana o falepuipui, o nisi fo'i ua lalafi i nofoāga tu'ufua i le vaomatua ma atumauga. Ua i ai i lea taimi i so'o se itū o le atunu'u ni vaega'au o lo'o una'iina e 'au a agelu leaga, auā le sauni atu mo le galuega tele o le fa'afanoga. O le taimi lenei, i le itūaso o le fa'atutumuga o le leaga, o le a tula'i mai ai le Atua o Isara'elu mo le laveā'iga o Lana fanau filifilia. Ua fetalai mai le Ali'i: "Tou te pepese fo'i e pei ona fai i le pō o le tausamiga pa'ia; tou te 'oli'oli fo'i e pei o ē ua ō atu i le mauga o leova, o le Papa o Isara'elu. E faia fo'i e leova ina ia fa'alogo mai le lalolagi uma i Lona si'ufofoga silisili, ma latou va'ai i le o'o mai o Lona 'a'ao i le taimi o Lona to'asā. O le a va'aia le mu o le afi tele, o le lolo, ma le afā, ma le uato'a" (Isaia 30:29, 30).

Ua 'alalaga tagata amioleaga i lo latou agaga manumalō ma le fa'atauemu a'o latou sauni e osofa'ia le fanau a le Atua. Peita'i, fa'auta, o le taimi lava lea na o'o mai ai i luga o le lalolagi se pogisā mafiafia, e sili atu i lo le pouliuli o le pō. Ua va'aia le nuanua i le lapotopoto o le lagi, ua susulu mai ma le mamalu mai le nofoāli'i o le Atua, ma e foliga mai ua li'oina ai fa'apotopotoga laiti o ē o lo o faia a latou talosaga i le Atua. Ua fa'afuase'i nei ona taofia le motu o tagata na lili'au i lo latou ita. Ua mou atu la latou 'alaga fa'atauemu. Ua latou lē amana'ia nei le 'au fa'amaoni na latou fia fasioti i ai. O lo latou mata'u tele ua latou pulato'a atu ai nei i le fa'aailoga o le feagaiga a le Atua, ma ua latou manana'o nei ina ia ufitia i latou mai le malosī o Lona pupula.

(2) O Ā 'UPU FIAFIA O LE A FA'ALOGOINA MAI LAUGUTU O LE 'AU FA'ATUATUA?

O lea aso e fa'a'apea ai, Fa'auta, o lo tatou Atua lenei; sa tatou fa'atalitali iā te Ia, ua Ia fa'aolaina fo'i i tatou; o leova lava lenei, sa tatou fa'atalitali iā te Ia; tatou te fiafia ma 'oli'oli i Lana fa'aolataga.

Isaia 25:9

Ua fa'alogoina e tagata o le Atua i lea taimi se si'ufofoga mālie ma le manino ua fa'a'apea mai, "Tepa a'e i luga." Ua latou tetepa a'e i le lagi, ona latou va'aia ai lea o le nuanua o le folafolaga. Ua mavae atu le ao uliuli ma le pogisā lea sa ufitia ai le vānimonimo, ma ua latou pulato'a atu i le lagi fa'apei o Setefano. Na latou va'aia le mamalu o le Atua, atoa ma le Atali'i o le tagata o lo o i Lona nofoāli'i. Ua latou va'aia i Ōna foliga fa'alelagi fa'aailoga o Lona fa'alumaina, ma ua latou fa'alogoina mai Ōna lafofoga le olega ua tu'uina atu i luma o Lona Tamā atoa ma agelu pa'ia, ua fa'a'apea atu, "O Lo'u loto lenei iā te i latou ua e foā'iina mai ia te A'u, ina ia latou fa'atasi ma A'u i le mea 'Ou te i ai" (Ioane 17:24). Ua toe fa'alogoina fo'i le si'ufofoga mālie ma le mamalu ua fa'a'apea mai: "Ua ō mai! Ua ō mai i latou! E pa'ia, e mamā, ma ua lē pōnā. Ua latou tausia le 'upu a Lo'u 'onosa'i; o lea fo'i latou te savavali ai fa'atasi ma agelu." Ona alu a'e ai lea o le 'alaga manumalō a i latou o ē sa taofi mau i lo latou fa'atuatua.

(3) O Ā FETALAIGA O LE A FA'ALOGOINA MAI FOFOGA O LE ATUA?

Ua liligi fo'i lona to'afitu o agelu lana ipu i le matagi; ona tūlei mai ai lea o le si'ufofoga tele mai le malumalu o i le lagi mai le nofoāli'i, ua fa'a'apea mai, 'Ua uma ona fai.'

Fa'aaliga 16:17

O le valuāpō o le a fa'aali mai ai e le Atua Lona mana mo le laveā'iga o Ōna tagata. Ua mu toto'a le susulu mai o le lā. O le a ta'alise ona tutupu mai o fa'aailoga ma mea ofoofogia. Ua va'ai atu le 'au amioleaga ma le mata'u ma le maofa tele; peita'i o lo o tepa a'e ma le 'oli'oli le 'au amiotonu i fa'aailoga o le laveā'iga o i latou. O mea uma o le foafoāga ua

foliga mai ua suia lo latou ala. Ua lē toe tatafe vaitafe. Ua ō a'e ao pogisā ma le fa'amālumālu ma ua feto'ai solo le tasi ma le isi. Ua va'aia i totonugalemū o le lagi fa'amālumālu se avanoa manino, o lona mamalu e lē mafai ona fa'amatalaina. O inā ua sau ai le si'ufofoga o le Atua e pei o le ta'alili o vai e tele ua fa'apea mai: "Ua mae'a."

(4) O LE Ā LE MEA OFOFOGIA TELE O LE A FA'ATUPUINA E LE SI'UFOFOGA O LE ATUA?

Ona tutupu ai lea o leo, ma faititili, ma uila, sa i ai fo'i le mafui'e tele, e lē fa'apea ona tele se mafui'e ua tele na'uā talu ona i ai tagata i le lalolagi.

Fa'aaliga 16:18

O lenā si'ufofoga ua lūlūina ai le lagi ma le lalolagi.... O le lagi ua foliga mai ua tatala e pei o se tusi ma toe tapunia, ma toe tatala ma toe tapunia. Ua peisea'i ua fe"emo mai ai le pupula o le nofoāli'i o le Atua. O atumauga ua lūlūina e pei o se ū i le matagi, a'o papa ua mavaevae ma fa'ata'ape'apeina solo. Ua i ai fo'i le gogolo e pei o se afā ua fotua'i mai. O le sami fo'i ua matuā sōusou na'uā. Ua fa'alogoia fo'i le 'i'i o le afā tele fa'apei o le leo o temoni i le galuega o le fa'afanoga. O le fogā'ele'ele atoa ua fegaoioia'i e pei o le fafati mai o galu o le sami. O ōna laufanua ua mavaevae. O ōna fa'avae fo'i ua foliga mai ua matuā lepetia uma lava. Ua gogoto ifo atumauga latou. O motu sa ainā ua lē toe va'aia. O 'a'ai ma taulaga sa fa'apei o Sotoma i le amioleaga ua lilofia nei i le moana sausau. Ua manatua Papelonua le 'a'ai tele i luma o Ieova, "ina ia tu'uina atu iā te ia o le ipu o le uaina o lona to'asā mamafa." E tusa ma le selau pauna le mamafa o matāua ta'itasi o le uato'a ua pa'u'ū ifo nei mai le lagi ma faia ai la latou galuega o le fa'afanoga (Fa'aaliga 16:19, 21). O 'a'ai tetele o le lalolagi ua olopalaina lava. O maota mamalu sa fa'aluluina ai e ali'i sili o le lalolagi lo latou tamao'aiga ina ia maua ai lo latou lava vi'iga ua matuā olopalaina lava ma fa'atafunaina i o latou luma. O pā ma faitoto'a o falepuipui ua lepetia i lalo, a'o tagata o le Atua, o ē sa saisaitia ai i inā ona o lo latou fa'atuatua, ua fa'asa'olotoina nei.

(5) O AI O LE A MOLIMAUINA LE AFIO FA'ALUA MAI O KERISO?

Fa'auta, o lo'o afio mai o Ia ma āo, e iloa atu fo'i o Ia e mata o tagata uma, atoa ma ē na tu'ia o Ia; e taufaitagitū'i fo'i itū'aiga uma o le lalolagi ona o Ia. E moni, Amene.

Fa'aaliga 1:7

Ua avanoa fo'i tu'ugamau, ma "E to'atele ē na momoe i le efuefu o le 'ele'ele ua latou ala mai, o isi i le ola e fa'avavau, a'o isi i le fa'alumaina ma le 'inosia e fa'avavau" (Tanielu 12:2). O i latou uma o ē na oti i le fa'atuatua i le fe'au a lona tolu o agelu o le a ala mai i latou mai le tu'ugamau ua fa'amamaluina. Ua latou fa'alogu atu i le feagaiga o le filemū a le Atua ma i latou o ē sa tausi i Lana tulafono, "Atoa ma ē na tū'ia o Ia" (Fa'aaliga 1:7), i latou o ē na fa'atauemu ma fa'atigā i le Keriso i Ōna puapuagā, atoa ma i latou o ē sa sili ona tete'e i Lana 'upu moni atoa ma Ōna tagata, e fa'atutūina a'e i latou se'ia va'ai atu iā te Ia i Lona mamalu, se'ia latou va'ai fo'i i le mamalu tele ua fa'ae'eina i luga o le 'au fa'amaoni ma ē usiusita'i.

(6) O LE Ā LE TALI O LE A TU'U MAI E LE 'AU AMIOLEAGA INA UA LATOU ILOA O LE A LATOU MOLIMAUINA LE AFIO FA'ALUA MAI O KERISO?

Ua latou fai atu fo'i i mauga ma papa, Mafuli mai ia iā te i matou, ma tanumia i matou ai le silafaga a Lē ti'eti'e i le nofoāli'i, ma le to'asā o le Tama'i Mamoe.

Fa'aaliga 6:16

Alu ia i totonu o le papa, inā lafi ia i le 'ele'ele, ona o le mata'utia o Ieova, ma Lona mamalu silisili.

E fa'amaulaloina mata fa'asiasia o tagatā nu'u; e fa'amaulaloina fo'i le fa'amaulaluga o ali'i; na o Ieova lava e vi'ia i lea aso.

Auā o le aso o Ieova o 'au, e o'o atu lea i ē fa'asiasia ma ē fa'amaulaluga uma lava, atoa fo'i ma ē o fa'afefeteina uma; ona fa'amaulaloina lea.

O lea aso e lafoa'i atu ai e tagata a latou tupua ario ma a latou tupua auro, na latou faia mo i latou e ifo i ai, e lafoa'iina lava i afora ma pe'a.

Ina ia latou ō atu i mavaevae o papa, atoa ma vā i papa, ona o le mata'utia o Ieova ma Lona mamalu silisili, pe a tula'i o Ia e lūlūina le lau'ele'ele.

Isaia 2:10-12, 20, 21

O lo o ufitia pea le lagi i ao mafiafia; peita'i o le a va'aia i lea taimi ma lea taimi le susulu mai o le lā ua peisea'i o fofoga tauimasui o Ieova. Ua mata'utia le fe"emo mai o uila ua peisea'i o ni afi mumū ua li'o ai le lalolagi. A o ta'alili

mai pea le pa o faititili taufa'amata'u, ua fa'alogoina fo'i ni leo e 'ese ma le mata'utia ua ta'u mai ai le i'uga o ē amioleaga. E le'i malamalama uma i ai le to'atele i nei 'upu ua ta'u mai, peita'i ua matuā manino lelei i ai le 'au a'oa'o taufa'asesē. O ē e le'i leva nei lava ona latou 'upuvale ma taufa'ifai, ma maoa'e lo latou fa'asauā i ē tausi poloā'iga a le Atua, ua lofitūina nei i latou ma fa'agateteina i le fefe ma le mata'u tele. Ua sili a'e i le ta'alili o faititili le leo tele o la latou uiō. Ua ioe ma ta'utino atu nei temoni i le silisili 'ese o Keriso, ma ua latou tetemū i Ōna luma, a'o ē amioleaga ua 'ai'oi atu nei mo le alofa tunoa, ma fa'apa'u'ū fāō i le matata'u tele.

(7) O LE Ā LE PESE O LE MANUMALŌ O LE A FA'ALOGAINA MAI LE 'AU AMIOTONU?

O le Atua, o lo tatou malu Ia ma lo tatou malos; e fai o Ia ma fesoasoani silisili i puapuagā.

O le mea lea tatou te lē fefefe ai, pe a fa'aliliuina le lalolagi, ma lūlūina mauga i totonu o le sami; pe a ta'alili ma sousou ōna suāsami, ma fa'agateteina ai mauga i lona maualuga.

Salamo 46:1-3

E i ai se avanoa i totonu o ao ua susulu mai ai se fetū ua sautuafā lona pupula. O lea fetū ua va'aia ai e le 'au fa'amaoni lo latou fa'amoemoe ma lo latou 'oli'oli; peita'i o lea fetū ua va'aia ai ma le mata'u e le 'au amioleaga le to'asā o le Atua. O ē na latou tu'uina atu i latou uma mo Keriso ua saogalemū nei i latou, ua natia i le mealilo o le malu o le Ali'i. Ua tofotofoina i latou, ma ua fa'aalia ai i luma o le lalolagi ma ē tauemu lo latou tūtūmau ma le fa'amaoni i Lē na maliu mo i latou. O se fesui'iga ofoofogia ua o'o nei iā i latou o ē na taofimau i lo latou fa'amaoni tusa lava po o le oti. Ua fa'afuase'i ona lavea'iina o i latou mai le sauā mata'utia o ē ua liua e pei o temoni. O o latou foliga sesēga na va'aia ai le atuavale ma le popole, ua pupula mai nei i le maofa ma le fa'atuatua, ma le alofa. O o latou leo ua alu a'e ai le pese o le manumalō.

(8) O LE Ā LE MEA O LE A 'ALAGAINA I LE LAGI?

E ta'ua fo'i e le lagi Lana amiotonu; auā o le Atua o Ia lava le fa'amasino.

Salamo 50:6

A o alu a'e i luma o le Atua nei 'upu o le fa'atuatua pa'ia, ua matafi 'ese atu ao a e va'aia le mamalu lē mafa'amatalaina o le lagi ua si'osi'omia e le vānimonimo pogisā taufa'amata'u. Ua susulu mai nei le mamalu o le 'a'ai fa'alelagi mai ōna faitoto'a ua talaia. Ona iloa ai lea i le lagi o le 'a'ao o lo'o taofia papama'a e lua. Fai mai le perofeta: "E fa'ailoa mai e le lagi lana amiotonu; auā o le Atua o Ia lava le fa'amasino."... Ua fa'aalia mai nei i le lalolagi le tapula'a o le fa'amasinoga - o le tulafono pa'ia lea na tu'uina mai Sinai e 'avea ma ta'iala o le olaga. Ua tatalaina e le 'a'ao papama'a, ma ua va'aia ai Tulafono e sufulu peisea'i ua tusia i se peni afi. E matuā manino ōna 'upu, e mafai e tagata uma ona faitau i ai. Ua fagua mafaufau o tagata, ua matafi 'ese atu i mafaufau o le lalolagi le pogisā o talitonuga ma a'oa'oga sesē, ina ia va'ai i latou uma o lo o nonofo i le lalolagi, i poloā'iga e sufulu a le Atua. O ia afioga mamalu e pu'upu'u, a ua aofia ai fa'agaioiga uma, atoa ma mafaufauga uma.

(9) O LE Ā LE 'UPU MONI E FA'ATATAU I POLOA'IGA A LE ATUA O LE A MATATA'U AI LOTO O LE 'AU AMIOLEAGA?

E moni lava Lau afioga talu le amataga; e fa'avavau fo'i Āu fa'amasinoga tonu uma lava.

Salamo 119:160

E magumagu le mutia, e to'ulu le fuga; a o le afioga a lo tatou Atua, e tumau lea e fa'avavau.

Isaia 40:8

E lē mafai ona fa'amatalaina le tetemū ma le leai o se toe fa'amoemoe o ē sa solipalaina poloā'iga pa'ia a le Atua. Na tu'uina atu e le Atua Lana tulafono ina ia mafai e i latou ona fa'atusatusa i ai a latou amio ma latou iloa ai lo latou sesē a'o i ai le avanoa latou te salamō ma toe fuata'iina ai; peita'i o lo latou naunau i vi'iga mai le lalolagi na latou tu'ulafoa'ia ai ia tulafono, ma ua latou a'oa'o atu fo'i i isi latou te soli i ai. Na latou taumafai e una'i le fanau a le Atua ia soli i Lona sapatu. A o lenei ua fa'asalaina i latou e le tulafono sa latou ita ma tete'e i ai. Ua latou iloa nei ma le mata'u ua leai so latou 'alofaga. Ua filifilia lava e i latou lē o le a latou 'au'auna ma tapua'i i ai. "Ona outou toe iloa lea e 'ese'ese lē amiotonu ma lē amio leaga; e 'ese lē ua 'au'auna i le Atua, ma lē ua lē 'au'auna iā te IA" (Malaki 3:18).

(10) O LE Ā LE I'UGA PE A ILOA LE 'UPU MONI A E LĒ FA'ASOAINA ATU LENEI MALAMALAMA I Ē UA LĒ ILOA?

A 'Ou fai atu i lē ua amio leaga, E oti lava 'oe; a ē lē apoapoa'i atu iā te ia, ma e lē fai atu i ai e apoapoa'i atu i lē ua amio leaga ia liliu 'ese i lona ala leaga, ina ia ola ai o ia; e oti lenā tagata amio leaga i lana amiolētonu, a o lona toto 'Ou te tau'i atu lea iā te 'oe.

A e afai e te apoapoa'i atu i lē ua amio leaga, a e lē liliu'ese o ia i lana amio leaga ma lona ala leaga, e oti o ia i lana amiolētonu; a o 'oe, ua lavea'iina 'oe iā te 'oe.

Esekielu 3:18, 19

O fili o le tulafono a le Atua, e afua mai lava i faife'au se'ia o'o ifo i le aupito itiiti o i latou, ua latou maua nei se malamalama'aga fou o le 'upu moni ma lo latou tiute. Peita'i ua fai si tuai. Ua leai se aogā o le toe iloa nei o le Sapati o le poloā'iga e fā, o le fa'amaufa'ailoga lea a le Atua soifua (Va'ai i Manatu Fa'aopoopo B, C, D). Ua tuai tele fo'i ona latou iloa o le uiga moni o lo latou sapati sesē, atoa ma le fa'avae oneone na latou taumafai e atina'e ai lea sapati. Ua latou iloa lo latou si'itaua i le Atua. A o ta'ita'ia e le 'aufailotu agaga i le malaia, sa latou fai atu i tagata o lo o latou ta'ita'ia i latou i faitoto'a o Parataiso. Fa'ato'ā iloa lava i le aso fa'amasino le tāua tele o tiute fai o ē sa tutū i tofi pa'ia, atoa ma le mata'utia o fua o lo latou lē fa'amaoni. Ua na o le lagi lava o le a tatou mafai ai ona fuafuaina ma le tonu le tāua o se agaga e tasi ua fano. E matuā mata'utia le i'uga o le a o'o i lē o le a fetalai i ai le Atua: “Alu 'ese atu ia 'oe le 'au'auna leaga.”

(11) O FEA O LE A VA'AIA AI KERISO I LONA AFIO MAI?

Ona fetalai atu ai lea o Iesu iā te ia, O lea lava; 'Ou te fai atu fo'i iā te outou, E mulimuli ane tou te iloa ai le Atali'i o le tagata e nofo i le itū taumatau o Lē e Ōna le mana, e sau fo'i o Ia i āo o le lagi.

Mataio 26:64

E lē pine a e va'aia loa i le itū i sasa'e le ao itiiti uliuli, e tusa o le 'afa o le alofilima o le tagata lona telē. O le ao lea o lo o si'omia ai le Fa'aola, a e na foliga mamao atu o se ao uliuli. Ua iloa e le fanau a le Atua o lenei ao o le fa'ailoga lava lea o le Atali'i o le tagata. Ua latou tulimata'i atu i ai ma le fa'alologo a'o aga'i mai pea le ao i le lalolagi, ma atili ai lona pupula ma lona mamalu, se'ia o'o ina 'avea o se ao sinasina tele, o ōna lalo ua uiga 'ese e pei o le afi ua mū saesae, ma ōna luga o le nuanua o le feagaiga. Ua afio mai Iesu o se ta'ita'ia manumalō. Ua lē o Ia nei o se “Tagata Fa'anoanoa,” e inu i le ipu o'ona o le fa'alumaina atoa ma le mapu'itigā; ua afio mai nei o Ia o Lē ua manumalō i le lagi ma le lalolagi, e fa'amasino i ē ola atoa ma ē ua oti. “O Lē Fa'amaoni ma le Moni, o le amiotonu fo'i Na te fa'amasino ai ma tau ai le taua. ... O 'au fo'i o i le lagi ua mulimuli atu iā te Ia” (Fa'aaliga 19:11-14). E lē mafaitaulia le numera o agelu pa'ia ua latou fa'afeaoina mai o Ia a'o latou 'alalaga mai i vi'iga fa'alelagi. Ua foliga mai ua fa'atumulua le vānimonimo i tino fepulafi “e afe ni afe, ma mano ni mano.”

(12) E FA'APEFEA ONA FA'AMATALAINA E LE PEROFETA O SAPAKUKA LE AFIO FA'ALUA MAI O KERISO?

Na afio mai le Atua mai Timanu, na afio mai fo'i le Pa'ia mai le mauga o Parana. Sa ufitia le lagi i Lona pupula, o Lona vi'iga fo'i sa tumu ai le lalolagi.

O le pupula fo'i sa fa'apei o le lā, sa o'o mai 'ave ai Lona 'a'ao, sa i ai fo'i le ufiufi o Lona mana.

Sapakuka 3:3, 4

E leai se peni a tagata e mafai ona fa'amatalaina ai lea va'aiga, e leai fo'i se tasi e mafai e lona mafaufau ona malamalama i lea mamalu. “Sa ufitia le lagi i Lona pupula, o Lona vi'iga fo'i sa tumu ai le lalolagi. O le pupula fo'i sa fa'apei o le lā.” A o tauau ina latalata mai pea le ao, ua va'aia e tagata uma le Perenise o le ola. Ua lē o le pale tuitūi ua fa'aleagaina ai Lona āo pa'ia, a e peita'i o le pale pupula o le mamalu ua fa'ae'eina i luga o Lona āo pa'ia. O Ōna fofoga ua susulu i le pupula matagofie e sili i lo le pupula o le lā ua mū toto'a. “Ua iā te Ia fo'i le suafa ua tusia i Lona ofu ma Lona vae, O le Tupu o tupu ma le Ali'i o ali'i” (Fa'aaliga 19:16).

(13) E FA'APEFEA ONA FA'AMATALAINA E LE PEROFETA O IEREMIA LE TALI A LE FANAU A TAGATA I LENEI MEA MATA'UTIA O LE A TUPU?

O le mea lea inā fesili atu ai ia, ma ia outou va'ava'ai, pe fanau ea se tane? O le ā ea le mea 'Ou te iloa atu ai i tane uma, e ta'itasi ma ōna lima i ōna itū, e pei o se fafine a fanau; o mata uma fo'i ua liua, ua matamata vale lava?

Auē! auā o le aso tele lea, e leai sona tusa; o ōna pō lava ia o le puapuagā o Iakopo; a e fa'aolaina ai o ia.

Jeremia 30:6, 7

“O mata uma fo'i ua liua, ua matamatavale lava i luma o Ōna fofoga;” ma ua o'o ifo nei i ē na te'ena le alofa tunoa o le Atua le mata'u tele ona ua leai so latou toe fa'amoemoe e fa'avavau. “Ua fa'avaivaia le loto, ua gatete tulivae ...o latou mata uma fo'i ua matamatavale” (Jeremia 30:6; Nauma 2:10). Ua 'alalaga fo'i le 'au amiotonu ma fa'apea atu: “O ai se mafai ona tū atu?” Ua taofia le pese a agelu, ma e mata'utia le lologo na o'o ifo i mea uma i lea vaitaimi. Ua fa'alogoaina loa le si'ufofoga o Iesu ua fetalai mai: “O lo'u nei alofa tunoa e lava lea mo outou.” Ua fa'afiafiaina le 'au amiotonu, ma ua fa'atumulua loto uma i le 'oli'oli. Ua toe amatalia pesega a agelu i se leo maoa'e i lona matagofie a'o latou aga'i mai pea i le lalolagi.

(14) O LE Ā LE VALO'AGA SA TU'U MAI E KERISO O LE A FA'ATAUNU'UINA, E 'A'AFIA AI Ē NA FA'ASATAUROINA O IA?

Ona fetalai atu ai lea o Iesu iā te ia, O lea lava; 'Ou te fai atu fo'i iā te outou, E mulimuli ane tou te iloa ai le Atali'i o le tagata e nofo i le itū taumatau o Lē e Ōna le mana, e sau fo'i o Ia i āo o le lagi.

Mataio 26:64

Ua i ai i latou o ē sa tauemu iā Keriso i Ōna puapuagā. Ua manino le o'o ifo i o latou mafaufau o afioga a Lē sa puapuagātia, i le taimi na Ia tali atu ai i le faitaulaga sili e fa'apea: “E mulimuli ane ona outou iloa ai lea o le Atali'i o le tagata ua nofo i le itū taumatau o Lē e Ōna le mana, e sau fo'i o Ia i ao o le lagi.” Ua latou va'aia nei o Ia i Lona mamalu, ma o le a latou va'aia fo'i o Ia ua nofo i le itū taumatau o Lē Ōna le malosi uma lava.

Ua lē magagana nei i latou o ē sa tauemu i Lana fa'aaliga o Ia o le Ālo o le Atua. Ua i ai fo'i Herota lea sa fa'atauemu i Lona tofi mamalu fa'atupu, ma sa ia fa'atonuina ai fitafita lē migao e fa'apale iā Keriso i le pale o tauemuga. Ua i ai fo'i le 'au lēpopoi ia na latou fa'a'ofu iā te Ia i le ofu pa'auli, ma fa'ae'e i Lona āo pa'ia le pale tuitūi, ma tu'uina atu i Lona 'a'ao le to'oto'o o le fa'atauemu, ma ifo'ifo atu i Ōna luma i ni uiga fa'atauemu ma le lē migao. O ē fo'i sa fepō ma feanu i le Perenise o le ola ua liliu 'ese nei o latou mata mai le sisila a Ōna fofoga. Ua latou fia sosola 'ese mai le malosi o Lona mamalu. O i latou fo'i na tutu'ia Ōna 'a'ao i fao, atoa ma le fitafita o lē na tutui Lona itū i le tao, ua latou va'ai atu nei ma le mata'u ma le fefe tele i tulaga-manu'a na latou faia....

E i ai lava taimi e lāgāina ai le loto fuatiaifo i olaga o i latou uma o ē te'ena le 'upu moni, pe a fa'amanatu mai e le mafaufau se olaga fa'a'ole'ole, se olaga e mafatia ai le loto; peita'i e lē aogā ona e lē o se salamō moni lea lagona. A e pe fa'apefea ona fa'atusatusa atu o nei lagona i le salamō o lenā aso “pe a o'o mai lo outou fefe pei se afā, pe a o'o mai fo'i lo outou malaia pei se asiosio!” (Fa'ata'oto 1:27). O ē sa fīa fa'a'umatia iā Keriso atoa ma Ōna tagata fa'amaoni ua latou molimauina nei le mamalu ua fa'ae'eina atu iā i latou. A o latou matata'u ma tetemū, sa latou fa'alogoaina leo o le 'au pa'ia i le 'alaga o le 'oli'oli ua fa'apea mai: “Fa'auta, o lo tatou Atua lenei, sa tatou fa'atalitali iā te Ia, ua Ia fa'aolaina fo'i i tatou” (Isaia 25:9).

(15) O LE Ā LE 'ALAGA O LE A FA'ATUMULIA AI LE LAGI A O VALA'AUINA E KERISO I LE OLA Ē AMIOTONU UA MALILIU?

Le oti e, o fea o i ai lou tui? Le tu'ugamau e, o fea o i ai lou manumalō?

I Korinito 15:55

A o lūlūina pea le lalolagi, a'o 'emo uila ma ta'alili faititili, sa fa'alogoaina le si'ufofoga o le Ālo o le Atua ua vala'au i le 'au pa'ia na momoe. Ua Ia silasila atu i tu'ugamau o le 'au amiotonu, ona sisi'i a'e lea o Ōna 'a'ao i le lagi ma Ia vala'au: “Ala mai ia, ala mai ia, ala mai, outou o ē o momoe i le efuefu o le 'ele'ele, inā ala mai ia!” O le a fa'alogoaina lea si'ufofoga e ē ua oti i tulū'iga uma o le lalolagi, ma o ē fa'alogi i lea si'ufofoga o le a ala mai i latou. O le a va'aia ma fa'alogoaina i le lalolagi atoa le toe tūtū mai o le 'au amiotonu e matuā to'atele na'uā mai atunu'u uma, ma itū'aiga, ma gagana, atoa ma nu'u. Ua latou ō mai mai le falepuipui o le tu'ugamau, ua 'o'ofu i le mamalu o le ola e fa'avavau, ma ua latou 'alalaga mai, “Le oti e, o fea o i ai lou tui? Le tu'ugamau e, o fea o i ai lou manumalō?” O le 'au amiotonu o lo o la, ma le 'au pa'ia na fa'atutūina mai ua 'au fa'atasi nei o latou leo i le 'alaga fiafia o le manumalō.

(16) O LE Ā LE SUIGA O LE A TUPU I Ē AMIOTONU?

E fa'afuase'i lava, o le 'emo o le mata, pe a ilia le pū fa'a'uma; auā e ilia lava, e toe tūtū mai ai ē ua oti ma le ola pea, e liua fo'i i tatou.

Auā e tataua ona ofu o lenei tino i'uvale i le tino ola pea, ia ofu fo'i lenei tino oti i le tino lē oti lava.

I Korinito 15:52, 53

O le a ō mai i latou uma mai o latou tu'ugamau i le tino fa'apei lava ona latou ulu atu ai i ai. E mamalu ma tino 'ese le tū mai o Atamu i le to'atele o ē ua fa'atutūina mai. O lona maua luga e itiiti ifo teisi nai lo le Ālo o le Atua. E tele na'uā se 'ese'esega o le maua luga o Atamu ma tagata o augātupulaga uma na mulimuli mai iā te ia; ua fa'ailoa mai ai le tulaga pa'ū maulalo tele o le aigā tagata. A e ui i lea e tutū mai uma le 'au amiotonu i le malosī fa'afouina ma le tino talavou e fa'avavau. Na foafoaina le tagata i le amataga ia foliga i le Atua, ia lē gata i le amio, a e fa'apea fo'i i ōna foliga fa'aletino. Toetoe lava a talepeina 'ato'atoa e le agasala foliga o le Atua i le tagata; peita'i na afio mai Keriso Na te toe fa'afouina le mea ua lepetia e le agasala. O le a Na liua o tatou tino leaga ina ia toe foliga i Lona tino matagofie. O le tino oti ma le i'uvale, le tino na fa'amātagāina e le agasala, ua fa'afouina nei, ua 'ato'atoa ma matagofie, e lē toe oti lava. O ila uma fo'i ma pona ma vaega lē 'ato'atoa ua tu'ua i le tu'ugamau. Ua toe fa'atagaina nei le tagata i le la'au o le ola, ma "o le a tutupu a'e" (Malaki 4:2) le 'au fa'aolaina se'ia o'o ina latou 'ausia le tulaga na i ai le fanau a tagata i le amataga. O le a 'ave'esea mea uma na fa'amanatu mai ai le mala o le agasala, a e tutū mai ai le 'au fa'amaoni i le "matagofie o le Ali'i lo tatou Atua," i le mafau'au, i le tino atoa ma le agaga, e fa'aalia ai le foliga 'ato'atoa o lo latou Ali'i. E, le ofoofogia o le fa'aolataga! Ua leva ona laugaina, ua leva fo'i ona fa'amoemoe i ai, sa mafau'au pea fo'i i ai ma le naunauta'i, a e le'i 'ato'atoa lava ona malamalama i ai.

(17) O FEA O LE A Ō I AI LE 'AU FILIFILIA INA UA MAE'A LENEI SUIGA?

Ona fa'afuase'i lea ona 'aveina a'e o i tatou o ē ola ma toetoe, fa'atasi ma i latou i āo, ina ia fetaia'i ma le Ali'i i le vā nimonimo; ona tatou fa'atasi pea lava lea ma le Ali'i.

I Tesalonia 4:17

E fa'afuase'i lava ona liua o le 'au amiotonu o lo o ola, e pei o le 'emo o le mata. Ua liua i latou i le tino fa'alelagi i le si'ufofoga o le Atua, ma ua 'aveina a'e nei i latou fa'atasi ma ē na fa'atutūina mai tu'ugamau, ina ia fetaia'i ma lo latou Ali'i i le vānimonimo. "E a'uina atu fo'i e Ia o Āna agelu...latou te fa'apopototo...i ē ua filifilia e Ia mai matāmatagi e fā, e amata i le tasi tulu'iga o le lagi e o'o atu i le tasi tulu'iga." Ua sapaia e agelu pa'ia le fanau laiti ma tu'uina atu i lima o o latou tinā. O uō ua leva ona māvae i le oti ua fa'atasia nei e lē toe tete'a e fa'avavau, ma ua latou pepese nei i le 'oli'oli a'o latou ō a'e fa'atasi i le 'ai o le Atua.

(18) O LE Ā LE MEA O LE A TU'UINA E KERISO, LO TATOU FA'AMASINO AMIOTONU, I LUGA O ŌNA TAGATA TA'ITO'ATASI UA FA'AOLAINA?

Pe a fa'aali mai fo'i le Leoleo Mamoe silisili, e maua e outou le pale pupula e lē mamae lava.

I Peteru 5:4

A o le'i ulu atu i latou i le 'ai a le Atua, ua tu'uina atu e le Fa'aola i ē na mulimuli iā te Ia o fa'ailoga o le manumalō, ma fa'ae'eina atu iā i latou fa'ailoga mamalu o lo latou tulaga fa'atupu. Ua fa'atulagaina agelu atoa ma le 'au pa'ia i se fa'atāfāfā e si'omia ai lo latou Tupu, o Lē o lo o tula'i i le mamalu ma le maua luga e sili a'e i lo agelu ma le 'au pa'ia. O le pupula atu o Ōna fofoga iā i latou ua fa'atumulia lea i le alofa mutimutivale. E lē mafaitaulia le fa'apopototoga o le 'au fa'aolaina; ua taula'i atu uma nei la latou va'ai iā te Ia; ua va'aia e mata uma Lona mamalu, o fofoga ia ma Lona tino sa sili ona fa'atāugāina nai lo se isi lava tagata. Ua fa'ae'e atu nei e le 'a'ao taumatu o Iesu le paleali'i mamalu i luga o ulu o le 'au manumalō. Ua ta'ito'atasi i latou ma le paleali'i ua tusia ai lona lava "igoa fou" (Fa'aaliga 2:17), ma 'upu ua tusia ai, "e Pa'ia Ieova." Ua tu'uina fo'i i lima uma ta'itasi laupama o le manumalō atoa ma le kitara. A o sasalu mai e ta'ita'i o agelu le nota amata, sa tau'āi tāina e le fa'apopototoga uma a latou kitara, ma ua āfua mai ai se leo o le pese e mālīe ma matuā matagofie na'uā. E lē mafai ona fa'amatalaina le 'oli'oli tele ua fa'agae'etia ai loto uma, ma ua latou 'alalaga ai uma i le vi'iga o le fa'amanū: "O Lē na alofa mai iā te i tatou, na Ia fufulu mai fo'i iā te i tatou i a tatou agasala i Lona lava toto. Ua Ia faia fo'i i tatou ma tupu ma faitaulaga i le Atua o Lona lava Tamā. Ia iā te Ia le vi'iga ma le malosī e fa'avavau fa'avavau lava" (Fa'aaliga 1:5, 6).

(19) O LE Ā LE VALA'AU FIAFIA O LE A TU'U MAI E KERISO I LE 'AU FA'AOLAINA?

Ona fai atu ai lea o le Tupu i ē o lo'o i Lona itū taumatau, Ō mai ia, o outou ua fa'amanuaina e Lo'u Tamā, ia fai mo outou tofi le malō ua saunia mo outou a o le'i fa'avaeina le lalolagi.

Mataio 25:34

Ua i luma nei o le fa'apopototoga o le 'au fa'aolaina le 'ai pa'ia. Ua tatalaina e Iesu faitoto'a penina o le 'ai, ma ua ulu atu nei i ai le nu'u o ē sa tasi i le mea moni. Ua latou va'aia nei le parataiso a le Atua, le aiga o Atamu a'o le'i agasala. Ona o'o mai ai lea o lenā si'ufofoga e sili ona mālīe i lo leo uma ua fa'alogoia e taliga, ua fa'apea mai: "Ua i'u

nei la outou finauga. Ō mai ia, outou ua fa'amanuaina e Lo'u Tamā, ia fai mo outou tofi le malō ua saunia mo outou a'o le'i fa'avaeina le lalolagi.”

Ua fa'ataunu'uina nei le talosaga a le Fa'aola mo Ōna so'o: “Ou te loto iā i latou o ē na E foa'iina mai ia te A'u, ina ia latou fa'atasi ma A'u i le mea 'Ou te i ai.” “Ua lē pōnā i luma o Lona lava mamalu ma le fiafia tele” (Iuta 24). Ua tu'uina atu e Keriso i le Tamā i latou na Ia fa'atauina i Lona lava toto, ua fa'apea atu: “O a'u lenei, atoa ma le fanau na E foa'iina mai ia te A'u. Ua 'Ou tausia lava i latou na E foa'iina ma iā te A'u.” E! le ofoofogia o le alofa lavea'i! Le uiga 'ese o lenā itūaso pe a silasila atu le Tamā Silisili 'Ese i le 'au fa'aolaina, o le a Ia va'aia ai Lona fa'atua. Ua 'ave'esea nei le leo pa'ulua o le agasala atoa ma ōna malaia, a ua toe lelei nei le fanau a tagata ma le Atua!

O le alofa e lē mafa'amatalaina ua fa'aulufaleina ai nei e Iesu le 'au fa'amaoni i le fiafia o lo latou Ali'i. Ua 'oli'oli le Fa'aola ona ua va'aia i le malō o le lagi o agaga na Ia lavea'iina e ala i Ōna puapuagā ma Lona fa'alumaina. O i latou fo'i ua togiolaina o le a 'auai i Lona fiafia, auā ua latou va'aia i le 'au fa'aolaina, i latou na aumaia iā Keriso e ala i a latou talosaga, a latou galuega atoa ma a latou taulaga ofo sa faia ma le alofa fa'amaoni. A o latou vagavagaia le nofoāli'i sinasina tele, na fa'atumulia i latou i le 'oli'oli e lē mafa'amatalaina ina ua latou va'aia ē na latou aumaia iā Keriso, ma latou iloa ai ua aumaia e lē tasi isi, ua ta'ita'ia mai fo'i e i latou nei nisi agaga, ua aumaia uma lava i le taulaga o le filemū. O inā ua latou lafoina ai i lalo o latou paleali'i i 'a'ao o Iesu ma fa'amanū atu iā te Ia e fa'avavau.

(20) O AI LE FA'APOTOPOTOGA O LE A MAUA LE AVANOA E PEPESE AI I SE PESE FA'APITOA, O VI'IGA I LO LATOU FA'AOLA?

Ua latou pepese fo'i e peiseā'i o se pese fou i luma o le nofoāli'i, ma luma o mea ola e fā, ma le 'au toea'ina; e lē mafaia fo'i e se tasi ona a'oa'o i lea pese, na o le selau afe ma afe e fā sefulu ma le fā afe o ē ua fa'atauina nai le lalolagi.

Fa'aaliga 14:3

O luma o le nofoāli'i ua i ai le sami tioata, le sami tioata lea ua foliga mai ua fefiloi ma le afi ona o le pupula tele o le mamalu o le Atua. O luga o lenei sami tioata ua potopoto ai nei i latou uma o ē “ua manumalō i le manu fe'ai ma lona fa'atagata, atoa ma lona fa'ailoga, ma le faitau aofa'i o lona igoa.” Ua latou tutū nei fa'atasi ma le Tama'i Mamoe i le Mauga o Siona, “ua iā i latou kitara a le Atua,” o lo latou faitau aofa'i e selau fāsefulu ma le fā o afe o ē ua fa'atauina mai tagata. Ua fa'alogoina fo'i, e pei o le ta'alili o vai e tele, e pei fo'i o le leo o se faititili tele, “le leo o ē tā kitara ua tā i a latou kitara,” ma ua latou pepese fo'i “se pese fou” i luma o le nofoāli'i; e lē mafai fo'i e se tasi ona a'oina lea pese vaganā le to'a selau fāsefulu ma le fā o afe. O le pese lea a Mose ma le Tama'i Mamoe - le pese o le laveā'iga. E leai se tasi, se'i vaganā lava le selau fāsefulu ma le fā o afe, e mafai ona latou a'oina lea pese; auā o le pese o le mea na o'o iā te i latou - le mea e le'i o'o i se isi lava vasega o tagata. “O i latou ia ua mulimuli atu i le Tama'i Mamoe i mea uma e alu i ai o Ia.” O i latou nei na 'aveolaina a'e nai le lalolagi, mai ē o lo o ola, ma ua ta'ua i latou o “ulua'i fua i le Atua ma le Tama'i Mamoe” (Fa'aaliga 15:2, 3; 14:1-5).

(21) O LE Ā LE MEA O LE A TU'U 'ESE AI LENEI FA'APOTOPOTOGA MAI LE TO'ATELE O LE 'AU FA'AOLAINA?

Ona fai mai ai lea o le tasi o le 'au toea'ina, ua fa'apea mai iā te a'u, O i latou ia ē ua 'o'ofu i 'ofu sisina, o ai ea i latou, po o fea fo'i na latou ō mai ai?

Ona 'ou fa'apea atu ai lea iā te ia, Le Ali'i e, ua e silafia. Ona fa'apea mai ai lea o ia iā te a'u, O i latou ia o ē ō mai nai le puapuagā tele, ua tā fo'i o latou 'ofu i le toto o le Tama'i Mamoe.

Fa'aaliga 7:13, 14

“O i latou ia na ō mai nai le puapuagā tele,” na latou ui mai i le taimi o puapuagā e leai sona tusa talu ona fa'ato'ā tupu o nu'u; na latou onosa'i i le tigā o le taimi o puapuagā o Iakopo; sa latou tutū e aunoa ma se fautua i le taimi na liliigi mai ai le to'asā mulimuli o le Atua. A e peita'i ua lavea'iina i latou, auā ua “tā o latou ofu ma ua fa'asinasina o latou ofu i le toto o le Tama'i Mamoe. ... Ua leai fo'i se pepelo i o latou gutu auā ua lē pōnā i latou i luma o le Atua. ... O le mea lea ua latou i luma ai o le nofoāli'i o le Atua, ua latou 'au'auna fo'i iā te Ia i Lona malumalu i le ao ma le pō; o Lē ti'eti'e fo'i i le nofoāli'i e mau ma i latou.” Ua latou va'aia le lalolagi ua fa'atafunaina i oge ma fa'amai, o le lā fo'i ua mū ai tagata i le mū tele, ma ua latou onosa'i i nei puapuagā uma, o lē fia'ai atoa ma lē fiainu. A e peita'i, “Latou te lē toe fia'a'ai, e lē toe fiainu fo'i, e lē ogotia i latou i le lā, po o se tasi vevela; auā o le Tama'i Mamoe o lo'o i luma o le nofoāli'i na te fafaga iā i latou, ma ta'ita'i iā te i latou i puna o vai ola; e soloi'eseina fo'i e le Atua o loimata uma nai o latou mata” (Fa'aaliga 7:14 -17).

(22) O LE Ā LE TA'IALA O LO'O FA'AMATALAINA I LENEI FUAI'UPU O LE A OSOFIA AI LE 'AU FA'AOLAINA IA FA'ASOA ATU LA LATOU MOLIMAU E FA'ATATAU I LE TOGIOLA, IA SO'O ATOA AI LE ATULAULAU?

Ua leai ni a la tupe e toe avatu, ona fa'amagalo fua lea e ia iā te i la'ua uma. Inā fai mai ia po o ai so la'ua e tele lona alofa iā te ia?

Ua tali mai Simona, ua fa'apea mai, Ai lava o lea na fa'amagaloina atu ana mea e tele. Ua fetalai atu Ia iā te ia, Ua tonu lou taofi.

Luka 7:42, 43

O le a'oga o tigā ma puapuagā na a'oga ai ma fa'atonuina ai le 'au filifilia a le Fa'aola i tupulaga uma. Sa latou savavali i ala vāpiapi o le lalolagi; ua fa'amamāina i latou i le ogāumu o puapuagā. Sa sauāina ma 'inosia ma tu'ua'ifuaina i latou, a e na latou onosa'i ona o le suafa o Iesu. Sa latou mulimuli atu fo'i iā te Ia i totonu o tofotofoga tigā; na latou onosa'i fo'i i le tau'aveina o o latou lava satauro ma latou ui mai ai i se ala tigā ma le matuitūi. O tigā na latou ui mai ai na latou iloa ai le leaga o le agasala, atoa ma lona malosi, lona fa'asala, ma lona pagātia; ma ua latou va'ai atu nei i ai ma le 'ino'ino tele. Ua fa'amaulaloina i latou i la latou lava va'ai ina ua latou lagona le silisili 'ese o le taulaga ua faia mo le agasala, ma ua fa'atumulia ai o latou loto i le fa'amanū ma le fa'afetai. E lē tāua lenei mea iā i latou o ē le'i pa'u'ū. Ua tele lo latou alofa auā ua tele fo'i mea ua fa'amagaloina ai i latou. Na latou 'auai i puapuagā o Keriso, o lea fo'i ua tatau ai ona latou 'auai fa'atasi ma Ia i Lona mamalu.

(23) O LE Ā LE A'OA'IGA O LE A 'AVE'ESEA MAI Ē AMIOTONU?

E fa'aumatia e Ia le oti e fa'avavau; e soloi'esea fo'i e le Ali'i o Ieova o loimata i mata uma lava; e fa'ate'a'eseina fo'i e Ia le gao o Lona nu'u i le lalolagi uma lava; auā ua fetalai mai ai Ieova.

Isaia 25:8

Ua ō mai suli o le Atua mai fale malepelepe ma pa'usisi sa nofosala ai, mai falepuipui palapalā ma le pogisā, mai fata na fausia mo lo latou fa'asalaga, mai mauga, mai toafa, mai ana o le 'ele'ele ma ana i le sami. Na matitiva ma sauāina ma fa'atāugāina i latou i le lalolagi. E miliona ma miliona na ō ifo i le tu'ugamau ma le fa'alumaina ona o lo latou tūtūmau ma le mausalī, ma lo latou lē fia gaua'i atu i fa'asesēga a Satani. O fa'ai'uga o fa'amasinoga a le lalolagi na 'avea ai i latou o ni pagotā aupito sili ona leaga. A o nei, “o le Atua o Ia lava le fa'amasino” (Salamo 50:6). Ua fa'alēaogāina nei fa'ai'uga a le lalolagi. “E fa'ate'a'eseina fo'i e ia le gao o lona nu'u i le lalolagi uma lava” (Isaia 25:8). “E igoa fo'i latou, O le nu'u pa'ia; o ē ua fa'atauina e Ieova.” Ua tofia fo'i e Ia “e foa'iina atu iā i latou le matagofie e sui a'i le lefulefu, o le u'u o le 'oli'oli e sui a'i le fa'anoanoa, o le ofu e fai ai vi'iga e sui a'i le loto fa'avaivai” (Isaia 62:12; 61:3). Ua lē toe tautevateva i latou, pe puapuagātia, pe fa'ata'ape'apeina, pe toe sauāina. E afua atu nei ona latou fa'atasi pea lava pea ma le Ali'i. Ua latou tutū nei i luma o le nofoālī'i ua 'o'ofu i ni ofu sisina e sili atu ona tautele i lo ni ofu na 'o'ofu ai ē aupito sili ona mamalu o le lalolagi. Ua fa'apaleina fo'i i latou i paleali'i e sili atu ona pupula i lo ni paleali'i na fa'ae'eina atu i tupu o le lalolagi. O aso o le tigā ma le tagi auē ua fa'ai'uina nei e fa'avavau. O le Tupu o le mamalu ua Na soloi'esea loimata uma i o latou mata; ua 'ave'esea fo'i mafua'aga uma o le fa'anoanoa. A o talotalo atu a latou laupama, ua latou 'alalaga a'e i le pese o le fa'amanū, e manino, e mālīe, ma e ō gatasi vaega uma; na taufai 'alalaga leo uma se'i o'o ina fa'atumulia itū uma o le lagi i lea vi'i, “O i ai le fa'aolataga i lo tatou Atua o Lē ti'eti'e i le nofoālī'i, atoa ma le Tama'i Mamoe.” O ē uma fo'i o nonofo i le lagi ua latou tali mai e fa'apea: “Amene, ia i lo tatou Atua le fa'amanū, ma le vi'iga, ma le poto, ma le fa'afetai, ma le mamalu, ma le mana, ma le malosi e fa'avavau fa'avavau lava” (Fa'aaliga 7:10, 12).

(24) E FA'APEFEA ONA FA'AMATALAINA E LE TUSI PA'IA LE FUAFUĀGA O LE FA'AOLATAGA?

Ua leai fo'i se taofi 'ese, e sili lave lenei 'upu lilo i la le amio Atua, Ua fa'aali mai le Atua i le tino tagata, ua fa'aalia Lana amiotonu e le Agaga, ua va'aia e agelu, ua tala'iina atu i nu'u 'ese, ua fa'atuatua i ai o ē o i le lalolagi, ua 'aveina a'e i le manu'a.

I Timoteo 3:16

Mo a'u fo'i, ina ia tu'uina mai le 'upu iā te a'u, ina ia 'ou fa'amalosi ona tautala atu ma fa'ailoa atu le 'upu o le tala lelei sa lilo.

Efeso 6:19

Ua na o se vaega papa'u o le matā'upu o le fa'aolataga ua mafai ona tatou malamalama i ai i lenei olaga. E mafai e o tatou mafaufau vaivai ona manatunatu ma le naunauta'i i le fa'alumaina atoa ma le mamalu, le ola atoa ma le oti, o le amiotonu ma le alofa tunoa, o mea uma ia ua feiloa'i i le satauro. Peita'i e lē mafai e le malosi sili e o'o i ai o tatou mafaufau ōna malamalama i le 'atoāga o lea matā'upu. Ua na ona tatou malamalama ma le fa'anefu i le umi ma le lautele, le loloto ma le maua luga o le alofa togiola. E lē 'ato'atoa lo tatou malamalama i le fuafuāga o le fa'aolataga, e o'o lava i le taimi o le a iloa ai le 'au fa'aolaina e fa'apei ona iloaitinoia o i latou. Peita'i o le a tatalaina mai malamalama'aga fou i le mafaufau ma'elegā, ma le loto e fia su'esu'e i le ola e fa'avavau. E ui lava ina ua mavae atu fa'anoanoāga ma tigā atoa ma tofotofoga o le lalolagi, ma ua 'ave'esea fo'i le mafua'aga o ia mea uma, o le a i ai pea lava i tagata o le Atua so latou malamalama'aga manino e uiga i le tau o lo latou fa'aolataga.

(25) O LE Ā LE PESE MA LE AUTŪ O SU'ESU'EGA A LE 'AU FA'AOLAINA MO LE TAIMI UA MAVAE, O LE ASŌ, MA LE LUMANA'I?

Tou te mafai ai ona iloa lelei e outou atoa ma le 'au pa'ia uma, o le uiga lautele, ma le umi, ma le loloto, ma le maua luga.

Ia iloa fo'i le alofa o Keriso ua silisili 'ese e lē mailoa, ia fa'atutumuina outou i le tumu uma lava o le Atua.

Efeso 3:18, 19

O le a 'avea le satauro o Keriso o le pese ma le autū o su'esu'ega uma a le 'au fa'aolaina i le ola e fa'avavau. O le a latou iloa le Keriso na fa'asatauroina pe a latou va'ai atu i le Keriso ua fa'amamaluina. O le a lē mafai lava ona fa'agaloina o lenei mea: o Lē e Ōna le mana na foafoaina ai ma fa'agaoioia ai lalolagi e lē mafaitaulia i le aoao o le vāteatea, o Ia lava lea na fa'amaulalo o Ia e Ia lava, ina ia si'itia a'e ai le tagata ua pa'ū. O le a lē galo iā i latou sa Ia tau'aveina le luma ma le masiasi o le agasala, ma sa ufiufiina ai fofoga o Lona Tamā, se'ia o'o ina momomo ai Lona finagalo i le ōi o le lalolagi ua fano, ma nutimomoia ai Lona soifua i luga o le satauro i Kalevario. O Ia lea o le Ālo pele o le Atua, le Silisili 'Ese o le lagi, o Lē sa fīafia kerupī ma serafi latou te ifo i ai. O Lē na faia le atulaulau uma, le Fa'amasino o mea uma lava, ua tu'u'esea e Ia Lona mamalu ma fa'amaulalo iā te Ia ona o le alofa i le tagata; o le a 'avea lava pea lenei matā'upu o se mea e fa'atupuina ai le maofa atoa ma le fia vivi'i a'e o atulaulau uma o le foafoāga atoa a le Atua. A o maimoa atu tagata 'ese'ese o le 'au fa'aolaina i lo latou Fa'aola ma va'aia ai le mamalu e fa'avavau o le Tamā o lo o susulu mai i Ōna fofoga; a'o latou maimoaina fo'i Lona nofoāli'i e mai le vavau e o'o lava i le fa'avavau, ma ua latou iloa ai o Lona malō e leai sona gata'aga, o le a latou 'alalaga loa i le pese: "Ua tataua lava 'Oe, ua tataua lava 'Oe le Tama'i Mamoe na fasia, ma ua E fa'atauina i matou mo le Atua e ala i Lou toto tāua!"

O le mea na latou lē malamalama ai e fa'atatau i le satauro, ua 'avea nei lea matā'upu ma fa'amalamalama'aga o isi mea uma na latou lē malamalama ai. O uiga o le Atua sa fa'atutumuina ai i tatou i le mata'u ma le fefe, ua matagofie mai nei ma ua tatou tosina atu i ai talu ai le malamalama ua susulu mai Kalevario. Ua va'aia nei o le alofa tunoa o le Atua, ma Lona fa'apalepale, ma Lona alofa fa'amātua, e ō gatasi lava ia uiga ma Lona pa'ia, ma Lana amiotonu, atoa ma Lona mana. A o tatou va'aia le matalasi, le maua luga ma le fa'aeaina o Lona nofoāli'i, ua tatou va'aia fo'i Lona alofa i ōna fa'aaliga 'ese'ese, ona tatou maua ai lea o se malamalama'aga fou o le fa'a'upuga "Lo Matou Tamā e".

O le a tatou malamalama ai fo'i i le pogai na lē uia ai e le Silisili 'Ese se isi ala mo lo tatou fa'aolataga, se'i vaganā ai le tu'uina mai o Lona lava Ālo. O le tau i Lona faia o lenei taulaga o Lona 'oli'oli lea i le fa'atutumuina o le lalolagi i ē ua togiolaina, o ē pa'ia, o ē fīafia, o ē o le a ola pea e fa'avavau. O le i'uga o le finauga a le Fa'aola ma agaga o le pouliuli, o le 'oli'oli lea mo ē ua togiolaina, ma i'u atu ai i le vi'iga o le Atua i augātupulaga uma o le ola e fa'avavau. Ua fa'apea lava le tāua o se agaga e to'atasi i le silafaga a le lagi, ua fa'amalieina ai le finagalo o le Tamā i le tau ua faia mo le togiola. Ua silasila atu fo'i Keriso i fua o Lana taulaga tautele, ona fa'amalieina ai lea o lona finagalo.

'Ou te tepa taula'i i lea aso tele pe a afio mai Keriso i āo o le lagi e laved'iina Ōna tagata mai le leaga o lenei lalolagi ma le mata'utia o le taimi o puapuagā o lo'o i o tatou luma.

Li'o le Tali:

Ioe

Lē Mautonu

O lo'o 'ou va'ai aga'i i luma ma le fīafia tele e talia le vala'au a Keriso, "Ō mai, outou ua fa'amanuiaina e Lo'u Tamā, ia fai mo outou tofi le malō ua saunia mo outou a o le'i fa'avaeina le lalolagi" (Mataio 25:34).

Li'o le Tali:

Ioe

Lē Mautonu

Manatū mai le Su'esu'ega

Tatalo e Mana'omia

Tali o Tatalo

This image shows a single sheet of white paper with horizontal ruling lines. The lines are evenly spaced and extend across the width of the page. There are no margins, text, or other markings on the paper.

O le Fa'atafunaga o le Lalolagi - 12

(1) O LE Ā LE FE'AU O LE ALOFA TUNOA UA FA'ASALALAU MAI LE LAGI IĀ I LATOU O Ē O LO'O MULIMULI MA LE LĒ ILOA TALITONUGA SESĒ A PAPELONIA?

Ua 'ou fa'alogofa'i i le tasi leo mai le lagi, ua fa'apea mai, Lo'u nu'u e, ia outou ō 'ese iā te ia, ina ne'i fa'atasia outou i āna agasala, ina ne'i tofusia fo'i outou i ōna mala.

Fa'aaliga 18:4

Ona mulimuli atu ai lea o le tasi agelu, ua fa'apea atu, Ua pa'ū, ua pa'ū Papelonía o le 'a'ai tele, auā ua ia fa'ainu i nu'u uma i le uaina o le to'asā i lana faita'aga.

Fa'aaliga 14:8

(2) O Ā FA'AMASINOGA O LE A PA'Ū I LUGA O PAPELONIA MA I LATOU O Ē TŪMAU PEA I ĀNA A'OA'OGA?

O le mea lea e o'o mai ai i le aso e tasi ōna mala, o le oti, ma le fa'anoanoa. ma le oge; e susunuina fo'i o ia i le afi; auā e malosi lava le Ali'i le Atua o Lē fa'asala iā te ia.

Fa'aaliga 18:8

(3) Auā ua feinu nu'u uma i le uaina o le to'asā i lana faita'aga, ua faita'aga fo'i ma ia tupu o le lalolagi, o le faula'iga o āna mea fa'afiafia ua tamao'aiga ai ē ua fa'atau 'oa o i le lalolagi.

(4) Ua 'ou fa'alogofa'i i le tasi leo mai le lagi, ua fa'apea mai, Lo'u nu'u e, ia outou ō 'ese iā te ia, ina ne'i fa'atasia outou i āna agasala, ina ne'i tofusia fo'i outou i ōna mala.

(5) Auā ua pa'i atu āna agasala i le lagi, ua manatua fo'i e le Atua āna amio leaga.

(6) Ia outou tau'i atu iā te ia ia pei ona tau'i mai e ia iā te outou, ia outou tau'i fa'alua iā te ia e tusa ma āna galuega; o le ipu fo'i na liligi mai ai e ia, ia outou liligi fa'aluaina atu ai iā te ia.

(7) E pei ona mitamita o ia iā te ia, mona ua fa'afiafia o ia iā te ia, ia fa'apea ona outou tu'uina atu iā te ia o le puapuagā ma le fa'anoanoa. Auā ua fa'apea ifo ia i lona loto, 'Ou te nofo nei o le tupu fafine, 'ou te lē se fafine ua oti lana tane, 'ou te lē iloa lava se fa'anoanoa;

(8) O le mea lea e o'o mai ai i le aso e tasi ōna mala, o le oti, ma le fa'anoanoa. ma le oge; e susunuina fo'i o ia i le afi; auā e malosi lava le Ali'i le Atua o Lē fa'asala iā te ia.

(9) O tupu fo'i o le lalolagi ē na faita'aga ma fa'afiafia i latou fa'atasi ma ia, latou te taufaitagi iā te ia ma taufaitagitu'i ona o ia, pe a latou iloa atu le asu o lona susunuina;

(10) E tutū mamao i latou ona o le fefe i lona puapuagā, e fa'apea atu, Auē, auē Papelonía e, le 'a'ai tele ma le 'a'ai malosi! auā o le itu aso e tasi ua o'o mai ai lau sala.

(11) O fa'atauoa fo'i i le lalolagi e taufaitagi i latou ma fa'anoanoa ona o ia; auā e lē toe fa'atau e se tasi a latou oloa;

(12) O le oloa auro, ma ario, ma ma'a tāua, ma penina, ma 'ie vavae, ma 'ie pāuli, ma le silika, ma le 'ie mūmū, ma la'au tuina uma, ma ipu nifo elefane uma, ma ipu la'au matuā tāua uma, ma le 'apa memea, ma le u'amea, ma le maremaru,

(13) ma kinamomi, ma mea manogi, ma le suāu'u manogi, ma le pulu lipano, ma le uaina, ma le u'u olive, ma le falaoa lelei, ma le saito, ma manu, ma mamoe, ma solofanua, ma nofoa fa'ata'avalevale, o tino fo'i atoa ma agaga o tagata.

(14) Ua te'a fo'i ma 'oe o fua na e tu'inau i ai, ua te'a fo'i ma 'oe mea lalelei uma ma mea pupula, e te lē toe maua lava ia mea.

(15) O E fa'atau ia mea, o ē tamao'aiga ona o ia, latou te tutū mamao ma le fefe i lona puapuagā, o lo'o taufaitagi ma fa'anoanoa,

(16) o lo'o fa'apea atu, Auē, auē le 'a'ai tele, na ofu i le 'ie vavae ma le pāuli, ma le mūmū, na teteu fo'i i auro, ma ma'a tāua ma penina;

(17) auā o le itu aso e tasi ua fa'aumatia ai le oloa ua sili ona tele. O tautai uma, atoa ma tagata uma o i va'a, ma auva'a, atoa uma ma e feoa'i i le vasa, ua tutū mamao i latou.

Fa'aaliga 18:3-17

O fa'asalaga ia e o'o iā Papelonía i le aso tele o le to'asā o le Atua. Ua tumu le ipu o lana amioleaga; ua o'o mai nei le itūaso o lona fa'asalaga. O le taimi e fa'alogoina ai le si'ufofoga o le Atua ua lavea'iina ai Lana fanau, o le taimi fo'i lea fa'ato'a tete'i ai ma fāgua mafaufau o le 'au amioleaga. A o le'i tapunia le faitoto'a o le alofa tunoa o le Atua, sa fa'atauasoina i latou e Satani i ana fa'asesēga, ma sa latou sa'ili'ili mo ni 'alofaga mo a latou amioleaga. Na femitai le 'au

mau'oa ona o fa'amanuiāga e tele ua fa'aeaina ai lo latou tulaga; peita'i na maua a latou mea e ala i le solia o le tulafono a le Atua.

(3) O LE Ā LE TA'IALA FA'AVAE UA SOLIA MA LE ILOA E I LATOU O Ē O LE A FA'AUMATIA?

Sa fai A'u ma tagata 'ese, a e le'i talia A'u e outou; na 'Ou lē lavalavā, a e tou te le'i fa'a'ofuina a'u; na 'Ou ma'i, na A'u i le falepuipui fo'i, a e tou te le'i asiasia A'u.

Ona tali mai ai lea o i latou fo'i iā te Ia, e fa'apea mai, Le Ali'i e, o anafea na matou iloa ai 'Oe ua fia 'ai, pe fia inu, po o se tagata 'ese, pe lē lavalavā, po o ma'i, po o i le fale puipui, ma matou le'i 'au'auna atu iā te 'Oe?

Ona tali atu ai lea o Ia iā te i latou, e fa'apea atu, E moni, 'Ou te fai atu iā te outou, auā na outou lē faia i le tasi o ē aupito ititi o i latou nei, o A'u lea ua outou lē faia i ai.

Mataio 25:43-45

A ia outou mua'i sa'ili le malō o le Atua ma Lana amiotonu; ona fa'aopoopoina atu lea o ia mea uma iā te outou.

Mataio 6:33

Latou te le'i fafaga ē na fia 'ai, latou te le'i fa'alavalava i ē matitiva, latou te le'i faia le amiotonu, latou te le'i fiafia i le alofa. Na o lo latou lava fa'aeaina na latou popole i ai; na latou manana'o i vi'iga mai tagata. A o lenei ua saei uma 'ese e le Atua mea na maua ai lo latou tulaga fa'aeaina, ma ua tutū mai nei i latou e leai ma se mea e tasi i o latou lima, leai fo'i ma so latou lafitaga. Ua latou ofo ma matata'u a'o latou molimauina le fa'atafunaga o a latou tupua, o tamao'aiga lava ia na latou fa'asili i luga a'e o le Atua. Ua leva ona latou sa'ilia le tamao'aiga ma fa'afiafiaga o le lalolagi, a e galo ai ona latou sa'ilia o le tamao'aiga fa'aleagaga. A o le ā nei le i'uga? Ua ma'ima'u o latou olaga; ua liua nei o se mea 'o'ona a latou fa'afiafiaga ma a latou 'oa. Ua mou atu nei i se taimi pu'upu'u le fa'aputugā'oa na pupū i ai o latou loto i le olaga atoa.

(4) O LE Ā LE SUIGA E TUPU I LE OLAGA PE A SALAMŌ FA'AMAONI LE TAGATA AMIOLEAGA?

Afai e fa'amaulalo Lo'u nu'u e ua ta'ua i Lo'u igoa, ma latou tatalo, ma sa'ili'ili iā te A'u, ma liliu 'ese i o latou ala leaga, ona 'Ou fa'alogi mai lea mai le lagi, ma fa'amagalo i a latou agasala, ma fa'aolaina lo latou nu'u.

II Nofoa'iga Tupu 7:14

Ia lafo'ai e lē ua amio leaga lona ala, ma le tagata agasala ia lafoa'i e ia ōna manatu; a ia fo'i mai iā Ieova, ona alofa mai lea o Ia iā te ia; ia fo'i mai i lo tatou Atua, auā Na te matuā fa'amagaloina.

Isaia 55:7

Ua tumu le 'au amioleaga i le salamō ona ua manumalō le Atua. E lē o a latou amioleaga ua latou salamō ai nei, a'o le fa'asalaga o le a o'o mai i o latou luga. Peita'i o lo o latou taumafai pea lava e sa'ili se auala e mafai ai ona latou si'itaua atu i le Atua.

(5) O LE Ā LE FOLAFOLĀGA OFOFOGIA O LE A FA'ATAUNU'UINA I Ē AMIOTONU?

Auā o Ia na te lavea'iina 'oe i le mailei a lē fai manu, ma le fa'ama'i e oti ai.

E ufiufi ifo o Ia iā te 'oe i Ōna apa'au, e te sulufa'i fo'i i lalo o Ōna apa'au; e faia Lona fa'amaoni ma āu talipupuni ma mea e puipuiina ai 'oe.

Salamo 91:3, 4

Ua va'ava'ai atu nei le lalolagi i tagata na latou fa'atauemu i ai ma fia fasioti i ai; ua latou va'ava'ai atu e lē o āfāina i latou i le fa'ama'i, po o afā, po o mafui'e. Ua 'avea le Atua o se afi e oti ai le 'au amioleaga; peita'i o le Atua lava lea ua 'avea o le sulufa'iga mo Lana fanau.

(6) O LE Ā LE FA'AMASINOGA O LE A TU'UINA ATU I LUGA O TA'ITA'I FA'ALEAGAGA, O Ē LĒ AMANA'IA PEA LE 'UPU MONI MA UA TA'ITA'I SESĒ A LATOU LAFU?

O i talofa i le 'au leoleo mamoe o ē ua fano ai ma fa'ata'ape'apeina mamoe na 'Ou fagaina! o lo'o fetalai mai ai Ieova.

O le mea lea ua fa'apea ona fetalai mai ai o Ieova le Atua o Isara'elu i le 'au leoleo mamoe o ē leoleo i Lo'u nu'u, Ua outou fa'ata'ape'apeina La'u lafu mamoe, ma tulia i latou, ma ua lē asiasi iā te i latou; fa'auta, 'Ou te tau'i atu iā te outou ona o le leaga o a outou amioaga, o lo'o fetalai mai ai Ieova.

Jeremia 23:1, 2

E i ai le 'aufailotu latou te le'i fia folafolaina le 'upu moni talu ai lo latou naunau i vi'iga mai tagata. O le taimi nei ua latou va'ava'ai manino atu ai i le uiga moni ma le i'uga leaga o a latou a'oa'oga. Ua manino mai nei sa silafia e le Atua mea uma na latou faia - a'o latou lauga atu i pulela'a, a'o latou savavali i le auala, a'o latou feoa'i ma talanoa ma tagata, na silafia nei mea uma e le Atua. O mea uma na latou faia - o lagona o le loto, o mea uma na latou tusia, o 'upu uma na latou faia, o galuega uma na fa'anofo ai tagata i le agaga fa'affilemū i le agasala, o nei mea uma na 'avea o fatu na latou lūlūina. Lenei la ua latou va'ava'ai i le i'uga o la latou galuega a'o si'osi'omia i latou e le to'atele o tagata ua saunia nei mo le fa'afanoga.

(7) O LE Ā LE MEA UA LĒ MAFAI ONA FA'AILOA MAI E NEI TA'TA'I LĒ FA'ATUATUA?

E moni lava Lau afioga talu le amataga; e fa'avavau fo'i Āu fa'amasinoga tonu uma lava.

O Lau amiotonu o le amiotonu e fa'avavau lea; o le mea moni fo'i Lau tulafono.

Salamo 119:160, 142

Ua iloa nei e le 'aufailotu ma tagata, ua leva ona latou fouvale i le Atua, le Puna o tulafono amiotonu uma. O lo latou 'ave'esea o le tulafono a le Atua, ua muli'auloa mai ai le afe ma afe o amioleaga 'ese'ese - o misa, o taua ma fevaevaea'iga, se'ia o'o ina ua tumu le lalolagi i amioleaga 'ese'ese. O le va'aiga lea ua iloa nei e i latou ua te'ena le 'upu moni a e filifilia mea sesē. E lē mafai e se gagana ona fa'amatalaina le fa'anaunauga ua o'o ifo nei iā i latou nei ona o le mea ua latou fa'ama'imauiina, o le ola e fa'avavau. O ē sa si'i i luga e le lalolagi ma latou 'ave i ai vi'iga ona o a latou atamai ma agava'a, ua 'ese nei la latou va'ai i ia taleni. Ua latou iloa nei ua latou lē maua le ola e fa'avavau ona o a latou soligatulafono. Ua latou to'otutuli ifo nei i luma o le 'au fa'amaoni, o ē na latou fa'atauemu ma ula i ai, ma ua latou fai mai e moni lava e alofa le Atua iā i latou.

(8) O LE A FA'APEFEA ONA TALI Ē UA LĒ ILOA E I LATOU NA FA'ASESĒINA I LATOU?

O lea aso fo'i e i ai iā te i latou le atuvalu tele mai iā Ieova; ona ta'itasi ai lea ma tago o le tasi i le lima o le tasi; e ta'itasi fo'i ma si'i i luga o latou lima o le tasi i le tasi.

Sakaria 14:13

Ua iloa nei e tagata ua fa'asesēina i latou. Ua taufai tu'ua'i e le tasi le isi ona o le tulaga ua latou o'o nei i ai. Peita'i ua latou tutū nei ma latou tusi lima fa'atasi i a latou faife'au. O faife'au nei na latou vavalō maia 'upu suamalie ma 'upu lamolemole; o i latou ia na latou ta'ita'iina tagata ina ia latou fa'alēaogāina le tulafono, ma sauāina ē na tasi fa'apa'ia i ai. Ua leai nei se mea e sosola i ai nei faife'au. Ua latou fa'aali atu nei i luma o le lalolagi uma la latou galuega o le taufa'asesē. Ua tumu tagata i le ita ma le fia fa'ao'olima. Fai mai la latou 'alaga: "Ua matou fano talu ai outou," ma ua latou liliu atu loa i nei faife'au pepelo. O tagata nei na latou si'i i latou i luga ma vi'ia i latou; o tagata lava fo'i nei ua liliu atu nei i le vasega o faife'au ma fai i ai 'upu leaga ma fetū'u. O lima o tagata nei na fa'apaleina i latou i le pale o vi'iga; o lima lava ia ua sisi'i a'e nei mo le fasiga o i latou. O a'u'upega na fa'amoemoe e fasiotia ai le fanau a le Atua, ua fa'aaogāina nei e fa'a'uma ai le 'aufailotu pepelo. Ua na o le toto masa'a ma fefasia'iga ua va'aia i luga o le fogā'ele'ele uma.

(9) PE A MAVAE ONA TAPUNIA LE TAIMI O TOFOTOFOGA, O AI O LE A AOFIA AI PE A TOE FA'AUMIUMI LE FINAUGA I LE VĀ O LE ATUA MA SATANI?

E o'o le vāvāō i tulu'iga o le lalolagi; auā o lo'o iā Ieova le finauga ma nu'u 'ese, e fa'amasinoina e Ia tagata uma; e tu'uina atu e Ia o ē amio leaga i le pelu, o lo'o fetalai mai ai Ieova.

Jeremia 25:31

Ua ono afe tausaga talu ona faia o le finauga tele - o le taua lea i le vā o Keriso ma Āna 'avefe'au fa'alelagi, ma Satani ma ana 'au o le pouliuli. O lea taimi umi na galulue ai Keriso ma agelu i le tu'uina mai o fe'au o le lapata'iga ma le malamalama, ina ia lavea'iina ai le fanau a tagata. Lenei la ua fa'ai'uina filifiliga a tagata uma; ua 'ato'atoa nei le so'o fa'atasi a le 'au amioleaga ma Satani i le faiga o la latou tete'e i le Atua. Ua o'o mai nei le itūaso e fa'ailoa ai le sa'o ma le tonu o le pule a Lana tulafono ua solipalaina e le lalolagi. E lē na o Satani e a'afia i le taua; e a'afia ai fo'i tagata uma. Fai mai le perofeta: "Auā o lo'o iā Ieova le finauga ma nu'u, ...e tu'uina atu fo'i e Ia ē amioleaga i le pelu."

(10) O LE Ā LE MEA O LE A TUPU I Ē AMIOLEAGA A O LATOU VA'AIA KERISO O LO'O AFIO MAI I ĀO?

O lenei, o lo'u mana'o ia tatalo o tane i mea uma lava, o lo'o sisi'i i luga o lima le agasala, ma ia lē ita, ma ia lē masalosalo.

II Tesalonia 2:8

Ua latou fai atu fo'i i mauga ma papa, Mafuli mai ia iā te i matou, ma tanumia i matou ai le silafaga a Lē ti'eti'e i le nofoāli'i, ma le to'asā o le Tama'i Mamoe. Auā ua o'o mai le aso tele o Lona to'asā, o ai fo'i sē na te mafaia ona tū atu?

Fa'aaliga 6:16, 17

O le afio mai o Iesu e fano ai le 'au amioleaga i le lalolagi atoa - e fano i latou i le mānavā mai o Ōna fofoga, ma le pupula o Lona mamalu. Ua 'ave e Keriso Ōna tagata i le 'a'ai a le Atua, a ua gaogaoa'i'i le lalolagi, ua leai ma se isi o totoe ai. “Fa'auta e fa'atafunaina e Ieova le lalolagi uma, Na te fa'afaōina, Na te fa'ata'ape'apeina fo'i ē o nonofo ai.” “E matuā vetea lava le nu'u; e matuā fa'atafunaina lava; auā ua fetalai mai ai Ieova” (Isaia 24:1, 3).

(11) O LE Ā LE MAFUA'AGA FA'AVAE O LE FA'A'UMATIAINA O LE 'AU AMIOLEAGA?

Ua leaga le nu'u i ē o nonofo ai; auā ua latou solia tulafono; ua latou liliu 'ese le sauniga; ua latou solia le feagaiga e fa'avavau.

O le mea lea e fa'a'umatia ai le nu'u i le fa'afano, ua fa'asalaina fo'i ē o nonofo ai; o le mea lea ua susunuina ai ē o nonofo i le nu'u; e to'aititi fo'i tagata ua totoe.

Isaia 24:5, 6

“...O le mea lea e fa'a'umatia ai le nu'u i le fa'afanoga, ua fa'asalaina fo'i ē o nonofo ai; o le mea lea ua susunuina ai ē o nonofo i le nu'u.” (Mo le Feagaiga e Fa'avavau va'ai i le Esoto 31:16, 17; 20:8, 11; Esekielu 20:12; Isaia 66:22, 23).

(12) O LE Ā LE 'A'AFIĀGA O LE LAU'ELE'ELE O LE A VA'AIA I LE AFIO MAI O LE ALI'I?

A e sau le aso o le Ali'i pei o se gai i le pō, e mavae'eseina ai le lagi ma le gogolo tele, e te'a 'ese'ese ai fo'i o mea na fai a'i ina ua mū; o le lalolagi fo'i ma galuega o i ai e susunuina lava.

II Peteru 3:10

Ua pei le lalolagi o se 'a'ai na tau ai se taua tele; ua pei o se atunu'u ua fa'aleagaina e se afā tele. O 'a'ai tetele ma nu'u ua to'ulu uma i lalo i le mafui'e; o la'au tetele ua lia'iina i luga ma a'a. Ua tumu le fogā'ele'ele i 'alā ma papa ua asu mai i ai e le sami, po ua to'u'ulu mai fo'i i mauga ma isi vaega o le 'ele'ele. Ua ta'atitia mai nei ni ana tetele e fa'aailoga ai mea na tutū ai mauga ua talia'i 'ese nei mai o latou fa'avae.

(13) O LE Ā LE I'UGA O SATANI INA UA UMA LE AFIO FA'ALUA MAI O KERISO?

Ua pu'e fo'i e ia le tarako, o le gata tuai, o le ti'āpolo lea ma Satani, ua ia fusifusi fo'i iā te ia i tausaga e afe.

Ua ia lafo fo'i iā te ia i le tō e lē gata, ua pupuni fo'i iā te ia, ma tu'uina atu le fa'amaufa'ailoga i ōna luga, ina ia lē toe fa'asesēina e ia o nu'u, se'ia atoa ia tausaga e afe; a mavae fo'i ia, e tataua ona tatalaina o ia i nai aso.

Fa'aaliga 20:2, 3

Ua fa'ataunu'uina nei le mea lea ua fa'aailoa mai lona fa'atusa, i le toe sauniga o le Aso o le Togiola i le nu'u o Isara'elu. Na mae'a loa le sauniga i le Mea e Sili ona Pa'ia, ma ua 'ave'esea agasala a Isara'elu mai le malumalu, e ala i le toto o le taulaga mo agasala, ona aumaia loa lea o le 'oti ola i luma o le Ali'i. Ua fa'ae'e lima o le faitaulaga sili i luga o le ulu o lenei 'oti a'o molimauina e le fa'apotopotoga o le nu'u, ona fa'aali lea e le faitaulaga sili agasala uma ma soligatulafono uma a le nu'u o Isara'elu i luga o le ulu o lenei oti (Levitiko 16:21). E fa'apenā fo'i pe a mae'a le galuega o le togiola i le malumalu i le lagi. O le a fa'ae'e atu i luga o Satani agasala uma a le 'au fa'aolaina, a'o molimauina e le Atua ma le 'au agelu a le lagi, fa'apea ma le 'au fa'aolaina. O le a faia le folafolaga e fa'aailoa mai ai o Satani e pa'ū i ai le sala o agasala uma na faia e le fanau a le Atua, talu ai o ia na fa'aosoosoina i latou ina ia faia nei agasala. E pei lava ona 'ave le 'oti ola i se nu'u lē 'ainā, o le a fa'apenā fo'i ona fa'aunu'u Satani i le lalolagi, o se lalolagi ua fa'atafunaina e mala ma mafui'e, ma ua lē o toe nofo ai nei se tagata.

(14) O Ā FA'AGAOIOIGA E FA'ATAGAINA E LE ATUA O LE A MAFAI ONA FAIA E SATANI I LE AFE TAUSAGA A O FA'APOLOGAINA I LE LALOLAGI?

Ua ia lafo fo'i iā te ia i le tō e lē gata, ua pupuni fo'i iā te ia, ma tu'uina atu le fa'amaufa'aailoga i ōna luga, ina ia lē toe fa'asesēina e ia o nu'u, se'ia atoa ia tausaga e afe; a mavae fo'i ia, e tataua ona tatalaina o ia i nai aso.

Fa'aaliga 20:3

E afe tausaga o le a nonofo ai Satani ma āna 'au i le lalolagi ua tu'ufua. Na o le lalolagi lava lenei o le a mafai ona fealua'i ai Satani. O le a lē fa'atagaina o ia e fai āna fa'aosoosoga i isi lalolagi e le'i pa'u'ū. O le uiga tonu lea o le fa'a'upuga ua saisaitia o ia i le lalolagi mo tausaga e afe. Ua lē toe i ai nisi i le lalolagi na te fa'aailoa i ai lona mana ma lona malosī. Ua matuā lē mafai lava ona faia lana galuega fiafia o le tau fa'asesē sa faia mo le tele o nei augātupulaga uma.

E ono afe tausaga o gatete le lalolagi i le galuega fouvale a Satani. E ono afe tausaga o gasolosolo atu le fanau a le Atua i lona falepuipui. Semanū na te taofiofia ai i latou fa'atagataotaua e fa'avavau pe ana lē afio mai Keriso ma fa'asa'oloto i ē na ia tu'uina i lona falepuipui. E o'o lava i tagata amioleaga, ua lē mafai e Satani ona fai i ai se mea. Ua fa'apenā ona nonofo ai na o Satani ma āna 'au i le lalolagi, ina ia latou manatunatu loloto ai i le leaga ma le malaia na aumaia e le agasala. “E ta'atitia fo'i tupu uma o nu'u i o latou tu'ugamau; ...a'o oe, ua lafoa'iina oe, ua leai sou tu'ugamau, ua pei o se tatupu ua 'inosia. ...E lē fa'atasia oe ma i latou i le tu'ugamau, auā ua e fa'a'umatia lou lau'ele'ele, ua e fasiotia fo'i lou nu'u.” (Isaia 14:18-20).

E afe tausaga o le a fealualua'i ai Satani i luga o le lalolagi ua fa'atafunaina, se'ia va'ai lelei ai o ia i le mea ua o'o i ai lana fouvalega i le tulafono a le Atua. O le a tigāina o ia i ona puapugā i lea taimi. Talu mai lava le amataga o le agasala, e le'i i ai se taimi na fa'aalu e Satani e mafaufau loloto ai i lana mea ua fai. Peita'i ua leai nei sona malosī, ma ua tu'ua nei o ia e manatunatu loloto i le galuega tele na ia faia talu mai le taimi na ia fouvale ai i le faigāmalō a le lagi. Ua ia va'ai nei ma le mata'u i le lumana'i, i le taimi e fa'asalaina ai o ia ona o mea leaga uma na ia faia, atoa ma amioleaga uma na ia fa'aosoina tagata latou te faia.

(15) O LE Ā LE ITU'AIGA GALUEGA O LE A FEAGAI AI MA Ē FA'AOLAINA MO TAUSAGA E AFE?

Na a'u iloa fo'i nofoāli'i ma ua latou ti'eti'e ai, ua tu'uina atu fo'i le fa'amasinoga iā te i latou; na a'u iloa fo'i agaga o ē ua vavae'eseina o latou ūlu ona o le mau iā Iesu ma le afioga a le Atua, o ē na lē ifo i le manu je'ai po o lona fa'atagata, na lē talia fo'i le fa'aailoga i o latou muāulu po o latou lima; ua latou ola fo'i, ma ua fai ma tupu fa'atasi ma Keriso i tausaga e afe.

Fa'aaliga 20:4

O le vā o le toe tūtū mai o ē amiotonu ma le toe tūtū mai o ē amioleaga, o le vaitaimi lea o le afe tausaga e fai ai le fa'amasinoga o le 'au amioleaga. E mulimuli mai lenei fa'amasinoga i le afio fa'alua mai o Iesu, e tusa ai ma le 'upu a Paulo. Fai mai Paulo: “Aua tou te fa'amasino i se mea e tasi se'ia o'o mai le itūaso ua atofaina, se'ia afio mai le Ali'i. O Ia na te aumaia i le malamalama mea ua natia i le pouliuli, ma fa'aalia mealilo o loto” (I Korinito 4:5). E tu'uina atu fo'i le fa'amasinoga i le 'au pa'ia a le Silisili 'Ese pe a maliu mai Lē Mai Anamuā Ōna aso, e tusa ai ma le fa'amatalaga a Tanielu (Tanielu 7:22). O le taimi lea o lo o nofo tupu ai le 'au amiotonu i le lagi - ua 'avea i latou ma tupu ma ositaulaga i le Atua. Fai mai Ioane i le Fa'aaliga: “Na a'u iloa fo'i nofoāli'i, ma ua latou ti'eti'e ai, ua tu'uina atu fo'i le fa'amasinoga iā te i latou”. “E 'avea i latou ma faitaulaga a le Atua ma Keriso, latou te fai ma tupu fo'i fa'atasi ma ia i tausaga e afe” (Fa'aaliga 20:4, 6). O le taimi tonu lea e fa'amasinoina ai e le 'au pa'ia le lalolagi e pei ona valo'ia mai e Paulo i 'upu nei: “E fa'amasinoina ai le lalolagi e le 'au pa'ia” (I Korinito 6:2). Ua latou fesoasoani iā Keriso i le fa'amasinoga o le 'au amioleaga. Latou te fa'atusatusa mea ua fai e le 'au amioleaga i le Tusi o le Tulafono, le Tusi Pa'ia lea, ma faia le fa'ai'uga e tusa ai ma mea ua faia i o latou tino. O le a tusia fo'i i le tusi o le oti le fa'asalaga o le a o'o i e amioleaga.

(16) O AI O LE A AOFIA AI I LENEI FA'AMASINOAGA?

Tou te lē iloa ea e fa'amasinoina le lalolagi e le 'au pa'ia? Afai fo'i e fa'amasinoina le lalolagi e outou, e lē tusa ea outou ona fai o fa'amasinoga i mea aupito iti?

Tou te lē iloa ea tou te fa'amasino i agelu? E lē fa'amasino ea i mea a le olaga nei i se ā?

I Korinito 6:2, 3

E fa'amasinoina fo'i Satani ma agelu leaga e Keriso ma Ōna tagata. Fai mai Paulo: “Tou te lē iloa ea tatou te fa'amasino i agelu?” Ua molimau mai fo'i Iuta: “O agelu fo'i o ē na lē taofi i lo latou mamalu, a ua tu'ua e i latou le mea

Ua Fa'ai'uina le Finauga - 13

O le i'uga o tausaga e afe e toe fo'i mai ai Keriso i le lalolagi. E fa'afeaoina mai o Ia e le 'au fa'aolaina fa'apea ma 'au a agelu. A o afio ifo o Ia i le mamalu mata'utia, ua Ia vala'auina loa le 'au amioleaga o lo o oti ina ia tula'i mo lo latou fa'asalaga. Ua latou tutū a'e nei, o le motu o tagata, e to'atele; e lē mafaitaulia i latou, ua pei o le oneone o le sami. Se 'ese'esega ina 'a vāvāmamao o i latou nei ma ē na fa'atutū mai i le ulua'i toe tū! Na toe tūtū mai ē amiotonu i le tino talavou e fa'avavau ma le matagofie. Peita'i ua toe tūtū mai le 'au amioleaga ma fa'a'ailoga o fa'ama'i atoa ma le oti.

(1) O Ā 'UPU O LE A FA'ALOGOINA MAI LAUGUTU O Ē LĒ TALITONU A E UA LĒ TOSINA E LE MANA O LE 'UPU MONI?

Fa'auta, e tu'ua lo outou fale, e fa'atafunaina; a e moni, 'Ou te fai atu iā te outou, tou te lē iloa mai lava A'u, se'ia o'o atu i le aso tou te fai ane ai, 'Ia manuia Lē maliu mai i le suafa o le Ali'i.'

Luka 13:35

Ua liliu atu nei mata uma o lenei fa'apopotoga tele se'ia o latou va'ai i le mamalu o le Ālo o le Atua. Ua 'alalaga atu loa le 'au amioleaga i le leo e tasi ma fa'apea atu: “Ia manuia Lē o lo o afio mai i le suafa o le Ali'i.” E lē o le alofa iā Iesu ua mafua ai nei 'upu. O le manumalō o le 'upu moni ua sau ai nei 'upu i laugutu lē mamā. Na ō ifo le 'au amioleaga i o latou tu'ugamau ma le tete'e iā Keriso; lenei ua latou toe tūtū mai, o lo o tete'e pea lava iā Keriso i lo latou agaga fouvale. E leai se aogā o le toe tū'ua i ai o se avanoa latou te fo'ia ai mea na fa'alētonu i o latou olaga i le taimi ua mavae. Na tu'u i ai le olaga atoa, a e na latou fa'ama'a'a pea. Afai a e toe tatala i ai le faitoto'a o le alofa tunoa, o le mea lava e tasi o le a latou faia. O le a latou soli i poloā'iga a le Atua, ma latou faia le fouvale iā te Ia.

(2) O LE Ā LE MEA E ALU IFO MAI LE LAGI E PEI O SE "FA'ATO'ĀNOFOTANE UA TEUTEUINA MO LANA TANE"?

O a'u fo'i o Ioane na 'ou iloa le 'a'ai pa'ia, o Ierusalem fou, ua alu ifo mai le Atua i le lagi, ua saunia pei o se fa'ato'ānofotane ua teuteuina mo lana tane.

Fa'aaliga 21:2

O le a afio mai Keriso i luga o le mauga o Olive, le mauga lea na afio a'e ai o Ia i le lagi, le mauga lea na fa'amanatu atu ai e agelu i le 'au so'o le folafolaga o Lona toe afio mai. Fai mai le perofeta: “E afio mai lava Ieova lo'u Atua ma le 'au pa'ia fa'atasi ma "oe.” “E tū Ōna 'a'ao i lea aso i luga o le mauga o Olive, o lo o feagai ma Ierusalem i le itū i sasa'e; e vaeluaina fo'i le mauga o Olive i totonu ...o le vanu tele lava,” “E fai fo'i Ieova ma tupu i le lalolagi uma lava; o lea aso ua na o Ieova ai lava, ma Lona suafa e 'au tasi lea” (Sakaria 14:5, 4, 9). Na alu ifo mai le lagi le Ierusalem fou, i lona pupula matagofie, ma ua ta'atia loa i luga o le mea ua fa'amamāina ma saunia mo ia. Ona ulu atu loa lea i ai o Keriso ma le 'au pa'ia, fa'atasi ma le 'au agelu.

(3) O LE Ā LE FA'AGAOIOIGA O LE A TOE FAIA E SATANI I LE FA'AI'UGA O LE AFE TAUSAGA MA UA TOE TUTŪ A'E LE 'AU AMIOLEAGA?

Pe a atoa fo'i ia tausaga e afe, ona tatalaina lea o Satani ai le mea na puipuiina ai o ia. E alu atu fo'i o ia e fa'asesē i nu'u o i itū e fā o le lalolagi, o Koku ma Makoku, e fa'apopototo iā te i latou i le taua, ua pei o le oneone o le sami i latou ona to'atele.

Fa'aaliga 20:7, 8

Ua sauni atu loa Satani mo lana toe osofa'iga tele auā le sa'iliga o le pule aoao. Na lē fiasia Satani i le taimi na saisaitia ai na o ia i le lalolagi e aunoa ma se isi na te fa'asesēina. Peita'i ua malosī nei lona loto ina ua va'ai atu i le miliona ma miliona o le 'au amioleaga ua toe tūtū mai nei ma ua latou fa'atasi i lana itū. Ua tonu iā te ia lona lē fia to'ilalo i lenei taua. O le a na vaevaeina lenei to'atele i ni vaega'au 'ese'ese o le 'au amioleaga, ona fa'atulagaina lea o nei vaega'au uma i lalo ifo o lana tagāvai. O vaega'au uma nei o le a ala mai ai le fa'ataunu'uga o ana fuafuāga. Ua maua uma lava e Satani lenei to'atele i lalo o lana pule. O lo latou te'ena o Keriso, o lo latou talia lava lea o le pule a le ta'ita'i o le fouvalega. Ua latou tutū nei ma sauni mo ana fautuāga, ua latou sauni fo'i e fai ana fa'atonuga. Peita'i, e pei lava o lana galuega fa'asesē i le lagi, na te le'i fa'a'ailoa atu o ia o Satani. Fai mai lana fa'amatalaga o ia o le perenise e ōna le lalolagi lenei; fai mai ua 'ave'esē fa'amalosī e le Atua lona tofi. Ua ia ta'u atu i lenei motu o tagata o ia o le fa'a'ola; o lona mana fo'i ua toe tūtū mai ai nei i latou nai tu'ugamau; ua toetiiti ona ia lavea'iina loa lea o i latou mai le pule sauā.

Ua leai nei le Agaga o le Atua i le lalolagi e fa'alavelave i faiga a Satani, ma ua faia nei ana vavega pepelo ina ia talitonu ai tagata iā te ia. O ē vaivai ua ia fa'amālosia, ma ua fa'apenā ona maua ai tagata uma i lona agaga fouvale ma lona malosi. Ua ta'u atu i ana vaega'au uma lana fuafuāga o le a ia ta'ita'ia i latou e tau ma le togalauapi a le 'au pa'ia, ma latou ave fa'amālosia ai le 'a'ai o le Atua. Ua so'ona fiasia o ia a'o ia va'ai atu i le miliona ma miliona e lē mafaitaulia o ē ua fa'atutūina mai le oti. Fai mai o ia e leai se fa'alētonu o lo latou manumalō i le fa'ato'ilaloina o le 'a'ai, atoa ma le toe fa'atūina o lona nofoāli'i ma lona malō.

(4) O LE Ā LE MEA O LO'O FA'ATUSATUSA I AI E LE TUSI PA'IA LE MOTU O TAGATA E TO'ATELE UA LĒ ILOA?

E alu atu fo'i o ia e fa'asesē i nu'u o i itū e fā o le lalolagi, o Koku ma Makoku, e fa'apotopoto iā te i latou i le taua, ua pei o le oneone o le sami i latou ona to'atele.

Fa'aaliga 20:8

E i ai i lenā miliona ma miliona o tagata i latou na ola i luma atu o le lolo. O i latou o ni tagata tino e'ese ma e maoa'e fo'i lo latou atamamai. Peita'i na latou gaua'i atu i le pule a agelu leaga, ma sa fa'aaogāina ai o latou agava'a ma lo latou atamai e si'itia a'e ai i latou lava. O mea ofoofogia na latou faia, na vi'ia ai i latou e tagata. Peita'i o lo latou sauā ma a latou amioleaga na fa'aleagaina ai le lalolagi ma toetoe ai lava soloi'esea le fa'atusa o le Atua i tagata. O le pogai lea na soloi'esea ai i latou e le Atua mai le fogā'ele'ele.

Na i ai fo'i i lenā fa'apotopotoga tele tupu ma ta'ita'i'au o ē na latou fa'ato'ilaloina malō. O i latou o ni tagata totoa ma le malolosi; e le'i faia'ina lava a latou vaega'au i se taua. O ni ta'ita'i'au fa'amaualuluga ma le lē fia to'ilalo i se isi; o a latou fa'agaioiga na fefefe ai malō. Lenei ua toe tūtū mai i latou, e leai se suiga ua o'o i o latou uiga tuai. O le mea lava na gata ai o latou mafauauga i le taimi o lo latou oti, o inā lava ua toe fa'aaui ai nei. Ua toe sauniuni tau i latou e pei lava ona latou faia i le taimi na latou pa'u'ū ai.

Ua faia se talanoaga a Satani ma āna agelu, ona toe talanoa lea ma nei tupu ma ta'ita'i'au malolosi. Ua latou va'ai i lo latou malosi ma lo latou to'atele, ona latou fai mai lea e leai se fa'alētonu o lo latou manumalō i le 'a'ai ona e sili mamao le fuainumera o a latou vaega'au i lo le vaega'au o lo o i totonu o le 'a'ai. Ua latou fa'ata'itia loa a latou fuafuāga mo le osofa'ia o le Ierusalem Fou ina ia fai mo i latou le tamao'aiga ma le mamalu o le 'a'ai. Ua latou tau fai sauni nei mo le taua. Ua fausia a'u'upega o le taua e i latou ua i ai lea agava'a. O ta'ita'i'au malolosi ma le ta'uta'ua i lo latou poto ma o latou manumalō, ua latou fa'atulagaina nei lenei fa'apotopotoga tele i vaega'au 'ese'ese mo le taua.

(5) O LE Ā LE MEA O LE A TAUMAFAI LENEI 'AUTAU TO'ATELE O LO'O I LALO O LE TA'ITA'IGA A SATANI E FAI?

Ua ō a'e fo'i i latou i le mafolafola o le lalolagi, ua latou si'omia fo'i le to'agālauapi a le 'au pa'ia ma le 'a'ai ua fa'apelepeleina; ona alu ifo lea o le afi mai le Atua i le lagi, ua susunu ai iā te i latou.

Fa'aaliga 20:9

Ona sau loa lea o le fa'atonuga ina ia fa'agaioia loa le osofa'iga. Ua amata gaiou atu nei i luma lenei 'au tau e lē mafaitaulia. E leai se 'au tau ua fa'apea sona to'atele i le tala tu'ufa'asolopito atoa o le lalolagi. A tu'ufa'atasi uma 'au tau a malō 'ese'ese talu mai ona faia o taua i le lalolagi, e lē tusa lava ma le malosi ma le to'atele o lenei 'au tau. Ua ta'imua lava le ta'ita'i'au sili, o Satani lea, ma ua tu'ufa'atasia nei le malosi o āna agelu mo le toe osofa'iga tele lenei. Ona mulimuli atu ai lea o tupu ma ta'ita'i'au, atoa ma le miliona ma miliona ua fa'avasegaina lelei i lalo ifo o o latou ta'ita'i ua tofia. Ua latou la'a atu nei aga'i i le 'a'ai o le Atua; e leai ma se isi e fa'alētonu, ua fa'alogoma i le leo o le ta'ita'i. O le taimi lea na fa'atonuina ai loa e Keriso ina ia tapunia faitoto'a o le Ierusalem Fou. Ona si'osi'omia loa lea e vaega'au uma a Satani le 'a'ai ma sauni loa mo le osofa'iga.

Peita'i o le taimi lea ua toe fa'aali mai ai Keriso se'ia va'ava'ai atu iā te Ia Ōna fili. Ua tū mai nei e mamao ma maua luga i luga a'e o le 'a'ai, se nofoāli'i ua i luga o se fa'avae ua faia i le auro lelei. O luga o le nofoāli'i ua ti'eti'e mai ai le Ālo o le Atua ua si'osi'omia e le 'au pa'ia ma agelu o lona malō. E leai se gagana po o se peni e mafai ona fa'amatalaina le matagofie ma le matalasi o le mamalu ma le malosi o Keriso. Ua si'osi'omia Keriso i le mamalu o Lona Tamā. Ua fa'atutūina le 'a'ai o le Atua i Lona pupula, ma ua o'o atu lea pupula i tua atu o faitoto'a o le 'a'ai, ma ua fa'amalamalamaina ai le lalolagi atoa.

(6) O AI I LATOU UA FAITAUINA I LE MOTU O TAGATA E TO'ATELE O LO'O TUTŪ I LUMA O LE NOFOĀLI'I O LE ATUA?

Ona 'ou fa'apea atu ai lea iā te Ia, 'Le Ali'i e, ua e silafia.' Ona fa'apea mai ai lea o Ia iā te a'u, 'O i latou ia o ē ō mai nai le puapuagā tele, ua tā fo'i o latou ofu, ma ua fa'asinasinaina o latou ofu i le toto o le Tama'i Mamoe.'

Fa'aaliga 7:14

Ua pito atu i le nofoāli'i i latou na sili ona to'a'aga ma ma'elegā i le galuega a Satani, a ua se'i'esea mai i latou ua pei o se motumotu ua se'ia mai le afi, ma sa latou mulimuli atu ai i le Fa'aola ma o latou loto atoa, ma lo latou malosi atoa. Na pito atu i ai ē na ola i vaitaimi o a'oa'oga sesē ma le lē fa'amaoni o le lalolagi. Na latou usita'i pea i le tulafono a le Atua ma latou fa'a'ato'atoaina ai lo latou olaga fa'a-Kerisiano, e ui lava ua fa'alēaogāina lea tulafono e le lalolagi Kerisiano. O i latou ia e miliona ma miliona i augātupulaga uma o le lalolagi, o ē na maliliu fa'amaturō ona o lo latou fa'amaoni i le Atua. O tua atu o i latou ia na i ai le “motu o tagata e to'atele mai atunu'u uma, ma itū'aiga, ma nu'u, ma gagana 'ese'ese, e lē mafaitaulia e se tasi, ...ua latou tutū i luma o le nofoāli'i ma luma o le Tama'i Mamoe, ua 'o'ofu i latou i ofu sisina, ua i ai fo'i lau pama i o latou lima” (Fa'aaliga 7:9). Na latou tau le taua, ma ua latou manumalō. Na latou tamomo'e i le taufetūlaga, ma ua latou maua le tau. O le lau pama i o latou lima o le fa'atusa lea o lo latou manumalō, a'o le ofu sisina o le fa'atusa lea o le amiotonu a Keriso e aunoa ma se ila; ua 'avea nei mo latou lea amiotonu.

(7) O LE Ā LE FUAI'UPU O VI'IGA O LE A FA'ALOGAINA MAI LE 'AU FA'AOLAINA?

Ua latou 'alalaga fo'i ma le leo tetele, ua fa'apea atu, 'O i ai le fa'aolataga i lo tatou Atua o Lē ti'eti'e i le nofoāli'i, atoa ma le Tama'i Mamoe.'

Fa'aaliga 7:10

Ua pepese ma 'alalaga fa'afetai le 'au fa'aolaina; ma sa tali mai i lea itū ma lea itū o le lapotopototo o le lagi la latou vi'iga ua fa'apea mai: “O le fa'aolataga e pogai mai i lo tatou Atua o Lē ti'eti'e i le nofoāli'i, atoa ma le Tama'i Mamoe.” Na fa'aopoopo atu i lea fa'ane'etaga o leo o agelu ma serafi. A o va'ai le 'au fa'aolaina i le malosi ma le agaga taufa'aleaga o Satani, na fa'apenā ona latou iloa ua na o le malosi lava o Keriso na mafai ai ona latou manumalō. E leai ma se isi o le 'au fa'aolaina na fa'apea mai ua latou maua le fa'aolataga ona o se mea na latou faia po o se puapuagā na latou tigāina ai. O le fa'aolataga e pogai mai lo tatou Atua ma le Tama'i Mamoe - o le autū lea ma le totonugalemū o pese uma ma vi'iga o le fa'ane'etaga.

(8) O LE Ā SE MAFUA'AGA TĀUA O LE A TOE FA'ATUTŪ A'E AI LE 'AU AMIOLEAGA UA OTI?

Na a'u iloa fo'i o ē na oti, o tagatānu'u atoa ma ali'i, o tutū i luma o le Atua, ona fofola lea o tusi; ua fofola fo'i ma le tasi tusi, o le Tusi lea o le ola; ona fa'amasinoina ai lea o ē na oti i mea ua tusia i tusi, e tusa ma a latou amio.

Ua ava'e fo'i e le sami ē na oti sa i ai, ua ava'e fo'i e le oti ma seoli ē na oti sa i ai; e ta'itasi fo'i o i latou ma fa'amasinoina e tusa ma a latou amio.

Fa'aaliga 20:12, 13

Ua faia nei le fa'au'uga o le Ālo o le Atua a'o molimauina e le fa'apotopotoga o ē uma na nonofo i le lalolagi atoa ma le lagi. Ua tu'uina atu nei iā Keriso le pule aoao ma le mamalu silisili, o Ia o le Tupu o tupu. Ua mae'a atu lea, ona faia loa lea e Keriso o le folafolaga ua ta'u mai ai le fa'asalaga o i latou uma o ē ua fouvale i Lana faigāmalō, i latou o ē na solia Lana tulafono, i latou o ē na sauāina Ōna tagata. Fai mai le perofeta a le Atua: “Na 'ou iloa fo'i le nofoāli'i tele e sinasina, ma Lē o ti'eti'e ai, ua sosola 'ese le lalolagi ma le lagi i Ōna luma, e lē iloa fo'i se mea e tū ai i la'ua. Na 'ou iloa fo'i o ē na oti, o tagatānu'u atoa ma ali'i, o tutū i luma o le Atua, ona fofola lea o tusi; ua fofola fo'i ma le tasi tusi, o le tusi lea o le ola; ona fa'amasinoina ai lea o ē na oti i mea ua tusia i tusi, e tusa ma a latou amio.”

(9) O LE Ā LE MEA O LE A FA'AALIA MAI I LE FA'AMASINOFA TELE?

Auā tatou te tutū atu uma lava i luma o le nofoa fa'amasino o Keriso e tatau ai; ina ia ta'itasi ma talitali i mea na faia i le tino, e pei o mea na faia, pe lelei pe leaga.

II Korinito 5:10

O le taimi e talaia ai tusi a le lagi ma ua tepa atu ai Iesu i le 'au amioleaga, o le taimi lea ua latou lagona ai le leaga o agasala uma na latou faia. Ua latou iloa i lea taimi le mea tonu na sipa 'ese ai o latou vae mai le tapula'a amiotonu a le Atua; ua latou iloa i lea taimi le mamao ma le maulalo ua o'o i ai la latou solia o le tulafono a le Atua talu ai lo latou fa'amauiluga ma lo latou fouvale. Na latou ta'ita'ia isi e faia le agasala talu ai lo latou fa'amalieina o o latou tu'inanau agasala; na latou fa'a'ogāsesēina fa'amanuiāga a le Atua; na latou tauemuina 'au'auna a le Atua ma te'ena Āna lapata'iga;

o le ma'a'a o o latou loto na latou te'ena ai pea lava pea olega ma musumusuga a le Agaga o le Atua - ua tutū matamata tetele mai nei ia mea uma i o latou luma, e pei ua tusia i mata'i tusi afi.

(10) O Ā FA'AMAONIGA O LO'O FA'AMATALAINA I NEI FUAI'UPU O LE A MATATA'U AI LOTO O Ē UA LĒ ILOA I LE ASO O LE FA'AMASINOGA?

Ua 'inosia ma tu'ulafoa'ina o Ia e tagata; o le tagata fa'anoanoa, ua masani fo'i ma le tigā; e peiseā'i ua 'alo'ese mata iā te Ia; ua 'inosia o Ia, ma ua tatou lē manatua lava o Ia.

A ua manu'a o Ia ona o a tatou solitūlāfono, ua momomo o Ia ona o a tatou amioleaga; o le a'oa'iga e filemū ai tatou sa i Ōna luga lea, o Ōna fa'alavalava fo'i ua malōlō ai tatou.

Isaia 53:3, 5

O ai ea ua talitonu i la matou 'upu e tauiologologo atu; ua fa'aalia iā te ai le 'a'ao o Ieova?

Na tupu a'e o Ia e pei o se tātupu i Ōna luma, e pei o le pogai i le nu'u naumati; e lē 'aulelei pe lalelei o Ia; a tatou va'ava'ai iā te Ia e leai Sona matagofie, ina ia tatou manana'o ai iā te Ia.

Ua 'inosia ma tu'ulafoa'ina o Ia e tagata; o le tagata fa'anoanoa, ua masani fo'i ma le tigā; e peiseā'i ua 'alo'ese mata iā te Ia; ua 'inosia o Ia, ma ua tatou lē manatua lava o Ia.

E moni, ua na tau'ave o tatou fa'anoanoa; a ua tatou manatu o Ia ua taia, ua fasia e le Atua, ma ua fa'atigāina.

A ua manu'a o Ia ona o a tatou solitūlāfono, ua momomo o Ia ona o a tatou amioleaga; o le a'oa'iga e filemū ai tatou sa i Ōna luga lea, o Ōna fa'alavalava fo'i ua malōlō ai tatou.

O i tatou uma ua sē i tatou e pei o mamoe, ua ta'itasi ma fa'asaga i lona lava ala; a ua fa'ao'o iā te Ia e Ieova le amioleaga o i tatou uma.

Na fa'asauāina o Ia, sa tigāina fo'i o Ia, a e lē tautala mai o Ia; e pei o le tama'i mamoe ua ta'ita'iina ia fasia, e pei o le mamoe fo'i i luma o ē sele lona fulufulu, ua fa'alologo ia, o ia fo'i ua lē tautala mai.

O le fa'asauā ma le fa'amasinoga na 'ave'eseina ai o Ia; o ai fo'i na te talatalaina Lana tupulaga? Auā ua vavae'eseina o Ia i le nu'u o tagata ola; na taia o Ia ona o le solitūlāfono a lo'u nu'u.

Na tofia o Ia ia fai Lona tu'ugamau fa'atasi ma ē pagotātā, a e peita'i sa i le mau'oa ina ua malii; auā na lē faia e Ia se fa'asauāga, ua leai fo'i se pepelo i Lona fofoga.

A ua finagalo Ieova e tu'imomomoina iā te Ia, ua Ia fa'atigāina iā te Ia; pe afai Na te faia se taulaga mo agasala, ona iloa ai lea e Ia o Lana fanau, e fa'alevaveina Ōna aso, o le finagalo fo'i o Ieova e manuia lea iā te Ia.

Ona o le tigā o Lona agaga Na te iloa ai Lana fanau, e malie ai o Ia; o le malamalama mai iā te Ia e ta'uamiotonuina ai tagata e to'atele e La'u 'au'auna ua amiotonu; auā e tau'ave e Ia a latou amioleaga.

O le mea lea 'Ou te vavae ai se vaega mo Ia fa'atasi ma ē ua sili, e vaea fo'i le vete fa'atasi ma ē fitafita, ona ua Ia sasa'a atu o Lona ola ia oti; na faitauina fo'i o Ia fa'atasi ma ē pagotātā; ua Ia 'aveina fo'i le agasala a tagata e to'atele, ua fautua fo'i o Ia mo ē solitūlāfono.

Isaia 53:1-12

O luga a'e o le nofoāli'i ua fa'aali mai ai le satauro. Ona fa'aali mai ai lea ua pei o se ata fa'asolo le taimi o le fa'aosoosoga o Atamu ma lona pa'ū, ma le fa'asologa atoa o la'asaga 'ese'ese o le fuafuāga tele o le fa'aolataga. Na fa'aali mai le fanau mai o le Fa'aola i se tulaga mauilalo; fa'apea ma Lona olaga usita'i a'o tamaitiiti o Ia; ma Lona papatisoga i Ioritana; o Lana anapogi ma fa'aosoosoga i le vao; o Lana galuega na fa'aailoa atu ai i tagata meaalofo tāua a le lagi; o aso na fa'atumulia i galuega o le alofa ma le agalelei, fa'apea ma pō na mataāla ma tatalo ai na o Ia i luga o mauga. Na fa'aali mai fo'i taupulepulega a tagata loto leaga na tau mai a'i Āna fa'amanuiāga; ma Lona puapuagā mata'utia e lē iloa e se tasi i Ketesemane a'o fa'amomomoina o Ia i le mamafa o agasala a le lalolagi uma. Na fa'aali mai fo'i Lona fa'alataina ma le tu'uina atu o Ia i lima o le nu'u fasioti tagata; ma mea mata'utia na o'o iā te Ia i lenā pō - o le 'avefa'apagotāina o Ia e aunoa ma Sona tete'e i ai, o le tu'ua na o Ia e Ōna so'o, o le so'ona fai o Ia e tagata i luga o ala tetele o Ierusalema; o le fe'avea'iga o Ia i luma o Ana, ma luma o le maota o le faitaulaga sili, ma le potu fa'amasino a Pilato, ma luma o le tagata sauā o Herota; o le ulagia ma le tauemuina o Ia, o le fa'ataugāina o Lona tino ma le fa'asalaina o Ia i le oti - ua fa'aali mai nei ma le manino ia mea uma.

Ona fa'aali atu loa lea i lenei motu o tagata e to'atele va'aiga mulimuli o le galuega a Keriso i lalo nei. Ua latou va'aia Iesu o onosa'i i le tau'aveina o Lona satauro i le ala i Kalevario; na latou va'aia le Perenise o le lagi ua tautau i le satauro; ma le 'au ositaulaga a'o latou taliē ma fai tauemuga i le taimi o Ōna toe tigā; ma le pogisā uiga 'ese; ma le mafui'e tele na saei mai ai i lalo papa o mauga ma matalatala ai tu'ugamau i le taimi na tu'uina atu ai e le Fa'aola o le lalolagi Lona ola.

O le mata'utia o nei mea uma i le taimi na tutupu ai, o le mata'utia lava fo'i lea ua latou va'ai uma nei i ai ma ua lagona i o latou loto. Tigā lava so latou fia tepa 'ese, ua lē mafai e Satani po o āna agelu po o le 'au amioleaga uma ona

latou tepa 'ese mai le ata o la latou galuega leaga. Ua manatua ifo lava e le tagata ia, po o le agelu ia, lana vaega na fai i nei va'aiga mata'utia. O Herota, o lē na fasiotia tama meamea o Peteleema ina ia fasiotia fa'atasi atu ai ma le Tupu o Isara'elu; o Herotia amioleaga, o lē o le a fa'fa i ai le oti o Ioane le Papatiso; o Pilato fa'alotolotolua; o le 'au fitafita lē popoi na latou tauemu ma so'onafai le Tupu o le lagi; o le 'au ositaulaga ma faipule, atoa ma le motu o tagata o ē na 'alalaga ma fai atu, "Ia i luga o i matou ma a matou fanau Lona toto" - ua latou va'ava'ai nei ma o'o ifo i o latou loto le tele o la latou amioleaga ua fai. Na i'uva'e a latou taumafaiga ina ia lalafi ai mai le matalasi fa'alelagi ma le pupula o Ōna fofoga.

(11) O LE Ā LE I'UGA MULIMULI O LE A O'O I LE 'AU AMIOLEAGA?

Ai se tasi ua iloa ua lē tusia i le tusi o le ola, ua lafoina i le lepa afi.

Fa'aaliga 20:15

Ua laulaututū atu nei le lalolagi atoa i luma o le fa'amasinoga a le Atua ona o le moliga o i latou o ni tagata fouvale i le malō o le lagi. E leai se isi e tū atu mo i latou i lea taimi; ua leai fo'i so latou 'alofaga. Ua tu'uina atu loa iā i latou le sala o le oti e fa'avavau.

Ua manino mai nei iā i latou uma o le totogi o le agasala e lē o le tuto'atasi ma le ola e fa'avavau, a'o le pologa, ma le pa'ū maulalo, ma le oti. Ua va'ai atu nei ē amioleaga i le mea ua latou lē maua nei talu ai lo latou olaga fouvale. Na latou fa'atauemu ma manatu fa'atauva'a i le talalelei ma le ola e fa'avavau ina ua ofoina atu iā i latou; peita'i ua latou mo'omo'o atu nei i ai. Fai mai le 'alaga a le tagata ua iloa lona fa'afanoga: "Semanū 'ou te maua nei mea uma, pe ana 'ou talia le talalelei ma le ola e fa'avavau. Peita'i na 'ou faia le filifiliga e tu'u mamao 'ese lenei mea ma lo'u mafaufau. Se mea ina 'ā valea! Ua 'ou fa'amamulu atu le filemū, ma le fiafia, ma le fa'amaoni, ina ia maua mai ai le pagātia, ma le masiasi, ma le leai o se fa'amoemoe." Ua ioe le 'au amioleaga uma ua tonu ma sa'o lo latou lē maua o le lagi. Na ta'u mai lava i o latou olaga la latou ta'utinoga ua fa'apea mai: "Matou te lē manana'o i lenei Tagata (o Iesu) e pule iā i matou."

(12) O LE Ā LE PESE O VI'IGA O LE A PESEINA E LE 'AU FA'AOLAINA?

Ua latou pepese i le pese a Mose le 'au'auna a le Atua, ma le pese a le Tama'i Mamoe, ua fa'apea atu, Le Ali'i e, le Atua e Ōu le malosi uma lava, ua tetele Āu galuega e ofo ai; e tonu ma fa'amaoni Ōu ala, le Tupu o le 'au pa'ia e.

Fa'aaliga 15:3

Ua tutū le 'au amioleaga ma sioa i le fa'au'uga o le Ālo o le Atua ua pei ua latou va'ai i se fa'aaliga. Ua latou va'aia o 'u'u i Ōna 'a'ao papa ma'a o le tulafono, le tulafono lea na latou solia ma manatu fa'atauva'a i ai. Ua latou va'aia le maofa ma le 'oli'oli e lē mafa'atusaina o le 'au fa'aolaina, ma latou fa'alogoia le alu a'e o a latou vi'iga o le fa'ane'etaga. A o pa'i mai e pei o se savili le mālū ma le mālīe o ia vi'iga i o latou luga, ua fa'apenā ona a'afia atu ai ma i latou i fa'o o le 'a'ai i le agaga o le fa'ane'etaga. Ua fa'apenā ona latou tufai 'alalaga fa'atasi ai ma fai mai: "Le Ali'i e, le Atua e Ōu le malosi uma lava, ua tetele Āu galuega e ofo ai; e tonu ma fa'amaoni Ōu ala, le Tupu o le 'au pa'ia e." Ua latou tufai fa'apa'u'ū fāō ma ifo atu i le Perenise o le ola.

(13) O LE Ā LE UIGA MONI O SATANI O LE A FA'AALIA MULIMULI I LE ATULAULAU?

Na 'ato'atoa ona lelei o āu sauniga talu le aso na faia ai 'oe, ua o'o i le aso na iloa ai lau amio leaga.

O lou fa'atauina o 'oa inā tele ua fa'atumuina ai 'oe i le sauā, ma ua e agasala; o le mea lea 'Ou te fa'aleagaina ai 'oe, ia te'a'ese i le mauga o le Atua; 'Ou te fa'a'umatia 'oe le kerupi fa'amalumalu nai le vā o ma'a o le afi.

Na fa'amaualugaina lou loto i lou matagofie; ua e fa'amaumau lou poto ma lou matagofie; 'Ou te lafoina 'oe i lalo i le 'ele'ele; 'Ou te tu'uina 'oe i luma o tupu ina ia latou va'ava'ai iā te 'oe.

Ezekielu 28:15-17

Auā e fa'amasinoina e le Atua galuega uma, atoa ma mea lilo uma lava, o mea lelei atoa ma mea leaga.

Failauga 12:14

O le sini e lē suia lava o Satani o lona sa'ilia lea o ni mea e 'alofaga i ai, ina ia ta'uuleia ai ana galuega a e pa'ū ai le leaga o le fouvalega i luga o le faigāmalō a le Atua. O le mea lava lenei na fa'aalu uma i ai le malosi o lona mafaufau ma le ma'ai o lona fai'ai. Na fai ma le mae'ae'a ana galuega, na fa'amanuiaina fo'i le tele o ana taumafaiga ina ia fa'asesēina ai le miliona ma miliona o tagata, ina ia latou talitonu i ana pepelo e fa'ataui i le finauga tele ma lona mafua'aga. Ua fia afe tausaga o fai e Satani lenei mea o le a'oa'oina o le mea sesē a e fa'aigoa o le 'upu moni. Peita'i ua o'o mai nei le taimi e fa'ato'ilaloina ai e fa'avavau le fouvalega, ma fa'aaliali manino a'e ai le uiga moni o le amio a Satani, fa'apea ma lona tala fa'asolopito atoa. Ua aliali a'e nei lona uiga moni i lana toe osofa'iga tele ona o le fia

lafotūina o Keriso, ma le fa'aumatiāga o Ōna tagata, ma le 'ave fa'amalosi o le 'a'ai o le Atua. Ua va'ai nei le 'au amioleaga ma agelu leaga i le malaia 'ato'atoa o lana galuega. Ua molimauina nei e le 'au fa'aolaina ma agelu a le lagi le 'atoāga o ana pepelo ma ana faufauga e tete'e atu ai i le malō o le Atua. Ua leai nei se isi e mana'o iā te ia.

(14) O LE Ā LE TALI O LE A AUMAIA E MEA UMA NA FOAFOAINA?

Ina ia to'otuli o tulivae uma lava i le suafa o Iesu, o ē o i le lagi, ma o i le lalolagi, ma ē o i lalo o le lalolagi; ma ia ta'uta'u atu e laulaufaiva uma lava o Iesu Keriso o le Ali'i lava Ia, ia i'u ina vi'ia ai le Atua le Tamā.

Filipi 2:10, 11

Ua iloa nei e Satani ua lē talafeagai o ia ma le lagi talu ai lana fouvalega. Ua fia senitūri o fiafia o ia e fai le tete'e i le Atua; o le a 'avea o se mea tigā iā te ia le mamā, ma le filemū ma le nofo lelei o le lagi pe afai a e o'o atu nei o ia i ai. Ua uma ai lava i lea taimi ana moliga pepelo e fa'atatau i le alofa tunoa ma le amiotonu o le Atua. O uiga leaga na ia taumafai e tu'ua'ifuia i le Atua ua fo'i mai uma nei i ōna luga. Ona punou ifo ai lea o Satani ma fa'aailoa mai le amiotonu o le fa'asalaga ua tu'uina atu iā te ia.

(15) O LE Ā LE 'UPU MONI E FA'ATATAU I LE MALŌ MA LE UIGA O LE ATUA O LE A MATUĀ MANINO UMA I AI LE ATULAULAU ATOA?

Ua si'osi'omia o Ia i ao ma le pogisā; o le amiotonu ma le fa'amasinoga o lo'o tumau ai Lona nofoāli'i.

Salamo 97:2

Auā o lo'o afio mai o Ia e fa'amasino le lalolagi; Na te fa'amasino le atu laulau ma le amiotonu, atoa ma le nu'u i le tonu.

Salamo 98:9

Le Ali'i e, o ai sē lē mata'u iā te 'Oe, ma vivi'i atu i Lou suafa? Auā ua na o 'Oe e lelei; ua e ō mai nu'u uma lava, ma latou ifo i Ōu luma; auā ua fa'aalia Āu fa'amasinoga tonu.

Fa'aaliga 15:4

Ua manino uma nei le 'ese'esega i le vā o le 'upu moni ma mea taufa'asesē i le finauga tele. Ua fofola atoa atu nei i luma o agelu fa'apea ma tagata i'uga leaga o le fouvale, ma i'uga leaga o le 'ave'esega ma le fa'alēaogāina o le tulafono a le Atua. Ua fa'ata'atia atu nei i luma o le atulaulau uma o le foafoāga a le Atua, le 'ese'esega mamao o pulega a Satani ma le faigāmalō a le Atua. Ua ta'usalaina Satani e ana lava galuega. Ua ioe nei le atulaulau uma ma le foafoāga atoa a le Atua i le moni ma le fa'amaoni o le poto o le Atua, fa'apea ma Lona amiotonu ma Lona lelei. Ua iloa e tagata fa'apea ma agelu, o galuega uma a le Atua na faia mo le lelei e fa'avavau o Ōna tagata, atoa ma le lelei e fa'avavau o le atulaulau uma na Ia faia. “Ieova e, e vivi'i atu iā te 'Oe mea uma na E faia; e fa'afetai atu fo'i le 'au pa'ia ia te 'Oe” (Salamo 145:10). O le a fai le tala tu'ufa'asolopito o le agasala ma molimau e fa'avavau, e fa'aailoa ai e lē mafai ona fiafia i latou na faia e le Atua e aunoa ma Lana tulafono. Lenei la ua fa'ata'atia atu nei le tala atoa o le finauga tele i luma o le foafoāga atoa a le Atua, o ē fa'amaoni fa'apea ma ē fouvale. Ona latou 'alalaga ai lea i le leo e tasi ma fai mai: “E moni ma fa'amaoni Ōu ala uma, le Tupu o le 'au pa'ia e.”

(16) O LE Ā LE TALI MAI A I LATOU SA FA'ASESĒINA E SATANI INA UA FA'AALIA MAI LONA UIGA MA ĀNA FUAUFUĀGA MONI?

O nu'u uma e iloa 'oe e femēmēā'i i latou uma ona o 'oe; e 'avea fo'i 'oe ma mea e ala ai le mata'u e lē toe i ai lava 'oe e fa'avavau.

Esekielu 28:19

O le mea lea o lo'o fa'apea ona fetalai mai ai o le Ali'i o Ieova, Ua e fa'atusa lou loto i le finagalo o le Atua; fa'auta, o le mea lea 'Ou te aumai ai tagata 'ese iā te 'oe, o ē ua mata'utia i nu'u; latou te tō a'e fo'i a latou pelu ia leaga ai le matagofie o lou poto, latou te fa'aleagaina lou matagofie.

Latou te 'ave ifo 'oe i le lua, e te oti 'oe e pei ona oti o ē ua fasia i totonu o le sami.

Esekielu 28:6-8

E ui lava ina ua uma ona ioe Satani i le amiotonu o le Atua atoa ma le silisili 'ese o Keriso, e le'i suia ai lava lana amio. Ua toe oso mai fo'i e pei o le galu le sau o le agaga fouvale. Ua toe o'o ifo nei iā te ia le fia tagolima iā Keriso,

ma ua tonu iā te ia e lē gaua'i o ia i lenei taua tele. Ua o'o mai nei le taimi o lana toe osofa'iga tele i le Tupu o le lagi. Ua ia fa'ata'alise atu nei i le totonugalemū o le togālauapi tele a le 'au amioleaga ma ua taumafai ina ia maua e ōna tagata le agaga o le tula'i loa ma sauni mo le taua. Peita'i ua leai nei se tasi o lenei fa'apopotoga tele o toe fiafia pe fia mulimuli iā Satani. Ua o'o mai nei le i'uga o lona malosī. O lo o fa'atumulua pea le 'au amioleaga i le ita ma le 'ino'ino i le Atua e pei lava o Satani. Peita'i ua latou iloa nei ua leai se aogā o a latou fuafuāga; e lē mafai ona latou manumalō i le Atua. Ua liliu ane nei lo latou ita iā Satani ma i latou uma na fai ma ōna sui i le galuega tele o le tautafa'asesē. Ua latou liliu atu nei i le sauā fa'atemoni iā i latou nei.

(17) O LE Ā LE FA'ASALAGA TONU E TU'UINA E LE ATUA O LE A FA'AALIA AI LE FA'AI'UGA MATA'UTIA O SATANI?

O lou fa'atauina o 'oa inā tele ua fa'atumuina ai 'oe i le sauā, ma ua e agasala; o le mea lea 'Ou te fa'aleagaina ai 'oe, ia te'a'ese i le mauga o le Atua; 'Ou te fa'a'umatia 'oe le kerupi fa'amalumalu nai le vā o ma'a o le afi.

Na fa'amaualugaina lou loto i lou matagofie; ua e fa'amaumau lou poto ma lou matagofie; 'Ou te lafoina 'oe i lalo i le 'ele'ele; 'Ou te tu'uina 'oe i luma o tupu ina ia latou va'ava'ai iā te 'oe.

O āu amio leaga ina tele, ma le pepelo i lou fa'atauina o mea, ua e fa'aleagaina mea pa'ia, o le mea lea 'Ou te fa'atupu ai se afi ai totonu iā te 'oe, e fa'a'umatia ai 'oe, 'Ou te 'avea 'oe ma lefulefu i le fogā'ele'ele i luma o i latou atoa o ē va'ava'ai iā te 'oe.

O nu'u uma e iloa 'oe e femēmēā'i i latou uma ona o 'oe; e 'avea fo'i 'oe ma mea e ala ai le mata'u e lē toe i ai lava 'oe e fa'avavau.

Ezekielu 28:16-19

(18) O LE Ā LE FA'AMASINOGA O LE A TU'U I LUGA O I LATOU E LĒ O TUSIA IGOA I LE TUSI O LE OLA?

Ai se tasi ua iloa ua lē tusia i le tusi o le ola, ua lafoina i le lepa afi.

Fa'aaliga 20:15

O a'u'upega uma fo'i ma ofutau na fa'aaogāina i le taua o le a fai ma fafie e tafu ai le afi (Isaia 9:5). Auā ua to'atama'i Ieova i nu'u uma; e o'o mai fo'i Lona to'asā i luga o a latou vaega'au uma. Na te matuā fa'a'umatia lava i latou (Isaia 34:2). E fa'atōtō fa'aūa mai e Ia i luga o ē amioleaga o malala ola, o le afi ma le teiō; o le a fai mo latou tofi le matagi ua vevela fa'aafi (Salamo 11:16). Ona alu ifo ai lea o le afi mai le Atua i le lagi. Ua amata nei ona mavaevae le tino o le lalolagi. Ua tautafai mafitititi a'e nei i luga a'u'upega a le Atua na natia ai i le manava o le 'ele'ele. O mavaevae i le tino o le lalolagi ua 'avea nei ma tofē, ma ua sasao a'e ai i le lagi le afi mata'utia. E o'o lava i papa ua mumū i le malosī o le afi. Ua o'o mai nei le aso e mū ai e pei o se umu le lalolagi. Ua liu suāvai mea uma i le 'a'asa o le afi (Malaki 4:1; 2 Peteru 3:10). O le fogā'ele'ele ua pei o se sami ona ua liu suāvai mea uma i le 'a'asa o le afi. Ua o'o mai le taimi e liligi mai ai le to'asā o le Atua i luga o le 'au amioleaga (Isaia 34:8).

(19) O LE Ā LE MEA O LE A 'AVEA MA FA'AVAE O LE TAU I O LE FA'AMASINOGA A LE ATUA MA AUMAIA LE TAU TONU I LE FA'AI'UGA?

O Lē na te tu'uina atu le tau i ta'itasi i tagata e tusa ma a latou galuega.

Roma 2:6

E tu'uina atu fo'i le ola e fa'avavau i ē tumau pea i galuega lelei, ua latou sa'ili ai le vi'iga, ma le mamalu, ma le lē i'u vale.

A o le to'atama'i ma le to'asā i ē finau vale, ma ē lē gaua'i i le 'upu moni, a e gaua'i i le amio leaga; o le puapuagā ma le atuatuvaile i tagata uma lava o ē fai amio leaga, e muamua le Iutaia, atoa ma le Eleni.

A o le vi'iga, ma le mamalu, ma le manuia iā te i latou uma o ē fai amio lelei, e muamua le Iutaia, atoa ma le Eleni.

Auā e lē fa'ailogaina e le Atua ni tagata.

Roma 2:7-11

Ua ava'e fo'i e le sami ē na oti sa i ai, ua ava'e fo'i e le oti ma seoli ē na oti sa i ai; e ta'itasi fo'i o i latou ma fa'amasinoina e tusa ma a latou amio.

Fa'aaliga 20:13

Fai atu ia i lē ua amiotonu, e manuia o ia; auā o le fua o a latou galuega latou te 'a'ai ai. Oi talofa i lē ua amio leaga! E malaia o ia; auā e tu'uina atu iā te ia le tau i o ōna lima.

Isaia 3:10, 11

Ua maua nei le tau i o ē amioleaga (Fa'ata'oto 11:31). O le a fai i latou "ma tagutugutu o saito; e susunuina fo'i i latou i le aso o le a o'o mai, ua fetalai mai ai Ieova o 'au" (Malaki 4:1). O nisi o le a fa'aumatia i se taimi pu'upu'u; a'o nisi o le a puapuagātia mo ni aso e tele. O le a fa'asalaina i latou uma e tusa ai ma a latou mea na fai. Ua i luga o Satani agasala a le 'au amiotonu, ma o le a fa'apenā ona puapuagātia Satani e lē gata mo lana fouvalega tele, a e fa'apea fo'i agasala uma na ia fa'aosoina le fanau a le Atua latou te faia. O le a sili mamao atu lona fa'asalaga i lo i latou uma na ia fa'asesēina. E o'o mai le oti i ē uma na ia fa'asesēina, a e puapuagātia lava Satani.

(20) O LE Ā LE MEA O LE A TOTOE MAI IĀ SATANI MA MEA LEAGA UMA INA UA UMA MA MATE LE AFI E FA'AMAMĀ AI LE LALOLAGI?

O āu amio leaga ina tele, ma le pepelo i lou fa'atauina o mea, ua e fa'aleagaina mea pa'ia, o le mea lea 'Ou te fa'atupu ai se afi ai totonu iā te 'oe, e fa'a'umatia ai 'oe, 'Ou te 'avea 'oe ma lefulefu i le fogā'ele'ele i luma o i latou atoa o ē va'ava'ai iā te 'oe.

Esekielu 28:18

Auā fa'auta, o le a o'o mai le aso e mū ai pei se umu; ona fai ai lea ma tagutugutu o saito o ē fa'amauululuga uma, atoa ma ē fai amio leaga uma; e susunuina fo'i i latou i le aso o le a o'o mai, ua fetalai mai ai Ieova o 'au; e lē fa'atoeina ai mo i latou se ā'a po o se la la'au.

Ona outou solia lea o ē amio leaga; auā e fai i latou ma efuefu i lalo o outou alofivae i le aso ua 'Ou tofia, ua fetalai mai ai Ieova o 'au.

Malaki 4:1, 3

Ua fa'aumatia uma nei ē amioleaga i le afi ua fa'amamāina ai le lalolagi. Ua mae'a nei le fa'asalaga o le soliga o le tulafono. Ua molimauina lenei fa'asalaga e le lagi ma le lalolagi, ona latou ioe ai lea i le amiotonu o Ieova.

(21) E FA'APEFEA ONA FA'AMATALAINA E LE AFI OGA PA'IA LE I'UGA O Ē AMIOLEAGA?

E fa'a'umatia o ē agasala ai le lalolagi, ma ē amio leaga e lē toe i ai i latou. Lo'u agaga e, ia e fa'amanū atu iā Ieova. Ia outou vivi'i atu iā loa.

Salamo 104:35

Auā e fano lava o ē amio leaga; o ē ita fo'i iā Ieova, e pei o le mea sili o i tama'i mamoe i latou; e mavae atu i latou, e mavae atu e pei o le asu.

Salamo 37:20

(22) O LE Ā LE FOLAFOLAGA O LE A TALOSAGAINA E I LATOU UMA NA FA'ALEAGAINA E LE AGASALA?

Se ā ea se mea ua outou mafau'afau ai iā Ieova? E fa'a'umatia lava e Ia; e lē tupu fa'alua mai le puapuagā.

Nauma 1:9

Ua i'u nei e fa'avavau le galuega leaga a Satani. Mo le ono afe tausaga sa faia pea lona loto, na fa'atumuina le lalolagi i fa'anoanoāga ma ia fa'atupu malaia i le atulaulu uma. O le foafoāga atoa sa āuōi ma tautigā fa'atasi i mafatiāga. A o nei ua fa'aolatia e fa'avavau mai āna fa'aosoosoga ma lona fa'atasi ai o foafoāga uma a le Atua.

(23) O Ā MEA O LE A 'AVE'ESEA A E O LE A SUIA I MEA FOU?

Ona a'u iloa lea o le lagi fou ma le lalolagi fou; auā ua mavae atu le ulua'i lagi ma le ulua'i lalolagi, ua leai fo'i se toe sami.

Fa'aaliga 21:1

O le afi na fano ai le 'au amioleaga na fa'amamāina ai fo'i le lalolagi. Ua mamā 'ese nei fa'aailoga uma o le malaia. E leai se afi e mū e fa'avavau i seoli e tau fa'amanatu atu ai i le 'au fa'aolaina i'uga mata'utia o le agasala.

(24) O LE Ā LE MEA E FA'AMANATU AI LE AGASALA O LE A TAU'AVEINA PEA E IESU E FA'AVAVAU?

Ona fai atu lea o le 'au so'o uma iā te ia, 'Ua matou iloa atu le Ali'i.' A ua fai mai o ia iā te i latou, 'Afai 'ou te lē va'ai atu i Ōna lima, i mea na tutu'i ai fao, ma tu'u lo'u tamatama'i lima i mea na tutu'i ai fao, ma tu'u lo'u lima i Lona itū, 'ou te lē talia lava.'

Ioane 20:25

Na o le tasi lava le mea o le a fai ma fa'amanatu o le leaga o le agasala - o tulaga manu'a ia o le a tau'aveina e fa'avavau e lo tatou Fa'aola, o fa'aailoga o Lona malii i le satauro. O tulaga manu'a i Lona āo, ma Lona itū, fa'apea ma Ōna lima ma Ōna vae, ona pau ia o fa'aailoga o le a totoe mai o le galuega sauā na faia e le agasala. O fa'aailoga o lona fa'alumaina o le a 'avea ia ma Ōna mamalu aupito maua. O le a ta'u mai e tulaga manu'a o Kalevario Lona malosi, ma fa'apogai mai ai Lona vi'iga.

(25) O LE Ā LE MEA O LO'O SAUNIA E KERISO MO LE 'AU FA'ATUATUA?

E tele mea e nonofo ai i le maota o Lo'u Tamā; ana leai, po ua 'Ou fai atu iā te outou, 'Ou te alu e sauni se mea e nonofo ai outou.

Ioane 14:2

A e fa'atalitali i tatou i le lagi fou ma le lalolagi fou, pei o Lana na folafola mai, e mau ai le amiotonu.

II Peteru 3:13

Ua fefefe le to'atele latou te taliaina se a'oa'oga e foliga mai ai e fa'aletino le tofi e fa'avavau o le 'au fa'aolaina. O le mea lea ua latou sa'ilia ai ni fa'amalamalama'aga fa'aleagaga o le nu'u ua tatou tulimata'i atu nei i ai e fai mo tatou aiga e fa'avavau. Na fetalai Keriso i Ōna so'o o le a afio o Ia i le lagi Na te saunia ai ni maota mo i latou i le lagi. O le a lē pogisā ē savavali i le afioga a le Atua e fa'atatau i le aiga fa'alelagi o le 'au fa'aolaina. Peita'i, e le'i va'ai mata o tagata, pe fa'alogofa fo'i o latou taliga, e le'i o'o ifo fo'i i o latou loto le maoa'e o mea ua saunia e le Atua mo i latou o ē alolofa iā te Ia (I Korinito 2:9). E lē mafai e gagana a tagata ona fa'amatalaina le tau i ē amiotonu. Na o le 'au fa'aolaina lava o le a latou malamalama i ai. E lē mafai e le mafaufau fa'aletagata ona malamalama i le mamalu ma le pupula o le Parataiso a le Atua.

(26) O LE Ā LE MEA O LO'O FA'ATUSA I AI LE NU'U O LE A FAI MA TOFI?

O le fa'atuatua fo'i na maua ai e Sara lava le malosi e fanau ai, na fanau fo'i o ia ina ua mavae tausaga o lona malosi, auā na manatu o ia e fa'amaoni mai o ia na folafola mai.

O le mea lea sa tutupu mai ai mai le to'atasi, o ia fo'i na oti i na mea, o le to'atele pei o fetū o le lagi, pei o le oneone fo'i i le matāfaga e lē mafaitaulia.

Na oti i latou uma nei lava o fa'atuatua, e le'i maua mea na folafolaina, a ua iloa ai e i latou a e maa, na mautinoa fo'i, ma latou talia ma le fiafia, ma latou ta'utino mai o tagata 'ese i latou ma āumau i le lalolagi.

Auā o i latou o ē fai mai 'upu fa'apenā, ua latou matuā fa'aailoa mai o lo'o sa'ili e i latou lo latou lava nu'u.

Auā fo'i ana manatua e i latou le nu'u ua latou ō mai ai, po ua mafaia e i latou ona toe fo'i atu i ai.

A o lenei, ua latou naunau lava i le nu'u e sili ona lelei, o le fa'alelagi lea; o le mea lea e lē mā ai le Atua iā te i latou, ina ia ta'ua o Ia o lo latou Atua; auā ua saunia e Ia o le 'a'ai mo i latou.

Eperu 11:11-16

O lē manumālō, 'Ou te faia lea ma poutū i le malumalu o Lo'u Atua, e lē toe ulufafo lava ia, 'Ou te tusi fo'i i ai le suafa o Lo'u Atua, ma le igoa o le 'a'ai o Lo'u Atua, o Ierusalem fou lea e alu ifo nai le lagi mai Lo'u Atua, atoa fo'i ma lo'u igoa fou.

Fa'aaliga 3:12

Ua fa'aigoa e le Tusi Pa'ia le tofi o le 'au fa'aolaina o se nu'u (Eperu 11:14- 16). O inā o le a ta'ita'iina ai e le Leoleo Mamoe fa'alelagi Lana lafu mamoe i le vai o le ola. O masina uma fo'i o le a fua mai ai le la'au o le ola; a'o ona lau e mālōlō ai nu'u. E i ai fo'i vaitafe manino e pei o le ma'a tioata; o autafa o ia vaitafe o lo o i ai auala e savavali ai le 'au fa'aolaina; o ia auala ua fa'apaologia e la'au matagofie. E matagofie fo'i le fofola mai o fanua laugatasi lafulemū, a'o tua atu o i ai le lalelei o mauga a le Atua. O le nu'u lenei o le a fai ma aiga o le fanau a le Atua, o ē ua leva ona ta'asē ma maumausolo i le lalolagi.

(27) O LE IERUSALEMA FOU, E FA'APEFEA LONA FOLIGA MAI?

Ua i ai le pupula o le Atua; o Lona pupula fo'i e pei o se ma'a tāua lava, e pei o se ma'a iasepi i lona fa'atioata mai.

Fa'aaliga 21:11

(28) O LE Ā LE TULAGA O LE NU'U O LE A TATOU NONOFO AI?

E nonofo fo'i lou nu'u i le mea e manuia ai, ma fale e saogalemū ai, ma mapusaga e filemū ai.

Isaia 32:18

E lē toe lagona le sauāga i lou lau'ele'ele; o le fa'atafunaina ma le lepetia o mea e lē lagona ia i lou nu'u; a e fa'aigoaina e 'oe ōu pā, O le olataga, ma ōu puipui, O le vi'iga.

Isaia 60:18

I lea nu'u, "E 'oli'oli ona o i latou le vao lafulafuā, ma le nu'u naumati, e fiafia le toafa ma fua mai pei o le aute." "E tupu a'e le perosi e sui a'i le la'au tuitūi; e tupu a'e le atasi e sui a'i le ogogo." "E nofo fa'atasi le luko ma le tama'i mamoe; e ta'oto fo'i le nameri fa'atasi ma le tama'i 'oti; e fa'atasi fo'i le tama'i povi ma le leona ta'anoa atoa ma le manu peti; e ta'ita'iina fo'i i latou e le tamaitiiti." "Latou te lē faia se mea leaga; latou te lē fa'a'umatia fo'i se mea i lo'u mauga pa'ia," auā ua fetalai mai ai leova (Isaia 35:1; 55:13; 11:6, 9).

(29) O Ā MEA OFOFOGIA O LE A FAIA MA LE FIAFIA E I LATOU O LE A FA'AOLAINA I LE LALOLAGI FOU?

Latou te faia fale, ma latou mau ai; latou te totō tovine, ma latou 'a'ai i o latou fua. Latou te lē fai fale ina ia mau ai nisi; latou te lē totō ina ia 'a'ai ai nisi; auā e pei o aso o le la'au aso o Lo'u nu'u; e uma lava i ē ua filifilia e A'u o mea na faia e o latou lima.

Isaia 65:21, 22

(30) O Ā MEA E FĀ E FA'AMAONIA AI O LE A LĒ TOE I AI LE AGASALA?

E soloi'esea fo'i e le Atua loimata uma i o latou mata; e leai fo'i se toe oti, po o se fa'anoanoa, po o se auē, e leai fo'i se toe puapuagā; auā ua mavae atu mea muamua.

Fa'aaliga 21:4

E lē fai mai fo'i se tasi ua mau ai, 'Ou te ma'i. E fa'amagaloina agasala a le nu'u e nonofo ai.

Isaia 33:24

E leai se tigā i le lagi. E lē toe i ai fo'i ni loimata, leai ni solo o maliu, leai ni fa'aailoga o le fa'anoanoa. "E leai fo'i se toe oti, po o se fa'anoanoa, po o se auē, e leai fo'i se toe puapuagā; auā ua mavae atu mea muamua". "E lē fai mai fo'i se tasi, Ua ou ma'i. E fa'amagaloina fo'i agasala a le nu'u e nonofo ai."

(31) O LE Ā LE POGAI O LE MALAMALAMA O LE A I LE 'A'AI A LE ATUA?

E leai lava se pō i lea mea; e lē aogā fo'i iā te i latou se lamepa, po o le malamalama o le lā; auā o le Ali'i le Atua na te fa'amalamalamaina i latou; latou te fai ma tupu fo'i e fa'avavau fa'avavau lava.

Fa'aaliga 22:5

E lē toe i ai se pō i le 'a'ai o le Atua. E lē toe vaivai pe lēlavā se tasi. O le a lē fiu se tasi i le faia o le finagalo o le Atua ma le tu'uina atu o le vi'iga i Lona suafa. O le a tatou lagona pea lava le malosi fa'afouina o le taeao. "E lē aogā fo'i iā te i latou se lamepa, po o le malamalama o le lā; auā o le Ali'i le Atua na te fa'amalamalamaina i latou." O le a i ai se malamalama e sili mamao atu i le susulu o le lā, peita'i e lē sesēga pe tigā ai mata. O le a fa'amalamalamagia le 'a'ai Pa'ia i le pupula matagofie o le Atua ma le Tama'i Mamoe. O le a fa'apenā ona savavali le 'au fa'aolaina i le malamalama o le aso e fa'avavau e aunoa ma se lā.

(32) ONA UA FA'ATASI AI LE AFIO'AGA PA'IA, AISEĀ O LE A LĒ TOE MANA'OMIA AI LE 'IE PUPUNI SA I LE MALUMALU FA'ALELALOLAGI?

'Ou te le'i iloa ai fo'i se malumalu; auā o Lona malumalu o le Ali'i le Atua lea, e Ōna le malosi uma lava, atoa ma le Tama'i Mamoe.

Fa'aaliga 21:22

O le a maua e le fanau a le Atua le avanoa sili latou te talanoa feva'aia'i ai ma Keriso ma le Tamā. E fa'anefu ma lē manino la tatou va'ai atu nei (1 Korinito 13:12). Ua lē manino lo tatou va'aia o le fa'atua o le Atua i Lana foafoāga, ma Lana galuega i olaga o isi tagata. Peita'i o inā tatou te feva'aia'i ai ma Ia e aunoa ma se 'ie puipui e vā a'i i tatou. O le a tatou tutū i Ōna luma ma tatou matamata i le pupula o Ōna fofoga.

O le mafutaga mamā ma le 'au pa'ia, o le 'au'aumea fa'atasi ma agelu pa'ia ma le 'au fa'amaoni mai augātupulaga uma, o ē ua tā o latou ofu ma ua fa'asinasinaina i le toto o le Tama'i Mamoe, o le agaga fa'alelagi ua fusia fa'atasi ai le aiga uma i le lagi atoa ma le lalolagi - o mea uma nei o le a fesoasoani i le fa'amautiina o le fiasia o le 'au fa'aolaina.

O le a lē uma le fiasia o le 'au fa'aolaina latou te manatunatu ai pea i le ofoofogia o le mana foafoa o le Atua, fa'aapea ma Lona alofa togioa. O le a leai se fili sauā na te fa'aosoosoina i latou ina ia fa'agalo i le Atua. O le a fa'alauteleina o latou agava'a ma lo latou atamai ma a latou taleni. O le a lē fiu le mafaufau pe vaivai fo'i le tino i le sa'iliga o le poto. Tusa lava po o le ā le maua o le sini e manana'o i ai le 'au fa'aolaina, o le lagi e mafai ona fa'ataunu'uina ai. Peita'i o le a i ai pea lava isi sini e sili atu lo latou maoa'e o le a tutū mai pea i o latou luma; o le a i ai isi mea ofoofogia e ao ona tausili i ai; o 'upu moni fou e ao ona malamalama i ai; ma matā'upu fou o le a 'avea ma lu'iga i le mafaufau, ma le loto atoa ma le tino.

(33) O LE Ā LE MOLIMAU O LE A FA'ALOGAINA PEA E FA'AVAVAU MAI Ē UA FA'AOLAINA?

O lo'o fa'aapea atu ma le leo tele, 'Ua tataua lava le Tama'i Mamoe na fasia ina ia tu'uina atu iā te Ia le mana, ma le 'oa, ma le poto, ma le malosi, ma le fa'ane'ene'ega, ma le vi'iga, ma le fa'amanū.'

Fa'aaliga 5:12

O le a matala mai i le 'au fa'aolaina le tamao'aiga o le atulaulu uma o le foafoāga atoa a le Atua latou te su'esu'e ma maimoa i ai. O le a mafai ona latou lele fa'ata'alise atu i lea lalolagi ma lea lalolagi. E lē mafa'amatalaina le 'oli'oli o le fanau a tagata a'o latou mafuta atu ma molimauina le fiasia ma le poto o i latou e le'i pa'u'ū. O le a latou va'ai manino nei e aunoa ma se toe fa'anefu i le mamalu o galuega a 'a'ao o le Atua - o lā ma fetū ma paneta, ma lo latou fa'atulagaga i vaega 'ese'ese. Ua tofua le fetū po o le lā ma lona auala ua atofaina i ai i le vāteatea, e fa'ata'amilo ai i le nofoāli'i o le Atua. Ua tusia le suafa o le Atua i Āna mea uma na fai, mai le mea aupito itiiti se'ia o'o i le lā aupito tele; ua fa'ailoa fo'i i nei mea uma le tamao'aiga o le mana ofoofogia o le Atua.

(34) O LE Ā LE PESE VIVI'I O LE A FA'ALOGAINA MAI LE 'AU FA'AOLAINA A LE ATUA A O LATOU MANATUNATU I LE FA'AI'UGA O LE FINAUGA TELE?

Na 'ou fa'alogofa'i i mea uma na faia o i le lagi, ma le lalolagi, ma lalo ifo o le lalolagi, ma mea fo'i o i le sami, atoa ma mea uma o i ai i ia mea, o lo'o fa'aapea atu, 'Ia iā te Ia o Lē ti'eti'e i le nofoāli'i atoa ma le Tama'i Mamoe le fa'amanū, ma le fa'ane'ene'ega, ma le vi'iga, ma le malosi e fa'avavau fa'avavau lava.'

Fa'aaliga 5:13

A o fa'asolo mai selau ma selau o tausaga o le ola e fa'avavau, o le a maua e le 'au fa'aolaina ni fa'aaliga e sili ona maoa'e o le mana foafoa ma le mamalu o le Atua ma Keriso. A o fa'apenā ona fa'atupula'ia lo latou poto ma lo latou malamalama, o le a fa'apenā fo'i ona tuputupu a'e lo latou alofa ma lo latou āvā i le Atua, ma o le a atili ai lo latou fiasia. O le tele o mea e iloa e le tagata e fa'ataua i le Atua, o le maua o fo'i lea o lana va'ai i le amiotonu a le Atua. A o a'oa'oina i latou e Keriso i le tamao'aiga o le fa'aolataga ma fuafuāga ua fa'ataunu'uina i le taua tele ma Satani, o le a 'oli'oli le 'au fa'aolaina ma atili ai lo latou alofa fa'amaoni. O le a fa'apenā ona tā a latou kitara ma si'i a'e leo e afe ma afe, e mano ni mano i le vi'iga o le fa'ane'etaga i le Atua.

Ua fa'ai'uina nei le finauga tele. Ua lē toe i ai se agasala po o ni tagata agasala. Ua mamā 'ato'atoa nei le foafoāga aoao a le Atua. Ua lē toe i ai nei se leo pa'ulua e fa'aleagaina ai le fiasia ma le galulue fa'atasi o mea uma i le foafoāga aoao a le Atua. E tafe mai le ola ma le malamalama ma le fiasia mai le Atua o Lē na foafoaina mea uma, a e o'o atu ia mea uma i vaega 'ese'ese uma o le vāteatea e lē gata mai. O le a 'alalaga mea uma, e amata mai si mea aupito itiiti o le foafoāga a le Atua, se'ia o'o atu lava i le lalolagi aupito tele, o mea e ola ma mea e lē o i ai le ola, o le a latou 'alalaga uma i le 'atoāga o lo latou 'oli'oli ma lo latou matagofie ma fa'aapea mai, O le Atua o le alofa lava Ia.

Ua 'ou fa'afetai i le alofa o le Atua ua fa'aalia ai, e ala mai i le Tusi Pa'ia le malamalamai le finauga tele. Ua 'ou iloa o le nofoāga o lo'o fai ai lenei fete'ena'iga o lo'u loto lea, ma o le matā'upu autū o le finauga o le itū o le a 'ou fa'amaoni i ai.

Manatu Fa'aopoopo A

O le Usiusita'i - Tofotofoga Moni o le Uiga Fa'amaoni

Ua fa'atūina e le Atua mamana tulafono fa'avae i luga o le alofa tunoa, le 'upu moni, ma le amiotonu (Salamo 97:2), ma se fa'aaliga o Lona uiga e 'ato'atoa le mamā (Esoto 34:4). O Āna tulafono e fa'avae i luga o le alofa, e lē vāapiapi, a e peita'i o le pogai o le saogalemū ma le fiafia mo i latou o ē ola ma le fa'autauta (Salamo 119:1). A fa'amatalaina, o le agasala o le vavae'ese lea mai le Atua (Isaia 50:1, 2), ma e mafua mai le solia o Āna tulafono e fa'avae i luga o le alofa (I Ioane 3:4). E mafai e le Atua ona silasila ifo, pe a lē taofia, o le a aofia le atulaulau atoa i le agasala ma o le alumaga e pei o se kanesa ua sosolo. Ina ia puipuia mai se mea e tupu fa'apea, na aumaia ai e le Atua le fa'asalaga o le oti mo le solia o le tulafono. (Roma 6:23). Sa fa'ailoa e le Atua i le atulaulau le 'ato'atoa o Lona amiotonu ma le alofa tunoa (Salamo 89:14) e ala i le aumaia o se ala i le fa'aolataga mo le tagata solitulafono ua salamō moni (I Peteru 1:20).

O lo'o fa'aauau pea le finauga tele i totonu o i tatou ma o mea uma ia e fa'ataui i le usita'i fa'amaoni o le loto. O le fuafuāga a Satani ia na maua o tatou loto fa'amaoni e ala i le fa'atalitonu o i tatou e fa'ataui i le tulafono - le mea faigaluega lea e fa'aalia tatou agasala ma vala'au ai i tatou ia usita'i, - o lea ua fa'apea ua lē toe aogā. Na te iloa pe a leai se tulafono o le a tatou o i le ala e aga'i i le agasala ma le vavae'ese o le a o'o i ai (Fa'ata'oto 5:22). O le poto a Satani ua aumaia ma fa'aulufale lenei talitonuga sesē ma le 'alaga e fa'alogoina ma le motu o tagata e to'atele, "o tulafono a le Atua ua lē aogā." O lo'o ta'u mai i le Kolose 2:14 o tulafono sa tete'e mai iā i tatou ua "tutu'i i fao i le satauro." A faitau le fuai'upu e 17 (F.17) o lo'o matuā fa'amanino atili mai ai - "o ata lava ia o mea atali" (Efeso 2:14). O poloā'iga e sefulu ma tulafono e tau i sauniga e matuā 'ese'ese lava (Teuterenome 31:26; Esoto 40:20). O le taimi lava na maliu ai Keriso na saeia e se 'a'ao e le'i ma va'aia le 'ie puipui mai luga i lalo e fa'ailogaina ai le fa'ai'uga o nei tulafono sa fa'atonuina ai faigātaulaga (Mataio 27:51; Mareko 15:38). O lea lava taimi na fa'ataunu'u ai e ala i le maliu o le Tama'i Mamoe a le Atua, mo agasala a le lalolagi. O tulafono ia na fa'agata ai, o tulafono e tau i sauniga ma faigātaulag sa fa'asino iā Keriso ma sa na o se ata o le satauro (II Nofoa'iga Tupu 8:13, 14; Levitiko 23:37, 38) o lo'o i lumana'i. O lo'o fa'amaonia le aogā o poloā'iga e sefulu mo ōna pō nei, i matā'upu fa'ai'ui'u o le Tusi o Fa'aaliga o lo'o ta'u mai ai iā i tatou, o tagata o le Atua, ē ulu atu i le lagi, o i latou ia o le a tauti i poloā'iga (Fa'aaliga 14:12; Fa'aaliga 22:14).

O le tulafono e na o se fa'ata e fa'aali mai ai le tulaga o tatou loto (Esekielu 11:19, 20). Pe a 'ave'ese le tulafono, o le 'ave'esea fo'i lea o le iloa o le agasala (Roma 5:13). O le Atua o le alofa lava lea (I Ioane 4:8) ma o le tulafono ma Poloā'iga e Sefulu e na o se fa'amalamalamaga e tusia ai pe fa'apefea ona fa'ailoa le alofa. O poloā'iga muamua e fā e fa'ailoa ai le alofa ma le fa'aaloaloga mo le Atua Lē na faia mea uma, a o le ono mulimuli e mo a tatou uso a tagata (Mareko 12:29-31).

Ua fa'apitoa ona fetalai mai le Atua, "Afai tou te alofa mai iā te A'u, ia tauti i A'u poloā'iga" (I Ioane 5:3; Ioane 14:15, 21, 23, 24). Pe a tatou tauti Āna poloā'iga ona o le alofa, o le a 'avea ai la ma o tatou Ali'i auā o 'au'auna i tatou a lē e tatou te usita'i i ai (Roma 6:16). O le usita'i o se fa'amanuiāga lea (Teuternome 11:27, 28). Pe a fa'aalia le fa'aaloalo i le Atua e ala i lo tatou usita'i i Āna poloā'iga, o le tiute 'atoa lea a le tagata (Failauga 12:13). O Ia o le Pogai o le fa'aolataga iā i latou o ē usiusita'i (Eperu 5:9), ma ua Ia folafola e 'auina mai le Agaga o le 'upu moni iā i latou o ē usiusita'i (Ioane 14:16). I le fa'amasinoga, e to'atele o le a fa'apea, "Le Ali'i e, le Ali'i e, ..ona 'Ou ta'utino atu ai lea iā te i latou, 'Ou te le'i iloa lava outou; ō 'ese ia outou iā te A'u, o outou o ē fai amio leaga" (Mataio 7:22, 23). O le fa'amatalaga o le agasala o le solia lea o le tulafono. O le tapua'iga e aupito sili le maualuga o le alofa lea e i'u ai i le usita'i iā te Ia (II Ioane 1:6), ma pe a fa'apea e tapua'i a e lē usita'i, e lē talafeagai ma e 'upu 'esea - "o ē ua peiseā'i ua amio Atua, a o le mana ua i lea mea ua latou te'ena" (II Timoteo 3:1-5).

Ua tatou i ai nei i se tulaga fa'alētonu. E pei o Paulo, ua tatou va'aia le tāua o le usiusita'i i le tulafono ma e tataua ona tatou usita'i, a e ua tatou tu'u atu tatou i mana'oga o le tino (Roma 7:19). O tatou uiga moni e matuā leaga (Failauga 9:3), o tagata agasala i tatou uma (Roma 3:23), o la tatou amiotonu e pei o le 'ie o le ma'i (Isaia 64:6). Ua talitonu o tatou loto ia tatou usiusita'i, a e peita'i, i la tatou fa'ataui, o i tatou lava e lē mafai ai (Jeremia 13:23).

E mafai ona tatou o mai ia Keriso pe o le a lava lo tatou tulaga, o le tala lelei lea - e leagafaia ma pagatia i le agasala - ma tatou tapaina le toto na fa'amaligiina i le satauro. E ala i le toto o Iesu ua fa'amagaloina nei a tatou agasala ma ua fa'asa'oloto mai le ta'usalaina ma le fa'asalaga a le tulafono (Kalatia 3:13; Roma 5:8-11). O lea, a uma ona tu'u atu i tatou ma le 'ato'atoa o le a Ia suia o tatou loto sa fa'ama'a'aina e le agasala i se loto alofa (Esekielu 11:19). O le a tatou maua le filemū ma le 'oli'oli (Mataio 11:28-30; Ioane 14:27) a o Ia tusia i o tatou loto poloā'iga o le alofa (Eperu 10:16). A o tatou fa'aaoga le taimi e fa'atasi ai ma Ia o le a Ia fa'aailoa ia i tatou Lona uiga e ala i le tu'uina mai o le agava'a e tausi ai Āna poloā'iga (Esekielu 11:20). E ala i le fa'atuatua (Kalatia 3:6) o le a tatou maua le avanoa e 'avea ai ma ē tofusia fesoa i Lona uiga Atua, ma alu'ese mai le leaga ma tu'inanau o lenei lalolagi (II Peteru 1:4). Ua aumai ia i tatou le malosi e usita'i ai e ala i Lona Agaga (Galuega 5:33). Ua uma atu le fetu'u o le ta'usalaina ma o le a tumau le fa'amanuiāga a le tulafono e 'avea ma malamalama i o tatou ala (Salamo 37:31; Iakopo 1:23-25).

Manatu Fa'aopoopo B

Tala Tu'ufa'asolo o le Sapati

I le fa'ai'uga o le vaiaso o le foafoāga, se tu'u'ese ai e le Atua se taimi fa'apitoa ma "malōlō" ai o Ia mai Āna galuega uma. E le'i "malōlō" le atua ina ua vaivai fa'aletino. Sa Ia malōlō, fa'amanuia, ma fa'apa'ia le Sapati ona, e ala i Lana fa'atonuga ma le fa'ata'ita'iga o le a fa'amanuiaina ai tatou mai lenei fa'amanatuga o Ia, lo tatou Ali'i ma Lē na foafoaina i tatou, e fai ta'i vaiaso (Kenese 2:1-3). Na Ia fa'amauiina le fa'ailoga o Lana pule i lenei taimi fa'apitoa o vaiaso ta'itasi ma talosaga mai ia tatou tu'u'ese a tatou gaoioiga fa'alelalolagi a e fa'aaogā lenei taimi mo Ia. A e peita'i, o le fuafuāga a Satani ia fa'atumuina o tatou mafaufau i mea 'ese'ese o le olaga ina ia tatou lē maua ai fa'amanuiāga moni e aumaia mai le tausiga o le poloā'iga e fā (Isaia 56:2; 58:13, 14; Teuterenome 5:29; Eperu 4:4-9; Levitiko 26:2-4; Fa'aaliga 22:14).

O lo'o ta'u manino mai e le Tusi Pa'ia le amataga o le Sapati mai le foafoāga e o'o i le fa'afouina o le lalolagi. O le Sapati o se meaalofoa i le aigātagata atoa mai le foafoāga, e lua afe tausaga a e le'i ola mai Aperā'amo, le ulua'i tagata Iutaia. I le fa'ai'uga o le vaiaso o le foafoāga sa malōlō ai le Atua mai Āna galuega foafoa, ma tu'u mai ai le Sapati mo le tagata (Kenese 2:3; Mareko 2:27). Sa tapua'i le 'au pateriaka i le Sapati se'ia o'o i le taimi o le fa'apologaina i Aikupito ma le fa'asauāina, ona lē toe tausia ai lea. Ina ua ō 'ese mai Aikupito, sa toe fa'amanatuina iā te i latou e le Atua le tāua o le Sapati e ala i le saunia o le manai e fa'aluaia ai le tofiga i le Aso Faraile a e ia mafai ona latou fa'amamaluina Lona Sapati (Esoto 16:4, 5). O lenei mea na tupu a e le'i tu'uina mai le tulafono i le Mauga o Sinai, ma e fa'amaonia ai na i ai le Sapati a e le'i o'o i Sinai. O lea, na fa'amamafaina e le Atua le Sapati, le pa'ia, ma le tāua o le aso o le poloā'iga e fā ina ua fetalai mai, "Ia manatua" (Esoto 20:8).

O le tausiga o le aso Sapati sa faia pea e i latou na ulufale i le 'ele'ele o Kanana ma sa fa'ailoaina e le 'au perofeta ma tausia e tagata sa fa'amaoni i le Atua (Ne'emias 13:15). Ina ua mavae tausaga e tele sa afio mai Keriso e fai ma tatou fa'aa'oa'o (I Peteru 2:21), ma na Ia tausia fa'amaoni le Sapati (Luka 4:16; Mareko 1:21; 6:2). E o'o lava i Lona fa'asatauroina ma le maliu, sa Ia tausia le Sapati ina ua malōlō i le tu'ugamau se'ia o'o i le ulua'i aso o le vaiaso. E le'i tusia i se mea Lona suiga o se aso. A e sa fa'apitoa ona fetalai mai sa afio mai o Ia e fa'ataunu'uina le tulafono (Mataio 5:17, 18), ma toe fetalai e fa'asino i le pa'ia o le Sapati; e fa'atatau lava i le fa'a'umatiāga o Ierusalem a i tausaga o i lumana'i a e ua leva ona mavae Lona maliu (Mataio 24:20). O lo'o fa'amaonia lava e leai se fa'atonuga na tu'u mai e Keriso mo le tausiga o le Ulua'i aso, auā o nisi o Ōna so'o sa latou saunia Lona tino mo le tanuga ona fa'amamaluina lea o le Sapati "e tusa ai ma le poloā'iga" (Luka 23:56; Mareko 16:1), ma na tausia ai lava fa'apea le Sapati e aga'i i luma atu (Galuega 18:4; 13:27; 13:14, 42; 15:21; 17:2).

I le Tusi o le Eperu i le Feagaiga Fou, sa tusia lea a e ua mavae le maliu ma le toe tū a'e o Keriso, sa toe fa'amamafaina le tausiga o le Sapati (Eperu 4:8-11). O lo'o ta'u mai iā te i tatou o le Sapati o se feagaiga e alualu pea (Esoto 3:16) - o le fa'ailoga o le fa'apa'iaina o tatou olaga mai le Atua (Esekielu 20:12; Esoto 31:13). O lo'o ta'u mai fo'i, pe a uma ona tapunia le tala tu'ufa'asolo o lenei lalolagi ma ua tatou ulufale atu i le lalolagi fou, o le a tatou tausia le Sapati aso fitu (Isaia 66:22, 23).

Ona e le'i i ai se fa'atonuga mo se suiga na tu'u mai e Keriso a e le'i maliu o Ia, e lē o se vaega na tu'uina mai o le Feagaiga Fou se suiga mai o le Sapati aso fitu i le tapua'iga o le Ulua'i Aso. Ina ia 'ave se mea ia aofia ai e fai ma vaega o le mavaega tusia a se tasi, e tataua ona ta'ua mai a e le'i maliu o ia (Eperu 9:16-18; Kalatia 3:15).

Manatu Fa'aopoopo C

Tala Fa'asolopito o le Tausiga o le Ulua'i Aso

O lo'o tusia ma ua fa'amaonia o tagata o le malō ma le ekalesia na amataina le tū masani e tapua'i ai i le Ulua'i Aso ina ia fa'amamalu ai le toe tū a'e o Keriso; a e peita'i o lo'o ta'u mai i le Afioga Pa'ia ua tofi aloa'ia le papatisoga ma le sauniga o le fa'amanatuga (Roma 6:4; I Peteru 3:21; Kolose 2:12) mo lenei fa'amoemoega (Luka 22:19). O le 'upu, "aso o le lā" e lē o i ai i le ulua'i fa'aliliuga (King James Version) o le Tusi Pa'ia ma le fuai'upu "ulua'i aso o le vaiaso" o lo'o ta'u fa'avalu mai, ma e lē o i ai se fa'atonuga e tasi mo se suiga (Mataio 28:1; Mareko 16:2, 9; Luka 24:1; Ioane 20:1, 19; Galuega 20:7; I Korinito 16:2). E lelei tele tū masani, a e maise pe a o a'afia ai tapua'iga i le Ali'i, a e o lo'o lapata'i mai ia lē tatau ona aiā ma fai ma fa'alavelave i le tulafono a le Atua (Mataio 15:3; Kolose 2:8; Galuega 5:29).

E i ai fa'amatalaga tusia o lo'o fa'aalia ai fa'agasologa o le suiga mai le Aso To'ona'i (aso fitu) i le Ulua'i Aso (aso o le lā) o tapua'iga, ma e ta'ua ai le amataga ina ua fa'ailoa ai le taumafaiga e sui. E le'i vave le suiga o tapua'iga ina ua mavae le maliu o Keriso, a e o se fa'agaoioiga sa alualu lemū i se taimi umi.

"O le Aso o le Lā (Sunday) o le aso muamua o le vaiaso. O lona igoa fa'a-Peretania ma lona igoa fa'a-Siāmani (Sonntag) e mai le 'upu Latina "Dies Solis," "Aso o le Lā" (Sun's Day), le igoa o se aso fa'amamaluina e Roma fa'apaupau....I aso muamua o tagata Kerisiano, sa amata ai ona suia le aso Sapati i le Ulua'i aso, ma ua tausia e fa'amamalu ai le toe tū a'e o Keriso. Sa tausia le Ulua'i aso e 'avea ma aso e malōlō ai, fa'apa'iaina fa'apitoa i le galuega a le Atua, e ala mai le Tupu Roma o Konesetatino le Sili. Sa amata mai le seneturi e fā (4), o tulafono uma fa'alemalō ma fa'ale-ekalesia e fa'atonutonu so'o ai galuega o le ulua'i aso ma sauniga e tatau ona fa'atasi i ai. I Amerika, sa faia tulafono (Blue laws) e fa'agata ai gaoioiga ma fa'afiafiāga e faia i le Ulua'i Aso." (*Microsoft Encarta Encyclopedia*).

O le Ekalesia Katoliko Roma e matuā fiafia lava e fa'ailoa mai o lana pulega e i luga a'e o le Atua i lenei taumafaiga e sui le aso pa'ia o le Ali'i. O nisi 'upu nei e si'i mai i ni tusiga lauiloa a le Ekalesia Katoliko o lo'o ta'uina ai la latou pule'aga:

Fesili: E i ai se isi ala e fa'amaonia ai o le ekalesia (Katoliko Roma) e i ai le pule e fa'atū ai aso fa'amanatu o le tulafono?

Tali: "Pe ana leai se pule fa'apea, semanū o le a lē mafai e ia ona faia le mea ua talileleia e ekalesia uma o ōna pō nei - o le a lē mafai e ia ona suia le tausiga o le Sapati, le aso fitu, se suiga e leai se pule o tu'uina mai e le agaga Pa'ia." (*A Doctrinal Catechism, by S. Keenan, pp. 174, 354*).

"O le tausiga o le Ulua'i Aso e tagata Ekalesia Porotesano o se fa'aaloaloga ua latou tu'uina i le pulega a le Ekalesia Katoliko." (*Plain Talk About Protestantism, by Father Segur, p 213*).

"O le Ekalesia Katoliko, e ala i le uiga malosi o lana galuega fa'aleagaga, na suia ai le aso tapua'i mai le Aso To'ona'i (aso fitu) i le Ulua'i Aso (aso o le lā)." (*The Convert's Catechism of Catholic Doctrine, p. 50, 3rd Edition*).

"O le mafaufau ma le tomai e mana'omia e taliaina le tasi po o le isi o filifiliga; o le tausia o le Sapati aso fitu ma le talitonuga fa'a-Porotesano, po o le talitonuga fa'a-Katoliko ma le tausiga o le Aso o le Lā. E lē mafai ona fa'alagolago i ni fetu'utu'una'iga." (*American Catholic Quarterly Review, Jan. 1883*).

"Pe a e manatu e va'ai mo se pule ua tu'u mai e le Tusi Pa'ia mo le tausiga o le Ulua'i Aso, o le a e lē maua ai. O se mea lelei le fa'amanatu i uso Ekalesia Perosipitero, Metotisi, Papatiso, ma isi uma Kerisiano o i fafo mai le ata o le Ekalesia Tele, e lē o lagolagoina i latou e le Tusi Pa'ia fa'atatau i le tausiga o le Aso o le Lā." (*Clifton Tracts, Vol. 4, p. 15*).

Sa valo'ia i le tusi o Tanielu lenei taumafaiga e sui, "...Na te faia 'upu i Lē Silisili 'Ese, ma fa'aumatia le 'au pa'ia a Lē Silisili 'Ese; e manatu o ia e fa'aliliu i tausaga ma tulafono..." (Tanielu 7:25). E pau le tulafono o lo'o a'afia ai le taimi, o le Poloa'iga e Fā (Esoto 20:3-17).

Manatu Fa'aopoopo D

O se Mea Tāua le Aso Tatou te Tausia?

E tāua le aso fa'apitoa tatou te "manatua" pe a o fa'aapefea ona tatou tausia o lea aso? O le Poloa'iga e Fā o lo'o tū fa'aogātonu i le tulafono a le Atua. O le pola'iga lea e tasi e i se aso fa'apitoa, ma i se ala fa'apiota, e fai ma se mea fa'amanatu e lē mavae ma e fa'amamalu ai le Atua o lo tatou Ali'i ma Lē na faia i tatou. E tāua le usita'i 'ato'atoa? E tāua lea mea? Pe a e fa'atonu lau tamaitiiti i se mea e fai, e te mana'o ia malamalama atoa ma malie i ai fa'ato'ā usita'i ai loa? E leai, ona e te fa'amoemoe ia usiusita'i ona o le alofa, fa'aaloalo, ma le talitonu. E te fa'amoemoe o le usita'i e fa'avae i luga o le iloa o lou alofa. O le Atua, lo tatou Tamā fa'alelagi, o Lē aupito sili atu le poto i lo tatou, o lo'o fa'atoga mai ma e matuā tatau mo Ia lenei lava alofa ma le usiusita'i e fa'avae i luga o le fa'atuatua.

O lo'o tofotofoina le aigātagata uma i luga o lenei matā'upu o le fa'atuatua. O le matā'upu lava lenei e tasi na pa'u'ū ai Atamu ma Eva. Na tu'u iā i la'ua fa'atonuga fa'apitoa e 'aia le fua o se la'au fa'apitoa (Kenese 2:16, 17)! O le tāua ona ua la lē fa'ailoa le fa'atuatua e fa'avae i luga o le alofa ma le usiusita'i i fa'atonuga a le Atua, e ui ina sa le'i malamalama 'ato'atoa i la'ua. Sa tofotofoina le fa'atuatua o Aperā'amo i le tu'u atu fa'ataulaga Isa'ako, a e vi'ia le atua ona sa maua e ia le manuia. O le ta'iala lava lea e tasi i le tausiga o le Poloa'iga lona Fā. O le matā'upu fa'avae lenei: O ai tatou te tu'u i ai la tatou usiusita'i, tapua'iga, ma le fa'amaoni? O le tofotofoa lea o le fa'atuatua.

Mo le ono afe tausaga, o le fa'avae o le finauga tele e fa'ataua lava lea i le tū fa'amaoni, ma e lē o se mea e ofo ai ona o le matā'upu lava fo'i lea i le fa'ai'uga o le fete'ena'iga. O le fuafuāga a Satani, ma o lo'o fai pea lava, o le fa'aleagaina o tulafono a le Atua lea e fa'atonu ai ia fa'amaoni ma tapua'i i le Atua, ma ia faia le tapua'iga e tatau ai i le Atua. Ua ta'u mai i le Fa'aaliga fe'au tāua o lapata'iga e tolu i taimi fa'ai'u o le lalolagi, ma o le a fa'asalalau i le lalolagi atoa, ma o nei fe'au uma e fa'atatau lava i le matā'upu o le tapua'iga (Fa'aaliga 14:6-9).

I toe aso o le tala fa'asolopito o le lalolagi, e vala'auina ai 'oe ia, "Ia mata'u i le Atua ma avatu iā te Ia le vi'iga...." O le a fa'aapefea ona e filifili e fa'aali atu lou fa'amaoni? O le a e faia Āna fa'atonuga fa'apitoa e "Manatua le aso Sapati e te fa'apa'iaina..." (Esoto 20:8-11)? O le a e tapaina fa'amanuiāga fa'apitoa ua Ia folafola mai: *"Afai e te liliu 'ese lou vae i le sapati, a e le faia lou lava loto i lo'u aso sā; ma e ta'ua le sapati, o le aso fiafia, le aso ua sā iā Ieova, ua mamalu; ma e fa'amamalu i ai, o lo'o e lē faia au lava amio, o lo'o lē maua ai lou lava fiafia, ma e lē tautala ai i au lava 'upu; ona e fiafia lava lea iā Ieova; 'Ou te fa'ati'eti'e ane fo'i iā te oe i luga o mea maua'ulu o le lalolagi, 'Ou te fafaga fo'i iā te oe i le tofi o Iakopo lou tamā; auā ua fetalai mai ai le fofoga o Ieova (Isaia 58:13, 14).*

O se fa'amanuiāga pe a tatou avatu le tapua'iga i Lē na faia i tatou ma mea uma lava; peita'i o se fa'amanuiāga fa'aleagaga e sili atu ma maoa'e e mai le usiusita'i ma le tu'u atu o le loto atoa e fai poloā'iga a le Atua (Fa'aaliga 22:14; Ioane 15:10, 11).

Manatu Fa'aopoopo E

O le Manu Fe'ai o le Fa'aaliga

I aso tau fa'ai'ui'u ua lapata'i mai i tatou: "Ona mulimuli atu ai lea iā te i la'ua o lona to'atolu o agelu, ua fa'apea atu ma le leo tele, Ai sē tasi e ifo i le manu fe'ai ma lona fa'atagata, ma talia le fa'ailoga i lona muāulu po o lona lima, e inu lava ia i le uaina o le to'asā o le Atua, ua liligiina atu e lē suia i le ipu o lona to'asā, e puapuagātia fo'i ai i le afi ma le teiō i luma o le 'au agelu pa'ia ma luma o le Tama'i Mamoe" (Fa'aaliga 14:9, 10). Ona o lo'o naunau le Atua ia fa'asaoina tagata ta'ito'atasi uma (II Peteru 3:9) ua Ia tu'u mai ai fa'ailoga totino e sefulu ma le tasi o le "manu fe'ai" i Lana afioga e puipuia ai tatou ne'i fa'asesēina.

A e le'i fa'aalia po o ai le "manu fe'ai," e tāua ona tomua lenei matā'upu i se 'upu e fa'atatau i le to'atele o uō Kerisiano o lo'o ō gatasi ma lenei fa'alapotopotoga fa'aleagaga e lē o iloa ua a'oa'oina i a i latou talitonuga sesē. O le mea lenei o lo'o aumai ai e le Atua le ōlega, ona o Lona alofa mutimutivale ma le tigāalofa, "Lo'u nu'u e, ia outou ō 'ese mai iā te ia" (Fa'aaliga 17:2-4).

Ua fa'ailoa mai i le Tusi Pa'ia, o le "manu fe'ai" o se tupu po o se malō, po o se ta'ita'i e mata'utia tele lana pule fa'alemalō (Tanielu 7:17, 23; 8:21). E o'o lava i ōna pō nei ua fa'aaogā manu e fai ma fa'ailoga o malō - o le aeto o le fa'ailoga o le malō o Amerika. O le pule fa'alemalō ua ta'u manino mai e tagata a'oa'oina o le Tusi Pa'ia mai ekalesia Porotesano 'ese'ese, o le "manu fe'ai" (Fa'aaliga 13:1; 14:9, 10) o le Pope po o le Ekalesia Katoliko Roma lea. Ua fa'aalia mai i le tala fa'asolopito o lenei pule fa'aeekalesia e "'ese'ese ona uiga," sa pulea malō ma ta'ita'ina le lalolagi fa'aleagaga mo seneturi e tele. Sa fa'amatala mai e Tanielu o ia lea o le "nifo itiiti" (Tanielu 7:8, 20-25; 8:9-12) na ta'uina e Paulo o le "tagata o le agasala" (II Tesalonia 2:2-4). E manino le leai lava o se isi pule o i le lalolagi e matuā ofi lelei i vaega nei e sefulu tasi o i le Tusi Pa'ia (Fa'aaliga 13:1-10, 15-18).

I. O LE MANU FE'AI NA ALU A'E I LUGA MAI LE SAMI (Fa'aaliga 13:1): I le Tusi Pa'ia o le vai, e i ai ma le "sami" e fa'asino lea i se motu o tagata, malō, ma gagana (Fa'aaliga 17:15). O lea ua fa'ailoa mai ai manu fe'ai e ō a'e mai se vaega o le lalolagi e matuā to'atele ai tagata. O lenei ua fa'amatala manino mai le vaega e matuā to'atele tagata o Roma i Europa i sisifo, o le mea o lo'o ea a'e ai le pule mata'utia a le Pope ma o lo'o i ai le nofoāga o lenei pulega.

II. O LE MANU FE'AI E FITU ŌNA ULU MA NIFO E SEFULU (Fa'aaliga 13:1): Ina ia fa'ailoa ma le mautinoa o le pope o le manu fe'ai lea e fitu ōna ulu ma nifo e sefulu, e mafai ona tatou fa'asino i isi Afioga e fa'atatau i le matā'upu lava lea e tasi. O le manu fe'ai o lo'o fa'amatala mai i le Fa'aaliga 13 o se so'ofa'atasiga o manu e fā sa fa'amatala mai i le fa'aaliga iā Tanielu (Tanielu 7:15-20) ma e tau i tamatama'ivae o le fa'atusa mai le miti a Nepukanesa (Tanielu 2:31-35).

E matuā fa'amaonia i tala tu'ufa'asolo o le lalolagi, ma e talia fo'i e tagata Kerisiano o manu fe'ai ma vaega o le fa'atusa i nei valo'aga e fa'asino lea i malō tetele sa pulea le lalolagi (Tanielu 7:17, 18) mai le 600 a e le'i i ai le Mesia (TLM) e o'o i le fa'ai'uga o lea tala fa'asolopito (*The Decline and Fall of the Roman Empire*, vol 3, p. 634). A toe iloiloia nei tusiga o le a mautinoa ai po o ai e fa'asino i ai ulu e fitu ma nifo e sefulu.

(1) O le Leona (Tanielu 7:4) po o le Ulu Auro (Tanielu 2:32): O Papelonía na pule mai le 605 - 538 TLM ma na pei o se leona ma apa'au o le aeto. O le leona ma lona ulu e faia i auro sa fa'amatala manino mai ai lava le malō o Papelonía auā o ia sa sili atu i malō uma le tamaoa'iga ma o apa'au e fa'amatala ai le tulaga saosaoa sa ia fa'ato'ilaloina ai malō o tagata malamalama.

(2) O le Urosa (Tanielu 7:5) po o le Fatafata ma Lima Ario (Tanielu 2:32): O le malō o Metai ma Peresia na pule mai le 538 se'i o'o i le 331 TLM. E fa'amatala manino i le urosa le uiga sauā ma le mana'o tele o Metai ma Peresia. O ivi'aso'aso e tolu e fa'asino i itumalō e tolu o Papelonía, Litia, ma Aikupito. E tulaga maulalo le urosa i le leona ma o le auro e sili atu le tāua i le ario, o lo'o fa'amatala ai le tū maulalo ifo o Metai ma Peresia i lo Papelonía i le 'oa ma le matagofie.

(3) O le Nameri (Tanielu 7:6) po o le Manava ma Ogāvae o Apamemea (Tanielu 2:32): Malō o Eleni na pule mai le 331 e o'o i le 168 TLM. O apa'au e fā e fa'asino i le televave o to'ilaloga o Eleni i lalo o le ta'ita'iga

a Alesana, e le'i i ai se fa'atusaina i taimi anamua mo le saosaoa ona fa'atafunaina e ia le lalolagi. O ulu e fā e fa'asino i ta'ita'i sili na vaevae i ai lona malō ina ua maliu o ia.

(4) O le Manu Fe'ai Mata'utia ma Matuā Malosi Lava (Tanielu 7:7) po o Vae o U'amea (Tanielu 2:33): O Roma ma nifo e sefulu sa pule mai le 168 TLM e o'o i le 476 TA (Tausaga o le Ali'i). Mai lona amataga o le malō o Roma sa lē mafa'atusaina i le fefe tele ma le tulaga mata'utia na ia fa'alagonaina a o ia ōlo fa'apefu malō i lalo o na vae.

O ulu e fitu ma nifo e sefulu (Fa'aaliga 13:1): Na vaevaeina le malō tele o Roma i ni malō e sefulu i le vā o tausaga e 351 - 476 TA. Ua fa'amatala mai fo'i e le Tusi Pa'ia o nei malō o nifo ia e sefulu o le Tanielu 7:7, 20 fa'apea ma tamatama'ivae e sefulu o le tupua o le Tanielu 2:4. O vae e faia i le "'u'amea ua fefiloi ma le ōmea" (Tanielu 2:43) sa fa'asino i vavaega nei e sefulu o le malō o Roma. Na fetalai le Atua o latou e "lē pipi'i le tasi i le tasi" (Tanielu 2:43) ma sa fa'amaonia i le tala tu'ufa'asolo i taumafaiga lēaogā a Hitila (Hitler) i le Taa Tele lona lua, e moni le Afioga a le Atua ma o nei malō o le a lē mafai lava ona toe tu'u fa'atasi.

Ma o le a "mulimuli ane fo'i iā te i latou ona tū mai o le tasi" (Tanielu 7:24, 8), na ta'ua fo'i o le "nifo itiiti" (Tanielu 7:8), ma o se malō "uiga 'ese" (Tanielu 7:24): O vaega muamua e sefulu o malō fa'afaipule, o lenei nifo e tasi o se pule e "uiga 'ese" fa'aleekalesia. O le pule lava lenei na tū a'e ina ua mavae nifo e sefulu o i le Fa'aaliga 13:2. Mai le fa'atafunaga o le malō Roma fa'afaipule (fa'apaupau), na tū a'e ai le malō tele i le faitino mata'utia o le Ekalesia Roma (*A.C.Flick, The Rise of The Medieval Church (1900), p. 150*). O lona tū a'e na amataina i le tausaga e 476 TA ma na 'ato'atoa le malosi o lana pule i le tausaga e 538 TA. Ua fa'amaonia ma le leai o se masalosalo e le tala fa'asolopito o le lalolagi ma le Tusi Pa'ia, o le "nifo itiiti" - le manu fe'ai mata'utia o le Fa'aaliga 13:1; Tanielu 7:8, 24; Fa'aaliga 14:9 - o le Pope lava lea.

Ua ia fa'i'esea i ōna luma o nifo e tolu sa mua'i tutū (Tanielu 7:8, 20): Ina ia fa'amalosia lana pule, sa fa'a'umatia e le Pope o Roma nifo e tolu - o Ostrogoths, Vandals, ma Heruli - ona ua latou tete'e e liua fa'a "Kerisiano," ona totoe ai lea o ulu e fitu.

III. NA MAUA LE MALOSI, LE NOFOĀLI'I, MA LE PULE MMAI LE TARAKO (Fa'aaliga 13:2): O Satani o le tarako (Fa'aaliga 20:2) ma na tu'u i le manu fe'ai lona malosi ma le tulaga fa'afaipule. O le "nofoāli'i" o se malō o lona laumua lea. O Herota, le ta'ita'i Roma, sa manino e pulea e le mana fa'aSatani a o ia sa'ili e fasioti Keriso (Fa'aaliga 12:3-5, 9; 13:2; Mataio 2:13). O Roma fa'apaupau lava lenei, i lalo o le fa'atonuga a le Tupu o Justinian sa fa'ataunu'uina lenei valo'aga i le tu'uina o lana pule ma le laumua i le Pope - "ua tu'uina atu iā te ia e le tarako o lona malosi, o lona nofoāli'i, ma lana pule tele."

IV. SA'ILI IA TAPUA'I ATU MA UA TA'USALAINA I LE FAIFAI I LE ATUA (Fa'aaliga 13:1, 4-6, 8; Tanielu 7:8, 20): Ua fa'amatala mai e le Tusi Pa'ia o le faifai, o le fa'asagatau lea i le suafa o le Atua (Fa'aaliga 13:6). O lona uiga ua fia pei o le Atua ma ua iā te ia le pule'aga e na o le Atua e i ai (Ioane 10:32, 33). E tasi le mea fa'apitoa e na o le Atua tolutasi e mafai ona tu'u mai, o le fa'amagaloga lea (Mareko 2:9, 10). O se 'upu lenei mai le Tusi o a'oa'oga fa'aKatoliko: "E matuā mafai e le ositaulaga ona fa'amagalo agasala talu ai le pule ua tu'uina iā te ia e Keriso" (*Joseph Deharbe, S.J., A Complete Catechism of the Catholic Religion (New York: Schwartz, Kirwin & Fauss, 1924), p. 279*).

O le ta'ita'i o le fa'apotopotoga taule Popeua na fa'ailoa mai fo'i lana pule i luga o agelu a le Atua. "E moni, o le silisili 'ese ma le pule a le Pope Roma e lē aofia ai na o le ta'ali'oli'oga o mea fa'alelagi, mea fa'alelalolagi, ma laufanua i lalo ifo, a e atoa fo'i ma luga a'e o agelu, i lo o lē e maualuga a'e ai fo'i ma ia" (*fa'aliliu mai iā Lucius Ferraris, Papa II, Prompta Bibliotheca, Vol. VI, p.27*).

V. O LE MANU FE'AI E "PEI" O SE NAMERI, O VAE O LE UROSA, MA LE GUTU O SE LEONA (Fa'aaliga 13:2): O Alesana le ta'ita'i ma le ulu o le "Nameri," na ia fa'atonu ōna tagata e tapua'i iā te ia pei o se atua. O le pule fa'amanu fe'ai a le Pope o le Fa'aaliga 13 sa tū a'e ma 'aveina le aganu'u fa'a-Eleni e aofia ai le tapua'i iā te ia pei o le Atua.

O le malosi "fa'a-urosa," o Metai ma Peresia, o lo'o iloa e o'o mai i nei ōna pō le ta'uina e leai se fa'alētonu, e mautinoa le mautū. A faia se tulafono, e lē mafai ona toe suia (Tanielu 6:15). E fa'apea le ta'ua o le Pope e "pei o vae o le urosa" ona o lea tulaga mautū.

O le malō o Papelonía o le "leona" o lo'o ta'ua lava i ōna pō nei ona o se tasi o mea ofoofogia o le lalolagi. O ōna ta'ita'i mitamitavale sa latou ta'ua mai lo latou tulaga e tataua ona fai tapua'iga i ai e pei o le Atua, ma e fa'apea fo'i 'upu a le Pope - "o lona gutu e pei o le gutu o le leona."

VI. FUA FA'ATATAU MO MASINA E 42 FA'AVALO'AGA (Fa'aaliga 13:5; 11:2; Tanielu 7:25): Ua fa'apea mai le Tusi Pa'ia, ua tu'uina le mana i le manu fe'ai e pule ai mo le 42 masina. I valo'aga, o le aso e tasi e tusa lea o le tausaga e tasi (Esekielu 4:6; Numera 14:34). E 30 aso i le masina fa'a-lutaia. O lea o le 30 fa'atele i le 42 aso ($30 \times 42 = 1260$ aso) maua ai le 1260 tausaga (Fa'aaliga 11:3; 12:6). O le nifo itiiti po o le pule fa'ale Pope, o lea pule'aga e mai le 538 se'ia o'o i le 1798, e 1260 tonu lava tausaga. O nei tausaga sa ta'ua "O Tausaga o le Pogisā" ina ua fa'asā e le ekalesia le fa'atauina o Tusi Pa'ia e tagata uma vaganā ta'ita'i o le ekalesia.

VII. UA SAUĀINA LE 'AU PA'IA (Fa'aaliga 13:10; 17:6; Tanielu 7:25): I le taimi o le pule a le Pope, o i latou e lē gaua'i i ōna talitonuga 'ese e leai se molimau i ai, sa fa'atauina i latou o fili a le ekalesia. Ona o le 'u'una'iga mai e lona tulaga, o pule fa'alemalō i lalo o le ta'ita'iga a "Fa'amasinoga Tausa'ili'ili" (Inquisitional Courts), sa sauāina ma fasiotia Kerisiano e le'i loto e toe tu'u o latou talitonuga e fa'avae i le Tusi Pa'ia. (*New Catholic Encyclopedia, Washington D.C., The Catholic University of America, 1967, Vol. 14, p.208: Torture and the Church*).

VIII. ULU UA FOA NA FAI A MATE (Fa'aaliga 13:3): Sa taofia mo se taimi le pule a le Pope ina ua fa'amalosia e toe tu'umuli mai le 'au osofa'i, ma ua 'ave fa'atagataotaua ai e le ta'ita'i'au Farani o Berthier le Pope Pio VI - ma i'u ina maliu ai ia i le fale puipui. O le manu'a lea na tupu i le tausaga e 1798, le taimi tonu o le valo'aga i le Tusi Pa'ia.

IX. NA TOE FA'ALELEIA LE MANU'A MA "UA OFO AI LE LALOLAGI UMA MA LATOU MULIMULI ATU I LE MANU FE'AI (Fa'aaliga 13:3): Na valo'ia fo'i e le Tusi Pa'ia o le a toe fa'aleleia le manu'a na fai a mate. Talu mai le 1798 o lo'o fa'asolo pea ona toe maua le tulaga aloa'ia ma le pule ta'ita'i a le Pope. Ua manatu ta'ita'i o malō uma o le lalolagi o se manuia fa'apitoa pe a tu'u fa'aaloaloga i le Pope. A o femalagaa'i ia i le lalolagi atoa, e matuā fa'asino tonu tala fa'asalalau mai itu 'ese'ese i le Pope, ma fa'ateleina le fa'amamaluina a o "feofoa'i" le lalolagi ona o ia.

X. O LE TAGATA E I AI LE NUMERA E 666 (Fa'aaliga 13:18): O le tagata o lo'o tū mai ma le pule fa'alepope, o le Pope po o le Tupu Sā lea. O le igoa o lo'o ia 'ave o le "Vika o le Ālo o le Atua," (Vicar of the Son of God); i le gagana fa'a-Latina (gagana lea a le Pope), o le "Vicarious Filii Dei." Pe a fa'aliliu fa'afuainumera mata'itusi uma o lenei igoa, o lona fa'aopoopoga e 666.

XI. UA IA TAUMAFAI E SUI "TAIMI MA TULAFONO" (Tanielu 7:25): O le pule fa'amanu fe'ai ua ta'u manino mai i āna lava tusiga lana pule'aga e sili a'e i le Atua esuia ai Āna tulafono. "O le Pope e i ai lana pule e suia ai taimi, toe tatata i tua tulafono, ma 'ave'ese mea uma, e o'o lava i a'oa'oga a Keriso" (*Decretal, de Tranlatic Episcop*).

O le Ekalesia Katoliko o lo'o taumafai pea e suia Poloa'iga e Sefulu a le atua. Ua 'ave'esea le Poloa'iga lona lua o lo'o fa'asā mai ai le ifo i fa'atusa, ma o lona sefulu ua vaelua, o lo'o fa'asā mai ai le mana'o fua.

E matuā manino lava le leai o se isi tagata po o se fa'apotopotoga, vaganā le matāgaluega a le Pope Katoliko e fetau'i 'ato'atoa i nei tulaga e fa'avae i le Tusi Pa'ia na tu'u mai e le Atua i Lana Afioaga e lapata'i iā i tatou e uiga i le pule a le manu fe'ai.

Manatu Fa'aopoopo F

O le "Fa'atusa" o le Manu Fe'ai

O le "fa'atusa" o le manu fe'ai e tatau ona fa'ailoa ina ia 'alo'ese ai mai le "fa'ailoga" (Fa'aaliga 14:9). E aumaia e le Atua fa'amatalaga ina ia mafai ai ona iloa le manu fe'ai, ma fa'apea fo'i ona Ia aumai uiga e lima (5) o lona "fa'atusa" ia mafai ai ona tatou iloa 'ato'atoa ma 'alo'ese ia lē maua ai ma lona fa'ailoga.

E na o le tasi le malō o lo'o i ai i le lalolagi i ōna pō nei e ō gatasi ma le tolu o nei valo'aga e lima ua uma ona taunu'u. Ua matuā manino o le malō tele o Amerika o lo'o aga'i tonu e 'avea o le "fa'atusa o le manu fe'ai."

I UA ALU A'E MAI LE FANUA (Fa'aaliga 13:11): Sa tatou iloa i se taimi ua mavae e fa'aaogāina e valo'aga a le Tusi Pa'ia le "vai" e fa'amatala ai se vaega 'ele'ele e matuā to'atele ai tagata (Fa'aaliga 17:15); ona tatou o'o lea i le fa'ai'uga, o le "fanua" o se vaega 'ele'ele e to'aititi tagata e i ai. E le'i fa'ato'ilaloina fa'amalosi Amerika e pei o manu fe'ai e fā o le Tanielu 2 ma le 7 ma le Fa'aaliga e 13 ma le 14. Na ea a'e le pule a Amerika i se vaega fanua e itiiti tagata sa mau ai.

II NA "ALU A'E MA LE FANUA" A O "FOA A MATE" LE MATĀGALUEGA FA'ALE-POPE (Fa'aaliga 13:3, 11): Ua tatou iloa mai la tatou su'esu'ega o le manu fe'ai na mau lenei manu'a i le tausaga e 1798. I a Mati 1, 1798 na amata fa'amalosia ai tulafono o faigāmalō o Amerika. E pei ona valo'ia, o lenei malō fou sa tū a'e i le taimi na fa'amanu'a ai toe a mate le Pope.

III O IA O "LE TASI MANU FE'AI UA ALU A'E" (Fa'aaliga 13:11): E tusa ai ma Ioane, o "le tasi manu fe'ai" na tū malosi a'e i le seneturi e 18 (18th century), o lea e le'i i ai lava se isi malō pule ma le a'oa'oina na i ai i lea vaitaimi. O lenei tulaga e 'ave'esea ai i tua malō uma o Europa i lea taimi, e leai se isi e tū mai o se fa'atusa o le manu fe'ai.

IV E I AI NIFO E LUA E PEI O SE TAMA'I MAMOE, A E TAUTALA PEI O SE TARAKO (Fa'aaliga 13:11): O le pule lea e pei o se tama'i mamoe. I le Tusi Pa'ia a e maise valo'aga, o le tama'i mamoe o le fa'ailoga lava lea o Iesu Keriso. O le fa'amatalaina i le Fa'aaliga 13 o lenei pule lona lua, o lo'o i ai nifo e lua e pei o se tama'i mamoe, ua fa'asino lea i ai o uiga fa'aKerisiano. O lenei malosi fou o le a 'avea ma se pule fa'a-Kerisiano, se malō e pi'imau i ta'iala Kerisiano e pei ona fa'amatala 'oto'oto i le Tusi Pa'ia. E fa'asino fo'i le tama'i mamoe i le uiga tausa'afia o lo'o ofo mai e le tulaga e sa'oloto ai e tapua'i mo tagata uma. Ona tautala lea e pei o se "tarako," ua fa'asino i se suiga mulimuli mai lona uiga moni. O tulafono tau i le faigānu'u, na fa'avae i luga o le fa'autaga o le sa'olotoga e tapua'i, e matuā fetau'i lea i le fa'amatalaga o le tama'i mamoe. O le 'upu fo'i "tama'i mamoe" e fa'asino lea i le tulaga talavou - na tū a'e Amerika ina ua mavae uma manu fe'ai sa talanoaina. O "nifo e lua" o le tama'i mamoe e fa'asino i vaega tetele e tāua iā Amerika - o sa'olotoga tauletapua'iga ma 'a'afiāga e tusai ma feāloa'iga a tagata.

V FAI FO'I LE PULE UMA A LE ULUA'I MANU FE'AI I ŌNA LUMA IA IFO FA'AMALOSI I AI (Fa'aaliga 13:12-15): Na tete'e Matini Luteru i le tau fa'amalosia e 'au'aumea fa'atasi i a'oa'oga fultua a le "ekalesia," ona ia tutu'i lea o Manatu Fa'atū e 95 (95 Thesis) e fa'ataui i le sesē o talitonuga i le faitoto'a o le falesā i Wittenberg, ma na fa'ailoga ai le amataga o le Toe Fuata'iga fa'aletapua'iga tele (Great Protestant Reformation). O le fa'aauauina o lenei sa'olotoga tauletapua'iga o se una'iga mo i latou na faimalaga mai le va'a o le Mayflower, ma fausia ai lenei malō o Amerika.

Mai le selau tausaga ua mavae o se mea masani le fa'alogoina o lenei lava fe'au e fa'ailoa ai le manu fe'ai, mai pulela'a o lotu Porotesano uma. E mafai ona fa'amaonia lenei 'upu pe a faitau lauga ma tusitusiga tau i tala fa'asolopito fa'ataui i ē na fa'atūina ekalesia 'ese'ese. O nei ōna pō e lē o toe fa'alogoina lenei fe'au. O le manu'a lava lenei o le matāgaluega taulePope o lo'o fa'aauau pea ona toe fa'aleleia. O le autū o lea la'asaga o

le tu'u'esea o mea ua mavae a e toe fo'i i le "mua'i ekalesia" lea sa una'i fa'amalosi ōna taofi i luga o tagata. O ekalesia Porotesano sa ta'ita'iina le Toe Fuata'iga Tele, ua toe talisapaia talitonuga a le pule "fa'alemanu fe'ai."

Ua mata'utia le fa'ateleina o le solitulafono i tausaga o lo'o fa'asolo pea. Ina ia fa'ataunu'u valo'aga a Paulo i aso o le i'uga, o lo'o tatou molimauina nei, "...o le faita'aga, o le amio ulavale, o le manumanu, o le loto leaga; o lo'o tumu saisai i le matau'a, o le fasioti tagata, o le misa, o le 'ole'olega, ma le fa'atautala; o tuā'upua i latou, o ē fai tala leaga, o ē 'ino'ino i le Atua, o ē fa'asiasia, o ē fa'asauā, o ē fa'afiasilisili, o ē fia fai togafiti i mea leaga, o ē lē 'ana'ana i mātua, o ē vālelea, o ē tu'umavaega, o ē lē loto'aiga, o ē fa'amolemoleina, ma ē fa'alēalofa" (Roma 1:29-31). E to'atele tagata o ekalesia 'ese'ese ua fiu i nei tulaga ma ua sauni e fai se suiga. Ua latou fa'apotopoto ni vaega fa'alemalō ma filifili ta'ita'i e fa'aaogāina so'ofa'atasiga o le ekalesia ma le malō e taumafai ai e fa'amalosia o latou lava talitonuga tauletapua'iga i luga o isi. O le a latou "tautala e pei o le tarako" e suia le fa'avae o sa'olotoga fa'aletapua'iga o lo'o fa'avaeina ai lenei malō tele - sa'olotoga i mea tau i le faigānu'u ma tauletapua'iga. O nei uma taumafaiga o le a faia e "toe aumai ai le Atua i lo tatou malō."

O lenei pule o le a pei o le nofoa'iga sauā a le Pope Roma, o le a fa'aaogā le faigāmalō e fa'ae'e ai fa'asalaga e tusai ma fefa'ataua'iga (Fa'aaliga 13:15-17), ma o le a tu'u le fa'asalaga o le oti iā i latou o ē tete'e e lē fia 'auai i ia fa'atonuga tauletapua'iga. O lenei toe so'ofa'atasiga ma le "ekalesia fa'atinā" i ōna talitonuga sesē ua ta'ua lea o le "fa'atusa o le manu fe'ai" (Fa'aaliga 14:9).

Manatu Fa'aopoopo G

O le "Fa'amaufa'ailoga a le Atua" ma le "Fa'ailoga" o le Manu Fe'ai

O le finauga tele sa amataina ma o le a fa'ai'uina i luga o le matā'upu tau i tapua'iga - o le fa'aaliga o le tautua fa'amaoni. O le "fa'ailoga" o le manu fe'ai po o le "fa'amaufa'ailoga" a le Atua o se fa'ailoga po o ai tatou te fa'amaoni i ai. O tagataola ta'ito'atasi uma o le a maua le "fa'ailoga" o le manu fe'ai e ala i le fa'atasi atu iā Satani i lana fouvalega i le tulafono a le Atua, po o le "fa'amaufa'ailoga" a le Atua pe a filifili e usita'i i Āna poloā'iga uma.

Ua ta'ua mai iā i tatou o le "fa'ailoga" lea e fa'asino i le tapua'iga sesē, e maua i le "muāulu" po o le "lima" (Fa'aaliga 14:9). O le muāulu, e i ai le vaega o le fa'i'ai e faia ai filifiliga ma e fa'asino i le itu o le mafaufau o lo'o talitonu moni i ai le tagata. O le lima e fa'asino i le mea e tatou te faia e ala i a tatou gaoioiga ma e lē ona taluai ni a tatou talitonuga (Failauga 9:10). E lē o ni fa'ailoga e va'aia i fafo (Eperu 10:16), a e o a tatou filifiliga ma fa'agaoioiga.

O tagata ua fa'amaufa'ailogaina o le Atua e "tausi poloā'iga a le Atua, ma le fa'atuatua iā Iesu" (Fa'aaliga 14:12). O tagata o ē na maua le fa'amaufa'ailoga a le Atua ona e tausi poloā'iga o le a puipuia mai le taimi o mala e fitu (Fa'aaliga 9:4; 7:3). O i latou o ē mulimuli i tapua'iga sesē o le manu fe'ai o le a maua le "fa'ailoga" ma o le a puapuagātia i le fa'a'umatiāga (Fa'aaliga 14:9-11).

Pe a e fesili, "Aiseā e matuā tāua ai le tausiga o poloā'iga a le Atua a e fa'apitoa lava lona fā?" Sa lapata'i i tatou e le perofeta o Tanielu e ala i lana miti, o le pule fa'alemanu fe'ai, e ala i una'iga fa'aSatani, o le a "manatu o ia e sui taimi ma tulafono" (Tanielu 7:25). O le poloā'iga e fā e na o le tasi lava lea e fa'atatau i le taimi.

O se "fa'amaufa'ailoga" e aofia ai mea e tolu: o le igoa o le ta'ita'i, o lona tulaga, ma le malō e i lalo o lana pulega. O se fa'aa'oa'oga fa'alelalolagi, e i ai le fa'amaufa'ailoga a le peresitene, e aofia ai le igoa, le tulaga - "Peresitene"- ma le malō - "o le Unaita Setete o Amerika." O le poloā'iga e fā e i totonugalemū o le tulafono a le Atua ma e aofia ai mea uma o le fa'amaufa'ailoga a le Atua: "O le Ali'i (Lona suafa) na faia (le tulaga o Lē na foafoaina) le lagi ma le lalolagi, atoa ma le sami (Lona malō)." Ua fa'asino tonu e Satani lana osofa'iga i le poloā'iga lona fā lea e vala'au iā i tatou ia manatua ma tapua'i i le Atua Lē na faia i tatou e ala i le tausiga o Lona aso pa'ia (Esoto 20:8-11; Mareko 2:28). O le poto o Satani ua na fa'atauasoina, ina ua mavae sina taimi, le to'atele o le lalolagi Kerisiano i fa'amanuiāga ma le tāua o le Sapati. E pei ona fa'aaogā e le Atua le tausiga o le Sapati e fai ma tofotofoga o le tulaga fa'amaoni mo le fanauga a Isara'elu i le vaomatua (Esoto 16:4-6), o le a 'avea fo'i ma se pito e tofotofoina ai lo tatou tulaga pe tumau le fa'amaoni i aso tau fa'ai'u.

E mafai ona e fesili, "O afea o le a maua ai le fa'ailoga o le manu fe'ai?" Ua valo'ia mai le Tusi Pa'ia o le manu fe'ai e pei o le tama'i mamoe, o le a suia i le fa'atusa o le manu fe'ai ma e tautala pei o se tarako (Fa'aaliga 13:11). Ona o le mana fa'atosina mai le matāgaluega Pope (le manu fe'ai), o le fa'atusa o le manu fe'ai (o ekalesia Porotesano o le a toe so'ofa'atasi i le fulituāga o talitonuga sesē ma le Pope), o le a tautala e pei o se tarako e ala i le 'u'una'i fa'amalosi o tagata Kerisiano uma e tausisi e faia sauniga tauletapua'iga a le manu fe'ai. O nei u'una'iga o le a fa'atinoina e ala i le fa'avaeina tulafono taulefaigālotu e fa'atonuina ai le tausiga o le Aso o le Lā (Ulua'i Aso). O le a mua'i faia lea mea e ala i mea fa'asā o fefa'ataua'iga ma i'u ai i le fa'amalosia o mea tauletino ma e o'o ai lava i le tau fa'amata'u i le fa'asalaga o le oti. I lea taimi o tagata ola uma ua tataua ona faia le filifiliga e talia le "fa'amafa'ailoga a le Atua" e ala i le usita'i i Āna poloā'iga (Fa'aaliga 14:12; 12:17) e ui ina sauāina, po o le maua o le "fa'ailoga a le manu fe'ai" e ala i le tausiga o āna talitonuga sesē (Fa'aaliga 14:7-9). O le a lē maua e se tasi le fa'ailoga o le manu fe'ai se'iloga ua tutupu nei mea uma ua tā'ua. O lo'o vala'au mai pea le Atua i Ōna tagata, ona o Lona alofa tunoa, ia ō 'ese mai Papelonia ma āna a'oa'oga sesē (Fa'aaliga 18:1-4).